

ማዛሙራ ማጻፋ ጊዶ ቆፋ

ማዛሙራ ማጻፋይ ገሻ ማጻፋ ጊዶን ይጻፍ ዋሳ ማጻፋ ጊዱዱ ኤሬቴስ። ሃ ማጻፋ ገግሲዳይቲ ኣዲሳ ዋዳታ ጊዶን ቤቲዳ ዲማ ዲማ ኣሳታ። ኢሲ ኢሲ ይጻታ ካዎ ዳዊቲ ጸፊዴስ፤ ሃ ይጻታኔ ሃ ዋሳታ ሺሺዱ ባ ጎይኒዛ ዋዴን ጎኤቲሼ ጋምኢዳይቲ ኢስራኤሌ ኣሳታ። ጉላ ዋዴፔ ጉዬ ባንታ ገሻ ማጻፋታ ጊዶን ጌልሉዳ።

ሃይታንቲ ኣያናፔ ጸፊቲዳ ገንጾታ ቆሞይ ጮራ፤ ኢስቲካ ጋላታ ጋላቲዛ ገንጾኔ ጸሳ ጎይናና ጎኢዛ ገንጾታ፤ ጸሲ ማዳና ማላ፥ ናጋና ማላኔ ሳሮን ዋፋና ማላ ዋሲዛ ዋሳታ ገንጾ፤ ናጋራፔ ማሬታናስ ሺሺዛ ዋሳ ገንጾታ፤ ጸሳ ኣንጆ ገሻስ ዮቲዛ ጋላታ ሳባታኔ ሞርኬታ ቃጸያና ማላ ጸሳስ ዮቲዛ ማጋና ገንጾታ። ሃ ዋሳቲ ኢሲ ኣሲ ባርካ ዋሲዳ ዋሳታኔ ጮራ ኣሳይ ኢሲፊ ዋሲዳ ዋሳታ። ኢስታፊ ኢሶቲ ኢሶቲ ኢሲ ኢሲ ኣሳ ዋዚናን ሲዬቲዳ ሚሾታ ቆንጨሲዛይታ። ሃራቲ ቃሴ ጸሳ ኣሳይ ኡባይ ኮይዛይሳኔ ኣስ ኡባስ ሲዬቲዛ ሃኖቴል ቤሲዛይታ።

ይሱሲ ታማርሲሽ ይጻ ማጻፋፔ ቦቺ ቦቺ ኤኪዱ ታማርሲዴስ። ኦራፋ ጫቆ ማጻፋታ ጸፊዳይቲካ ኢዛን ጸፊቲዳይሳፊ ባ ጸፊዛ ማጻፋ ጊዶ ጌልሉዳ። ዋሳ ኬፋያ ኤቆሶፊ ዶማዳ ይጻ ማጻፋ ጸሳስ ጎይኒዛ ዋዴ ጎኤቲዛ ጊታ ሚንጃ ሚሻ ማላ ኦይካዱስ።

ሃ ማጻፋይ ኦይኪዳ ኩሜሳ ቆፋ

ማዛሙራ ማጻፋይ ኢቻሽ ኪፊሌታን ሻኬቴስ፤ ዳሪዛ ባጋታ ኮይሮ ኪፊሌታኔ ናምኣንሶ ኪፊሌታ ጸፊዳይ ካዎ ዳዊቲ። ሄቫንሶ ኪፊሌዛ ጸፊዳይ ኣሳፊ ዎይኮ ቆሬ ናይታ።

ማዛሙራ 120-134 ጋካናስ ዲዛ ይጻቲ ባኣሌ ቦንቸስ ይጽቲዛ ይጻታ፤ ሃይሳፊ ካሊዱ ማጻፋዚ ኢቻሽ ኪፊሌታን ሻኬቲዳይሲ ቆንጨዴስ።

ማዛሙራ 1—41

ማዛሙራ 42—72

ማዛሙራ 73—89

ማዛሙራ 90—106

ማዛሙራ 107—150

ኮይሮ ማጻፋ

1

(ማዛ 1—41)

- 1 ኢታታ ዞሬን ቦንታይ፥
 ዋይኮ ናጋራንቻታ
 ኦጌን ኤቆንታይ፥
 ቂልጪዛይታ ሺቆን
 ኡቶንታይ ኣንጃቲዳዴ።
- 2 ሄሳ ማላ ኣሲ
 ጎዳ ዋጋን ኡፋዬቴስ፤
 ኢዛ ዋጋ ጋላሲኔ
 ቃማ ቆፔስ።
- 3 ሄሳዴይ ጎጊዛ ሃላ
 ኣቻን ቶኬቲዲ፥
 ሃይሊካ ቆኮንታ
 ዋዴን ዋዴን ኣይፌ ኣይፊዛ
 ማላ ማላ፤
 ኢዚ ኦሊዛ ኡባይ ኢዛስ ሃኔስ።
- 4 ጊዶ ኣቲን ኢታቲ
 ሄሳ ማላ ጊዴቴና፤
 ጫርኮይ ፒቲ ኤፊዛ ሱላ ማላ።
- 5 ሄሳ ጊሻስ ኢታታ ቦላ
 ጎዳይ ፒርዳና፤
 ናጋራንቻቲካ
 ጸሎታ ሺቆን ኤቂቴና።
- 6 ኣይስ ጊኮ ጎዳይ
 ጸሎታ ኦጌ ኤሬስ፤
 ጊዶ ኣቲን ኢታታ ኦጌይ
 ኢስታ ጳዮን ጋሌስ።

2

- 1 ካዋቴላቲ ኣይስ ዴንዲዞ?
 ቃሴ ካዋቴላይ
 ኣይስ ኢታ ኦላናስ ማቂቲዜ?
- 2 ሳኣ ካዋቴኔ ዳናቲ ዴንዲዳ፤
 ኢስቲ ጎዳ ቦላኔ
 ጎዳይ ቲይዳይሳ ቦላ

ዴንዳናስ ኢሲፌ ዱላቲዳ።
 3 ኢስቲ፥ «ኣኔ ኮኒ
 ኢስታ ሳንሳላታ ዱሶስ፤
 ኢስቲ ኩና ቃቺዛይሳካ
 ኬሲ ዋራ ኦሎስ» ጌቲስ።

4 ሳሎን ባ አራታ ቦላ ኡቲዳይሲ
 ኢስታ ቦላ ሚጨስ፤
 ጎዳይ ኢስታ ቂጵስ።

5 ጎዳይ ባ ሃንቆን ኢስታ ሴሬስ፤
 ባ ዋልቃማ ሃንቆን
 ኢስታ ዳጋንፊስ።

6 ጎዳይ፥ «ታኒ ታ ጌሻ ዙማ
 ጸዮኔ ቦላ ታ ካዋዛ
 ካዋላዲስ» ጌስ።

7 ሄ ካዋይ፥ «ታኒ ጎዳ
 ዋጋ አዋጃና፤
 ጎዳይ ታና፥ ሳኒ ታ ና፤
 ታኒ ኔና ሃች ዩላዲስ።

8 ኔኒ ታና ኦይቻ፤
 ታኒ ካዋቲላ ኡባ
 ኔስ አማና፤
 ሳኦ ኡባይ ኔስ ጊዳና።

9 ኔኒ ቢራታ ጉፌን
 ኢስታ ቆጶሬላና፤
 ኢስታ ኔኒ ማና ሚሺ
 ማቂዛ ማላ
 ማንፊሬላና፥ ጌስ» ጊዳስ።

10 ሄሳ ጌሻስ አንቲኖ
 ካዋቶ ኦኬኪቲ፤
 ሃ ሳኦ ሃሪዛይቶ
 አንቲ ናጌቲቲ!

11 ጎዳስ ያሻቲላን ኦሊቲ፤
 ኢዛስ ኮኮርሳን ሃሬቲቲ።

12 ጎዳይ ሃንቂቲን

ኦጌን አጎቱ ጳዮንታ ማላ
 ኢዛሰ ሱሬ ዋዚናን ጎይኒቲ፤
 ኣይሰ ጊኮ ኢዛ ሃንቆይ
 ኤሰን ኤጺ ኬዛና።
 ኢዛ ባንታሰ ዜሞፖ
 ኦሊዛይቲ ኣንጃቲዳይታ።

3

- ዳዊቲ ባ ና ኣቤሴሎሜፔ ባቃቲሼ ዬጺዳ ማዛሙራ
- 1 ጎዳዉ! ታ ሞርኬቲ
 ኣይ ከና ጮራቲዶ!
 ታ ቦላ ኣፑናቲ ዴንዲዶ!
- 2 ዳርቲ፥ «ጸሲ ኢዛ ኣሼና»
 ጊዲ ታ ቦላ ሃሳይዳ።
- 3 ጊዶ ኣቲን ጎዳዉ!
 ኔኒ ታ ዩሾን ጎንዳሌ።
 ታና ቦንቺሲዛይኔ
 ሚንፌሊዛይ ኔና።
- 4 ታኒ ታ ቃላ ቶቂሳዳ
 ጎዳኮ ዋሳና፤
 ሂሰቲኮ ኢዚ ባ ጌሻ
 ዙማ ቦላ ዲሼ
 ታ ዋሳ ሲያና።
- 5 ጎዳይ ታና ናጊዛ ጊሻሰ፥
 ታኒ ኢቻዳ ጳሰካይሲኔ
 ቤጎታይሰ።
- 6 ታኒ ታና ጊዶሊ ኡቲዳ
 ጮራ ሞርኬታሰካ ባቢኬ።
- 7 ኣቤት ጎዳዉ! ዴንዳ!
 ኣቤት ታ ጸሳዉ! ታና ኣሻ!
 ኔኒ ታ ሞርኬታ
 ኡባ ባንቁላ ሾጫ፤
 ኢታታ ኣቻካ ሜንፋ።
- 8 ማደይ ጎዳሳ፤

ጎዳው ኔ እንጆይ
ኔ ዴራ ቦላ ጊድ።

4

ዳዊት ዛማሬታ ካቦስ ኦስፑን ሻያን ዋጾቲዳ ዲላን ዩጲዳ
ማዛሙራ

¹ እቤት ታ ጲሎ ጸሳው!
ታኒ ጴይጊዛ ዋዴ
ኔ ታስ ኮያ።
ታኒ ኡንኤቲዳ ዋዴ፥
ኔኒ ታና ሼምፒሳዳሳ፤
ታስ ቃጴታዳ ታ ዋሳ ሲያ።

² ኢንቴኖ አሳቶ!
ኢንቴ አዉዴ ጋካናስ
ታ ቦንቾ ካዉሻኔ?
ኢንቴ አዉዴ ጋካናስ
ሃዳ ሚሽ ሲቃኔ?
ኢንቴ አዉዴ ጋካናስ
ዋርዶ ሚሽ ካላኔ?

³ ጎዳይ ጲሎ አሳታ
ባስ ሻኪ
ዲማ ዋላዳይሳ
ኢንቴ ኤሪቴ፤
ሄሳ ጊሻስ ታኒ ጎዳ
ጴይጊዛ ዋዴ
ኢዚ ታስ ሲዬሰ።

⁴ ሃንቄቲቴ፤ ጊዶ አቲን
ኢንቴ ሃንቆን
ናጋራ ኦፆፍቴ።
ሂጸን ኢቺ ዲዛ ዋዴ
ሲርጲ ጊዲ ኢንቴ ዋዚና ቆሪቴ።

⁵ ጎዳስ ቤሲዛ ያርሾ ያርሺቴ፤
ጎዳንካ ጸሳንካ
አማኔቲቴ።

- 6 ዳርቲ፥ «ኮና
 ሎኦ ቤሳናይ
 ኦኔ?» ጌቴሰ፤
 ኣቤት ጎዳዉ!
 ኔ ሎኦ ኣይፊሶይ
 ኑ ቦላ ፖኦ።
- 7 ካሊኔ ዋይኔ ኡሹ
 ዳር ዴሚዲ
 ሃራቲ ኡፋዬቲዛይሳፊ ኣላዳ
 ኔኒ ታ ዋዚና
 ኡፋይሳን ኩንላዳሳ።
- 8 ኣቤት ጎዳዉ!
 ኔ ጸላ ታና ሳርን ናጋ
 ኣይሲዛ ጊሻሰ
 ታኒ ኢቻዳ ሳርቴላን
 ዲሰካይሰ።

5

ዳዊቲ ዛማሬታ ካቦሰ ሱሱልኤን ዩዲዳ ማዛሙራ

- 1 ኣቤት ጎዳዉ!
 ታኒ ዮቲዛይሳ ኤዘጋ፤
 ታ ኡንኦን ዋሲዛ
 ዋሳካ ሲያ።
- 2 ታ ካዋዘ ጸሶ!
 ታ ኔና ዋሲዛ ጊሻሰ
 ታና ማዳ ጋዳ
 ታ ዋሲዛ ዋሶዛ ኔ ሲያ።
- 3 ኣቤት ጎዳዉ!
 ማላዶ ማላዶ ጉራን
 ኔኒ ታ ቃላ ሲያሳ።
 ማላዶ ማላዶ ጉራን
 ታኒ ታ ዋሳ
 ኔ ሲንሐ ሺሻዳ፥
 ኔኒ ታሰ ኢሚዛ ዛር
 ኤካና ጋዳ ናጋይሰ።
- 4 ኔኒ ኢታቴላን

- ኡፋዬቶንታ ጸሳ፤
ኢታቲ ኔናራ ዳኤቴና።
- 5 ጨቄቲዛይቲ
ኔ ሲንላን ኤቄቴና፤
ኢታ ሚሽ ኦሊዛ ኡባታ
ኔኒ ኢጸሳ።
- 6 ዋርዶ ሃሳይዛይታ
ኔኒ ጳይሳሳ።
ሱሐ ጉሲዛይታኔ
ጨሚዛ ኣሳታ
ኔኒ ሃራሴታሳ።
- 7 ጊዶ ኣቲን ታኒ ኔ ማሮ ዳሮን
ኔ ኬላ ጌላና።
ኔ ጌሻ ኬላኮ ሲማዳ
ቦንቶኒኔ ያሻቴላን
ኔሰ ጎይናና።
- 8 ኣቤት ጎዳዉ! ታ ሞርኬታፔ
ኔ ታና ኣሻ፤
ታና ኔ ጸሎቴላንካ
ካሌላ፤
ኔ ኦጌ ታ ሲንላን ሱሪሳ።
- 9 ኢሰታ ዶናፔ ኬዚዛ ቃላይ
ቱሙ ጊዳና።
ኢሰታ ዋዚናንካ ጌኔይ ኩሚዴሰ፤
ኢሰታ ዶናይ
ዶዬቲዳ ዲፎ ማላ፤
ኢሰቲ ባንታ ኢንጸርሳን
ኣሰ ጨሜቴሰ።
- 10 ኣቤት ጸሶ!
ኢሰታ ቦላ ኔኒ ፒርዳ፤
ኢሰታ ጌኔይ ኢሰታ ኤኪ ቦ።
ኢሰታ ናጋራይ ዳሮ፤
ሄሳ ጊሻሰ
ኔኒ ኢሰታ ጎዳ ዲጋ፤
ኣይሰ ጊኮ

ኢስቲ ኔ ቦላ ጌላቲዳ።

- 11 ጊዶ አቲን ኔናን ዜምፒዳ
ኡባቲ ኡፋዬቱቶ፤
ኢስቲ ሜርናሰ ኡፋይሳን ዩጾቶ።
ኔ ሱንላ ሲቂዛ
ኡባቲ ኡፋዬቱቶ፤
ኢስቲካ ኔናን ናጌቱቶ።
- 12 አቤት ጎዳዉ!
ኔኒ ጸሎታ አንጃሳ፤
ኔኒ ጎንዳሌን ካሚዛ ማላ
ኔ ኪያቲላን ኢስታ ካማሳ።

6

ዳዊቲ ዛማሬታ ካቦስ ኦስፑን ሻያን ዋጾቲዳ ዲላን ዩጸዳ
ማዛሙሬ

- 1 አቤት ጎዳዉ! ዪሎን ታና ሴርፓ፤
ዋይኮ ኔ ሃንቆን
ታና ቃጸኖፓ።
- 2 አቤት ጎዳዉ!
ታኒ ዳቡራንቻ ጊዲዳ
ጊሻሰ ታና ማራ።
አቤት ጎዳዉ!
ታ ዋዚናይ ማዲንጲዳ ጊሻሰ
ታና ፓላ።
- 3 ታ ሼምፖያ ኬሃ ኡንኤታዲስ፤
ሂስቲን ጎዳዉ!
ታና ማዳናስ
ኔኒ አዉዴ ጋካናስ ጋምኣኔ?
- 4 አቤት ጎዳዉ!
ኔኒ ሲማዳ ታና አሻ፤
ኔ ማርቴላ ዳሮን
ታና ኬሳ ኤካ።
- 5 ሃይቂዳ አሲ ኦኒኔ
ኔና ቆፔና፤

- ዱፎን ኔና ጋላቲዛይ ዳና።
 6 ታ ጨጭን ጸላ ዳቡራዲስ፤
 ኦማርስ ኦማርስ ታኒ ዩካሼ
 ታ ሂጸ ጫጲሳይስ፤
 ታ ቦርኮላካ
 ታ ኣፋንላን ሙሲሳይስ።
 7 ታ ኣይፌቲ
 ዳሮ ኣፋንጲዳ ጊሻስ ዳቡርዳ፤
 ታ ሞርኬታ ኡባ ጋሶንካ
 ዴሞ ኢጲዳ።
 8 ጎዳይ ታኒ ዩኪዛ ዩሆ
 ሲዪዳ ጊሻስ፤
 ኢንቴኖ ኢታ ኦሴዛ ኡባቶ!
 ታፔ ሃኪቴ።
 9 ጎዳይ ታ ሾቤላ ቤኢዴስ፤
 ታ ዋሳካ ሲዪዴስ።
 10 ታ ሞርኬ ኡባቲ
 ዩላታናኔ ዳጋማና፤
 ቆፖንታ ካወዪዲ ጉዬ ሲማና።

7

በኒያማ ዛሬ ኩዜ ጋሶን ዳዊቲ ጎዳኮ ዚላሊዳ ዚላስ

- 1 ኣቤት ጎዳዉ!
 ታ ጸሳዉ ኔኒ ታስ ቆቴቲዛሶ፤
 ታና ጎዲዛ ኡባፌ
 ኔኒ ታና ኣሻ።
 2 ኔኒ ታና ኣሾንታ ኣጊኮ፥
 ኢስቲ ታና ጋሞ ማላ
 ማንሴሬሲዳ፥
 ኦኒኔ ኣሾንታሶን
 ፑዜሬላና።
 3-4 ኣቤት ጎዳዉ ታ ጸሳዉ!
 ታኒ ኣስ ቆሂዳ ጊዲኮ፥
 ታስ ሎኦ ኦሴዳዴስ

ኢታ ዛሪዳ ገዲኮ፥
 ዋይኮ ጋሶይካ ባይንዳ
 ታ ሞርኬፌ ቦንቂዳ ገዲኮ፥
 ሄይታ ማላ ዮኦታፔ ኢሲኖካ
 ታኒ ኦሊዳ ገዲኮ፥
 5 ታ ሞርኬይ ታና ጎዲ ኦይኮ፤
 ታና ሳኦንካ ዬጄሬላ፤
 ታና ቢታን ዬገዲ
 ታ ቦንቾ ካዉሾ።

6 ኣቤት ጎዳዉ!
 ኔ ሃንቆን ዴንዳ ኤቃ፤
 ኤጺዛ ታ ሞርኬታ
 ሃንቆ ቦላ ዴንዳ፤
 ታ ጸሳዉ ቤጋ፤
 ቱሙ ፒርዳ ፒርዳ።

7 ዴሬታ ዲላታይ
 ኔ ዩሾዛን ሺቆ፤
 ኔኒ ኢስታ ቦላ ካዋታ።

8 ጎዳይ ካዋቱታ ቦላ ፒርዴስ።
 ኣቤት ጎዳዉ!
 ታስ ታ ጲሎቴላ ማላኔ
 ታ ሱሬቴላ ማላ ፒርዳ።

9 ቆፋኔ ዋዚና ፒልጋ ኤሪዛ
 ጲሎ ጸሳዉ!
 ኢታታ ጌኔዛ ኔኒ ጳይሳ፤
 ገዶ ኣቲን ጲሎታ ሳሮን ናጋ።

10 ጸሲ ታስ ጎንዳሌ፤
 ዋዚና ጲሎታ

ኢዚ ኣሺዛ ጸሳ።
 11 ጸሳይ ጲሎ ፒርዲዛ ጸሳ፤
 ኢዚ ጋላስ ጋላስ
 ባ ሃንቆ ቆንጨሲዛ ጸሳ።

12 ኣሲ ባ ናጋራ ፓጺዲ
 ሲሞንታ ኣገኮ፥
 ጸሲ ባ ማሻ ሌፌስ፤

- ኢዚ ባ ዋንዳፌዛ
ዳፊ ኦይኬስ።
- 13 ኢዚ ዋዲዛ ኦላ
ሚሻታ ጊጊሴስ፤
ታማ ላጮ ማላ
ፖፖልኡ ጊዛ
ባ ቶራ ዪሻ ጊጊሴስ።
- 14 ኢታቴላ ሻሪዲ፥
ጌኔ ቃንፋቲዳይ ዋርዶ ዩሌስ።
- 15 ሃራ አሳታስ ኦላ ቦኪዳ ኣሲ
ባ ቦኪዳ ኦላን
ሲሚ ኩንዴስ።
- 16 ኢዚ ኤሂዛ ጌኔይ
ኢዛ ሁኤስ ሲሜስ፤
ኢዛ ማካላይካ ሲሚዲ
ኢዛስ ጊዴስ።
- 17 ጎዳ ጸሎቴላ ጊሻስ
ታኒ ኢዛ ጋላታና፤
ቃሴ ኡባፌ ቶቃ
ጎዳ ሱንፋስ
ታኒ ጋላታ ማዛሙራ ዩጸና።

8

ዳዊቲ ዛማሬታ ካቦስ ሱሱልኤን ዩዲዳ ማዛሙራ

- 1 ኣቤት ጎዳዉ!
ኑ ጎዳዉ ኔ ሱንሒ
ቢታ ኡባን ኬሂ
ቦንቹቲዴስ፤
ኔኒ ኔ ቦንቾ
ሳሎታፔ ቦላን
ቶቁ ቶቁ ሂስታ
ዋላዳሳ።
- 2 ኔኒ ኔ ሞርኬታ ጊሻስ
ኔ ባልጋራኔ
ኔ ቦላ ማንዲዛይሳ
ሲርጺ ኦላናዉ
ጉላ ናይታ ዶናኒኔ

ቋሚዛ ናይታ ዶናን
ጋላታ ኩንላዳሳ።

3 ኔኒ ኔ ኩሼን ሜዲዳ ሳሎታ፥
ሶሆን ሶሆን ኔኒ
ዎሊዳ ኣገናኔ

ጸሊንቴታ ታኒ ቤኢዛ ዎዴ፥
4 ኔኒ ኣሳሰ ቆፓናዉ ኣሲ ኣዜ?
ዎይኮ ኔኒ ኣሳ ናሰ
ዉዴታናዉ ኢዚ ኣዜ?

5 ኢዛ ኔኒ ኪታንቻታፔ *
ጉላራ ዚቁሳዳሳ፤
ቦንቾኔ ጌታቴላ
ካላቻ
ኢዛ ሁኡን ጎጲሳዳሳ።

6 ኢዛ ኔኒ ኔ ሜዲዳ
ሜዴቴላ ኡባ ቦላን
ሃሪዛዴ ኦላዳ
ሱንላዳሳ፤
ኡባካ ኢዛሰ ሃሪሳዳሳ።

7 ዶርሳታኔ ሚዛታ፥
ዶኣ ኡባ፥
8 ሳሎ ካፎታ፥ ኣባ ሞሌታኔ
ኣባ ጊደን ዲዛ ሜዴታ ኡባካ
ኢዛሰ ሃሪሳዳሳ።

9 ኣቤት ኑ ጎዳ ጸሳዉ!
ኔ ሱንሊ ቢታ ኡባ ቦላ
ኬሂ ቦንቾቴዴሰ።

9

ና ሃይቆ ጊጊሶ ጌቴቴዛ ዩላን ዳዊቲ ዛማሬታ ካቦስ ዩጲዳ
ማዛሙሬ

8:2 ማቶ 21:16 8:4 ኢዮ 7:17-18፤ ማዛ 144:3፤ ኢብ 2:6-8 * 8:5
ኪታንቻታፔ ጊዛይሳ ኢሲ ኢሲ ጌሻ ማጻፋቲ ጸሳፌ ጌቴሰ። 8:6 1ቆሮ 15:27፤
ኤፌ 1:22፤ ኢብ 2:8

- 1 አቤት ጎዳዉ!
 ታኒ ኔና ኩሜላ
 ዋዚናፔ ጋላታና፤
 ማላሊሲዛ ኔ ኦሶዛ
 ኡባካ ታ ዮታና።
- 2 ታኒ ኔናን ኡፋዬታናኔ
 ሃሹ ጋና።
 ኡባፌ ቋቃ ጸሳዉ!
 ታኒ ኔ ሱንሳሰ
 ጋላታ ማዛሙሬ ዬጸና።
- 3 ኔ ቆንጨዛ ዋዴ
 ታ ሞርኬቲ ጉዬ ሲማና፤
 ኔ ሲንሳፌካ
 ቋዴቲ ቋያና።
- 4 ኔኒ ታሰ ጸሎ ፒርዳ ፒርዳዳሳ፤
 ኔኒ ጸሎቴላን ፒርዳሼ
 ኔ ካዋቴላ አራታን ኡታዳሳ።
- 5 ኔኒ ካዋቴላታ ሴራዳሳ፤
 ኢታታካ ቋይሳዳሳ፤
 ኔኒ ኢሰታ ሱንሳ
 ሜሪ ሜርናሰካ ቁጫ ዲጋዳሳ።
- 6 ሞርኬቲ ሜሪ ሜርናሰ ቋይዳ፤
 ኢሰታ ካታማታካ
 ሙሌራ ቋቃላ ቋይሳዳሳ፤
 ኢሰቲ ሙሌራ ዶጌቲ አቲዳ።
- 7 ጊዶ አቲን ጎዳይ
 ሜርናሰ ካዋቴዲ ዴሰ፤
 ኢዚ ፒርዳናሰ
 ባ አራታ ገግሲዴሰ።
- 8 ኢዚ ሃ አላሜዛ
 ጸሎቴላን ፒርዳና፤
 ካዋቴላታ ቦላካ
 ቱማቴላን ፒርዳና።
- 9 ጎዳይ ኡንኤቲዳይታሰ
 ባቃቲ አቲዛሶ፤
 ሜቶ ዋዴታንካ
 ቆቴቲ አቲዛሶ።

- 10 ኔ ሱንላ ኤሪዛይቲ
 ኔናን አማኔቴቴሰ፤
 አይሰ ጊኮ ጎዳዉ!
 ኔኒ ኔና ኮይዛይታ
 ዩጋ አጋቤካ።
- 11 ጸዮኔን ካዎቲ ኡቲዳ ጎዳሰ
 ጋላታ ማዛሙሬ ዩጸቴ፤
 ኢዚ ኦሊዳ ኦሶ
 ዴሬ ኡባሰ ቆንጩን ዮቲቴ።
- 12 አይሰ ጊኮ ሱሐ ጉሲዛይታሰ
 ሃሎ ኬሲዛ ጸሲ
 ናቄቲዳይታ ዋሶዛ
 ኢዚ ዶጌና።
- 13 አቤት ጎዳዉ!
 ታ ሞርኬቲ
 ታና ዩዴሊዛይሳ ቤኣ።
 ኔኒ ታሰ ቃጼታዳ
 ሃይቆፔ ታና አሻ።
- 14 ሄሲካ ታኒ ጸዮኔ አሳ ካሬን
 ኤቃዳ ኔና ጋላታናሲኔ
 ኔ አሺዳይሳን
 ኬሃ ኡፋይታናሳ።
- 15 ካዎቴላይ ባ ቦኪዳ
 ኦላን ኩንዲዴሰ።
 ኢሰቲ ቆቲ ዋሊዳ ዎጸማዴይ
 ኢሰታ ቶሆ ኦይኪዴሰ።
- 16 ጎዳይ ባ ጸሎ ፒርዳን ኤሬቲዴሰ፤
 ኢታ አሲ ባ ኩሺን ኦሊዳ
 ኦሶ ዎጸማዴን ኦይኬቲዴሰ።
- 17 ኢታቲ ሲኦሌን ጌላና፤
 ጸሳ ዶጊዛ ካዎቴላይ
 ኡባይካ ኢሰታ ማላ ሃናና።
- 18 ሂዬሳቲ አይዴካ
 ዶጌቲ አቴቴና፤
 ዎይኮ ማንቆታ ሂዶታይ
 ጮ ሜርናሰ ጳዩና።

- 19 አቤት ጎዳዉ!
 ካዎቴላቲ ባ ዎልቃን ደንዲዲ
 ኔ ቦላ ጨቄቶንታ ማላ
 ኔኒ ኢስታ ቦላ ፒርዳ።
- 20 አቤት ጎዳዉ!
 ኔ ኢስታ ዳጋንላ፤
 ኢስቲ አስ ጊዲዳይሳ
 ኔኒ ኢስታ ኤሪሳ።

10

- 1 አቤት ጎዳዉ!
 ኔ አይስ ሃካዳ ኤቃይ?
 ሜቶ ዎዴንካ አይስ ጌማይ?
- 2 ኢታ አሳቲ ኦቶሬቴቲስ፤
 ሂዬሳታካ ዬዴፊቲስ፤
 ኢስቲ ሃራስ ዎሊዳ ዎጺማዴን
 ዛሪ ኦይኬቴቶ።
- 3 ኢታ አሲ ባ ዎዚና
 አሞን ጨቄቴስ፤
 ዮራይ ጎዳ ጫዬሲኔ
 ካዴስ።
- 4 ኢታ አሲ ኦቶሬቴላን
 ጾሳ ኮዬና፤
 ኢዛ ቆፋ ኡባን ጾሲ ዴና።
- 5 ኡባ ሚሺ ኢዛስ ኩሚስ፤
 ኔ ዎጋይ ኢዛስ ጌሌና፤
 ኦቶራንቻይ
 ኔ ዎጋፔ ሃኬስ፤
 ሄሳ ጊሻስ
 ባ ሞርኬታ ቦላን
 ኢዚ ቁልጩስ።
- 6 ባ ዎዚናን ኢዚ፥
 «ታና አይኮይካ ቃሌና፤
 ታና ሙሌካ ሜቶይ ጋኬና»
 ጊዲ ቆፔስ።
- 7 ኢዛ ዶናን ቃንጌሊ፥
 ዎርዶይኔ ማንዴይ ኩሚዴስ፤

- ኢዛ ኢንጻርሳን ጌኔይኔ
 ባሌላይ ዴሰ።
 8 ዴሬ ጊዶን ጌማሶን ዙጊ ኡቴሰ፤
 ማዶይ ባይንዳይታ
 ቆይሳናሰ ናጌቴሰ፤
 ጸሎ አሳታ ጌማን ዋዴሰ።
 9 ባ ቆቴቲዛሶን ጌሚዲ፥
 ሂዬሳ ኦይካናዉ
 ጋሞ ማላ ዙጌሰ፤
 ማዶይ ባይንዳይታ ባ ዋዲማዴን
 ኦይኪዲ ጎቺ ኤፌሰ።
 10 ማዶይ ባይንዳይኔ
 ሂዬሳይ ኢዛ ኩሼን ኩንዴሰ፤
 ኢዚካ ኢሰታ
 ኒፒ ሂሰቲ ማንጮሬሌሰ።
 11 ኢታ አሲ ባ ዋዚናን፥
 «ጸሲ ታና ደጊዴሰ፤
 ባ ሲንፋ ታፔ ጌንፊዴሰ፤
 ሙሌካ ኢዚ ታና ቤኤና» ጌሰ።
 12 አቤት ጎዳዉ! ዴንዳ።
 ጸሶ! ኔ ኩሼዛ
 ቶቁ ሂሰታ ዴንፋ፤
 ማዶይ ባይንዳ
 ማቶታንቻታ ደጎፓ።
 13 ኢታ አሲ ጸሳ አይሰ ካጺዜ?
 ባ ዋዚናንካ፥
 «ጸሲ ታና ቃጸዬና»
 አይሰ ጊዜ?
 14 ጊዶ አቲን ጸሶ!
 ኔኒ ማቶዛኔ
 ዋዬዛካ ቤያሳ፤
 ኔኒ ኡባ ዋዴ
 ማዳናሰ ጊጋ ኡታዳሳ፤
 ኔኒ ዪኦታ ማዳሳ፤
 ማዶይ ባይንዳይቲካ
 ባና ኔሰ ሼዴቴሰ።

15 ጌኔ አሳታ ዋልቃ መንሳ፤
 ኢታ አሳታ ዋልቃካ ሊቁሳ፤
 ኢሰቲ ናምእንሶ
 ኢታ አሳንታ ማላ
 ኢሰታ ኮሶ ማላ ኢሰታ ቃጸያ።

16 ጎዳይ መሪፔ መርናሰ
 ካዋቲዲ ዴሰ፤
 ሃራ ካዋቲላቲ
 ኢዛ ቢታፌ ቆያና።

17 አቤት ጎዳዉ!
 ኔኒ ሂዬሳታ አሞ ኤራሳ፤
 ኢሰታ ዋሳካ ሲያዳ
 መንገፍላሳ።

18 ኦኒካ ኢሰታ ያሺሶንታ ማላ
 ማዶይ ባይንዳይታሲኔ
 ዪኦታሰ ኔ ፒርዳ።

11

ዳዊቲ ዛማሬታ ካቦስ ዬጲዳ ማዛሙሬ

1 ጎዳይ ታኒ ባቃታ አቲዛሶ፤
 ሂሰቲን ኢንቴ ታና አይሰ፤
 «ኔኒ ካፎ ማላ
 ፑዴ ዙማ ቦላ ባቃታ» ጌቲ?

2 ናጋራንቻቲ ዋዚና ጌሻታ
 ቆማን ጫዳናሰ
 ባንታ ዋንዳፌ
 ዳፊ ኮይኪዳ።

3 ዮቻ ሹቺ * ዋዲዛ ዋዴ፥
 ደሊሮይ አይ ኦላናዉ
 ዳንዳይዜ?

4 ጎዳይ ባ ጌሻ
 ኬላን ዴሰ፤
 ሳሎን ባ አራታን ኡቲዲ

* 11:3 ዮቻ ሹቺ፡ ዮቻ ሹቺ ገዛይሳ ኢሲ ኢሲ ባጋ ጋሞሶ ቃላን ማጋላ ሹቺ፡ ሃራቲ ቃሴ ባሳ ጊሺን ሄሲካ አማራሶ ቃላራ ማሳራቱ ጌቲቲሰ።

- እሳ በኤሰ፤
 ኢዛ ኣይፌቲ
 እሳ ፒልጊ ዴሌቴስ።
- 5 ጎዳይ ዲሎታኔ
 ናጋራንቻታ ፒልጊ ዴሌስ።
 ጊዶ እቲን ጌላቴሊኔ
 ማካላቴሰ ሰቁዛይታ
 ኢዚ ኬሂፔ ኢዴስ።
- 6 ጎዳይ ኢታታ ቦላ
 ኤዲዛ ታማ ቦንቆኔ
 ዲኔ ታማ ቡኪሳና።
 ቆይሲዛ ጎቴ ጫርኮን
 ኢስታ ቃጸያና።
- 7 ጎዳይ ዲሎ ጊዲዳ ጊሻሰ
 ዲሎቴሳ ኦሶ ዶሴስ።
 ሱሬ ኣሳቲ ኢዛ ሲንሰ በያና።

12

ዳዊቲ ዛማሬታ ካቦስ ኦስፑን ሻያን ዋጾቲዳ ዲላን ዩዲዳ
 ማዛሙራ

- 1 ጎዳዉ! ሎኦ ኣሲ ቢታ ቦላፌ ዉሪዳ ጊሻሰ
 ኔ ታና ማዳርኪ፤
 ዴራ ጊዶን ኣማኔቲዛ
 ኣሲ ዴና።
- 2 ኢሶይ ኢሳስ ዋርዶ ሃሳዬስ፤
 ኢሶይ ኢሳ ዶናን ጨሜቴስ፤
- 3 ኣቤት ጎዳዉ!
 ባሌላዛ ዶና ጎርዳ፤
 ኦቶሮን ሃሳይዛ
 ኢንጸርሳታ ቃንጸ፤
- 4 ኢስቲ፥ «ኦኒ ኑ ኢንጸርሳን ጸናና፤
 ኑ ዶናይ ኦሳ፤
 ኦስ ጎዳይ ኦኔ?» ጌቴስ።
- 5 ጎዳይ፥ «ሂዬሳቲ ኡንኤቲዳ
 ጊሻሲኔ

ሜቶታንቻታ ዋሶ ገሻሰ
 ሃኢ ታኒ ዴንዳና፤
 ታኒ ኢሰቲ አሞቲዛ ሳሮቴላን
 ኢሰታ ዋላና» ጌሰ።

6 ጎዳ ቃላይ ኢዛን
 ዋላካይ ባይንዳ ሙሩታ፤
 ጮጮ ታማን ላፑንቶ
 ፓጮቲ ጌዱዳ ቢራ ማላ።

7 አቤት ጎዳዉ!
 ኔኒ ኑና ሳሮቴላን ናጋ፤
 ሃ ዋዴን ዲዛ ኢታ ዩሌታፔ
 ሜርናሰ ኔ ኑና አሻ።

8 አሳ ገደን ኢታይ
 ቦንቹቲዳ ዋዴ
 ጌላቲ ኡባ ዋዴ
 ኦቶሬቴላን ሲሜሬቴቴሰ።

13

ዳዊቲ ዛማሬታ ካቦሰ ዩዲዳ ማዛሙራ

1 አቤት ጎዳዉ!
 አዉዴ ጋካናሰ
 ኔኒ ታና ዶጋኔ?
 ኔ ታና ሜርናሰ ባላኔ?
 አዉዴ ጋካናሰ
 ኔኒ ታፔ ጌማኔ?

2 አዉዴ ጋካናሰ
 ታኒ ታ ቆፋራ ባጾታኔ?
 አዉዴ ጋካናሰ ታ ዋዚናይ
 ጨጫሼ ዳኔ?
 ታ ሞርኬቲ ታ ቦላ
 አዉዴ ጋካናሰ ጎባኔ?

3 ታ ጎዳዉ!
 ሃ ታኮ ጸላዳ
 ታሰ ዛር አማ፤
 ታ አይፌ ፖኢሳዳ፥
 ሃይቆፔ ታና አሻ።

4 «ኮኒ ኢዛ ጸኒደሰ» ጊዲ፥
 ታ ሞርኬቲ ጨቄቶንታ ማለ
 ኔ ኢሰታ ቱቃ።
 ታ ኩንዴላን
 ኢሰቲ ኡፋዬቶንታ ማለ
 ኔ ኢሰታ ዲጋ።

5 ጊደ ኣቲን ኔ ማርቴላ
 ዳርን ታኒ ኣማኔታይሰ፤
 ኔኒ ታና ኣሺዛ ጊሻሰ
 ታኒ ኡፋዬታይሰ።

6 ጎዳዉ! ኔ ከያቲላ
 ታሰ ዳሪዳ ጊሻሰ
 ታኒ ኔሰ ዩጻና።

14

ዳዊቲ ዛማሬታ ካቦስ ዩጲዳ ማዛሙራ

1 ኤያቲ ባንታ ዋዚናን፥
 «ጸሲ ባዋ» ጌቲሰ፤
 ኢሰታ ዴኦይ ሞሬቲዴሰ፤
 ኢሰቲ ሃራሲዛ ሚሽ ኦፊቲሰ፤
 ኢሰታ ጊዶን ሎኦ ኦፊዛ
 ኢሲ ኣሲካ ዴና።

2 ጸሳ ኮይዛይኔ ኣኬኪዛይ
 ዴኢዛኮ ቤኣናሰ፥
 ጎዳይ ሳሎፔ ዱጌ
 ኣሳ ጸሌሰ።

3 ጊደ ኣቲን ኡባይካ
 ኦጌፔ ካሬ ኬኢዳ፤
 ኡባይካ ሙሌራ ጎኦንታዝ ጊዲዳ፤
 ሎኦ ኦፊዛይ ኦኒኔ ዴና፤
 ሃራይ ኣቶ ኢሳዴይካ ዴና።

4 ጎዳይ፥ «ታ ኣሳ ቦንቂ
 ሚዛ ኢታ ኣሳቲ
 ኣይኮካ ኤሬቲኔ?» ጌሰ።

- 5 ጊደ ኣቲን ጸሲ ጸሎ ኣሳታራ
ዴኢዛ ጊሻሰ
ኢታ ኣሳቲ ሄሳን ዳጋማና።
- 6 ኢንቴ ሂዬሳታ ሃልቾ ላሌታ፤
ጊደ ኣቲን ጎዳይ
ሂዬሳቲ ባቃቲ ኣቲዛሶ ጊዴሰ።
- 7 ኢሰራኤሌሰ ኣቶቴሉ
ጸዮኔፔ ዩዳኮ!
ጎዳይ ኢሰታ ዱሳ ዛሪዛ ዎዴ
ያቆቤ ዜሬላቲ ኡፋዬታና፤
ኢሰራኤሌ ኣሳይ
ኡፋይሳን ጋላታና።

15

ዳዊቲ ማዛሙራ

- 1 ኣቤት ጎዳዉ!
ኔ ዱንካኔዛን
ጋሞኣናይ ኦኔ?
ኔ ጌሻ ዙማ ቦላ
ኔናራ ዴኣናይ ኦኔ?
- 2 ሱሬ ዴኦ ዴኢዛይ፥
ጸሎ ኦሲዛይ፥
ባ ዎዚናፔ ቱማ ሃሳይዛይ፥
- 3 ኣሰ ጨሞንታይ፥
ባ ላጌ ቦላ ኢታ ኦፋንታይ፥
ባ ሾሮ ዚጊሮንታይ፥
- 4 ኢታ ኣሳታ ካዲዛይ፥
ጊደ ኣቲን
ጎዳሰ ያዩዛይታ
ቦንቺዛይ፥
ኣይ ዴዲኮካ
ባ ጫቂዳ ቃላ ፖሊዛይ፥
- 5 ባ ሚሻ ዴቻሰ ታልኦንታይ፥
ጸሎ ኣሰ ቆሃናሰ
ማታኤ ኤኮንታይ፥

ሃ ዮኦታ ፖሊዛዴይ
ሜርናሰካ ሂርጌና።

16

ዳዊቱ ዋሳ

1 አቤት ጎዳዉ!

ታ ባቃታ አቲዛሶይ ኔና፤
ኔ ከኦን ታና ቆታ።

2 ታኒ ጎዳሰ፥ «ኔኒ ታ ጎዳ፤

ኔፔ አቲን ሃራ ሎኦይ
ታሰ ዴና» ጋዲሰ።

3 ሳኦን ዴኢዛ ጌሻቲ

አይ ማላ ቦንቼቲዳይቲ!
ታኒ ኢሰታን ኡፋዬታይሰ።

4 ዋርዶ ጸሳታ ካሊዛይቲ

ባንታ ቦላ ሜቶ ዳርሴቴሰ።
ጌዶ አቲን
ታኒ ኤቃ ጸሳታሰ ሹኪኬ፤
ኢሰታሰ ሰንፋካ ጾይጌኬ።

5 ጎዳዉ! ታሰ ላታ ጸንጾይኔ

ቃዳይ ኔና፤

6 ኔ ታሰ ዋዲዳ ዛዋይ

ሎኦ ጌዲዴሰ፤
ኬሂፔ ሎኦ ጸንጾይ
ታና ጋኪዴሰ።

7 ታና ዞሪዛ ጎዳ ጋላታይሰ፤

ኦማርሰ ታ ዋዚናይ
ታና ታማርሴሰ።

8 ታኒ ኡባቶ ጎዳ ሲንፋሳይሰ፤

ኢዚ ታ ኡሻቻን ዲዛ ጌሻሰ
ታኒ ኮኮሪኬ።

9 ሄሳ ጌሻሰ

ታ ዋዚናይ ኡፋዬቴሰ፤
ታ ሼምፖይካ ዋፑ ጌሰ፤
ታ አሳቴላይካ ሂርጋይ ባይንዳ

- 10 ኔ ታና ሲኦሌን ኣጋካ፤
 ኔ ጌሻዛ
 ዋቃና ማላ ኣጋካ።
 11 ኔኒ ታና ዳኦ ኦጌ ቤሳሳ፤
 ኔ ማታን ኩሜላ ኡፋይሲ፥
 ኔሰ ኡሻቻን
 ሜርና ኡፋይሲ ዳሰ።

17

- ዳዊቲ ዋሳ
 1 ኣቤት ጎዳዉ!
 ታ ዲሎቴላን ማጋኒዛ
 ማጋና ሲያ፤
 ታ ዋሶዛ ኤዝጋ፤
 ጨሞይ ባይንዳ ዋሲዛ ዋሳሰ
 ዛሮ ኣማ።
 2 ታሰ ዲሎቴላ ኔፔ ዮ፤
 ቱማ ኔ ኣይፌይ ዶሎ።
 3 ኔኒ ቃማን ታና ጸሞሳዳሳ፤
 ታ ዋዚና ፓጫዳሳ፤
 ኔ ፓጪዳ ጌዲኮካ
 ታ ቦላ ኣይኮካ ዳማቤካ።
 ታ ኢንጻርሳይ ኢታ ሃሳይቤና።
 4 ታኒ ሃራ ኣሳ ማላ
 ኢታ ቃላ ሃሳይኬ፤
 ታኒ ኔ ኣዛዞ ናጊዛ ጊሻሰ
 ጌኔ ኦጌ ካላቤኬ።
 5 ታ ቶሆቲ ኔ ኦጌፔ
 ሃንዳሪሾንታ ማላ
 ታ ታንጎይ ኔ ኦጌፔ
 ካሬ ኬዚቤና።
 6 ኣቤት ጸሳዉ! ታኒ ዋሲን
 ኔኒ ሲዩዛ ጊሻሰ

- ታኒ ኔና ዋሳይሰ፤
 ኔ ሃይላ ታኮ ዛራዳ፥
 ታኒ ኔሰ ዮቲዛይሳ ሲያ።
 7 ባንታ ሞርኬታፔ ባቃቲዛይታ
 ኔ ኡሻቻ ኩሼዛን
 ቆታዳ ኣሺዛይሶ!
 ኔ ኪያቲላ ማላሊሲዛ
 ኦጌራ ቆንጨሳ።
 8 ኔ ኣይፌ ጨር ማላ ታና ናጋ፤
 ኔ ቂፌታ ጊዶን ታና ቆታ።
 9 ኡንኤሊዛ ኢታታፔኔ
 ዶዲ ኡቲዳ ዋልቃማ
 ሞርኬታ ኩሼፔ
 ኔ ታና ኣሻ።
 10 ኢሰታሰ ቃጴቲዛ ዋዚናይ ባዋ፤
 ኦቶር ሃሳያ ሃሳዬቲሰ።
 11 ታኒ ቢዛሶ ኡባን
 ኢሰቲ ታና ዶዴቲሰ፤
 ታና ዱጌ ቢታን ኩንዲሰ
 ዬጋናሰ ዳሬቄቲሰ።
 12 ኢሰቲ ባንታሰ ሚዛ ሚሽ
 ኮይዛ ጋሞ ማላ፤
 ዋይኮ ጌማን ዛማዲ ናጊዛ
 ዋዳላ ጋሞ ማላ።
 13 ኣቤት ጎዳዉ! ዴንዳ።
 ታ ሞርኬታራ ኤቂታዳ
 ኢሰታ ሾጫ፤
 ኔ ማሻን ኢታታፔ
 ታና ኣሻ።
 14 ኣቤት ጎዳዉ!
 ሄሳ ማላ ኣሳታፔ
 ታና ቆታ፤
 ኢሰታ ቃዳይ ሃ ሳኣ ዴኦ
 ጸላ ጊዲዛ ኣሳፔ
 ኔ ኩሼን ታና ኣሻ፤
 ኔ ማዘጋባን ሚንጂዳ ቂጻቲፔ
 ኢሰታ ካልሳ፤

ኢስታ ናይታስ ዳሪዲ ቲርፖ፤
 ኢስታ ናይታ ናይታስካ
 ጊዲ ፓላሆ።

- 15 ጊደ ኣቲን ታኒ ጸሎቴላን
 ኔ ሲንላ ቤያና፤
 ታኒ ቤጊዛ ዋዴ
 ኔ ቦንቾ ቤኣዳ ኣላና።

18

ጎዳይ ሳኦሌ ኩሼፔኔ ኢዛ ሞርኬታ ኡባ ኩሼፔ ኣሺዳ ዋዴ
 ጎዳ ኣይሌ ዳዊቲ ዛማሬታ ካቦስ ጎዳ ጊሻስ ዩዲዳ ማዛሙራ
 (2ሳሜ 22:1-51)

- 1 ኣቤት ጎዳዉ!
 ኔ ታስ ዋልቃ ኢሚዳ ጊሻስ
 ታ ኔና ሲቃይስ።
- 2 ጎዳይ ታስ ዛላ፤
 ታኒ ኦላፔ ናጌቲዛ ሚጻ፤
 ኢዚ ታና ኣሺዛይሳ፤
 ታ ጸሳይ ታኒ ኢዛን
 ጌሜታ ኣቲዛ ዋጋ ዛላ።
 ኢዚ ታስ ጎንዳሌ፤
 ኢዚ ታና ኣሺዛ ካጩ፤
 ታስ ኢዚ ሚኖ ዜምፖ።
- 3 ጋላታይ ቤሲዛ ጎዳ
 ታኒ ጴይጋይስ፤
 ኢዚ ታ ሞርኬታፔ ታና ኣሼስ።
- 4 ሃይቆ ዋዶሮይ ታና ጩሊዴስ፤
 ጴይሲዛ ዲኦይ ታና ሚቲዴስ።
- 5 ዱፎ ዋዶሮይ ታና ቃቺዴስ፤
 ሃይቆ ዋጺማዴይ
 ታ ሲንላን ዋጼቲዴስ።
- 6 ታና ሜቶይ ኡንኢን
 ጎዳ ጴይጋዲስ፤
 «ታና ማዳ» ጋዳ
 ታ ጸሳስ ዋሳዲስ፤

ኢዚ ባ ከላን ዲሼ
 ታ ጩንጉርሳ ሲደደስ፤
 ታኒ ዋሲዳ ዋሶይ
 ኢዛ ሃይላን ዋዲደስ።

7 ጸሲ ሃንቄቲዳ ጊሻስ
 ቢታይ ቃጺደስ፤
 ዙማታ ጸጾይ ኮኮሪደስ።

8 ኢዛ ሲዴፔ
 ሃንቆ ጩዋይ ጩዋቲደስ፤
 ኢዛ ደናፔ
 ሚዛ ታማ ላጮይ ከዚደስ፤
 ኢዛ ደናፔ
 ጹጊዛ ቦንቆይ ፑልቲደስ።

9 ሳሎ ጳልቂዲ ዋዲደስ፤
 ሄ ዋዴ ኢዛ ቶሆ ጋርሳራ
 ዲፒ ጊዳ ሻራይ ደስ።

10 ከሩቤን ኡቲዲ ፓሊደስ፤
 ጫርኮ ቄፌ ኤኪዲ
 ፑዴ ደንዲ ቢደስ።

11 ባና ዳማን ካሚደስ፤
 ኢዛ ዲንካኔዛ ዲፒ ጊዳ
 ኢራራ ሻራይ ደዲደስ።

12 ኢዛ ሲንላን ዴኢዛ
 ጊታ ፖኦዛፔ ሻቺኔ
 ዋልቃንሉ ከኢደስ፤
 ዲፒ ጊዳ ሻራካ
 ካንሉ ከኢደስ።

13 ጎዳይ ዳዳ ማላ
 ሳሎፔ ጉሚደስ፤
 ኡባፌ ቶቃ ጸሳይ
 ባ ጩንጉርሳ ሲሲደስ፤
 ዋልቃንላኒኔ
 ታማ ላጮን ቆንጨደስ።

14 ባ ዋንዳፌዛ ዪሻ ዬዲደስ፤
 ባ ሞርኬታካ ላሊደስ፤
 ዋልቃንላ ፖኦ ከቲዲ
 ኢስታ ዬዴሉደስ።

15 አቤት ጎዳዉ!
 ኔኒ ሴሪዳ ዋዴኔ
 ኔ ሃንቆይ ኤጲዳ ዋዴ፥
 ጌታ አባቲ
 ኢቺዳ ቢታይ ቤቲዴስ፤
 ቃሴ ሳኣ ዮቻይ ቆንጨዴስ።

16 ጎዳይ ቦላፌ ባ ኩሼዛ
 ዴጌ ዬዲዲ ታና ኦይኪዴስ፤
 ጨማ ሃላፌ ታና ኬሲዴስ።

17 ኢዚ ታ ቦላ ዋልቃቲዛ
 ታ ሞርኬታፔ፥
 ታና ኢጲዛይታፔ አሺዴስ።

18 ታና ሜቶይ ኡንኢዳ ጋላስ
 ኢስቲ ታ ቦላ ዴንዲዳ፤
 ጌዶ አቲን ጎዳይ
 ታስ ዜምፖ ጌዲዴስ።

19 ኢዚ ታና አሆ ዴምባን ኬሲዴስ፤
 ታናን ኡፋዬቲዳ ጊሻስ
 ታና አሺዴስ።

20 ታ ጲሎቴላ ማላ
 ጎዳይ ታስ ቃንጲዴስ፤
 ታ ኩሼ ጌሻቴላ ማላ
 ኢዚ ታስ ዛሪዴስ።

21 ታኒ ጎዳ ኦጌ ካላዲስ፤
 ታኒ ታ ጸሳ አጋዳ
 ኢታ ኦላቤኬ።

22 ታኒ ኢዛ ዋጋ ኡባ ናጋዲስ፤
 ኢዛ አዛዞዛ ፖላናፔ
 ጉዬ ጋቤኬ።

23 ታኒ ኢዛ ሲንላን ሱሬ ዴኣዲስ፤
 ታናቴላ ናጋራፔ ናጋዲስ።

24 ሄሳ ጊሻስ
 ጎዳይ ታስ
 ታ ጲሎቴላ ማላ ኢሚዴስ፤
 ታ ኩሼይ ኢዛ ሲንላን
 ጌሽ ጌዲዳ ማላ ዛሪዴስ።

- 25 አቤት ጎዳዉ!
 አማኔቲዛይታስ
 ኔኒ አማኔታሳ፤
 ሱሬታስ ኔኒ ሱሬ።
- 26 ጌሻታሰካ ኔኒ ጌሻ፤
 ጌዶ አቲን ጌላታሰ ኔኒ ጌላ።
- 27 አሽኬታ ኔ አሻሳ፤
 ጌዶ አቲን ኦቶራንቻታ
 ካዉሻሳ።
- 28 አቤት ጎዳዉ!
 ኔ ታስ ጸምፓሳ፤
 ጸሳይ ኔኒ ታስ
 ጹማ ፖኢሳሳ።
- 29 ኔ ማዲን
 ታኒ ታ ሞርኬታ ኦላይሰ፤
 ታ ጸሳ ዋልቃን ታኒ ኢሰታ
 ጊምቤ ቦላራ ጉፓ አዳይሰ።
- 30 ጸሳ ኦጌይ ሱሬ፤
 ጎዳ ቃላይ አማኔቲዛይሳ፤
 ኢዛኮ ባቃቲዛ ኡባታሰ
 ኢዚ ጎንዳሌ።
- 31 ጸሳፌ አቲን ሃራ ጸሲ ኦኔ?
 ኦ ጎዳፔ አቲን ሃራ ዛላይ ኦኔ?
- 32 ታስ ዋልቃ ኢሚዛይኔ
 ታ ኦጌ ሳሮ ኦሊዛይ ጸሳ።
- 33 ኢዚ ታ ቶሆታ
 ጌኔሳ ቶሆ ማላ ሚንሌሰ፤
 ታና ቆቃሶሆታን ሳሮቴላን ዋሌሰ።
- 34 ኢዚ ታ ኩሼታ
 ኦላ ታማርሴሰ፤
 ሄሳ ጊሻሰ ታኒ ታ ቄሴን
 ጸርቂማላ ዋንዳፌዛ
 ዳፋዳ ዱካይሰ።
- 35 አሺዛ ኔ ጎንዳሌ ታስ ኢማዳሳ።
 ኔ ኡሻቻ ኩሼን ታና ዜምፒሳዳሳ፤
 ታኮ ዚቂ ጋዳ ታና ጌታሳዳሳ።

36 ታ ኦጌ አሳዳሳ፤
ሄሳ ጊሻስ ታ ቶሆይ ሃንዳራሺቤና።

37 ታ ሞርኬታ ታኒ
ዬዳላ ኦይካዲሰ፤
ታኒ ኢሰታ ጳይሳና ጋካናሰ
ጉዬ ሲማቤኬ።

38 ኢሰቲ ናሞአንሐ
ዴንደንታ ማላ ሸጫዲሰ፤
ታ ቶሆ ጋርሳንካ ኩንዲዳ።

39 አላሰ ታና ዋልቃ ጊዲሳዳሳ፤
ታ ሞርኬታ
ታ ሲንሳን ጉልባቲሳዳሳ።

40 ታ ሞርኬታ ታ ሲንሳፌ
ጉዬ ዛራ ባቃቲሳዳሳ፤
ታና ኢጲዛይታ ታኒ ጳይሳዲሰ።

41 ባንታና ማዳና ማላ ዋሲዳ፤
ጊዶ ኣቲን ኦኒኔ ኢሰታ ኣሺቤና።
ኅዳ ኢሰቲ ጴይጊዳ፤
ጊዶ ኣቲን ኢዚ ኢሰታሰ ኮዬቤና።

42 ጫርኮይ ፒቲዲ ኤፊዛ ጉዲላ ማላ
ታኒ ኢሰታ ኦሳዲሰ፤
ኦጌን ዴኢዛ ኡርቃ ማላካ
ኢሰታ ዬዴታዲሰ።

43 ማካላ አሳፔ ታና አሻዳሳ፤
ኔ ታና ካዎቲላታ አይሲዛዴ
ሂሰታ ሹማዳሳ፤
ታ ኤሮንታ ዴሬይ
ታሰ ሃሬቲዴሰ።

44 ታና ኤሮንታ አላጋ ዴሬይ
ታሰ አዛዜቲሰ፤
ኢሰቲ ታ ኀባቲላ ሲዬዲ
ታሰ ዚጌቲሰ።

45 ኢሰቲ ያሻን ካሃ ጳዬቲሰ፤
ባንቲ ናጊዛ ሚጻፔ ኬዚዲ
ኮኮሪሼ ታኮ ዬቲሰ።

- 46 ጎዳይ ዳኦ ጸሳ!
 ታ ዜምፒዛ
 ዋጋ ዛላይ ጋላቴቶ!
 ታና ኣሺዳ ጸሳይ
 ቶቁ ቶቁ ጎ!
- 47 ኢዚ ታ ሃሎ ኬሲዛ ጸሳ፤
 ካዎቴላታ ታስ ሃሪሲዛ ጸሳ።
- 48 ታ ሞርኬታፔ ታና ኣሻሳ፤
 ኣቤት ጎዳዉ!
 ኔኒ ታ ሞርኬታ ቦላ
 ታና ቶቁ ቶቁ ሂስታሳ፤
 ማካላንቻ ኣሳታፔ
 ኔኒ ታና ኣሻሳ።
- 49 ሄሳ ጊሻስ ታኒ ኔና
 ካዎቴላታ ሲንላን ጋላታና፤
 ታኒ ኔ ሱንላ ዬላን ሳባና።
- 50 ጸሲ ባ ካዎሊዳ ካዎስ
 ጸኖ ቦላ ጸኖ ኢሜስ።
 ባ ቲይዳይሳስ ኪያቴላ ቤሴስ፤
 ዳዊቴሲኔ ኢዛ ዜሬላታስ
 ሜርናስ ሄሳሶ ኦሴስ።

19

ዳዊቲ ዛማሬታ ካቦስ ዩጲዳ ማዛሙሬ

- 1 ሳሎቲ ጸሳ ቦንቾ ዮቴቴስ፤
 ሳሎ ጉፋንሶይ
 ኢዛ ኩሺ ኦሶ ኣዋጄስ።
- 2 ኢሲ ጋላሳይ ሃራ ጋላሳስ
 ሄሳ ዮቴስ፤
 ኢሲ ቃማይካ ካሊዛ ቃማስ
 ኤራቴላ ቆንጨሴስ።
- 3 ኢስታስ ሃሳያይ
 ዋይኮ ቃላይ ባዋ፤
 ኢስታ ጨንጉርሲካ ሲዬቴና።
- 4 ጊዶ ኣቲን ኢስታ ሃሳያ ጨንጉርሲ
 ሳኣ ኡባን ላሌታና፤

ኢስታ ቃላይካ ቢታ ጋጸ ጋካና።

ጸሲ ኣርሼስ
ሳሎን ሶሆ ጊግሲዴስ።

5 ኣርሼይ ሚሺራይ ባ ኬላፌ
ኬዚዛ ማላ ፖኢ ኬኤስ፤
ጋዴ ዋጺዛ ፒላታ
ኣሳ ማላ ኡፋዬቴስ።

6 ኣርሼይ ኬሳሶፔ
ዉሎሶ ጋካናስ ቤስ፤
ኢዛ ሴላፔ ጌሚ
ኣታና ሚሺ ዴና።

7 ጎዳ ዋጋይ ሱሬ፤
ሼምፖ ዛሪ ጨልኢሴስ፤
ጎዳ ኣዛዘይ ኣማኔቲዛይሳ፤
ኣኬካይ ፓጨዳይታስ
ኣጵ ኤራቴል ኢሚስ።

8 ጎዳ ዋጋይ ሊኬ፤
ዋዚና ኡፋይሴስ።
ጎዳ ኣዛዘይ ጌሻ፤
ኣይፌ ፖኢሴስ።

9 ጎዳስ ያሺ ጌሻቴላ፤
ኢዚ ሚርናስ ኤቂዲ ዴኣና።
ጎዳ ፒርዳይ
ሙሌራ ቱማኔ ጸሎ።

10 ዋርቃፌኔ ሙሩታ ዋርቃፌ
ኣጲ ዶሴቴስ፤
ኤሳፌኔ ኤሳ ኢሊሎፔ
ኣጲ ማልኤስ።

11 ቃሴ ታና ኔ ኣይሌዛ
ናጌታና ማላ ዘሬስ፤
ኔ ዋጋ ናጎይ ዳሮ ጎኤስ።

12 ባ ባላ ዴሚዛይ ኦኔ?
ኣቤት ጎዳዉ!
ጌሚዳ ናጋራፔ

- ታና ጌሻ።
 13 ታኒ ኔ አይሌይ፥
 ጸላቴላን ናጋራ
 ኦሶንታ ማላ
 ኔኒ ታና ናጋ።
 ናጋራይ ታና ሃሮፖ፤
 ሄ ዋዴ ታኒ ሱሬ ጊዳና፤
 ጌታ ሞሮፔካ ጌያና።

- 14 አቤት ጎዳዉ!
 ታ ዜምፒዛ ዋጋ ዛላዉ!
 ታና ዋዚዳ ታ ጎዳዉ!
 ታ ደናፔ ኬኢዛ ቃላይኔ
 ታ ዋዚና ቆፋይ
 ኔና ኡፋይሲዛይሳ ጊዶ።

20

ዳዊቲ ዛማሬታ ካቦስ ዩዲዳ ማዛሙራ

- 1 ኔኒ ሜቶቲዳ ዋዴ
 ጎዳይ ኔ ዋሳ ሲዮ፤
 ያቆቤ ጸሳ ሱንሉ
 ኔና ሚንሉ ኤሶ።
 2 ባ ኬላፌ ኔስ ማዶ ኪቶ፤
 ዲዮኔፔ ማዶይ ዮ።
 3 ኔ ያርሾ ኡባ ኢዚ አኬኮ፤
 ኔ ጸጊዛ ያርሾን ኢዚ ኡፋዬቶ።
 4 ኔ ዋዚና አሞ ኔስ ኢሞ፤
 ኔ ሃልኛ ኡባ ፖሎ።
 5 ኔ ጸኒዳ ጊሻስ
 ኔኒ ኡፋይሳን ሆምቦጫና፤
 ኑ ጸሳ ሱንላን
 ኑ ባንዲራ ቶቄ ኦላና፤
 ኔ ዋሳ ኡባ
 ጎዳይ ኔስ ኢሞ።
 6 ጎዳይ ባ ዶሪዳ ካዋዛስ
 ጸኖ አሚዛይሳ ታኒ ሃኢ ኤራዲስ፤
 ባ ኡሻቻ ኩሼዛን

- ኢዚ ጌታ ጸኖን ኩንፋና፤
 ባ ጌሻ ሳሎፔካ
 ኢዛሰ ዛሮ ኢማና።
 7 ኢሶቲ ኢሶቲ ባንታ ኦላ
 ፓራ-ጋሬን ኣማኔቴቴሰ፤
 ሃራቲ ባንታ ፓራን ጨቄቴቴሰ፤
 ኑኒ ጌዲኮ
 ኑ ጎዳ ዋልቃን ጨቄቶሰ።
 8 ኢሰቲ ቋጹቲዲ ኩንዳና፤
 ኑኒ ጌዲኮ ዴንዲዲ
 ሚኒ ኤቃና።
 9 ኣቤት ጎዳዉ!
 ካዋዛሰ ጸኖ ኢማ፤
 ኑኒካ ኔና ጸይጊዛ ዋዴ ሲያ።

21

- ዳዊቲ ዛማሬታ ካቦሰ ዩዲዳ ማዛሙሬ
- 1 ኣቤት ጎዳዉ!
 ካዋይ ኔ ኢሚዳ
 ዋልቃ ጊሻሰ ኡፋዬቴሰ፤
 ኔኒ ኢሚዳ ጸኖን
 ኢዚ ከሂ ሆምቦጨሰ።
 2 ኔኒ ኢዛ ዋዚና ኣሞ
 ኢዛሰ ኢማዳሳ፤
 ቃሴ ኢዚ ኔና
 ባ ዶናን ኦይቺዳይሳ
 ኔኒ ዲጋቤካ።
 3 ኔኒ ሎኦ ኣንጆራ ኢዛ ሞካሳ፤
 ጌሻ ዋርቃ ካላቻ
 ኢዛ ሁኣን ጎዲሳዳሳ።
 4 ኔኒ ዴኦ ኢዛሰ ኢማና ማላ
 ኔና ዋሲዴሰ፤
 ኔካ ኢዛሰ ዴኦኔ
 ኣዲሳ ላይሰ ኢማዳሳ።
 5 ኔኒ ጸኖ ኢሚዳ ጊሻሰ

- ኢዛሰ ቦንቾይ ዳሪዳሰ፤
 ጌታቴሉኔ ቴማ
 ኢዛሰ ኢማዳሳ።
 6 ኔኒ ኢዛሰ ሜርና እንጆ ኢማዳሳ፤
 ኔ ኢዛራ ዲሳን
 ኢዛ ኡፋይሳዳሳ።
 7 ካዎዚ ጎዳን አማኔቴሰ።
 ኡባፌ ቶቃ
 ጸሳ ኪያቴሉ
 ኢዛራ ዲዛ ጌሻሰ
 ኢዚ ያዬና።
 8 ኔ ኩሼይ ኔ ሞርኬታ
 ኡባ ዴማና፤
 ኔ ኡሻቻይ
 ኔና ኢጺዛይታ ኦይካና።
 9 ኔኒ ቆንጨዛ ዎዴ
 ጮጮን ኢጺዛ ታማ ማላ
 ኔ ኢሰታ ዱጋና፤
 ጎዳይ ባ ሃንቆዛ ሱሌን
 ኢሰታ ዱጋና፤
 ኢዛ ታማይካ
 ኢሰታ ሚ ቆይሳና።
 10 ኔኒ ኢሰታ ናይታ
 ቢታፌ ዲጋና፤
 ኢሰታ ዜሬላካ
 ዴሬፔ ዴንላ ቆይሳና።
 11 ኔ ሞርኬቲ ኔ ቦላ
 ጌኔን ዲላቴቴሰ፤
 ኢታ ሚሸካ ማቄቴቴሰ፤
 ጌዶ አቲን ኢሰታሰ ሃኔና።
 12 ኔካ ኢሰታ
 ኔ ዎንዳፌዛ
 ዪሻን ጎዳሳ፤
 ኢሰቲ ጉዬ ሲሚዲ
 ባቃታና ማላ ኦላሳ።
 13 አቤት ጎዳዉ!
 ኔ ሚኖቴላይ

ጾቄ ጾቄ ጎ፤
ኔ ጌታ ዋለቃ ጊሻሰ
ጋላታ ዮሳ ዩጸሰ።

22

- ዳዊቲ ዛማሬታ ካቦስ ዩጲዳ ማዛሙሬ
- 1 ታ ጸሳዉ! ታ ጸሳዉ!
ታና ኣይሰ ኣጋዲ?
ታና ማዳ ጋዳ
ታኒ ዋሲሺን
ኣይሰ ሲዮንታ ኢጸዲ?
ታፔካ ኣይሰ ሃካዲ?
- 2 ኣቤት ታ ጸሳዉ!
ጋላስ ኩሜል
ታ ኔኮ ዋሲሺን
ኔ ሲያቤካ፤
ቃማ ኡባንካ ኔኮ
ዋሶፔ ሼምፓቤኬ።
- 3 ኔ ጊዲኮ ጌሻ ካዎ፤
ኢስራኤል ጋላታይ
ኔ ዩሾን ዳሰ።
- 4 ካሴ ኑ ኣዋቲ
ኔናን ኣማኔቲዳ፤
ኔናን ኣማኔቲን
ኔ ኢሰታ ኣሻዳሳ።
- 5 ኢሰቲ ኔኮ ዋሲን ኣሻዳሳ፤
ኔናን ኣማኔቲን
ኢሰታ ዩላሳቤካ።
- 6 ታኒ ጉጹኔ ኣቲን
ኣሰ ጊዲኬ፤
ታኒ ኣሳን ካጼቲዳዴኔ
ኢጸቲዳዴ።
- 7 ታና ቤኢዳ ኡባቲ ቂጼቴሰ፤
ዛሪዲካ ኢንጸርሰ

- ከሲ ቂጽቴሰ፤
 ባ ቆጽካ
 ታ ቦላ ቃፍቴሰ።
- 8 ሂሰቲዲ፥ «ኢዚ ጎዳን
 አማኔቲዴሰ፤
 አኔ ጸሲ ኢዛ አሾ፤
 ኢዚ ኡፋዬቲዳ ጊዲኮ
 አኔ ኢዛ ማዶ» ጌቴሰ።
- 9 ጊዶ አቲን ታ ዋጋራ
 ዬሌታና ማላ ማዲዲይ ኔና፤
 ታኒ ታ አዪ ቋንሐ
 ቋሚሺንካ
 ኔ ታሰ አማኔታሳ።
- 10 ታኒ ዬሌቶሶፌ ደማዳ
 ኔናን ዲጫዲሰ፤
 ታ አዬይ ኡሎፔ ደማዳካ
 ኔኒ ታ ጸሳ።
- 11 ሜቶይ ታኮ
 ማቲ ማቲ ዪዛ ገሻሰ፥
 ታና ማዲዛይካ
 ባይንዳ ገሻሰ
 ኔኒ ታፔ ሃኮፋ።
- 12 ዳሮ ሞርኬቲ ኮርማ ቦራታ ማላ
 ታና ጊዶሊዳ፤
 ቃይጪዛ ባሳኔ ቢታ
 ቦራታ ማላ
 ታና ዶዲዳ።
- 13 ሜንሐሬሊ ዬጊዲ
 ጸጊዛ ጋሞ ማላ
 ባ ዶና ታ ቦላ ዶይዳ።
- 14 ታኒ ሃላ ማላ ጎጋዲሰ፤
 ታ ሜቁላቲ
 ሶሜፔ ሶሜፔ ኮሌቲዳ።
 ታ ዋዚናይ ሙቃዳ ማላ
 ታ ጊዶን ሰሪዴሰ።

- 15 ታስ ቆጆይ ኮንኣ ማላ ሜሊዴስ፤
 ታ ኢንጸርሳይ
 ጎንጊራላራ ኦይኬቲዴስ፤
 ኔኒ ታና ሃይቂዳ ኣሳ ማላ
 ጉዲላን ዩጋዳሳ። *
- 16 ካናቲ ታና ጊደሊዳ፤
 ኢታ ኣሳቲ ታና ዶዲ ኦይኪዳ፤
 ታ ኩሼታኔ
 ታ ቶሆታ ሺሺ ጴሺኪዳ።
- 17 ታኒ ሜቂሳታ
 ቆዳና ዳንዳያይስ፤
 ታ ሞርኬቲካ
 ታና ጰርጺ ሂስቲ ጸሌቲስ።
- 18 ታ ማይኦዛ ጊሺቲ ኤኪዳ፤
 ታ ኣዲሳ ማይኦዛን
 ሳማ ዩጊዳ።
- 19 ኣቤት ጎዳዉ!
 ኔኒ ሃኢ ታፔ ሃኮፋ።
 ኣቤት ታ ዋልቃዉ!
 ታና ማዳናስ ኤሶታ።
- 20 ታና ማሻፌ ኣሻ፤
 ታ ሼምፖዮ
 ዋልቃማ ካናታፔ ኣሻ።
- 21 ታና ጋሞታ ደናፔ ኣሻ፤
 ቃይጪዛ ሜንላ ካጩዛፔ
 ታና ናጋ።
- 22 ታኒ ኔ ሱንላ
 ታ ኢሻታስ ዮታና፤
 ኢስቲ ሺቂዳሶንካ
 ታ ኔና ጋላታና።
- 23 ኢንቴሮ ጎዳስ ያዪዛይቶ፥
 ኢዛ ጋላቲቲ!

* 22:15 ጎንጊራላ ጊዛይሲ ኢሲ ኢሲ ባጋ ጋሞላ ቃላን ሃንጋሮ ጌቲቲስ። 22:18

ማቶ 27:35፤ ማር 15:24፤ ሉቃ 23:34፤ ዮሃ 19:24 22:22 ኢብ 2:12

እንቴኖ ያቆቤ ዜሬላቶ!
 ኡባይካ ኢዛ ቦንቺቴ!
 እንቴኖ ኢሰራኤል ዜሬላቶ!
 ኡባቲካ ቦንቾን
 ኢዛሰ ያዪቴ!

- 24 ኢዚ ናቄቲዳይሳ ካጺቤና፤
 ማቶቲሺን ዬጊ ኣጺቤና፤
 ባ ሲንሳ ኢዛፔ
 ጌንሊቤና፤
 ኢዚ ማዳርኪ ጊ ዋሲን
 ኢዛ ዋሶ ሲዪዴሰ።

- 25 ኔኒ ኦሊዲ ሎኦ ኦሶ ጊሻሰ፥
 ዴሬይ ሸቄዳሶን ጋላታና፤
 ታ ኣዲኒዳይሳ ኔና ያዪዛ
 ኣሳ ሲንሳን ጋላና።

- 26 ሂዬሳቲ ሚዲ ካላና።
 ጎዳ ኮይዛይቲ ኢዛ ጋላታና።
 ኢሰቲ ሜርናሰ ኡፋይታና።

- 27 ሳኦ ጋጸ ጋካናሰ ዲዛ ኣሳይ
 ኢዛ ጊሻሰ ዩሺ ቆፓና፤
 ጎዳኮ ሲማና።
 ኣሳ ዜሬ ኡባይ ኢዛሰ ጎይናና።

- 28 ኣይሰ ጊኮ ማታይ ኢዛሳ፤
 ካዎቴላይ ኡባይ ኢዛሰ ሃሬታና።

- 29 ሳኦ ቦላ ዲዛ ዲሬቲ
 ኢዛሰ ጎይናና።
 ባና ሃይቆፔ ኣሻናዉ
 ዳንዳዮንታ ቢታን
 ባና ኣሲ ኡባይ
 ኢዛ ሲንሳን ጉልባታና።

- 30 ቡሮ ያና ዬሌታይ ኢዛሰ ኦላና፤
 ሄ ዬሌታይ ካሊ ዪዛ ዬሌታሰ
 ጎዳ ኦሶ ዮታና።

- 31 ኢሰቲ ኢዛ ጸሎቴላ ጊሻሰ
 ቡሮ ያና ዬሌታሰ ዮታና።

23

ዳዊቱ ማዛመጥ

- 1 ጎዳይ ታ ሄንላንቻ፤
ታስ ኣይኮይካ ፓጮና።
- 2 ታና ኣጫ ቆሮን ሸምፒሴስ፤
ጸሎ ሃሊ ዲዛሶ
ታና ካሌሴስ።
- 3 ታ ዴኦ ኦራዲሴስ።
ባ ሱንላ ጊሻስ
ታና ጸሎቴላ ኦጌን ካሌሴስ።
- 4 ኔኒ ታ ጎዳይ ታናራ ዲዛ ጊሻስ
ታኒ ጊርዲ ጊዳ
ቋማ ሸባ ጊዳራ ቢኮካ
ኢታ ሚሻስ ባቢኬ።
ኔ ጉፊይኔ ጋቱማይ
ታና ሚንሌሴስ።
- 5 ታ ሞርኬታ ሲንላን
ታስ ማዳ ጊጊሳዳሳ፤
ታ ሁኔ ዛይቲን ቲያዳሳ፤
ታ ኡሺ ኩንላ ፓላሂሳዳሳ።
- 6 ኔ ኪያቴሊኔ ኔ ማሮቴላይ
ታ ዴኦ ላይላ ኡባን
ታና ካላና፤
ታኒ ጎዳ ኬላን ሜርናስ ዳና።

24

ዳዊቱ ዩጲዳ ማዛመጥ

- 1 ሳኣይኔ ሳኣን ኩሚዳ
ኡባይ ጎዳሳ፤
ሳሎ ጉፋንሶን ዲዛ
ኡባይ ጸሳሳ።
- 2 ሳኣ ጊታ ኣባታ ቦላ ሚጨዴስ፤
ሃላ ቦላካ
ሚንሊዲ ኤሲዴስ።

- 3 ጎዳ ዙማ ቦላ ከዛናይ ኦኔ?
 ኢዛ ጌሻሶሆን
 ኤቃናይ ኦኔ?
- 4 ኢዛ ኩሼይ ናጋራፔ ጌዱዳይ፥
 ኢዛ ዎዚናይ ጌሻ ጌዱዳይ፥
 ኤቃ ጸሳታሰ ጎይኖንታይ፥
 ዎርዶ ጫቆንታይ፥
- 5 ኢዚ ጎዳፔ አንጆ ኤካና፤
 ባና አሺዛ ጸሳፌ
 ጸሎ ፒርዳ ዳማና።
- 6 ጸሳኮ ጸሊዛ አሳይኔ
 ያቆቤ ጸሳ ሲንሐ
 ኮይዛ አሳይ ሄይታንታ ማላ።
- 7 ካሬቲ ዶዬቴቶ፤
 ቦንቾ ካዎይ ጌሎ፤
 ቤኒ ፔንጌቲ
 ኢዛ ኡፋይሳን ሞኪቲ!
- 8 ሄ ቦንቾ ካዎይ ኦኔ?
 ሚኖኔ ዎልቃማ ጎዳ!
 ኦላሰካ ኢዚ ዎልቃማ ጎዳ!
- 9 ካሬቲ ዶዬቴቶ፤
 ቦንቾ ካዎይ ጌሎ፤
 ቤኒ ፔንጌቲ
 ኢዛ ኡፋይሳን ሞኪቲ!
- 10 ሃ ቦንቾ ካዎይ ኦኔ?
 ሄ ቦንቾ ካዎይ
 ሳሎ ሜጴቴላ ጎዳ!

25

ዳዊቲ ማዛሙራ

- 1 አቤት ጎዳዉ!
 ታ ኔና ዎዚናፔ ዎሳይሰ።
- 2 አቤት ታ ጸሳዉ!
 ታኒ ኔናን አማኔታይሰ፤
 ታና ዬላሶፓ፤

- ታ ሞርኬቲካ
 ታ ቦላ ጨቄቶፌቶ።
 3 ኔና ሂደታ ኦሊዛይቲ
 ዬላቴቴና፤
 ጊዶ አቲን ጌኔ ኦሊዛይቲ
 ዬላታና።
- 4 አቤት ጎዳዉ!
 ታና ኔ ኦጌ ቤሳ፤
 ኔ ጌዶ ካሎ ታና ታማርሳ።
- 5 ኔኒ ታና አሺዛ ጸሳ፤
 ኔ ቱማቴላን
 ታና ካሌላኔ ታማርሳ፤
 ኡባ ዎዴ ታ ሂደታይ ኔና።
- 6 አቤት ጎዳዉ!
 ቤኒሶፌ ዲዛ ኔ ቃዴቴላኔ
 ኔ ኪያቴላ ሃሳኦ።
- 7 ታ ዬላጋቴላ ናጋራኔ
 ሞሮ ሃሳኦ፤
 አቤት ጎዳዉ!
 ኔ ጌታ ኪያቴላ ማላኔ
 ኔ ሎኤቴላ ከና ታና ቆፓ፤
- 8 ጎዳይ ኪያኔ ሱሬ፤
 ሄሳ ጊሻሰ ናጋራንቻታ
 ባ ኦጌ ታማርሴሰ።
- 9 አሽኬታ ሱሬ ኦጌራ ካሌሴሰ፤
 ኢሰታካ ባ ኦጌ ታማርሴሰ።
- 10 ጎዳ ጫቆ ቃላኔ
 ማራ ናጊዛይታሰ
 ኢዛ ኦጌይ ኡባይ ኪያኔ ቱማ።
- 11 አቤት ጎዳዉ!
 ታ ናጋራይ ኬሂ ዳሮ፤
 ጊዲኮካ ኔ ሱንላ ጊሻሰ
 አቶ ጋ።
- 12 ጎዳሰ ያዪዛ አሲ ኦኔ?
 ኔ ዶራዳ ባና ኦጌዛ
 ኢዚ ኔና ታማርሳና።

- 13 ኢዚ ኡባ ዋዴካ ሎኦ ዱሰ ዳና፤
ኢዛ ዜሬላቲ ቢታ ላታና።
- 14 ጎዳይ ባና ያዩዛይታ፤
ባ ጹራ ቆቴና፤
ኢዚ ኢስታሰ
ባ ጌሊዳ ጫቆ
ቃላካ ኤሪሴሰ።
- 15 ጎዳይ ታ ቶሆ
ናርጸፌ ኬሲ ኤኪዛ ጊሻሰ፤
ታ ኣይፌይ ማዶ ዴማናሰ
ኡባ ዋዴ ኢዛኮ ጸሌሰ።
- 16 ጎዳዉ! ታኒ ቢዛ ዲዛዴኔ
ቆሄቲዳ ኣሰ ጊዲዳ ጊሻሰ፤
ኔ ሃ ታኮ ሰማ፤
ኔ ማርቴላካ ቤሳ።
- 17 ታሰ ሜቶይ ዳሪዴሰ፤
ታ ሜቶዛ፤ ታና ኔኒ ኬሳ።
- 18 ታ ሜቶዛ፤
ታ ቱጋ ኔኒ ቤኣ፤
ታ ናጋራ ኡባ ኣቶ ጋ።
- 19 ታ ሞርኬቲ ኣይ ኬና ዳሪዳኮ
ኔ ቤኣ፤
ኢሰቲ ታና ኣይ ማላ ኢጲዛኮ
ኔ ጴላ።
- 20 ኔኒ ታና ናጋኔ ኣሻ፤
ታ ኔናን ዜሞፓዲሰ፤
ኔ ታና ዬላሶፓ።
- 21 ኔ ታሰ ሂዶታ ጊዲዳ ጊሻሰ
ሱሬቴላይኔ ቱማቴላይ
ታና ናጎ።
- 22 ኣቤት ጸሳዉ!
ኢሰራኤሌ ኣሳ
ሜቶ ኡባፌ ኔኒ ዋዛ።

- 1 አቤት ጎዳዉ!
 ታኒ ሱሬቴላኒኔ
 ሲጼይ ባይንዳ
 ኔናን አማኔታ
 ዴኢዳ ጊሻስ
 ኔ ታስ ፒርዳ።
- 2 አቤት ጎዳዉ! ታና ፓጫ፤
 ታ ቃንሰ ፒልጋ፤
 ታ ዋዚና ጸላ፤
- 3 አይስ ጊኮ ኔ ሲቆይ
 ታ ሲንላን ዴስ፤
 ታኒ ኔ ቱማቴላ
 ኦፔን ሄማታይስ።
- 4 ታኒ ባሌላዛ አሳታራ
 ኢሲፌ ኡቲኬ፤
 ሎኦ ሚሳቲዛ
 ኢታታ ማባራን ጌሊኬ።
- 5 ኢታ ኦሊዛ አሳታ ኢሲፌቴላ
 ታኒ አጸይስ፤
 ኮፋ አሳታራ ኢሲፌ ኡቲኬ።
- 6 አቤት ጎዳዉ!
 ታናን ቆሆይ
 ባይንዳይሳ ቤሳናስ
 ታ ኩሼዛ ሚጫይስ፤
 ሂስታዳ ያርሾ
 ያርሺዛሶዛ ዩያይስ።
- 7 ጋላታ ማዛሙራ ዩጸይስ፤
 ኔኒ ኦሊዳ ሚሽ
 ኡባካ ኮታይስ።
- 8 አቤት ጎዳዉ!
 ኔኒ ዴኢዛ ኬላኔ
 ኔ ቦንቾይ አቂዛሶሆ
 ታኒ ዶሳይስ።
- 9 ታና ናጋራንቻታራ
 ኢሲፌ ፒርዳ፤
 አስ ዋጲዛይታራካ ኢሲፌ
 ታ ሼምፖ ዳይሶፋ።

- 10 ኢስታ ኩሼን ኢታ ሃልቾይ ዳሰ፤
 ቃሴ ኢስታ ኡሻቻ ኩሼይ
 ማታኤን ኩሚዳሰ።
- 11 ታኒ ጊዲኮ ቦሬይ ባይንዳ
 ዲሰ ዳይሰ፤
 ታና ዋዛ፤
 ታሰ ቃዴታ።
- 12 ታ ቶሆይ ዳምባሶን ኤቂዳሰ፤
 ታኒ ዳሬይ ሺቂዳሶን ጎዳ ጋላታና።

27

ዳዊቱ ማዛመራ

- 1 ጎዳይ ታሰ ፖኦኔ
 ታና ኣሺዛይሳ፤
 ሂሰቲን ታኒ ኦናሰ ያያኔ?
 ጎዳይ ታ ሼምፖይሰ
 ኣቲዛ ሚጸ፤
 ሂሰቲን ታኒ ኦናሰ ባባኔ?
- 2 ኢታ ኣሳቲ፥ ታ ሞርኬቲኔ
 ታ ባልጋራቲ
 ታና ዋዳናዉ
 ታኮ ሆርዶፊ ዪዛ ዋዴ፥
 ኢሰቲ ባሰ ቋጹቲዲ ኩንዳና።
- 3 ሞርኬ ቶራይ
 ታና ደዲዛኮካ
 ታ ዋዚናይ ያዬና፤
 ኦላይ ታ ቦላ ዋራጂዳኮካ፥
 ታኒ ጎዳን ኣማኔታይሰ።
- 4 ታኒ ጎዳ ኢሲ ሚሽ ኦይቻይሰ፤
 ሂሲካ ታኒ
 ታ ዴኦ ላይሰ ኡባን
 ጎዳ ኬላን ዴኣናሳ፤
 ታኒ ጎዳ ቦንቾ ሎኦቴላ ቤኣናሳ፤
 ኢዛ ኬላንካ
 ኢዛ ኮያሼ ዴኣናሳ።

- 5 ሄሳ ጊሻስ ሜቶ ጋላስ
 ኢዚ ታና ባ ዲዛሶን ጌንፋና፤
 ባ ዲንካኔን
 ታና ቆቲ አሻና፤
 ቆቃ ዛላ ቦላካ
 ኢዚ ታና ኤሳና።
- 6 ሄ ዎዴ ታና ዶዲዳ
 ታ ሞርኬታፔ ቦላራ
 ቶቁ ቶቁ ጋና፤
 ታኒ ኢዛ ዲንካኔዛ ሲንፋን
 ኡፋይሳ ያርሾ ያርሻና፤
 ታኒ ጎዳስ ዲጸናኔ
 ዬጸና።
- 7 አቤት ጎዳዉ!
 ታኒ ኔና ጸይጊዛ ዎዴ
 ኔኒ ታስ ኮያ፤
 ታስ ቃጴታ፤ ታና ሲያ።
- 8 ኔኒ፡ «ታ ሲንፋ
 ኮዪቲ» ጊዳ ዎዴ፥
 ታ ዎዚናይ፥
 «አቤት ጎዳዉ! ኤኖ፤
 ታኒ ኔ ሲንፋ ኮያና» ጊዴሰ።
- 9 አቤት ታና አሺዛ ታ ጸሳዉ!
 ኔኒ ታና ማዲዛዴ፤
 ኔ ሲንፋ ታፔ ጌንፋፋ፤
 ታና ኔ አይሌ ሃንቁታዳ
 ኔፔ ሃሶፋ።
 ታና ኦሎፓኔ አጎፋ።
- 10 ታ አዋይኔ
 ታ አያ ታና አጊኮካ
 ጎዳይ ታና ሺሺ ኤካና።
- 11 አቤት ጎዳዉ!
 ኔ ኦጌ ታና ታማርሳ፤
 ታ ሞርኬታ ጊሻስ
 ታና ሱሬ ኦጌራ ካሌፋ።
- 12 ዎርዶ ማርካቲ
 ታ ቦላ ማካላቴፋን

ዴንዲዲ፤
ሄሳ ጊሻሰ ኔ ታና
ኢሰታ ኢታ አሞሰ አላ ኢሞፋ።

13 ታኒ ሸምፖራ ፓጸ ዳሼ
ጎዳ ኪያቴላ ቤያናይሳ
ሂደታ ኦላይሰ።

14 ጎዳን አማኔታ፤
ሚና፥ ሂደታ ቃንጾፋ፥
ጎዳን አማኔታ።

28

ዳዊቱ ማዛመራ

1 አቤት ጎዳዉ! ታ ዛላዉ!
ታኒ ኔና ዴይጊሸን
ታሰ ሲሲ ኢጾፋ፤
ታ ዋሲሸን ኔ ጮኡ ጊኮ
ታኒ ዲፎን ጌሊዛ
ኦሳታ ማላ ጊዳና።

2 ታ ኩሼዛ ኔ ጌሻ
አቆሶ ሚጫዳ ዋሲሸኔ
ታና ማዳርኪ ጋዳ
ታ ዋሲሸን ኔ ሲያ።

3 ባ ዋዚናን ኢታ ቆፒሼ
ባ ላጌታራ ሳሮቴላ ሃሳይዛ
ኢታ ኦላዛይታራ
ታና ኢሰታራ ጋላ ኤፎፓ።

4 ኔ ኢሰታሰ ኢሰታ ኢታቴላ ማላኔ
ኢሰታ ኦሶ ማላ ኢማ፤
ኢሰታሰ ኢሰታ ኩሼ
ኦሶ ማላ ዛራ፤
ኢሰቲ ኦላዳ ኢታ ኦሶዛሰ
ሃሎ ኬሳ።

5 ኢሰቲ ጎዳ ኦሶሰ ዉዱ ጎንታ
ኢጺዳ ጊሻሰ፥

ኢዛ ኩሼ ኦሶታሰ ሶሆ
 እሞንታ ኣጌዳ ጊሻሰ፥
 ኢዚ ኢሰታ ላላና፤
 ዛሪዲካ ኬጾና።

6 ታ ዎሳ ሲዬዳ ጊሻሰ፥
 ጎዳይ ጋላቴቶ።

7 ጎዳይ ታሰ ዎልቃኔ ጎንዳሌ፤
 ታ ዎዚናይ ኢዛን ኣማኔቴሰ፤
 ሄሳን ታኒ ማዴታዲሰ፤
 ሄሳ ጊሻሰ
 ታ ዎዚናይ ኢዛን ኡፋዬቴሰ፤
 ታኒ ኢዛ ዬላን ሳባና።

8 ጎዳይ ባ ዴራሰ ዎልቃ፤
 ኢዚ ባ ቲይዳ ካዎዛ
 ኣሺዛ ሚጽ።

9 ጎዳዉ! ኔ ዴራ ኣሻ፤
 ኔሰ ጊዲዛይታ ኣንጃ፤
 ኢሰታ ሄንፋንቻይ
 ኔና ጊዳ፤
 ኔኒ ኢሰታ ሚርናሰካ ቶካ።

29

ዳዊቴ ማዛሙራ

1 ኢንቴኖ ሳሎን ዲዛ ሜዴታቶ!
 «ቦንቾይኔ ዎልቃይ
 ጎዳሳ» ጊዲ ዮቴቴ።

2 ጎዳ ቦንቾ
 ሱንሳ ጋላቴቴ፤
 ኢዛ ጌሻቴላ ቴማሰ
 ጎዳ ጎይኒቴ።

3 ጎዳ ጨንጉርሳይ
 ሃላታ ቦላን ሲዬቴሰ።
 ቦንቾ ጸሳይ

- ዳዳ ማላ ጉሜስ፤
 ጎዳይ ጌታ ሃላታ ቦላን
 ጉሜስ።
- 4 ጎዳ ጨንጉርሳይ ዋልቃማ፤
 ጎዳ ጉንሳይ፤
 «ኔስ ሆላ!» ጌሲዛዛ።
- 5 ጎዳ ጨንጉርሳይ
 ዚጋ ሚላ ሚንጮሬሴስ፤
 ሊባኖሴ ዚጋታካ
 ጎዳይ ሚንጮሬሴስ።
- 6 ሊባኖሴ ዙማ
 ጋሎ ማራ ማላ ቡራቂሴስ፤
 ሲሪኖኔ ዙማካ
 ሚንላ ማላ ጸኪሴስ። *
- 7 ጎዳ ጨንጉርሳይ
 ዋልቃንስ ፖፖልኡ ጌስ።
- 8 ጎዳ ጨንጉርሳይ
 ባዞ ቃሴስ፤
 ጎዳይ ቃዴሴ ባዞ ቃሴስ።
- 9 ጎዳ ጨንጉርሳይ
 ዋላታ ቃሴስ፤
 ሚላ ሃይሊካ ቆቆፌስ።
 ኢዛ ኬላን ዴኢዛይቲ፤
 «ቦንቾይ
 ጎዳስ ጊዶ» ጌቲስ።
- 10 ጎዳይ ዲኦ ሃላ ቦላ
 ባ ኣራታ ዋሊዲ ኡቲዴስ፤
 ጎዳይ ባ ካዋቲላ
 ኣልጋን ኡቲዲ
 ሜርናስ ሃሬስ።
- 11 ጎዳይ ባ ዴራስ ዋልቃ ኢሜስ።
 ባ ኣሳካ ሳሮቲላን ኣንጄስ።

30

ኬላ ኣንጂሶስ ዬጾቲዳ ዳዊቲ ማዛሙራ

* 29:6 ሲዶና ቃላራ ሲሪኖኔ ጊዛይሲ ሄርሞኔ ቤሴስ።

- 1 አቤት ጎዳው!
 ኔኒ ታና ጨማፌ ከሳዳሳ፤
 ታ ሞርኬቲ ታ ቦላ
 ኡፋዬቶንታ ማላ ኦላዳሳ፤
 ሄሳስ ታ ኔና
 ጾቁ ጾቁ ሂስታይስ።
- 2 አቤት ታ ጎዳው!
 ኔኒ ታና ማዳና ማላ
 ታ ኔኮ ዋሳዲስ፤
 ኔካ ታና ፓላዳሳ።
- 3 አቤት ጎዳው!
 ታና ዱፎን ቦንታ ማላ
 ናጋዳሳ፤
 ዱጌ ጨማ ኦላን ጌሎንታ ማላ
 ኔኒ ታና አሻዳሳ።
- 4 ኢንቲኖ ጸሳ አሳቶ!
 ጎዳስ ዩጲቲ፤
 ኢዛ ጌሻ ሰንፋካ ሳቢቲ።
- 5 ኢዛ ሃንቆይ ጉላ ዋዴሳ፤
 ጌዶ አቲን ኢዛ ከያቴላ
 ዴኦ ላይሰ ኡባሳ፤
 ኦማርስ ዬኪሼ አቂኮካ
 ማላዶ ዛዋይ
 ባይንዳ ኡፋይስ ጌዴስ።
- 6 ታኒ ዋፓን ዲዛ ዋዴ፤
 «ታኒ ሙሌካ ኮኮሪኬ» ጋዲስ።
- 7 አቤት ጎዳው!
 ኔኒ ታስ ከዪዳ ዋዴ፤
 ታና ጌታ ዙማ ማላ
 ሚንፋ ኤሳዳሳ፤
 ጌዶ አቲን ኔኒ ኔ ሲንፋ
 ታፔ ሃራሶ ዛሪዳ ዋዴ
 ታኒ ዳጋማዲስ።
- 8 አቤት ጎዳው!
 ታኒ ኔና ጴይጋዲስ፤

- ታኒ ጎዳፔ
 ማሮቴስ ዋሳዲስ፤
 9 «ታ ሃይቂኮ ዋይኮ
 ዱፎን ጌሊኮ
 ኔ ታፔ አይ ዴማኔ?
 ቢታን ጌሊዳ አሲ
 ኔና ጋላቲ ኤሪዜ?
 ኔ አማኔቴላ
 ሃሳዪ ኤሪዜ?
 10 አቤት ጎዳዉ!
 ታ ዋሳ ኔ ሲያ፤
 ታስ ቃጵታ።
 አቤት ጎዳዉ!
 ኔ ታስ ማዶ ጊዳ» ጋዲስ።
- 11 ታ ዬሆ ዬላን ላማዳሳ።
 ካዮ ማይኦዛ ታፔ ቃራዳ
 ኡፋይሳ ማይኦ
 ታና ማይዛዳሳ።
- 12 ሄሳ ጊሻስ ታኒ ኔና
 ሳባናፔ አቲን ጮኤ ጊኬ።
 አቤት ታ ጎዳዉ!
 ታኒ ኔና ሜርናስ ጋላታና።

31

- ዳዊቲ ዛማሬታ ካቦስ ዬዲዳ ማዛሙሬ
- 1 አቤት ጎዳዉ!
 ኔ ታስ ኩዋ ጊዳና ማላ
 ታ ኔኮ ያዲስ፤
 አይዴካ ታና ዬላስፓ፤
 ኔ ዲሎቴላን ታና አሻ።
- 2 ኔ ሃይላ ታኮ ዛራ፤
 ኤሶን ታና አሻ፤
 ኔኒ ታና ጌንሲዛ ዛላ ጊዳ፤
 ታና አሺዛ ሚኖ ሚጸ
 ታስ ጊዳ።
- 3 ኤ፥ ኔኒ ታስ ዛላ፤
 ታ ኢዛን ጌላ አቲዛ ሚጸ፤

- ኔ ሱንላ ገሻሰ
 ታኒ ባና ኦጌ
 ቤሳኔ ካሌላ።
 4 ኔኒ ታሰ ዜምፖ ገዲዛ ገሻሰ፤
 ኢሰቲ ታሰ ዋጺ ዋሊዳ
 ናርጸፌ ታና ኔ ናጋ።
 5 ኣቤት ጎዳዉ ቱሙ ጸሳዉ!
 ታኒ ታ ሸምፖ
 ኔ ኩሼን ሃዳራ ኢማይሰ፤
 ኔኒ ታና ዋዛ።
 6 ፓሉንታ ኤቃታሰ
 ጎይኒዛይታ ታኒ ኢጸይሰ፤
 ታኒ ገዲኮ ጎዳን ኣማኔታይሰ።
 7 ታ ሜቶ ኔኒ ቤኢዳ ገሻሰኔ
 ታ ቱጋ ኔኒ ኤሪዳ ገሻሰ
 ታኒ ኔ ሲቆን ኡፋዬታይሰ።
 8 ኔኒ ታና ታ ሞርኬታሰ
 ኣላ ኢማቤካ፤
 ታ ቶሆታካ
 ኣሆ ሶሆን ኤሳዳሳ።
 9 ኣቤት ጎዳዉ!
 ታኒ ሜቶን ጌላዲሰ፤
 ታሰ ቃጴታ።
 ታኒ ዳሮ ሚሼታዲሰ፤
 ታ ኣይፌይ፥ ታ ኣሾይኔ
 ታ ሸምፖይ ዳቡርዳሰ።
 10 ታ ሸምፖያ ዋዬን ዳቡራዲሰ፤
 ታ ላይላይካ ጨጨን ዉሪዳሰ።
 ሜቶ ዳሮን
 ታ ዋለቃይ ጨንገዴሰ፤
 ታ ሜቁላቲካ
 ገደን ሴሪዳ።
 11 ታ ሞርኬታ ኡባሰ
 ታኒ ቂጴ ሚሽ ገዲዲሰ፤
 ታ ሾርታሰ ሚሬሰ ኣታዲሰ፤

- ታና ኤሪዛይታስ ካጼስ ጊዳዲስ፤
 ኦጌን ታና ቤኢዳይቲካ
 ታፔ ባቃቴቲስ።
- 12 ታኒ ሃይቂዳ አሳ ማላ ደጌታዲስ፤
 ሞሆ አቶ ማላ ጊዳዲስ።
- 13 ታኒ ዳርቲ ሳሱኬቲሺን ሲያዲስ፤
 ዳጋማይ ኡባሶራ ዴስ፤
 ኢስቲ ታ ቦላ ጌኔን ዱላቴቲስ፤
 ታና ዋጃናዉካ
 ማቄቴቲስ።
- 14 ጊዶ አቲን ጎዳዉ!
 ታኒ ኔናን አማኔታዳ፥
 «ኔኒ ታ ጸላ» ጋይስ።
- 15 ታ ዴኦ ላይላይ
 ኔ ኩሼና፤
 ታና ጎዲዛ
 ታ ሞርኬታ ኩሼፔ
 ኔ ታና አሻ።
- 16 ኔ አይሌዛ ቦላ
 ኔ ሲንላ ፖኢሳ፤
 ኔ ማርቲላን ታና አሻ።
- 17 አቤት ጎዳዉ!
 ታኒ ኔና ጴይጋይስ፤
 ታና ዬላሶፓ፤
 ኢታቲ ጊዲኮ ዬላቴቶ፤
 ዱጌ ዱፎን ጌሊዲ ሲርጲ ጌቶ።
- 18 ጸሎዛ ቦላ ኦቶሮን፥ ካጼኒኔ
 ጸላቴላን ሃሳይዛ ገሻስ
 ዋርዳንቻታ ዶና ዱዲሳ።
- 19 ኔናን ዜምፓናስ
 ኔኮ ሸቂዳይታሲኔ
 ኔስ ያዪዛይታስ
 ኔኒ አሳ ሲንላን ኢስታስ
 ኢማና ጋዳ ሚንጃ ዋሊዳ
 ከያቴሊ አይ ማላ ዳሮ!
- 20 ኔኒ ኢስታ ኔ ኬላን ጌንላዳ

እሳ ማቆፌ አሻሳ፤
ኔኒ ኢስታ ኔ ዲዛሶን ቆታዳ
ኢታ ኢንጻርሳፌ ናጋሳ።

21 ታኒ ሞርኬይ ዶዲ ኦይኪዳ
ካታማ ጊዶን ዲዛ ዎዴ
ኢዚ ማላሊሲዛ ባ ማሮቴል
ታና ቤሲዳ ጊሻሰ
ኅዳይ ጋላቴቶ።

22 ታኒ ዳጋማዳ፡
«ኔ ሲንጻፌ ከቻዲሰ» ጋዲሰ።
ጊዶ አቲን ታና ማዳና ማላ
ኔና ታ ጽይጊዳ ዎዴ
ታ ዋሶዛ ኔኒ ሲያዳሳ።

23 ኢንቴሮ ጸሳ አሳቶ!
ኅዳ ሲቂቴ።
ኅዳይ ኢዛን አማኔቲዛይታ
ናጌሰ፤
ጊዶ አቲን ኦቶራንቻታሰ
ኢስታሰ ቤሲዛ ቂጻቴ ኢሜሰ።

24 ኢንቴ ሂዶታ
ኅዳን ኦሴዳይቶ!
ቤጊቴኔ ሚኒቴ።

32

ዳዊቲ ሃሳኣን ሺሺዳ ጊንጾ

1 ኢዛ ሞርይ አቶ ጌቴቲዳይሲኔ
ኢዛ ናጋራይ
ካሜቲዳይ አንጃቲዳይሳ።

2 ኅዳይ ኢዛ ናጋራ
ቆዶንታዴይኔ
ኢዛ ቆፋን
ባሌላይ ባይንዳይ አንጃቲዳይሳ።

3 ታኒ ታ ናጋራ ፓጽንታ ዳሼ
ጋላሰ ኩሜል ጩጪን
ታ አሳቴላይ ዳቡርዴሰ።

- 4 ጋላሲኔ ቃማ ኔ ኩሼይ
 ታ ቦላ ዳዲዴሰ፤
 ሃላ ቦኔ አዋን ሚጪዛ ማላ
 ታ ዋልቃይ ጨንገ ወሪዴሰ።
- 5 ታኒ ታ ናጋራ ኔሰ ፓጻዲሰ፤
 ታ ቆሂዳይሳ ኔፔ
 ጌንላቤኬ፤
 «ታ ሞሮዛ ጎዳሰ
 ፓጻና» ጋዲሰ።
 ሂሰቲን ኔ ታ ናጋራ
 ኡባ አቶ ጋዳሳ።
- 6 ሄሳ ገሻሰ ጸሎ አሲ
 ኔኒ ቤቲዛ ዋዴ ኔና ዋሶ፤
 ዲኦይ ኢዚ ዲዛ ሄራ
 ሜጪ ኤፊኮካ ኢዛ ቦቹና።
- 7 ኔኒ ታሰ ቆቴቲዛሶ፤
 ኔኒ ታና ሜቶፔ ናጋሳ፤
 ታና ጸኖ ዬላን
 ኩንላዳሳ።
- 8 ጎዳይ፥ «ታኒ ኔና ታማርሳና፤
 ኔኒ ባናሰ ቤሲዛ ኦጌካ
 ኔና ኤሪሳና፤
 ታኒ ኔና ዘራናኔ ናጋና።
- 9 ቢጸላኒኔ ፑሎን ሃሬቲዛ
 አኬካይ ባይንዳ ባቁሎ ማላ
 ዋይኮ ፓራ ማላ
 ኢንቴ ሃኖፒቲ» ጌሰ።
- 10 ኢታታሰ ቱጋይ ዳሮ፤
 ጊዶ አቲን ጎዳን
 አማኔቲዛይታ
 ማሮቴላ ዶዴሰ።
- 11 ኢንቴኖ ጸሎቶ!
 ጎዳን ኡፋዬቲቴኔ
 «ሃሹ!» ጌቲ፤
 ኢንቴኖ ዋዚና ሱሬቶ!
 ኡፋይሳን ኢሊሊቲ!

33

- 1 ኢንቴሮ ጸሎቶ! ጎዳን ኡፋዬቲቴ፤
ሱሬ ኣሳቲ ኡፋይሳን ኢሊሊቴ።
- 2 ማሲንቆ ሾጨሼ ጎዳ ጋላቲቴ፤
ታሙ ሻያን ዋጾቲዳ
ዲላን ኢዛሰ ዩጸቴ።
- 3 ኦራላ ማዛሙሬ ኢዛሰ ዩጸቴ፤
ዲላ ገግሲ ሾጨቴ፤
ኡፋይሳን ኢሊሊ ገቴ።
- 4 ጎዳ ቃላይ ቱማ፤
ኢዚ ኦሊዛ ኦሶ
ኡባይ ኣማኔቲዛይሳ።
- 5 ጎዳይ ጸሎቴላኔ
ቱማ ፒርዳ ዶሴሰ፤
ኢዛ ከያቴሊ ሳኣ ኩሚዴሰ።
- 6 ሳሎቲ ጎዳ ቃላን ሜጴቲዳ።
ኢዛ ዶናፔ ኬዚዛ ፔናን
ሳሎን ዲዛ ሜጴቴላቲ
ሜጴቲዳ።
- 7 ጌታ ኣባ ሃላ
ኢዚ ኢሲሶን ሺሺዴሰ፤
ጨማ ሃላ
ሚንጃሶን ኤሊሲዴሰ።
- 8 ሳኣን ዲዛ ኣሲ ኡባይ
ጎዳሰ ያዮ፤
ሳሎ ጉፋንላይ
ጎዳ ቦንቾ።
- 9 ኣይሰ ጌኮ ኢዚ ሃሳዪን ሃንዴሰ፤
ኢዚ ኣዛዚን ሚኒዲ ኤቂዴሰ።
- 10 ጎዳይ ካዎቴላታ
ሃልቾ ላላና፤
ኢሰታ ቆፋካ ሃዳ ኦላና።
- 11 ጎዳ ሃልቾይ
ሜርናሰ ኤቂ ዳና፤
ኢዛ ዎዚና ቆፋይካ ዩሌታፔ
ዩሌታ ጋካናዉ ዳና።

- 12 ጸሲ ኢዛሰ ጎዳ ጊዲዳ
ካዎቱላይ፥
ኢዚ ባሰ ዶሪዳ ዳሬይ
እንጃቲዳ ዳሬ።
- 13 ጎዳይ ሳሎን ኡቲዲ ዱጌ ጸሌሰ፤
እሳ ኡባካ ቤኤሰ።
- 14 ጎዳይ ባ ኣራታን ኡቲዲ
ሳኣን ዳኢዛ ኡባ ጸሌሰ።
- 15 ኢዚ ኡባ ዎዚና ሜጲዳሰ፤
ኢሰቲ ኦሊዛ ሚሽ ኡባ ኤሬሰ።
- 16 ካዎይ ባ ዎታዳራ
ጮራቱላን ኣቴና፤
ኦላንቻይ ባ ዎልቃ
ሚኖቱላን ኬሲ ኤኬና።
- 17 ታኒ ፓራን ጸናና ጊ
ናጎይ ሃዳ፤
ኢዚ ባ ዎልቃ ሚኖቱላን
ኦናካ ኣሻናዉ
ዳንዳዬና።
- 18 ጎዳ ኣይፌቲ ኢዛሰ ያዪዛይታኔ
ኢዛ ሜርና ሲቆ
ሂዶታ ኦሊዛ ኣሳታ ጸሌሰ።
- 19 ኢዚ ሄሳን ኢሰታ ሃይቆፔ ኣሼሰ፤
ኮሻ ዎዴካ ኢሰታ
ሼምፖራ ፓጻ ዎሌሰ።
- 20 ኑ ሼምፖያ ጎዳ
ሂዶታ ኦላዉሰ፤
ኢዚ ኑሰ ማዶኔ ጎንዳሌ።
- 21 ኑኒ ጌሽ ጊዲዳ
ኢዛ ሱንላን ኣማኔቶሰ፤
ኑ ዎዚናይካ ኢዛን ኡፋዬቲሰ።
- 22 ኣቤት ጎዳዉ!
ኑኒ ኔናን
ሂዶታ ኦሊዛይሳ ማላ
ሜርና ኔ ሲቆይ ኑናራ ጊዶ።

34

ካዎ አቢሜሌኬ ሲንፋፌ ኣቲ ቢዳ ዎዴ ዳዊቲ ዩጲዳ
ማዛሙራ

1 ታኒ ጎዳ ኡባ ዎዴ ጋላታና፤
ኢዛ ጋላታይ እይ ዎዴንካ
ታ ዶናፔ ፓጩና።

2 ታኒ ጎዳን ጨቁታይሰ፤
ናቁቲዳይቲ ሄሳ ሲዪዲ
ኡፋዬቴቶ።

3 ኣኔ ታናራ ኢሲፌ
ጎዳ ቦንቾሰ፤
ኢዛ ሱንፋካ
ጶቁ ጶቁ ኦሶሰ።

4 ታኒ ጎዳ ኮያዲሰ፤
ኢዚካ ታሰ ዛሪዳሰ፤
ታኒ ያዪዛ ሚሽ ኡባፌ
ታና ኣሺዳሰ።

5 ኢዛኮ ጸሊዛ ኡባ
ሲንፋይ ፖኤሰ፤
ኢሰቲ ሙሌካ ዩላቴቴና።

6 ሃ ሂዬሳይ ዋሲዳሰ፤
ጎዳይ ኢዛ ዋሶዛ ሲዪዳሰ፤
ሜቶ ኡባፌ ኢዛ ኣሺዳሰ።

7 ጎዳ ኪታንቻይ
ጎዳሰ ያዪዛይታ ናጌሰ፤
ኢዚ ኢሰታ ዩሾዛን ጊዲዲ
ኢሰታ ኣሺሰ።

8 ጎዳይ ኪያ ጊዲዳይሳ
ዩሽ ቆፒቴ፤
ኢዛኮ ሸቂዳይ ኣንጃቲዳዴ።

9 ኢንቴኖ ጌሻ ኣሳቶ!
ጎዳሰ ያዪቴ፤
ኣይሰ ጊኮ ኢዛሰ ያዪዛ ኡባታሰ
ኣይኮይካ ፓጩና።

- 10 ጋሞቲ ሚዛዚ ጳዴን
 ኮሻቴቴስ፤
 ጎዳ ኮይዛይታስ ጊዲኮ
 ሎኦ ሚሺ
 ኣይኮካ ፓጮና።
- 11 ናይቶ! ሃ ዪቴ፤
 ታ ጊዛዝ ሲዪቴ፤
 ታኒ ኢንቴና
 ጎዳስ ያሻቴል
 ታማርሳና።
- 12 ኣዲሳ ላይል ዳናስ ዶሲዛይኔ
 ሎኦ ሚሺ ቤያናስ
 ኮይዛይ ኦኔ?
- 13 ኔ ኢንጸርሳ
 ኢታ ሃሳዮንታ ማላ ናጋ፤
 ኔ ዳናፔ ዋርዶይ
 ኬዞንታ ማላ ናጌታ።
- 14 ኢታፔ ሻኬታ፤
 ሎኦ ሚሺ ኦላ፤
 ሳሮቴል ኮያዳ ካላ።
- 15 ጎዳ ኣይፌይ ጸሎታኮ ጸሌስ፤
 ቃሴ ኢዛ ሃይሊ
 ኢስታ ዋሳ ኤዝጌስ።
- 16 ኢስታ ሃሳኢሲዛ ሚሺ
 ቢታፌ ጳይሳና ማላ፥
 ጎዳይ ኢታ ኦሊዛይታ
 ባ ሃንቆ ኣይፌን ጸሌስ።
- 17 ጸሎቲ ዋሴቴስ፤
 ጎዳይ ኢስታ ዋሶ ሲዬስ፤
 ኢዚካ ኢስታ ሜቶ
 ኡባፌ ኣሼስ።
- 18 ጎዳይ ዋዚናይ ሜቂዳይታስ
 ማታን ዴስ፤
 ቃሴ ሂዶታ ቃንጸዳይታካ

አሼሰ።*

- 19 ጸሎ አሰ ጋኪዛ ሜቶይ ዳሮ፤
 ጊዶ አቲን ጎዳይ
 ኢዛ ሄ ኡባፌ አሼሰ።
 20 ጎዳይ ኢዛ ሚንሲ ናጌሰ፤
 ኢዛ ሜቁላታፔ
 ኢሶይካ ሜቁና።
 21 ኢታታ ኢሰታ ኢታቴሊ ዋዳና፤
 ጸሎታ ኢጸዛይቲ ፒርዴታና።
 22 ጎዳይ ባ ኦሳንቻታ አሼሰ፤
 ኢዛኮ ባቃቲዳ ኦኒኔ
 ፒርዴቲና።

35

ዳዊቲ ዮሳ

- 1 አቤት ጎዳዉ!
 ታናራ ኤቄቲዛይታራ
 ኔኒ ኤቄታ፤
 ታናራ ኦሌቲዛይታራ ኔኒ ኦሌታ።
 2 ጎንዳሌኔ ጸሩሬ * ኦይካዳ፥
 ታና ማዳናሰ ዴንዳ።
 3 ታና ዬዴሊዛይታ ቦላን
 ኔ ቶራኔ ማሻ ዴንላ።
 ታና፥ «ታ ኔና አሺዛዴ» ጋ።
 4 ታ ሼምፖዮ ዋዳናዉ ኮይዛይቲ
 ዬላቴቶኔ ካዉዬቶ፤
 ታ ቦላ ኢታ ኦላና
 ማቄቲዛይቲ
 ካዉዬዲ ጉዬ ሲሜቶ።
 5 ጎዳ ኪታንቻይ

* 34:18 ሂደታ ቃንጸዳይታካ አሼሰ ጊዛይሳ ኢሲ ኢሲ ጌሻ ማጽፋ ቢርሼላን ባንታ
 አያናን ሊቁዳይታ አሼሰ ጌቲቲ ጸፊቲዴሰ። 34:20 ዮሃ 19:36 * 35:2 ጸሩሬ፥
 ጸሩሬ ጌቲቲዛይ ኦላ ዋዴ አሳይ ኦሌቲሼ ቲራ ካሚዛ ጋምባሌ ማላ ኦላ ማይኦ።

- ኢስታ ዬዴሶ፤
 ኢስቲካ ጫርኮ ሲንላን ዲዛ
 ሱላ ማላ ጊዴቶ።
- 6 ጎዳ ከታንቻይ ኢስታ ጎዶ፤
 ኢስታ ኦጌይካ ቋማኔ
 ሃሊሐ ጊዶ።
- 7 ጮ ታና ኦይካናዉ
 ባንታ ናርጸ ዋሊዳ፤
 ቃሴካ ጮ ታና ኩንዲሳናሰ
 ኦላ ቦኪዶ።
- 8 ኢስቲ ቆፖንታ ዲሺን
 ባሺ ኢስታ ቦላ ፑቱ ጎ፤
 ኢስቲ ዋሊዳ ዋጺማዴይ
 ኢስታ ኦይኮ፤
 ኢስቲ ኦላን ኩንዲ ቋዬቶ።
- 9 ሄ ዋዴ ታኒ ጎዳን ኡፋዬታና፤
 ኢዚ ኣሺዳ ጊሻሰ
 ታኒ ኡፋዬታና።
- 10 ታ ኩሚላ ኣሳቲላይ ኔና፤
 «ኣቤት ጎዳዉ!
 ቆሄቲዳይታ ቆሄዛይታ
 ኩሺፔ ኣሺዛይ፤
 ሂዬሳታኔ ሚቶታንቻታ
 ቦንቁዛይታ ኩሺፔ ናጊዛይ
 ሃራ ኔ ማላይ ኦኔ?» ጋና።
- 11 ኢታ ኣሳቲ ታ ኦሶንታ ሚሻን
 ታና ሞቲዳ፤
 ታ ኤርንታ ሚሻን ታ ቦላ
 ዋርዶ ማርካ ማርካሲዳ።
- 12 ታና ቢዛሲዳ፤
 ታ ሎኦ ኦላይሳ ኩሺ
 ኢታ ዛሪዳ።
- 13 ጊዶ ኣቲን ታኒ
 ኢስቲ ሃርጊዳ ዋዴ
 ማቃ ማይኣዲሰ፤
 ታ ኣሳቲላ ጸማን
 ዳቡርሳዲሰ፤

- ታ ዋሳስ ዛርይ ዳይዴስ።
 14 ታ ኢሻስ ዋይኮ ታ ዳቦስ
 ታ ሙዞቲዛ ማላ ሙዞታዲስ፤
 ኢያ ሃይቂን ካዮቲዛ አሳ ማላ
 ከሃ ዩካዲስ።
 15 ጊዶ አቲን ታኒ ቆጶቲን
 ኢስቲ ኡፋይሳን ኢሲ ቦላ ሺቂዳ፤
 ሄ ጌኔ አሳቲ ታ ኤርንታ ጋሶን
 ታና ዋዲዲ አጎንታ ኢዲዳ።
 16 ኢስቲ ኢታ አሳቲ ቂዲዛ ማላ
 ታና ቂዲዳ፤
 ዪሎስ ባ አች ጋርጨዳ።
 17 አቤት ጎዳዉ!
 ኔኒ አዉዴ ጋካናስ
 ታና ጮኡ ጋዳ ጸላኔ?
 ኢስታ ኢታ ኦሳፔ ታና አሻ፤
 ሃ ጋሞ ማላ አሳታፔ
 ታ አልኦ ሼምፖዮ ዋላ ኤካ።
 18 ሄ ዋዴ ጊታ ሺቆን
 ታ ኔና ጋላታና፤
 ጮራ አሳ ሺቆን ታ ኔና ሳባና።
 19 ዋርዶራ ታና ሞርኪዛይቲ
 ኡፋዬቶፊቶ፤
 ታና ጮ ኢዲዛይቲ
 ታ ቦላ ቂሞኦቶፔቶ።
 20 ኢስታ ዶናፔ
 ሳር ሃሳያይ ከዜና፤
 ቢታን ጮኡ ጊዲ ዲዛ አሳታ ቦላ
 ዮኦ ቃጼቴስ።
 21 ኢስቲ ባ ዶና ታ ቦላ ዶይዲ፥
 «ሄኮ ቤኣ!
 ኔ ኦሶይሳ ኑኒ
 ኑ አይፌን ቤኢዶስ» ጌቴስ።
 22 አቤት ጎዳዉ!

ኔኒ ሃይሳ ቤያሳ፤
ሄሳ ጊሻስ ኔኒ ጮኡ ጎፓ፤
ታፔካ ሃኮፋ።

23 አቤት ጎዳዉ፥ ታ ጸሳዉ!

ታ ጊሻስ አሌታ፤
ዴንዳ፤ ቤጋ፤
ታ ዶና ጊዳዳ ሞቲታ።

24 አቤት ጎዳዉ ታ ጸሳዉ!
ኔ ጸሎቴላ ማለ ታስ ፒርዳ፤
ታ ሞርኬታካ ኡፋይሶፋ።

25 ኢስቲ ባንታስ፥ «ሃሹ፥ ሃሹ፥
ኑኒ ኑ ዋዚናን
አሞቲዳይሲ ፖሌቲዴስ፤
ኑኒ ኢዛ ሚቲዶስ»
ጋና ማለ አሶፋ።

26 ታ ዋዬን ኡፋዬቲዛይቲ
ኡባይ ዩላቲቶኔ ካዉዬቶ፤
ታ ቦላን ኡቶሬቲዛይቲ
ዩላኔ ካዉሻቴል
ማይኤቶ።

27 ታኒ ሻቱሚዛይሳ ዶሲዛይቲ
ኡፋዬቲዱ «ሃሹ!» ጌቶ፤
ኢስቲ ኡባ ዋዴ፥
«ባ አይሌዛ
ሳሮቴላን ኡፋዬቲዛ
ጎዳይ ቶቁ ቶቁ
ጎ» ጌቶ።

28 ጋላስ ኩሜል ታ ኢንጻርሳይ
ኔ ጸሎቴሊኔ ኔ ጋላታ ኾታና።

36

ጎዳ አሳንቻ ዳዊቲ ዛማሬታ ካቦስ ዩጲዳ ማዛሙሬ

1 ኢታ አሲ ባ ዋዚናን
ጌኔ ቆፔስ፤
ኢዛ ጊዶን ጸሳስ

- ያሻቴሌ ዳና።
 2 ኢዛ ናጋራይ ቆንጨን ኢጸንታ ማላ
 ኢዚ ባርካ ባና ባሌጭሰ
 3 ኢዛ ዶናፔ ኬኢዛ ሃሳያይ
 ጌኔኔ ዋርዶ፤
 አጽ ኤራቴሌኔ ሎኦ ኦሶ
 ሙሌካ አጊዴሰ።
 4 ኢዚ ባ ሂጸን ዲሼ
 ጌኔ ቆፒሼ አቄሰ፤
 ባና ሎኦ ጊዶንታ
 ኦጌ ካሌጭሰ፤
 ኢታ ኢዚ ኢጾና።
 5 አቤት ጎዳዉ!
 ኔ ሚርና ሲቆይ ሳሎ ጋኬሰ፤
 ኔ ቱማቴላይካ
 ቦላ ሻራ ማላ ቶቄሰ።
 6 አቤት ጎዳዉ!
 ኔ ጸሎቴላይ
 ኡባፌ ቶቃ ዙማታ ማላ፤
 ኔ ፒርዳይካ ኡባፌ
 ዚቃ ጨማ ማላ፤
 ኔኒ አሳካ ዶኣካ
 ኢታፔ ናጋሳ።
 7 አቤት ጸሳዉ!
 ኔ ሚርና ሲቆይ
 አይ ኬና አልኦ!
 አሳይ ኔ ቄፌ ጊዶን
 ጌሚ አቴሰ።
 8 ኢሰቲ ኔሶን ኩሚዳ ማዳፌ
 ሚዲ ካሌቴሰ፤
 ኔኒ ኔ አንጆ ሻፋፔ
 ኢሰታ ኡሻሳ።
 9 አይሰ ጊኮ ዴኦ ፑልቶይ
 ኔ አቻን ዴሰ፤
 ኔ ፖኦን ኑኒ ፖኦ ቤኦሰ።

- 10 ኔና ኤሪዛይታስ
ኔ ሜርና ሲቆዛ አጎፋ፤
ሱሬታስ ኔ ኪያቴል ዲጎፋ።
- 11 እቶራንቻታ ቶሆይ
ታና ዬጶፎ፤
ናጋራንቻታ ኩሼይ
ታና ዬዴሶፎ።
- 12 ኢታ አሳቲ ኩንዲዳይሳ በኢቴ፤
ኢሰቲ ኩንዲዳ፤
ዴንዳናዉካ ዳንዳዬቴና።

37

ዳዊቴ ዬሳ

- 1 ኢታ እሴዛይታ
በኣዳ ዪሎቶፓ፤
ናጋራ እሴዛይታ ቃናቶፓ።
- 2 ኣይሰ ጊኮ ኢሰቲ
ማታ ማላ ኤሶን ማላና፤
ቦንጮ ማላ
ኢሰቲ ሹሊዲ ቆካና።
- 3 ኔኒ ጎዳን አማኔታ፤
ሎኦ ኦሶካ ኦሳ፤
ሂሰቲኮ ኔኒ ቢታ ቦላ
ፓላሂን ዳና።
- 4 ጎዳን ኡፋዬታ፤
ኢዚ ኔሰ
ኔ ዋዚና አሞ ኢማና።
- 5 ኔ ኦጌ ጎዳሰ ሃዳራ ኢማ፤
ኢዛን አማኔታ፤
ኢዚካ ኔሰ ኦሳና።
- 6 ኢዚ ኔ ጸሎቴሳ
ማላዶ ጸልቄ ማላ ኬሳና፤
ኔ ዮኦዛ ፒርዳካ
ሴታ ጋላሳ አዋ ማላ
ፖኢሳና።

7 ጎዳ ሲንላን ጮኤ ጋዳ
 ኢዚ ኦላና ጋካናሰ
 ዳንዳያን ናጋ፤
 ኢታ አሳቲ ዱሬቲኮኔ
 ኢሰታ ቆፋይ ፖሌቲኮ
 ኔ ኢሰታ ቦላ ዪሎቶፓ።

8 ሃንቆ አጋ፤
 ዪሎፌ ባቃታ።
 ዪሎቶፓ፤ አይሰ ጊኮ
 ሂሲ አሰ ሜቶን ዬጌሰ።

9 ኢታ ኦሊዛይቲ
 ቶቃሌቲ ቶያና፤
 ጊዶ አቲን ጎዳን
 ሂዶታ ኦሊዛይቲ
 ቢታ ላታና።

10 ኢታ ኦሊዛይቲ
 ጉላ ዋዴፔ
 ጉዬ ዴኤቴና፤
 ኔኒ ኢሰታ ኮዪዳኮካ
 ኢሰቲ ቤቴቴና።

11 ጊዶ አቲን አሸኬቲ ቢታ ላታና፤
 ኢሰቲ ጊታ ሳሮቴላን
 ኡፋዬቲ ዳና።

12 ኢታ አሳቲ
 ዪሎታ ቦላ ማቄቴቴሲኔ
 ባ አኙ ጋርጩቴሰ።

13 ጊዶ አቲን ጎዳይ
 ኢታታ ቦላን ሚጩሰ፤
 አይሰ ጊኮ ኢሰቲ ቶያና ጋላሳይ
 ጋኪዳይሳ ኢዚ ኤሬሰ።

14 ኢታ አሳቲ ሂዬሳታኔ
 ሜቶታንቻታ ቶይሳናዉ፥
 ሱሬቴላን ሄሜቲዛይታ

- ዋዳናው ባንታ ማሻ
 ሾዴቴሰኔ
 ባንታ ዋንዳፌዛ ዳፌቴሰ።
- 15 ጌዶ ኣቲን ኢሰታ ማሻይ
 ኢሰታሰ ዋዚና ኣይፌን ጌላና፤
 ኢሰታ ዋንዳፌይካ ሜቃና።
- 16 ጸሎሰ ዴኢዛ ጉሳይ
 ኢታ ኣሳታሰ ዲዛ
 ዳሮ ኣቆታፔ ኣጼሰ።
- 17 ኣይሰ ጊኮ
 ኢታታ ዋልቃይ ሜቃና፤
 ጸሎታ ጊዲኮ
 ጎዳይ ሚንፌፌሰ።
- 18 ጎዳይ ሱሬ ኣሳታ
 ኡባ ጋላሰ ናጌሰ፤
 ኢሰታ ላታይካ
 ሜርናሰ ኢሰታሰ ጌዳና።
- 19 ኢታ ዋዴን
 ሱሬ ኣሳቲ ዬላቴቴና፤
 ኮሻ ላይሰ ኢሰቲ ካሊ ማና።
- 20 ኢታ ኣሳቲ ጊዲኮ ሃይቃና፤
 ጎዳ ሞርኬቲ
 ባዞ ጨሻ ማላ ቆካና፤
 ጨዋ ማላካ ጮ ጳያና።
- 21 ኢታ ኣሲ ታልኢ ኤኪዲ
 ዛሪ ኤሬና፤
 ጌዶ ኣቲን ጸሎ ኣሲ
 ቃጼቲዲ ጌዴ ኢሜሰ።
- 22 ጎዳን ኣንጃቲዳይቲ
 ቢታ ላታና፤
 ጌዶ ኣቲን ኢዚ ቃንጊዳይቲ
 ጮ ጳያና።
- 23 ኣሳ ኦጌይ ጎዳ ኡፋይሲኮ

- ጎዳይ ኢዛዳ
 ታንጎ ካሌጼሲኔ ሚንጼሰ።
 24 ኢዚ ቋጹቲኮካ ኩንዶንታ ማላ
 ጎዳይ ባ ኩሼን
 ኦይኪ ኣሼሰ።
 25 ታኒ ካሴ ዩላጋ ሺን
 ሃኢ ጨማዲሰ፤
 ጊዶ ኣቲን ጸሎ ኣሲ
 ጮ ዩጌቲ ኣቲሺን፥
 ዎይኮ ኢዛ ዜሬላ
 ካላ ዎሲ ሚሺን
 ታኒ ሙሌካ ቤኣ ኤሪኬ።
 26 ኢዚ ኡባ ዎዴካ ኪያቴላ ኢሜሰ፤
 ዲቺ ባይንዳ ታልኤሰ፤
 ኢዛ ዛሬቲካ ኣንጀሰ ጊዳና።
 27 ኢታፔ ሃካ፤ ሎኦ ሚሽ ኦላ።
 ሂሰቲኮ ኔ ኣዱሳ ላይላ ዴኣና።
 28 ኣይሰ ጊኮ ጎዳይ ጸሎቴላ ዶሴሰ።
 ጸሳይ ባሰ ኣማኔቲዳ
 ኣሳታ ዩጌና፤
 ኢዚ ኢሰታ ሜርናሰካ ናጋና።
 ጊዶ ኣቲን
 ኢታታ ዜሬላቲ ቋማና።
 29 ጸሎቲ ቢታዮ ላታና፤
 ኢዚን ሜርናሰ ዴኣና።
 30 ጸሎ ኣሳ ዶናይ
 ኣቋ ኤራቴላ ዮቴሰ፤
 ኢዛ ኢንጻርሲካ ጸሎ ሃሳዬሰ።
 31 ኢዛ ጸሳ ዎጋይ ኢዛ ዎዚናን ዴሰ፤
 ኢዛ ቶሆይካ ሃርቹና።
 32 ኢታ ኣሲ ጸሎ ኣሰ
 ኢታ ኣይፌን ጸሌሲኔ
 ዎቋናዉካ ኮዪ ካሌሰ።
 33 ጊዶ ኣቲን ጎዳይ ጸሎ ኣሰ
 ኢዛ ኩሼን ዩጌና፤

ፒርዳስ ኤቂዛ ዋዴካ
ኢዛ ኣሉ ኢሜና።

34 ጎዳ ሂዶታ ኦላ፤
ኢዛ ኣዛዞካ ናጋ፤
ኢዚ ኔና ቢታ ላቲሳና፤
ዛሪዲካ ቦንቻና፤
ኢታ ኣሳቲ ጶሚ ጳይሺን
ኔ ቤያና።

35 ታኒ ኢሲ ሜንጾ ኢታ ኣሲ
ዋላ ማላ ዳዩዲሳ ቤያዲሰ።

36 ጊዶ ኣቲን ታኒ ሄ ሶሆራ
ሲማዳ ካንሉዛ ዋዴ
ኢዚ ጳይዴሰ፤
ታ ኮዩንካ ኢዚ ቤቲቤና።

37 ኣኔ ሎኦ ኣሰ ኣኬካ፤
ሱሬ ኣሰ ቤኣ፤
ሳር ኣሳሰ ወርሴሉ ሎኦ ጊዳና።

38 ጊዶ ኣቲን ናጋራንቻቲ
ሙሌራ ጳያና፤
ኢሰቲ ወርሴላን ጶማና።

39 ጸሎታሰ ኣቶቴሉ ጎዳፔ ዩሰ፤
ሜቶ ዋዴ ኢዚ ኢሰታሰ ጌሚዛሶ።

40 ጸሎቲ ጎዳ ጉዬ ኣጲዳ፤
ሄሳ ጊሻሰ ኢዚ ኢሰታ
ማዴሰኔ ኣሼሰ፤
ኢታታ ኩሼፔካ
ዋሉ ኤኬሰ።

38

ሃሳኢሶስ ዳዊቲ ዩዲዳ ማዛሙራ

1 ኣቤት ጎዳዉ!
ኔ ሃንቆን ታና ቤርፓ፤
ኔ ዩሎን ታና ሙርፓ።

2 ኔ ዋንዳፌ ዩሺ ታና ጫዲዴሰ፤
ኔ ኩሼይካ

- ታና ናቂ ኦይኪዴሰ።
 3 ኔ ሃንቆፌ ዴንዲዲይሳን
 ታ ቦላይ ፓዬና፤
 ታ ናጋራ ጋሶን
 ታ አሳቴላይ ፓፓቲዴሰ።
 4 ታ ቆሆይ ታና ሚቲዴሰ፤
 ዴጾ ቶሆ ማላ
 ታና ናቂ ኦይኪዴሰ።
 5 ታኒ ኤያቴላን ኦሊዳ
 ናጋራ ጋሶን
 ታ ማዲንላይ ጸንቂዴሰ።
 6 ታኒ ሆካዲሲኔ ቁናዲሰ።
 ጋላስ ኩሜሐ
 ዬካሼ ፔአዲሰ።
 7 ታ አሾይ ታማ ሚሻ ማላ
 ጸጌሰ፤
 ታ ቦላይካ ፓዬና።
 8 ታኒ ኢጾታዲሲኔ ኒፊፊ ጋዲሰ፤
 ታ ዋዚናይ
 ጨጨዳ ጊሻሰ ዋሳይሰ።
 9 አቤት ጎዳዉ!
 ታ አሞ ኡባ ኔ ኤራሳ፤
 ታኒ ጨጨዛይሲ
 ኔፔ ጌሚቤና።
 10 ታስ ዋዚና አይፌን ጉፔሰ፤
 ታ ዋልቃይ ጨንጊዴሰ፤
 ታ አይፌፔ ፖኦይ ኪቺዴሰ።
 11 ታ ማዲንላ ጋሶን
 ታ ሾሮቲኔ ታ ላጌቲካ
 ታፔ ባቃቲዳ፤
 ታ ዳቦቲካ ታፔ ሃኪዳ።
 12 ታና ዋቃናዉ ኮይዛይቲ
 ባንታ ናርጸ ታና አይካና ዋሊዳ፤
 ታና ቆሃናዉ ኮይዛይቲ፤
 «ናጋሻ፤ ኩኒ ኔና
 ዴማና» ጊዲ

ታ ቦላ ማንዲዳ፤
 ጋላስ ኩሜል ታ ቦላ
 ጌኔን ዲላቲዳ።

- 13 ሄ ዋዴ ታኒ ሲዮንታ
 ቱሌ አሳ ማላ ጊዳዲስ፤
 ደናካ ፖጎንታ
 ዲዴ አሳ ማላ ጊዳዲስ።
- 14 ቱማፔ ታኒ ሃይሉ ሲዮንታ
 አሳ ማላኔ
 ደናይ ሃሳዮንታ
 አሳ ማላ ጊዳዲስ።
- 15 ጊዶ አቲን አቤት ጎዳዉ!
 ታኒ ኔናን ሂዶታ አላይስ፤
 አቤት ታ ጎዳዉ!
 ኔኒ ታስ ዛሮ አማ።
- 16 ታኒ ጎዳ፥
 «ታ ቶሆይ ሃንዳራሺን፥
 ታ ሞርኬቲ፥ «ኢዛስ ሃሹ»
 ጋና ማላኔ
 ታ ቦላ ጨቄታና ማላ
 አሶፋ» ጋዳ ዋሳይስ።
- 17 ታኒ ኩንዳና ማታዲስ፤
 ታ ሳኮይካ ፓጽንታ ኢዲዴስ።
- 18 ታ ናጋራይ ታና ሜቲዴስ፤
 ሄሳ ጊሻስ ታ ቆሆ
 ታ ኔስ ፓጻይስ።
- 19 ታ ሞርኬቲ ጊታኔ ዋልቃማ፤
 ታና ጮ ኢዲዛይቲ ጮራ።
- 20 ታኒ ሎኦ ኦሶ ኦሊን
 ታስ ኢታ ዛሪዛይቲ
 ታኒ ሎኦ ካሊዛ ጊሻስ
 ታናራ ኤቄቲቲስ።
- 21 አቤት ጎዳዉ!
 ኔ ታና ዬጎፋ፤
 አቤት ጸሳዉ

- ታፔ ኔኒ ሃኮፋ።
 22 አቤት ታና አሺዛ ጎዳዉ!
 ታና ማዳናስ ኤሶታ።

39

- ዳዊቲ ዛማሬታ ካቦ ኤደታኔስ ዩጲዳ ማዛሙራ
- 1 ታኒ፥ «አንጸርሳን
 ናጋራ ኦሶንታ ማላ
 ታኒ ታ ኦጌ ናጋና፤
 ኢታ አሳቲ
 ታ ሲንፋን ዲዛ ዎዴ
 ታ ዶና ጎርዳና» ጋዲስ።
- 2 ታኒ ዱዴ ማላ ጮኡ ጋዲስ፤
 ሃራይ አቶሺን ሎኦ ሚሽ
 ሃሳያናፔካ ጮኡ ጋዲስ፤
 ጊዶ አቲን ታ ዋዬይ
 ሃ ዳሪዴስ።
- 3 ታ ዎዚናይ ቆፋን ሴሊዴስ፤
 ታ ዩሻ ቆፒሺን ታማ ማላ
 ኤጲ ኬዚዴስ።
 ሂስቲን ታኒ ሃሳያ ዶማዲስ።
- 4 «አቤት ጎዳዉ! ታ ዴኦ ዉርሴፋኔ
 ታስ ዴአናስ አቲዳ ጋላሳታ
 ታና ቤሳ።
 ቃሴ ታ ዳና ላይፋይ
 አይ ኬና ቃንፋኮ
 ታና ኤሪሳ።
- 5 ኔኒ ታ ላይፋ
 ቂ ታቆኮ ኬና ኬሳዳሳ፤
 ታ ላይሊ ኔ ሲንፋን
 ቆዳን ባይንዳ ማላ፤
 ቱማፔ አሲ ኡባይ
 ኢሲቶ አቂ ቢዛ ጫርኮ ማላ።
- 6 ቱማፔ አሳ ዱሲ ኤሾ ማላ፤
 ጮ ሜላ ሃዳ ሃሮ
 ሺሾን ዳቡሪስ፤
 ጊዶ አቲን ኦኒ ኤካናኮ ኤሬና።

- 7 «አቤት ጎዳዉ!
 ኔፔ አቲን ሃራ
 ኦናኮ ጴሎ?
 ታ ሂዶታይ ኔናና።
- 8 ታ ሞሮ ኡባፌ ታና አሻ፤
 ኤያታ ሚቻሰ ታና ኬሶፋ።
- 9 ሃይሳ ኡባ ኦሊዳይ
 ኔና ጊዲዳ ጊሻሰ
 ታኒ ጮኡ ጋና፤
 ደናካ ፖጊኬ።
- 10 ኔ ቦሻ ታ ቦላፌ ደንላ፤
 ኔ ዋልቃማ ሾቻ ጋሶን
 ታ ዳቡራዲሰ።
- 11 ኔኒ አሰ ኢዛ ናጋራ ጊሻሰ
 ሴራሳኔ ሙራሳ፤
 ኢዛሰ ዲዛ አልኦ ሚሽ ባዳ ማላ
 ኔ ዉርሳሳ፤
 ቱማፔ አሲ ኡባይ ኢሲቶ
 ጫርኪ አጂዛ ጫርኮ ማላ።
- 12 «አቤት ጎዳዉ!
 ታ ዋሳ ሲያ፤
 ታና ማዳናሰ ታ ዋሶዛ ኤዘጋ።
 ታ አፋንላ ጮኡ ጎፓ፤
 ታኒ ካሴ ታ አዋታ ኡባ ማላ
 ቤቴ አሲኔ ኢማል ጊዳዳ
 ኔ ኬላን ዳይሰ።
- 13 ታኒ ጉዬ ሲማ ያናሰ
 ዳንዳዮንታሶ ባናፔ ካሴ
 ጉላ ዋዴ ኡፋዬታና ማላ
 ታና ኣጋሻርኪ!» ጋዲሰ።

40

ዳዊቲ ዛማሬታ ካቦሰ ዩጲዳ ማዛሙራ

- 1 ታኒ ጎዳ ዳንዳያን ናጋዲሰ፤
 ኢዚ ታኮ ሲሚዲ
 ታ ዋሳ ሲዩዳሰ።
- 2 ጨማ ኦላፌ፥ ሚቲዛ ኡርቃፌ

ታና ኬሲዴሰ፤
 ታ ቶሆታ ዛላ ቦላ ኬሲዴሰ፤
 ቃሴ ታ ሄሜላ ሚንሒዴሰ።
 3 ኢዚ ታ ዶናን
 ኦራላ ማዛመራ ዋሒዴሰ፤
 ሄ ዬላይ፤
 «ኮ ጸሳይ ጋላቴቶ» ጊዛዛ።
 ዳሮቲ ቤኢዲ ያያናኔ
 ጎዳን አማኔታና።

4 ጎዳን አማኔቲዛይ፤
 ኦቶራንቻታኮ ሲሞንታይ፤
 ዋርዳንቻታኮ ጼሎንታይ
 አንጃቲዳዴ።

5 አቤት ታ ጎዳዉ!
 ኔኒ ዳሮ ማላሊሲዛ
 ኦሶ አላዳሳ፤
 ኔናራ ሊኬቲዛይ
 ኦኒኔ ባዋ!
 ኔኒ ኩሰ ቆፒዳ ሎኦ ቆፋ
 ኦኒኔ ቆዳናዉ ዳንዳዬና፤
 ሄሲ ታኒ ዮቲን
 ዉሪዛዝ ጊዴና።

6 ኔኒ ያርሾኔ
 ሙጹዋታ ኮያቤካ፤
 ጸጊዛ ያርሾኔ
 ናጋራ ያርሾካ
 ኔኒ ሳሞታቤካ፤
 ጊዶ አቲን ሲያና ማላ
 ታሰ ሃይላታ ዶያዳሳ።

7 ሄሳፌ ጉዬ ታኒ፤
 «ጸላ ማጻፋን
 ታ ጊሻሰ ጸፊቲዳ ማላ
 ሄኮ ሃኢ ታኒ ያዲሰ።

8 አቤት ታ ጸሳዉ!
 ታኒ ኔኒ ኮይዛይሳ

ኦላናሰ ዶሳይሰ፤
ኔ ዋጋይ ታ ዋዚና
ጊዶን ዴሰ» ጋዲሰ።

- 9 ጊታ ሺቆን ታኒ ጸሎቴላ
ሚሺራቾ አዋጃዲሰ።
አቤት ጎዳዉ!
ኔኒ ኤሪዛ ማላካ
ታኒ ታ ዶናን
ዮቲዛይሳ አጊኬ።

- 10 ታኒ ኔ ጸሎቴላ
ታ ዋዚናን ቆታቤኬ፤
ኔኒ አማኔቲዛይሳኔ
አሺዛይሳ ታ ዮታዲሰ።
ቃሴ ኔ ሲቆኔ
ኔ ቱማቴላ
ጊታ ሺቆዛፔ ጌንላቤኬ።

- 11 አቤት ጎዳዉ!
ኔ ማሮቴላ
ታፔ ሃሶፋ፤
ኔ ሲቆይኔ ኔ ቱማቴላይ
ታና ኡባ ዋዴ ናጎ።

- 12 አይሰ ጊኮ ቆዳይ ባይንዳ
ኢታ ሚሺ ታና ዶዲዴሰ፤
ታ ኢታቴላ ዳሪዳ ጊሻሰ
ታ ጼላናዉ ዳንዳይኬ።
ታ ኢታ ኦሶይ
ታ ሁኤ ቢናናፔ ዳሪዴሰ፤
ታ ዋዚናይ ታ ጊዶን ሴሪዴሰ።

- 13 አቤት ጎዳዉ! ታና አሻ፤
አቤት ጎዳዉ!
ታና ማዳናሰ ኤሶታ።

- 14 ታና ዋቋናዉ ኮይዛይቲ
ሙሌካ ዩላቴቶኔ ካዉዬቶ፤
ታኒ ቆሂታናይሳ አሞቲዛይቲ
ካዉዪዲ ጉዬ ሲሜቶ።

- 15 ታ ቦላ፥
 «ኢዛስ ሃሹ! ሃሹ!» ጊዳይቲ፥
 ባ ሁኤስ ዩላን ዳጋሜቶ።
- 16 ጊዳ ኣቲን ኔና ኮይዛ ኡባቲ
 ኔናን ኡፋዬቲቶኔ
 ሃሹ ጌቶ፤
 ኔ ኣቶቴላ ዶሲዛ ኡባቲ፥
 «ጎዳይ ጊታቶ!» ጌቶ።
- 17 ታኒ ሂዬሳኔ ሜቶታንቻ፤
 ጎዳይ ታስ ቆፔስ፤
 ታና ማዲዛይኔ
 ኣሺዛይ ኔና፤
 ኣቤት ታ ጸሳዉ
 ታና ኤሶን ማዳ።

41

ዳዊቲ ዛማሬታ ካቦስ ዩጲዳ ማዛሙሬ

- 1 ሂዬሳስ ቆፒዛ ኣሲ ኣንጄቲዳይሳ፤
 ሜቶ ጋላስ ጎዳይ ኢዛ ኣሺስ።
- 2 ጎዳይ ኢዛ ናጊዲ ፓጸ ዋሕስ፤
 ኢዚካ ቢታ ቦላ ኣንጄታና፤
 ጎዳይ ኢዛ ሞርኬታስ
 ኢዛ ኣሊዲ ኣሜና።
- 3 ጎዳይ ኢዚ ሃርጌቲዲ
 ሂጸን ዲሺን ማዴስ፤
 ሳኬቲንካ ኢዛ ፓሕስ።
- 4 ታኒ ጊዲኮ፥ «ኣቤት ጎዳዉ!
 ታኒ ኔና ቆሂዳ ጊሻስ
 ታና ማራ፤
 ሃርጌፌ ታና ፓላ» ጋዲስ።
- 5 ታ ሞርኬቲ ታ ቦላ
 ኢታ ሚሽ ሃሳይዲ፥
 «ኢዚ ኣዉዴ ሃይቃንዳሻ?
 ቃሴ ኢዛ ሱንሳይካ
 ኣዉዴ ዳያንዳሻ?» ጌቴስ።

6 ታና ቤያናው ዪዛ ኦኒካ
 ባ ዋዚናን
 ኢታ ሚሽ ሱሊሽ
 ቆጼፔ ቆሞን ሃሳዬስ፤
 ካሬ ኬዚዲካ ዚጊርሰ ፑኔስ።

7 ታና ኢጺዛ ኡባቲ
 ዙፔቲዲ ታ ቦላን
 ሳሱኬቴቴስ፤
 ኢታ ሚሽ ታ ቦላ
 ጋካና ማላ አሞቴቴስ።

8 «ኢዛ ኢታ ሃርጌይ ኦይኪዴስ፤
 ኢዚ ሄ ኢቺዳሶፔ
 ሙሌካ ዴንዴና» ጌቴስ።

9 ሃራይ አቲን ታኒ አማኔቲዛ
 ታ ሲቆ ላጌይ፥
 ታናራ ኢሲ ማዳፌ ሚዳይ
 ታ ቦላ ቶሆ ዴንሊዴስ።

10 ጊዶ አቲን አቤት ጎዳዉ!
 ኔኒ ታና ማራ፤
 ታኒ ሃሎ ኬሳና ማላ
 ታና ሃርጌፌ ፓላ።

11 ታ ሞርኬይ
 ታና ጸኖንታይሳን
 ኔ ታና ዶሲዛይሳ
 ታ ኤራይስ።

12 ኔኒ ታና
 ታ ሱሬቴላ ጊሻስ ማዳሳ፤
 ኔ ሲንላን ታና
 ሜርናስ ዋላሳ።

13 ጎዳ ኢስራኤሌ ጸሳይ
 ሜርናፔ ሜርና
 ጋካናው ጋላቴቶ።
 አሚን! አሚን!

ናሞአንሶ ማጽፋ

42

(ማዛ 42—72)

ዛማሬታ ካቦስ ቆሬ ናይቲ ሃሳኣን ሺሺዳ ጊንጾ

1 ወሻይ ፑልቶ ሃል ላሞቲዛ ማላ፥

ኣቤት ጸሓው፥

ታኒካ ኔና ላሞታይሰ።

2 «ታ ሸምፖፖ

ታኒ ባዳ ጸሓ ሲንል

ቤያናይ ኣዉዴሻ?» ጋዳ

ጸሓ፥ ዴኦ ጸሓ ሳማታዲሰ።

3 ኣሳይ ኡባቶ፥

«ኔ ጸሲ ኣዋን ዲዜ?»

ጊዛ ዋዴ ታሰ ጋላሲኔ ኦማርሰ

ኣፋንሉ ቁማ ጊዲዴሰ።

4 ታ ዋዚናያ ጨጨፋን ጊዶራ

ሴራሼ ሃይታንታ ኣኬካዲሰ፤

ዳሮ ዋዴ ታ ጸሓ ኬል

ካሌፋሽ

ኢሊሊሳኒኔ ጋላታ ዬፋን

ባኣሌ ቦንቻና

ሸቂዳ ዳሮ ኣሳ ጊዶራ

ታ ዋና ቢዛኮ ኣሙሳዲሰ።

5 ታኒ ኣይሰ ሂዶታ ቃንጸዚና?

ቃሴ ኣይሰ ጨጨዚና?

ታኒ ጸሓን ኣማኔታይሰ፤

ታና ኣሺዛ ታ ጸሓ

ታ ቡሮ ጋላታና።

6 ታ ጸሓዉ!

ታ ዋዚናያ ጨጨዲሰ፤

ሄሳ ጊሻሰ

ታኒ ዮርዳኖሴ ቢታን

ሄርሞኔ ዙሞቡላ

ሚዛሬ ዙማ ቦላ ኤቃዳ

ኔና ታ ቆፓና።

7 ኔ ፒሳ ጉንፋን

ጨማይ ጨማሰ ኣንኬሰ፤

ቃሴ ኔ ዳምባላይኔ
ኔ ጫርኮ ኡባይ
ታ ቦላራ ኣጲዴሰ።

- 8 ኅዳይ ባ ሜርና ሲቆ ጋላስ
ታስ ኪቴስ።
ታኒካ ኦማርስ ኢዛስ
ጋላታ ማዛሙሬ ሺሻይስ፤
ሄሲካ ታ ዴኦ ጸሳስ
ሺሺዛ ዋሳ።

- 9 ታ ጸሳዉ ታስ ዛላዉ!
«ኔ ታና ኣይስ ደጋዲ?
ታ ሞርኬቲ ታና ቆሂሺን
ታ ጩጫሺ
ኣይስ ዴኦ?» ጋይስ።
10 ታ ሞርኬቲ ታና ኡባ ዋዴ፥
«ኔ ጸሳይ ኣዋን ዲዜ?»
ጊዲ ዮኦን ታና ጫዴቴስ፤
ሚቁሊካ ሚንሊ ጫዴቴስ።

- 11 ታኒ ኣይስ ሂዶታ ቃንጸዚና?
ቃሴ ኣይስ ጩጫዚና?
ታኒ ጸሳን ኣማኔታይስ፤
ታና ኣሺዛ ታ ጸሳ
ታ ቡሮ ጋላታና።

43

- 1 ኣቤት ጸሳዉ! ኔ ታስ ፒርዳ፤
ጸሳ ኤሮንታ ካዋቴፋታራ
ኔ ታ ጊሻስ ሞቴታ፤
ጪሚዛ ኣሳታፔኔ
ኢታ ኣሳታፔ ታና ኣሻ።
2 ታ ጸሳዉ! ታስ ኔ ሚኖ ሚጸ፤
ሂስቲን ኔ ታና ኣይስ ኣጋዲ?
ታ ሞርኬቲ ታና ቆሂሺን
ታ ጩጫሺ ኣይስ ዴኦ?
3 ኔ ፖኦኔ ኔ ቱማ ታስ ኪታ፤
ኢስቲ ታና ካሌሌቶ፤

ጉዳ ጌሻ ዙማ ቦላ
 ኔ ዲዛሶ ታና ጋፊቶ።
 4 ሄ ዎዴ ታኒ
 ታና ኡፋይሲዛ ጸሳኮ ባና፤
 ኔሰ ያርሾ ያርሺዛሶዛ ባዳ
 ኔሰ ጎይናና፤
 አቤት ጎዳ ታ ጸሳዉ!
 ታኒ ዲላን ኔና ሳባና።

5 ታኒ አይሰ ሂደታ ቃንጸዚና?
 ቃሴ አይሰ ጨጫዚና?
 ታኒ ጸሳን አማኔታይሰ፤
 ታና አሺዛ ታ ጸሳ
 ታ ቡሮ ጋላታና።

44

ዛማሬታ ካቦስ ቆሬ ናይቲ ሃሳኣን ሺሺዳ ጊንጾ

1 አቤት ጸሳዉ!
 ቤኒ አፏዳ ዎዴ
 ኔ ኦሊዳ ጊታ ሚሻ
 ኔኒ ሲዪዶስ፤
 ኑ አዋታ ዎዴካ
 ኔ ኦሊዳይሳ
 ኢሰቲ ኑሰ ዮቲዳ።
 2 ካዎቴላታ ኔኒ ኔ ኩሼን
 ጎዳ ኬሳዳሳ፤
 ኑ አዋታ
 ኢሰታ ቢታን ቶካዳሳ፤
 ዴራ ሊቂሳዳሳ፤
 ጊዶ አቲን
 ኔ ካዎቴላታ አሳዳሳ።
 3 ኢሰቲ ባንታ ማሻን ኦሊዱ
 ሄ ቢታ ኦይኪቤቴና፤
 ኢሰቲ ጸኒዳይ
 ባ ቄሴ ሚኖቴላን ጊዴና።
 ጊዶ አቲን ኔኒ
 ኢሰታን ኡፋዬቲዳ ጊሻስ
 ኔ ኡሻቻ ኩሼይ፤

ኔ ቄሴይኔ
ኔ ሲንሳ ፖኦ ዋልቃይ
ሄሳ ኦሊዴሰ።

- 4 ታ ጸሳዉ ታ ካዎይ ኔና፤
ያቆቤ ዜሬላሰ
ጸኖ ኢሚዲይ
ጸሶ ኔና።
- 5 ኔናን ጊዲዲ ኑ ሞርኬታ
ኑ ኦሊ ጸናና፤
ኔ ሱንሳን ኑናራ ኤቄቲዛይታ
ኑኒ ዬቆና።
- 6 ታኒ ታ ቶራን አማኔቲኬ፤
ታ ጊላ ማሻይካ
ታና አሼና።
- 7 ጊዶ አቲን ኔኒ ኑና
ኑ ሞርኬታፔ አሻሳ፤
ቃሴ ኑና ኢዲዛይታ
ኔኒ ካዉሻሳ።
- 8 ኑኒ ኡባ ዎዴ
ጸሳን ጨቄቶሰ፤
ኔ ሱንሳካ ሜርናሰ ሳቦሰ።
- 9 ሃኢ ጊዲኮ ኔ ኑና አጋዳሳ፤
ቃሴካ ካዉሻዳሳ፤
ኔኒ ኑ ኦላንቻታራ
ኢሲፌ ኬዚዛይሳ አጋዳሳ።
- 10 ኑ ሞርኬታ ሲንሳፌ
ኑና ባቃቲሳዳሳ፤
ኑናራ ኤቄቲዛይቲ
ኑ አቆታ ቦንቂዳ።
- 11 ኔኒ ኑና ዶርሳታ ማላ ሹካሰ
አላ ኢማዳሳ፤
ቃሴ ካዎቲላታ ጊዶን
ኑና ላላዳሳ።
- 12 ኔኒ ኔ አሳ ሂራይሶን ባይዛዳሳ፤
ጊዶ አቲን ዎጄ ዴማቤካ።

- 13 ኔኒ ኑና ኑ ሾርታስ ጫሻስ፥
 ቃሴ ኑ ሄራን ዲዛይታስ ቂዴሴኔ
 ሚቻስ ኬሳዳሳ።
- 14 ኔኒ ኑና ካዋቲላታ ጊዶን
 ሃይሲኤስ ኬሳዳሳ፤
 ኢስቲ ባንታ ሁኤ ኑ ቦላ
 ቃሊ ቃሊ
 ቂቆና ማላ አላዳሳ።
- 15 ታ ኡባ ዋዴ ካዉያዲስ፤
 ታ ሲንሉ ዬላ ማይኢዴስ።
- 16 ሄ ኡባይ ታና ጋኪዳይ
 ታ ሞርኬቲ ታ ቦላ
 ሃሎ ኬሲሺን
 ሃራቲ ካዲዲ ሚጨዳ ጊሻሳ።
- 17 ኑኒ ኔና ደጎንታ ዲሺን
 ዋይኮ ኔ ጫቆ ቃላ
 ፓጪንቸንታ ዲሺን
 ሃይሲ ኡባይ ኑ ቦላን ጋኪዴስ።
- 18 ኑ ዋዚናይ ኔፔ
 ጉዬ አንዱዲቤና፤
 ኑ ቶሆይ ኔ ኦፔፔ
 ጋጾ ኬዚቤና።
- 19 ጊዶ አቲን ኔኒ ኑና
 ሚንጮሬላዳ
 ደኣ ኦጌን ዬጋዳሳ፤
 ጊርዲ ጊዳ ቋማንካ አላዳሳ።
- 20 ኑ ጸሳ ሱንሐ
 ኑኒ ባሊዳ ጊዲኮ
 ኑ ኩሼካ ኤቃ ጸሳታ
 ዋሳናስ ሚጨዳኮ፥
- 21 ሃይሳ ኤርይ ጸስ ጸናኔ?
 ኢዚ ዋዚናን ጌሚ ዲዛ
 ጹራ ኡባ ኤሬስ
- 22 ጊዶ አቲን ኡባ ጋላስ
 ኔ ጊሻስ
 ሃይቆስ ኣዲ ኢሜቲዶስ፤

ሹካስ ኤፊዛ ዶርሳታ ማላካ
ቆዴቲዶስ።

- 23 አቤት ጎዳዉ ቤጋ!
አይስ ቋስካይ?
ዴንዳ! ሜርናስ ኑና አጎፋ።
- 24 ኔ ሲንላ ኑፔ አይስ ጌንላይ?
ኑ ቆሄቴላኔ
ኑ ኡንኤቴላ አይስ ዶጋይ?
- 25 ኑኒ ዱጌ ጉዱላን ዩጌቲዶስ፤
ቢታ ቦላካ ፖርጩ ጌዶስ።
- 26 አቤት ጎዳዉ፥
ኑና ማዳናስ ዴንዳ!
ኔ ሜርና ሲቆን ኑና ዋዛ።

45

ጨሻታ ገጊሶ ጌቴቲዛ ዬላን ቆሬ ናይቲ ዛማሬታ ካቦስ ዩጲዳ
ማዛሙሬ

- 1 ታ ዋዚናፔ ሎኦ ቆፋይ ፑልቴስ፤
ታ ገግሲዳ ገንጾዛ
ካዋዛ ሲሳና፤
ታ ኢንጻርሳይካ
ኤራንቻ ጸፌ ቢኢሬ ማላ።
- 2 አሳ ኡባፌ ኔኒ ኬሃ ሎኣሳ፤
ኔ ፑላን ኩሚዳ
ቃላ ሃሳያሳ፤
ሄሳ ገሻስ ጸሲ ኔና
ሜርናስ ኣንጂዴስ።
- 3 ዋልቃማ ካዋ!
ኔ ማሻ ገጻ፤
ቦንቾኔ ቲማ ማይኣ።
- 4 ቱማቴላስ፥
ኣሽኬቴላሲኔ ጸሎቴላስ
ኔ ቱማቴላ ማይኣዳ

- ኦላ ጸናናሰ ሲንሐ ሆርዶፋ፤
 ኔ ኡሻቻ ኩሼይ
 ማላሊሲዛ ሚሽ ቤሶ።
 5 ኔ ዪሻቲ ቃራታ፤
 ኢሰቲ ካዎ ሞርኬታ
 ዎዚና አይፌን ጫዳና፤
 ካዎቴላቲ ጸኔቲዲ
 ኔ ቶሆ ጋርሳን ኩንዳና።
 6 አቤት ጸሳዉ!
 ኔ ካዎቴላ አልጋይ
 ሚርናሰ ዳና፤
 ኔ ካዎቴላ ጉፊይካ
 ሱራቴላ ጉፊ።
 7 ኔኒ ጸሎቴሐ ዶሳሳ፤
 ማካላቴሐ ኢጸሳ።
 ሄሳ ጊሻሰ ጸሳይ፥
 ኔ ጸሳይ
 ኔ ላኔታፔካ አሊዲ
 ኔና ኡፋይሳ ዛይቲን ቲይዴሰ።
 8 ካርቤፌ፥ ጎዳሬ ኡላፌኔ
 ቡርጉዴፔ
 ኦሴቲዳ ሺቶን ኔ ማይኦይ
 ጫጫፌቲዲ ሳዎ ቱኑ ጌሰ፤
 ዳንጋርሳ ዛሌን አሌቄቲዳ
 ኔ ካዎቴላ ኬላን
 ዲዴቲዛ ዲላይኔ
 ማሲንቆይ ኔና ኡፋይሴሰ።
 9 ካዎቴላ ኬላን ዲዛ
 ማጫሳታ ጊዶን
 ካዎታ ማጫ ናይቲ ዴቲሰ፤
 ጎዳቴያ ጌሻ
 ዎርቃን አሌቄታዳ
 ኔፔ ኡሻቻ
 ባጋን ኤቃዱሰ።
 10 ታ ናዬ፥ ኤዝጋ ሲያ፤
 ኔ ሃይላ ሃ ዬጋ።

ኔ ዴራኔ

ኔ አዋ ኬላ ደጋ።

11 ኔ ሜቆ ሎኦይ

ካዋ ዋዚና ኤኪዴሰ፤

ኢዚ ኔሰ ጎዳ ጊዲዳ ጊሻሰ

ኔ ኢዛ ቦንቻ።

12 ጸርሴ አሳይ ኢዚሰ

ኢሞታ ኤኪ ያና፤

ዱሬቲ ኔና አዳሻና።

13 ካዋ ናያ ካዋ ኬላ ጊደን

አይ ማላ ሎኦዜ!

ኢዚ ማይኦይካ ዋርቃን አሌቂዴሰ።

14 ባ አሌቆ ማይኦዛ ማይኦዳ

ካዋዛኮ ባዉሰ፤

ኢዚ ላጌ ጊዲዳ ጌላኦቲ

ኢዞ አዠቢ ኢዛሰ ኤኪ ዪዳ።

15 ኢሰቲ ኡፋዬቲሼኔ

ሆሞቦጨሼ ዪዲ

ካዋዛ ኬላ ጌሌቲሰ።

16 ካዋ! ኔ ናይቲ

ኔ አዋታ ሶሆ ላታና፤

ኔኒ ኢሰታ ቢታ

ኡባ ቦላን ሹማና።

17 ታኒ ኔ ሱንሊ ዩሌታ ኡባን

ሃሳኤታና ማላ ኦላና።

ሄሳ ጊሻሰ አሳይ

ሜርናሰ ኔና ሳሳና።

46

ጌላኦ ናይታ ኤዶ ጌቴቲዛ ዩላን ቆሬ ናይቲ ዛማሬታ ካቦሰ
ዩዲዳ ማዛሙሬ

1 ጸሲ ኮኒ ሺቂ አቲዛሶኔ

ኑሰ ዋልቃ፤

ኑና ሜቶይ ጋኪዛ ዋዴ

ማዳናሰ ኢዚ ኡባቶ

ማታን ዴሰ።

2 ሄሳ ጊሻሰ ቢታይ ቃጺኮ፥

- ዙማቲካ ዱጌ አባን ጌሊኮ
 ኑኒ ያዮኩ።
 3 አባ ደምባላይካ
 ጉሚዲ ሆሞቲኮ፥
 ኢዛ ዋልቃማ ሃኖን
 ዙማቲ ኮኮርኮካ
 ኑኒ ዳጋሞኩ።
 4 ጸሳ ካታማን፥
 ኡባፌ ቋቃ ጸሳይ ዲዛሶን
 ኡፋይሲዛ ሻፋቲ ዴቴሰ።
 5 ጸሲ ኢዚ ጊደን ዲዛ ጊሻሰ
 ሄ ካታማያ ቃጹኩ፤
 ዋንታ ማላደራ ጸሲ
 ኢዛ ማዳና።
 6 ካዋቲላቲ ማካላን ዴንዲዳ፤
 ካዋቲካ ኩንዲዳ፤
 ኢዚ ባ ቃላ
 ቋቁ ሂስቲ ሲሲዴሰ፤
 ቢታይካ ሴሪዴሰ።
 7 ኡባፌ ዋልቃማ ጎዳይ
 ኑናራ ዴሰ፤
 ያቆቤ ጸሲ
 ኑ ቆቴቲ አቲዛ ቆልኣ።
 8 ሃ ዪቴ፤ ጎዳ ኦሶ ጸሊቴ፤
 ኢዚ ሳኣ ዋሰቲ
 ቡላሲዳኮ ቤኢቴ።
 9 ኢዚ ሳኣ ጋጸፔ ጋጸ ጋካናሰ
 ዲዛ ኦላ ቴቄሰ፤
 ዋንዳፌኔ ቶራ ሜንፎሰ፤
 ጎንዳሌካ ታማን ጸጌሰ። *
 10 ሼምፒ ኡቲቴ፤
 ታኒ ጸሰ ጊዲዳይሳ ኤሪቴ፤
 ካዋቲላታ ቦላ

* 46:9 ጎንዳሌ ጊዛይሳ ኢሲ ኢሲ ቢርሼላ ማጻፋቲ ሃሬ ጋሬ ጌቴሰ።

ታ ዶቄ ዶቄ ጋና፤
ቢታ ቦላካ ታ ዶቄ ዶቄ ጋና።

- 11 ኡባፌ ዋልቃማ ጎዳይ
ኑናራ ዳሰ፤
ያቆቤ ጸሲ
ኑ ቆቴቲ እቲዛ ቆልኣ።

47

- ቆሬ ናይቲ ዛማሬታ ካቦስ ዩዲዳ ማዛሙሬ
- 1 ካዋቴሉ ኡባይ
ኢንቴ ኩሼ ባቂቴ፤
ኢንቴ ቃላ ዶቄ ኦሴዲ
ጸሳስ ኢሊሊ ጊቲ።
- 2 ቢታ ኡባ ቦላ ባይራ ካዋይ
ኡባፌ ቶቃ ጸሳይ
ኢዚ ያሺሲዛ ጸሳ።
- 3 ዳራ ኑ ጋርስ ኣሉዳሰ፤
ካዋቴላታካ ኑ ቶሆ
ጋርሳን ሃሪሲዳሰ።
- 4 ኢዚ ኑስ ላታ ቢታ ዶሪዳሰ፤
ሄ ቢታይን
ኢዚ ዶሲዛ ያቆቤይ ጨቄቴሰ።
- 5 ኢሊሊሺን ጸሳይ ኡፋይሳን
ዛዬ ፑኒሺን ጎዳይ
ፑዳ ባ ኣራታን ኬዚዳሰ።
- 6 ዩዲቴ፥ ጸሳስ ዩዲቴ፤
ዩዲቴ ኑ ካዋዛስ ዩዲቴ።
- 7 ጸሲ ኣላሜ ኡባስ ካዋ፤
ሄሳ ጊሻስ ጋላታ ማዛሙሬ
ኢዛስ ዩዲቴ።
- 8 ጸሲ ካዋቴላታ ቦላ ካዋቴዳሰ፤
ባ ጌሻ
ኣራታ ቦላካ ኡቲዳሰ።
- 9 ካዋቴላታ ካሌሊዛ ዳናቲ
ኣብራሃሜ ጸሳ

አሳራ ኢሲፌ ሸቂዳ፤
ዴሬ ኡባ ካዎቲ ጸሳሳ፤
ኢዚ ኡባፌካ ቦላራ ቆቃ።

48

ቆሬ ናይታ ማዛሙራ

- 1 ጎዳይ ጌታ፤
ኑ ጸሳ ካታማን
ጌሻ ዙማዛን
ጌታ ጋላታይ ኢዛስ ቤሴስ።
- 2 ቢታ ኡባስ ኡፋይስ ጌዲዳይ፤
ፑዴሃ ባጋራ ቤቲዛይ
ቆቃኔ ሎኦ ጌዲዳ
ጸዮኔ ዙማይ
ዎጋ ካዎዛ ካታማ።
- 3 ሄ ካታማ ጌምቤዛ ጌዶን፤
ኢዚ ካታማይስ አሺዛ
ሚጸ ጌዲዳይሳ ቤሴዴስ።

- 4 ካዎቲ ባንታ ቶራንቻታራ
ኢሲፌ ሸቂዳ፤
ሂስቲዲ ጸዮኖ ኦላናዉ ዪዳ።
- 5 ጌዶ ኣቲን ኢዞ ቤኢዲ ማላሌቲዳ፤
ዳጋሚዲ ጉዬ ባቃቲዳ።
- 6 ኢስቲ ሄሳን ዴኢሺን
ኢስታ ያሻ ኮኮሪሲ ኦይኪዴስ፤
ሚጸይ ኦይኪዳ
ማጫሳ ማላ ሚጸቲዳ።
- 7 ኣርሼይ ሞኪዛሶ ባጋ
ዎልቃማ ጨርኮን ሜቂዛ
ታርሴሴ ማርካቤታ ማላ
ኢስታ ኮኮርሳዳሳ።

- 8 ኑኒ ሲዪዳ ማላካ፤
ኡባፌ ዎልቃማ
ጎዳ ካታማን፤

ኑ ጸሳ ካታማን
 ኢዚ ኦሊዲይሳ
 ኑ በኢደሰ።
 ጸሲ ሄ ካታማ ሜርናስ
 ሚንሊ ኤሳና።

9 ኣቤት ጸሳዉ፡

ኔ ኬላ ጊደን
 ኔ ሚርና ሲቆ ቆፖስ።

10 ኣቤት ጸሳዉ፡

ኔ ሱንላ ማላካ
 ኔ ጋላታይ ሳኣ ጋጸ ጋኪዴስ፤
 ኔ ኡሻቻ ኩሼይ
 ጸሊሎቲላን ኩሚዴስ።

11 ኔ ፒርዳ ጊሻስ፡

ጸዮኔ ኣሳይ ኡፋዬቴስ፤
 ዩሁዳ ካታማቲካ
 ኡፋይሳን ሆምቦጩቴስ።

12 ጸዮኔ ዩሻን ሄሚቲቲ፤

ኢዚ ጊምቤታ ዩሻን
 ያኔ ሃ ሰሚሬቲቲ፤
 ኢዚ ሻኮታ ቆዲቲ።

13 ዪዛ ዩሌታስ ዮታና ማላ፡

ኢዚ ኣሆ ጊምቤዛ ኣኬኪቲኔ
 ኢዚ ሚጸታ ጸሞሲቲ።

14 ኢንቲ፡ «ሜሪ ሚርናስ

ሃ ጸሳይ ኑ ጸሳ፤
 ኑ ሃይቃና ጋካናስ
 ኢዚ ኑና ካሌላና»
 ጊዲ ዮቲቲ።

49

ቆሬ ናይቲ ዛማሬታ ካቦስ ዩዲዳ ማዛሙሬ

1 ዴሬዘ፡ ኢንቲ ኡባቲካ

ሃይሳ ሲዬቲ!
 ኢንቲና ሳኣ ቦላ ዲዛ ኡባቶ!
 ሃይሳ ኤዘጊቲ።

- 2 ዶቃይኔ ዚቃይ፥
ዲሬይኔ ማንቆይካ ሲደቱ።
- 3 ታ ዋዚና ቆፋይ እኩካ ኢሜስ፤
ታ ዶናይ
እቶ ኤራቴላ ቃላ
ሃሳዬስ፤
- 4 ታኒ ታ ሃይሰ
ሌሚሶታኮ ዛራና፤
ኢስታ ቢርሼላካ
ታ ዲላን ቆንጨሳና።
- 5 ሜቶ ጋላሲ ዪዛ ዋዴኔ
ኢታቴላን ታና ላቢዛይቲ
ዶዲ ኡቲኮ
ታ አይሰ ባቦ?
- 6 ባ አቆታን አማኔቲዛይታሲኔ
ባ ዲሬቴላ ዳሮን
ጨቄቲዛይታስ ታ አይሰ ባቦ?
- 7 አሲ ባርካ ባና ዋዜና፤
ዋይኮ ባ ሼምፖ ጊሻስ
ጸሳስ ዋጋ ቃንጸናስ
ዳንዳዬና።
- 8 አሳ ሼምፖ ዋጋይ
ከሂፔ አልኦ፤
ሼምፖ ዲሊዛ ዋጋይ
ሙሌካ ዴና።
- 9 አይ ዋጋ ቃንጸኒካ
ኢዚ ሜርናስ ዴኣና ማላ፥
ዋይኮ ኢዚ ሃይቆንታ ማላ
ኦላናዉ ዳንዳዬና።
- 10 ኤያቲኔ ዳማቲ ሃይቄዛ ማላ
እቶ ኤራንቻቲካ ሃይቃና፤
ኡባይካ ባ አቆታ
ሃራስ ዬጊ ባና፤
ሄሳ ኡባይካ ቤኣና።
- 11 ዳሮ ጋዴ
ኢስቲ ባ ሱንላን ሃሪኮካ
ኢስታስ ሜርና ኬላይ ዲፎ፤

ኢዚካ ኢስታስ
ዬሌታፔ ዬሌታ ጋካናዉ
ዱሳሶ ጊዳና።

12 ኣሲ ኣይ ዱሬቲኮካ
ባ ዱሬቲላራ ካንፔና፤
ኢዚ ዶኣ ማላ ሃይቃና።

13 ባናን አማኔቲዛ
ኤያታ ቃዳይኔ
ኢስታ ቃላ ካሊዛይታ
ዉርሴላ ሳማይ ሃይሳ።

14 ሹካስ ቆሬቲዳ ዶርሳታ ማላ
ኢስቲ ዱፎሰ ዶሬቲዳ፤
ሃይቆይ ኢስታ ሄንላንቻ
ጊዳና፤
ኢስቲ ባንታ ያሊሶ ኬላፌ
ሃኪዲ ዱፎን ሙሳና።
ሱሬ ኣሳቲ ማላዶራ
ኢስታ ዱፎ ቦላራ ሲሜሬታና።

15 ጊዶ ኣቲን ጸሲ
ታ ሼምፖ ዋዛና፤
ኢዚ ታና ሃይቆ ዋልቃፌ
ኣሺ ኤካና።

16 ኣሲ ዱሬቲዛ ዋዴኔ
ኢዛ ኣቆታይ ዳሪ ዳሪ ቢዛ ዋዴ
ኢዛዴስ ያዮፋ።

17 ጋሶይካ ኢዚ ሃይቂሺ
ኣይኮካ ኤኪ ቤና፤
ኢዛ ኣቆታይ ኢዛራ ኢሲፌ
ዱፎን ጌሌና።

18 ኣሲ ፓጻ ዲዛ ዋዴን፥
«ታስ ኩሚዴስ» ጊኮካ፥
ኡባይ ኢዛስ ጊጊዳ ጊሻስ
ጋላቲቲኮካ፥

19 ሲሚዲ ሙሌካ
ፖኦ ቤኦንታሶ
ባ ኣዋታ ማባራን ጋይቲስ።

- 20 አሲ ኤራቴሊ ባይንዳ
 ኣይ ዱሬቲኮካ
 ኢዚ ዶኣ ማላ ሃይቃና።

50

- አሳፌ ማዛመራ
- 1 ዋልቃማ ጎዳይ፥
 ጸሳይ ሃሳዬስ፤
 ኣርሼይ ሞኪዛሶፔ
 ዉሊዛሶ ጋካናስ
 ሳኣን ዲዛ አሳ ጸይጌስ።
- 2 ሙሊራ ሎኦ ጊዲዳ ጸዮኒፔ
 ጸሲ ፖኢሴስ።
- 3 ኦ ጸሲ ያና፤
 ኢዚ ጮኡ ጌና።
 ሚዛ ታማይ ኢዛ ሲንፋና፤
 ዋልቃማ ጎቴይ ኢዛ ዩሾና።
- 4 ጸሲ ባ አሳ ፒርዳናስ
 ሳሎኔ ሳኣ ጸይጌስ።
- 5 «ታናራ ያርሾን ጨቄቲዳ
 ጌሻታ ታኮ
 ሽሽቲ» ጌስ።
- 6 ጸሲ ባርካ ፒርዲዛ
 ጸሳ ጊዲዳ ጌሻስ
 ሳሎቲ ኢዛ ጸሎቴላ አዋጄቲስ።
- 7 «ታ አሳዞ ኔ ሲያ!
 ታኒ ኔስ ዮታይስ፤
 ኢስራኤሌ አሳዉ!
 ታኒ ኔ ቦላ ማርካታይስ።
 ታኒ ጸሳይ ኔ ጸሳ።
- 8 ኔ ያርሾ ጌሻሲኔ
 ኔኒ ኡባቶ ሽሽዛ
 ጸጌቲዛ ያርሾ ጌሻስ
 ታኒ ኔና ቦሪኬ።
- 9 ሄሳ ማላካ ኔ ዲርሳፌ ኮርማታ፥
 ዋይኮ ኔ ጸርጳፌ ዴይሻታ

- ኤካናዉ ኮይኬ።
 10 ዋራን ዲዛ ዶኣ ኡባቲ ታሳ፤
 ሺ ዙማታ ቦላን ዲዛ
 ሜሄቲካ ታይታ።
 11 ታኒ ዙማታ ቦላ ዲዛ ካፎታ
 ኡባ ኤራይስ፤
 ዴምባን ዲዛ ሜዴቴላቲ
 ኡባይ ታይታ።
 12 ሳሎ ጉፋንፉን ዲዛ ኡባይ ታሳ፤
 ሄሳ ጊሻስ ታ ጋፊኮካ
 ኔስ ዮቲኬ።
 13 ታኒ ኮርማታ ኣሾ ሚኬ፤
 ዋይኮ ዴይሻታ ሱል ኡዩኬ።
 14 ጸሳስ ጋላታ ያርሾ ሺሻ፤
 ኔ ኣዲና ኡባፌ ጶቃ
 ጸሳስ ጋላ።
 15 ሜቶ ጋላስ
 ኔ ታና ጴይጋ፤
 ታ ኔና ኣሻና፤
 ኔካ ታና ቦንቻና» ጌስ።
 16 ጊዶ ኣቲን ጸሲ ናጋራንቻስ፥
 «ታ ዋጋ ኔኒ
 ዛራ ዛራዳ ቢዳናስ
 ዋይኮ ታ ጫቆ ቃላ
 ኔ ዮታናስ
 ኔስ ኣይ ማታይ ዲዜ?
 17 ኔ ታ ሴራ ኢጸሳ፤
 ታ ቃላታካ ካታሳ።
 18 ኔኒ ካይሶ ቤኢዳ ዋዴ
 ኢዛራ ዳቦታዳሳ፤
 ላይማቲዛይታ ማባራንካ
 ዙፔታሳ።
 19 ኔኒ ኔ ዶና
 ኢታ ሃሳያናስ ዶያዳሳ፤
 ኔ ሃሳይዛ ሃሳያይ
 ዋርዶ ጸላ።
 20 ኣጶሶን ኣጶሶን
 ኔ ኢሻ ዘጊራሳ፤

- ኔ አጼ ና ሱንሒካ ሞራሳ።
 21 ኔኒ ሃይሳ ኡባ ኦሒዛ ዎዴ
 ታኒ ጮኡ ጋዲሰ፤
 ሄሳ ጊሻሰ ኔኒ ታና
 ኔ ማላ ጋዲ ቆፓዳሳ፤
 ጊዶ አቲን ሃኢ ታኒ
 ኔና ዋላሳይሰ፤
 ቃሴካ ታ ኔና
 ቆንጩን ሴራይሰ።
- 22 «ኢንቴኖ ጸሳ ዶጊዛይቶ!
 ሃይሳ አኬኪቴ፤
 ኢንቴ ኢጸሰ ጊኮ
 ታኒ ኢንቴና ማንሐሬላና፤
 ሄ ዎዴ ኢንቴና ኦኒካ
 አሼና።
- 23 ታሰ ጋላታ ኢሚዛ አሲ
 ታና ቦንቼሰ።
 ሱሬ ኦጌራ ቢዛ አሰ
 ታኒ ኣቶቴላ ቤሳና» ጌሰ።

51

ካዎ ዳዊቲ ላይማቲዳፔ ጉዬ ናቤ ናታኔይ ኢዛኮ ዪዳ ዎዴ
 ዳዊቲ ዛማሬታ ካቦስ ዩጲዳ ማዛሙሬ

- 1 አቤት ጸሳዉ!
 ኔ ሜርና ሲቆዛ ማላ
 ታና ማራ፤
 ኔ ቃጂታ ዳሮን
 ታ ሞሮዛ ቁጫ።
- 2 ታ ኢታቴላ ኡባ
 ታፔ ሚጫ፤
 ታ ናጋራፔካ ታና ጌሻ።
- 3 ታኒ ታ ሞሮዛ ኤራይሰ፤
 ታ ናጋራይካ
 ኡባቶ ታ ሲንላና።

- 4 ታ ኔና ጸላ ቆሃዲሰ፤
 ቃሴካ ኔ ሲንላን
 ኢታ ኦላዲሰ።
 ሄሳ ጊሻሰ
 ኔ ቃጸይዳ ቂጸቴን፥
 ኔ ታ ቦላ ፒርዲዳ ፒርዳንካ
 ኔ ጸሎ
- 5 ታኒ ታ አዪ ኡሎፔ
 ደማዳ ናጋራንቻ፤
 ዬሌቶሶፌ ሃ ሲማዳካ
 ታ ሞራንቻ።
- 6 ሄኮ ኔኒ አሳ ዋዚናፔ
 ቱማ ኮያሳ፤
 ሄሳ ጊሻሰ
 ታ ጊዶ አሳቴላ
 ኔ አፆ ኤራቴላ ታማርሳ።
- 7 ሂሶጴ ቦንጮን
 ኔኒ ታና ፒሰታ፤
 ታኒ ጌያና፤
 ታና ሜጫ፤
 ታኒ ሻቻፌ
 አጃዳ ቦጻና።
- 8 ኔኒ ታና ኡፋይሲኔ
 ሃሹ ጊሲዛ ሚሽ ሲሳ፤
 ኔ ሜንጮሬሊዳ
 ታ ሜቄላታካ ፓላ።
- 9 ኔ ሲንላ ታ ናጋራፔ
 ሃራሶ ዛራ፤
 ታ ቆሆ ኡባካ ቁጫ ዲጋ።
- 10 አቤት ጸሳዉ!
 ኔ ታሰ ጌሻ
 ዋዚና ሜጃ፤
 ሚኖ አያና ታ ጊዶን ዋላ።
- 11 ታና ኔ ሲንላፌ ኦሎፓ፤
 ኔ ጌሻ አያና

- ታፔ ኤኮፋ።
 12 ኔ አቶቴላ ኡፋይሳ
 ታሰ ዛራዳ ኢማ፤
 ኤኖ ጊሲዛ አያናን
 ኔ ታና ኩንላ።
- 13 ሂሰቲኮ ታኒ ሞራንቻታ
 ኔ ኦጌ ታማርሳና፤
 ሄ ናጋራንቻቲካ
 ኔኮ ሲማና።
- 14 አቤት ጸሳዉ፥
 ታና አሺዛ ጸሳዉ!
 ታኒ ሸምፖ ዋጶንታ ማላ
 ታና ማዳ፤
 ታ አንጻርሳይካ
 ኔ ጸሎቴላ ጊሻሰ
 አሊሊሳን ዬጾ።
- 15 አቤት ጎዳዉ! ታ ዶና ዶያ፤
 ሂሰቲኮ ታ አንጻርሳይ
 ኔና ጋላታና።
- 16 ኔኒ ያርሾን ኡፋዬቲዛኮ
 ታ ኔሰ ያርሾ ሺሻና፤
 ኔ ጊዲኮ ያርሾን ኡፋዬታካ፤
 ጸጌቲዛ ያርሾ ያርሺኮካ
 ኔኒ ኡፋዬታካ።
- 17 ጸሳሰ ሺቂዛ ያርሾይ
 አሽኬ አያና፤
 አቤት ጸሳዉ!
 ሜቂዳ ዋዚና ኔ ካታካ።
- 18 አቤት ጸሳዉ!
 ኔ ዶሳን ጸዮኖ ዱሬሳ፤
 ዬሩሳላሜ ገምቤታ ገምባ።
- 19 ሄ ዋዴ ጸሎቴላ ያርሾኒኔ
 ዉሪ ጸጌቲዛ ያርሾን
 ኔኒ ኡፋዬታና፤
 ኮርማቲካ ኔ ያርሺዛሶን
 ያርሼታና።

52

ኤደሜ ቢታ አስ ደይቂይ ሳኦሌኮ ቢዲ፥ «ዳዊቲ አቢሜሌኬ
ሶ ቢደሰ» ጌዲ ዮቲ ሲሚን ዳዊቲ ዛማሬታ ካቦስ ሃሳኣን ሺሺዳ
ጊንጾ

1 ሃይሶ ዋልቃማዘ!

ጸሲ ኔና ካጲቺዴሰ፤

ኔ አይሰ ኢታ ኦሶን ናሼታይ?

አይሰ ኡባ ጋላስ ጨቁታይ?

2 ኔኖ ባሌሶን ኩሚዳ

ጌናንቻዉ!

ሃራታ ጳይሳና ቃጸሳ!

ኔ ኢንጸርሳይካ

ቃራ ማጋላ ማላ።

3 ኔኒ ሎኦ አጋዳ ኢታ ሲቃሳ፤

ቱማ ሃሳያናፔ ዋርዶ

ሃሳያ ደሳሳ።

4 ኔኖ ባሌሶን ኩሚዳ

ዋርዳንቻዘ!

ኔኒ አስ ማዲንጢዛ

ቃላ ሲቃሳ።

5 ጌዶ አቲን ጸሲ ኔና

ሜርናሰ ጳይሳና፤

ኢዚ ኔና ኔ ኬላፌ

ቡጨ ኬሳና፤

ፓጸ ዲዛይታ ጌደፌካ

ጶቃሊ ዲጋና።

6 ጸሎቲ ሃይሳ ቤኢዲ ያያና፤

ኢሰቲ ኢዛ ቦላ ሂዘጊ ሚጫና፤

7 «ጸሳ ባሰ ዜምፖ

ኦሶንታዴ፥

ባ ዲሬቲላ ዳርን

አማኔቲዛዴ

ባ ኢታ ኦሶን ሚኒዛዴ

ሃይሳ ቤኢቲ!» ጋና።

8 ጌዶ አቲን አጨዛ

- ዎጋራ ሚላ ማላ
 ታኒ ጸሳ ከላን ኣጫይሰ፤
 ኢዛ ሚርና ሲቆን ታኒ
 ሚሪ ሚርናሰ ኣማኔታይሰ።
- 9 ኔኒ ኦሊዳ ኡባሰ
 ታኒ ኔና ሚርናሰ ጋላታይሰ፤
 ኔ ሎኦ ጊዲዳ ጊሻሰ
 ታ ኔ ሱንሳን ሂደታ ኦላይሰ፤
 ታኒ ጸሳ ዴራ ሲንሳን
 ኔ ኪያቴላ ሳባና።

53

- ዳዊቲ ዛማሬታ ካቦሰ ሃሳኣን ሺሺዳ ጊንጾ
- 1 ኤያቲ ባንታ ዎዚናን፤
 «ጸሲ ባዎ» ጌቴሰ፤
 ኢሰቲ ሞሬቲዳይታ፤
 ኢሰታ ኦሶይካ ሃራሲዛዛ፤
 ኢሰታ ጋርሳፌ
 ሎኦ ኦሊዛይ ዴና።
- 2 ጸሳ ኮይዛይቲኔ ኣኬኪዛይቲ
 ዴኢዛኮ ቤኣናዉ
 ጸሲ ሳሎፔ ዲጌ
 ኣሳ ናይታ ጴሌሰ።
- 3 ኢሰቲ ኡባይካ ጸሳፌ ሃኪዳ፤
 ኡባይካ ኢሲፌ ቱኒዳ፤
 ሎኦ ኦሊዛ ኣሲ ዴና፤
 ሃራይ ኣቶ ኢሳዴይካ ባዎ።
- 4 ጸሲ፥ «ኣሲ ካል ሚዛ ማላ
 ታ ዴራ ቦንቂ ሚዛይቲ፥
 ጸሰ ዎሲ ኤሮንታይቲ፥
 ሄይቲ ኢታ ኦሊዛይቲ
 ዩሺ ቆፔቴኔ?» ጌሰ።
- 5 ጸሲ ባ ኣሳ ሞርኪዛይታ
 ሚቁላ ላላና፤
 ኢሰቲ ካሴ ዳጋሚ ኤሮንታ

ዳጋማ ዳጋማና።
 ጾሲ ኢስታ ካጲዳ ጊሻስ
 ኢስቲ ዬላታና፤

- 6 ኢስራኤሌስ አቶቴላ
 ጸያኔፔ ዩዳኮ!
 ጾሲ ባ ዴራፔ ዲኤቲዳይሳ
 ዛሪዛ ዎዴ
 ያቆቤ ዛሬቲ ኡፋዬታና፤
 ኢስራኤሌ አሳይ ኡፋዬታና።

54

ዚፌ አሳይ ሳኦሌኮ ቢዲ፥ «ዳዊቲ ኑ ቢታን ቆቴቲ ኡቲዴስ»
 ጊ ዮቲን ዳዊቲ ዛማሬታ ካቦስ ዲላን ዬጲዳ ማዛሙሬ

- 1 አቤት ጸሳዉ!
 ኔ ሱንላን ታና አሻ፤
 ኔ ዎልቃን ታስ ፒርዳ።
 2 አቤት ጸሳዉ! ታ ዎሳ ሲያ፤
 ታ ሃሳይዛ ቃላ ኤዘጋ።
 3 ኦቶራንቻቲ ታ ቦላ ዴንዲዳ፤
 ጌናንቻቲ
 ታና ዎቆናስ ኮዬቲስ።
 ጸሳ ዉዲ ጌቲና።

- 4 ጊዶ አቲን ጾሲ ታስ ማዶ፤
 ጎዳይካ ታስ ዜምፖ።

- 5 አቤት ጸሳዉ!
 ታ ሞርኬታስ
 ኢስታ ኢታቴላ ማላ
 ኢስታስ ዛራ።
 ኔ አማኔቴላን
 ኔ ኢስታ ቆይሳ።

- 6 አቤት ጎዳዉ!
 ታኒ ታ ዶሳን ኔስ ያርሻና፤
 ኔስ ቤሲዛ ጊሻስ
 ታኒ ኔ ሱንላ ጋላታና።

- 7 አይሰ ጊኮ ኔኒ ታና
 ታ ሜቶ ኡባፌ አሻዳሳ፤
 ታ ሞርኬቲ ኩንዲሺን
 ታ አይፌን ቤያዲሰ።

55

ዳዊቲ ሃሳኣን ሺሺዳ ጊንጾ፤ ዳዊቲ ዛማሬታ ካቦሰ ዲላን
 ዬጺዲ ማዛመሬ

- 1 አቤት ጸሳዉ! ታ ዋሳ ሲያ፤
 ታ ሾቢሺን ቄሊ ጎፓ።
 2 ኤዘጋ፤ ታ ዋሳ ሲያ፤
 ታ ቆፋን ታ ኡንኤታዲሰ፤
 ማራጩይ ታሰ ኮኮሪዴሰ።
 3 ታ ሞርኬቲ ማንዲን ሂርጋዲሰ፤
 ኢታ አሳቲ ቆሂን ዳጋማዲሰ፤
 ኢሰቲ ታ ቦላ ሜቶ ኤሂዳ፤
 ሃንቆን ዴንዲዲ ታና ሞርኪዳ።
 4 ታ ዋዚናይ ሂርጌሰ፤
 ሃይቃናኮኔ ጊዛ ዳጋማይ
 ታ ቦላ ዋጂዴሰ።
 5 ያሺኔ ዳጋማይ ታና ኦይኪዴሰ፤
 ታ አሳቴላይ ኮኮሪዴሰ።
 6 ታኒ፥ «ታሰ ሃራጹ ማላ
 ቄፌይ ዲዛኮ
 ፒራቋ ባዳ ሸምፓና።
 7 ታኒ ቤታ ባዳካ
 ባዞን ዴኣና ሺን።
 8 ታኒ ጎቴፔኔ ኡሾፔ አቲዛሶ
 ኤሶታዳ ጋካና ሺን» ጋዲሰ።
 9 አቤት ጎዳዉ!
 ታኒ ካታማይ ጊዶን
 ኦሺኔ ጌኔ ቤያዲሰ፤
 ኢታታ ዘሬ ኔ ቋይሳ፤
 ኢሰታ ቆፋካ
 ቡላኬሬላ ዬጋ።
 10 ኢታቲ ጋላሲኔ ቃማ

- ካታማ ገምቤዛ ቦላራ
 ዩዬቴሰ፤
 ኢታቴሉኔ ጌኔይ
 ኢዚ ጊደን ዴሰ።
- 11 ባሺ ኢዚ ጊደን ዴሰ፤
 ጌኔይኔ ጨሞይ
 ኢዚ ዱቡሻታፔ ሻኬቴና።
- 12 ታ ሞርኬይ ታና ጨዪዳኮ
 ታ ኢዛ ዳንዳያ አላናኮ፥
 ታ ቦላ ጨቄቴዛይ
 ታና ኢዲዛዴ
 ጊዲዳኮ ታኒ ኢዛፔ ቆቴታና።
- 13 ጊደ አቲን ሃይሳ ኡባ
 ታ ቦላ ኦሊዛይ ኔና፥
 ታ ላጌዛ፥ ታ ዳቦዛኔ
 ታ ሲቆዛ።
- 14 ኑኒ ኢሶይ ኢሳራ
 ኡፋይሳን ሃሳዬቴዶሰ፤
 ኢሲፌካ ጸሳ ሶን
 ሲሜሬቴዶሰ።
- 15 ኢታቴሉ ኢሰታ ዎዚና
 ጊደን ዲዛ ጊሻሰ
 ታ ሞርኬታ ቦላ ቆፖንታ
 ሃይቆይ ጋኮ፤
 ሸምፖራ ፓጻ ዲሼ
 ሞጌቴቶ!
- 16 ታኒ ጊዲኮ ታ ጸሳ ዴይጋይሰ፤
 ጎዳይ ታና አሼሰ።
- 17 ማላዶ፥ ጋላሲኔ ኦማርሰ
 ታኒ ዋሳይሲኔ
 ታ ሜቶ ኢዛሰ ዮታይሰ፤
 ኢዚ ታ ቃላ ሲዬሰ።
- 18 ዳርቲ ታና ኤቄቴኮካ፥
 ኢዚ ታና ኦላ ቶራፔ አሼሰ።
- 19 ቤኒሶፌ ካዎቴላ አራታን
 ኡቲ ዲዛ ጸሳይ
 ታ ዎሳ ሲዪዲ
 ባ ኦጌ ላሞንታይታኔ

- ጸሳስ ያየንታይታ
ካወሻና።
- 20 ታ ላጌዚ ባ ሲቆታ ቦላ
ባ ኩሼ ዴንሊዴስ፤
ኢስታራ ጫቄቲዳ
ጫቆ ቃላካ ላሊዴስ።
- 21 ኢዛ ዶናፔ ኬዚዛ ቃላይ
ኦይሳ ማላ፤
ጊዶ ኣቲን ኢዛ ዎዚናይ
ጫዲዛ ቶራ ማላ፤
ኢዛ ቃላቲ ዛይቴፔካ
ኣጂ ሹጎ፤
ጊዶ ኣቲን ቃንጺዛ
ማሻ ማላ።
- 22 ኔ ሜቶ ጎዳ ቦላ ዎላ፤
ኢዚ ኔና ሚንሊ ናጋና፤
ኢዚ ጸሎቲ
ኩንዳና ማላ ኦፊና።
- 23 ኣቤት ጸሳዉ!
ኔኒ ጊዲኮ ኢታታ
ዴጌ ጨማ ኦላን ዩጋና።
ሱሰ ጉሲዛይቲኔ
ባሌሊዛይቲ
ባ ዶና ላይላስ
ባጋካ ዴቴና፤
ጊዶ ኣቲን ታኒ
ኔናን ኣማኔታይስ።

56

ፊሊስጶሜ ኣሳይ ጌቲ ካታማን ዳዊቲ ኦይኪዳ ዎዴ ዳዊቲ
ዛማሬታ ካቦስ ዩጲዳ ዩላ፤ «ሃሆሶን ዲዛ ዎላ ቦላ ኡቲዳ
ሃራጶዮ» ጌቲቲዛ ዲላ ጊጊሶን ሺቂዳ ዎሳ

- 1 ኣቤት ጸሳዉ!
ኣሳይ ታና ኡንኤፊስ፤
ታ ሞርኬቲ ታና
ኡባ ዎዴ ዩዴፊቲስ፤
ሂሳ ጊሻስ ኔ ታስ ቃዴታ።
- 2 ታ ሞርኬቲ ኡባ ጋላስ

ታና ዬዴሌቴስ፤
ዳርቲ ኦቶሬቴላን ታና ኦሌቴስ።

3 ታና ባቢሲዛ ዎዴ
ታ ኔናን ኣማኔታይስ።

4 ታኒ ጸሳን
ኣማኔቲዛ ጊሻስ ባቢኬ፤
ኢዚ ኢሚዳ
ሂዶታ ቃላ
ጊሻሲካ
ኢዛ ጋላታይስ፤
ታ ጸሳን ኣማኔታይስ፤
ኣሲ ታና ኣይ ኦላኔ?

5 ኡባ ጋላስ ታ ሞርኬቲ
ታፔ ሞሮ ዴማናስ
ዎጼቴስ፤
ኢስቲ ኡባ ዎዴ
ታና ቆሃናስ ዘሬቴቴስ።

6 ሺቂዲ ታ ቦላ ማቄቴቴስ፤
ዛማዲ ኡቲዲ ታና ካሌቴቴሲኔ
ታ ጌዶን ኤቄቴቴስ፤
ታና ዎጳናስካ ኮዬቴስ።

7 ጸሶ! ኢስታ ኢታቴላ ጊሻስ
ኢስታ ዬዶፋ፤
ሄ ካዎቴላታ
ኔ ሃንቆን ካዉሻ።

8 ኔኒ ታ ዬሆ ቤያዳሳ፤
ታ ኣፋንላ ማካዳሳ፤
ኡባቲካ ኔ ማዘጋባን
ጸፊቲዳ።

9 ታኒ ኔና ጸይጊዛ ዎዴ
ታ ሞርኬቲ ጉዬ ሲሜቴስ፤
ጸሲ ታናራ ዲዛይሳ
ታኒ ሄሳን ኤራይስ።

10 ታ ኢዛ ቃላ ጋላቲዛ ጸሳን፥

ታ ኢዛ ቃላ ሳቢዛ ጎዳን፥

11 ታኒ ሄ ጸሳን

አማኔቲዛ ጊሻሰ ባቢኬ፤

እሲ ታና አይ ኦላኔ?

12 አቤት ጸሳዉ!

ታኒ ኔሰ አዲና አዲኔታዲሰ፤

ታ አዲኔቶይሳ ጋላታ ያርሾ

ኔሰ ጋላና።

13 ኔኒ ታ ሼምፖፑ ሃይቆፔ

ታ ቶሆታ ቆጶፔ አሻዳሳ።

ሄሳ ጊሻሰ ኢዚ

ሼምፖራ ፓጸ ዲዛይታሰ

ፖኢሲዛ ፖኦን

ጸሳ ሲንላን

ታ ሲሜሬታና።

57

ዳዊቲ ሳኦሌ ሲንላፌ ባቃቲዲ ጎንጎሎ ጊደን ዲሼ ዛማሬታ
ካቦስ፥ «ዳይሶፋ» ጌቴቲዛ ዲላ ጊሊሶን ሺሺዳ ዎሳ ማዛሙሬ

1 አቤት ጸሳዉ!

ኔ ታሰ ቃጴታ፤

ታና ማራ፤

ታ ሼምፖያ ኔናን ዜምፓዲሰ፤

ባሻይ አቆና ጋካናሰ

ታኒ ኔ ቄፌታ ጋርሳን ቆቴታና።

2 ኢዚ ባ ሃልኞ ማላ ታሰ ፖሊዛ

ኡባፌ ቶቃ

ጸሳኮ ዋሳይሰ።

3 ጸሲ ሳሎፔ ማዶ ኪቲዲ

ታና አሻና፤

ታና ዬቂዛይታ ካዉሻና፤

ጸሲ ባ ሜርና ሲቆኔ

ባ ቱማቴላ ታሰ ኪታና።

- 4 ታኒ ታ ሞርኬታ ጊደን፥
 ኣሰ ፑዚዲ ሚዛ ጋሞ
 ሚሳቲዛይታ ጊደን ዳይሰ።
 ኢሰታ ኣቻይ ቶራኔ
 ዋንዳፌ ዪሻ ማላ፤
 ኢሰታ ኢንጻርሳይካ
 ቃራ ማሻ ማላ።
- 5 ኣቤት ጸሳዉ! ኔኒ ሳሎታፔ
 ቦላራ ቶቁ ቶቁ ጋ፤
 ኔ ቦንቾይ ሳኣ ኡባ ኩሞ።
- 6 ኢሰቲ ታ ቶሆስ ዋጸማዴ ዋሊዳ፤
 ታ ኣሳቲላ ኩኒሲዳ፤
 ኢሰቲ ታ ኦጌን ኦላ ቦኪዳ፤
 ጊደ ኣቲን ሄ ኦላን
 ባንታሰ ኩንዲዳ።
- 7 ታ ዋዚናይ ሚኒ ዴሰ፤
 ኣቤት ጸሳዉ!
 ታ ዋዚናይ ሚኒዲ ዴሰ፤
 ታኒ ኔሰ ዬጻናኔ
 ኔና ሳባና።
- 8 ታ ሼምፖዬ ቢርካ!
 ዲላቲኔ ማሲንቆቲ
 ቤጊቲ!
 ታኒካ ዋንታራ ዴንዳና።
- 9 ኣቤት ጎዳዉ፥ ታኒ ኔና
 ኣሳ ኡባ ሲንላን ጋላታና፤
 ቃሴ ዴራ ጊደን
 ታ ኔና ዬላን ሳባና።
- 10 ኔ ሜርና ሲቆይ
 ፑዴ ሳሎ ጋኪዴሰ፤
 ኔ ቱማቴላይካ
 ሳሎ ሻራ ጋኪዴሰ።
- 11 ኣቤት ጸሳዉ!

ኔኒ ሳሎታፔ ቦላራ
 ቶቁ ቶቁ ጋ፤
 ኔ ቦንቸይ
 ሳኣ ኡባ ኩሞ።

58

ዳዊቲ ዛማሬታ ካቦስ፡ «ታይሶፋ» ጌቴቲዛ ዲላ ጊጊሶን
 ሺሺዳ ዋሳ ማዛሙራ

¹ ኢንቴኖ ዴሬ ሃሪዛይቶ!
 ኣዳካ ኢንቴ ደናፔ
 ጸሎ ሃሳያይ ኬዚዜ?
 ኣሳ ኡባስ ጸሎ ፒርዴቲ?
² ኣካይ! ኢንቴ ዋዚናን
 ኢታ ሚሽ ሃልቹታ፤
 ኢንቴ ኩሺይ ቢታ ቦላ
 ማካላ ኦሶ ኦሴስ።

³ ኢታቲ ባ ኣዪ ኡሎፔ ደሚዲ
 ሞሮ ኦጌ ቤቴስ፤
 ዩሌቲዳ ጋላሳፌ ደሚዲ
 ባሌቴቴሲኔ ዋርዶቴቴስ።

⁴ ኢስቲ ሾሻ ማላ
 ማርዜራ ዴቴስ፤
 ቱሌ ጎፔ ሾሻ ማላ
 ባ ሃይሐ ቱሊሴቴስ።

⁵ ሙራኒዛይሲ ኣይ ማላ
 ጨንጫ ጊዲኮካ
 ጎፔ ሾሺ
 ኢዛ ጨንጉርሳ ሲዬና።

⁶ ኣቤት ጸሳዉ!
 ኢስታ ኣቻ ሜንላ፤
 ኣቤት ጎዳዉ!
 ጋሞታ ባንቂላ ሜንላ።

⁷ ኢስቲ ጉኪዛ ሃላ ማላ
 ቶዬቶ፤
 ኢስቲ ዲኪዛ

ዋንዳፌ ዪሻይ ዱንኦ።
 8 ኢስቲ ቢሽ
 ሙሽዛ ጳጴ ማላ
 ጊዴቶ፤
 ፖኦ ቤኦንታ ኣወጫያ ዬሌቲዳ
 ና ማላ ጊዴቶ።

9 ኣጉንላ ታማይ ኦቶ ሱሊሶንታ
 ጳይዛ ማላ ናጋራንቻታ
 ኔ ኤሶን ጳይሳ።

10 ናጋራንቻታ ቦላ
 ሃሎ ኬሲዛይሳ ቤኢዲ
 ጸሎቲ ኡፋዬታና።
 ኢታታ ሱላን
 ባ ቶሆ ሜጨታና።

11 ሄ ዋዴ ኣሳይ፥
 «ኣዳካ ጸሎቲ ኦሊዳ
 ሎኦ ኦሶስ
 ዋይቶይ ዴስ፤
 ቱሙካ ሳኣ ቦላ ፒርዲዛ
 ጸሲ ዴስ» ጋና።

59

ሳኦሊ ዳዊቲ ዋዳናስ ኪቲዳ ኣሳቲ ኢዛ ኬላ ደዲ ኡቲዳ
 ዋዴ ዳዊቲ ዛማሬታ ካቦስ፥ «ጳይሶፋ» ጌቲቲዛ ዲላ ገጊሶን
 ሺሺዳ ዋሳ ማዛሙሬ

1 ኣቤት ታ ጸሳዉ!
 ታ ሞርኬታፔ ታና ኣሻ፤
 ታ ቦላ ዴንዲዛይታፔ ታና ናጋ።

2 ኢታ ኦሊዛይታፔ
 ታና ማዳ፤
 ሱላ ጉሲዛ ኣሳታፔ
 ታና ኣሻ።

3 ኣቤት ጎዳዉ!
 ኢስቲ ታና ዋዳናዉ

- ዛማዲዲ ናጊዛይሳ ቤኣ!
 መንጾ ኢታ ኣሳቲ
 ታኒ ሞሮኔ
 ናጋራ ኦሶንታ ዲሺን
 ታ ቦላ ዴላቴቲስ።
- 4 ኣይኮ ሞሮ ታ ኦሶንታ ዲሺን
 ታና ጳይሳናስ ገጌቲዳ፤
 ሃይሳ ኔኒ ቤኣዳ
 ታና ማዳና ዴንዳ።
- 5 ኣቤት ጎዳዉ!
 ኡባፌ ዋልቃማ ጸሳዉ!
 ኔኒ ኢስራኤል ጸሳ፤
 ካዎቴላታ ኡባ
 ቃጸያናስ ኔ ቤጋ፤
 ማካላ ኦሊዛይታ ማሮፓ።
- 6 ኢስቲ ካና ማላ ሆስካቲሼ
 ካታማ ጊዶን ዩዪ ፔኢዲ
 ኦማርስ ሲማና።
- 7 ኢስታ ዶናፔ ኬዚዛይሳ ሲዪቴ!
 ኢስታ ኢንጻርሳይ ማሻ ማላ፤
 ኢስቲ፥ «ኦኔ ኑና ሲያናይ?»
 ጊ ቆፔቴስ።
- 8 ጊዶ ኣቲን ኣቤት ጎዳዉ!
 ኔኒ ኢስታ ቦላ መጫሳ፤
 ካዎቴላታ ኡባ ካቆሳ።
- 9 ታ ጸሳዉ!
 ኔ ታስ መጸ ጊዲዳ ጊሻስ
 ታ ኔናን ኣማኔታይስ።
- 10 ታ ጸሳይ ባ መርና ሲቆን
 ታናራ ጋይታና፤
 ታ ሞርኬታ ኩንዴል
 ኢዚ ታና ቤሳና።
- 11 ኣቤት ኑስ ጎንዳሌ ጊዲዳ
 ጎዳዉ! ታ ኣሳይ
 ኔኒ ሃሎ ኬሲዛይሳ
 ባሎንታ ማላ

- ኔኒ ኢሰታ ዋዳ ዳይሶፋ፤
 ጊዶ አቲን ኔ ዋልቃን
 ኢሰታ ላላኔ ካዉሻ።
- 12 ኢሰቲ ባንታ ደናፔ
 ኬሲዛ ናጋራ ገሻሰ፤
 ባንታ ኢንጸርሳ ቃላ ገሻሰ፤
 ኢሰቲ ቃንጊዳ ቃንጌላ
 ገሻሲኔ
 ዋርዶቲዛ ገሻሰ
 ባንታ ኦቶሬቴላን ኦይኬቴቶ።
- 13 ኔ ሃንቆን ኢሰታ ዳይሳ፤
 ኢሰታ ሙሌራ ዲፒ ሂሰታ፤
 ሄ ዋዴ ጸሲ
 ያቆቤ ዜሬላ
 ኣይሲዛዴኔ
 ሳኣ ጋጸ ጋካናሰ ዲዛ ዴራ
 ሃሪዛዴ ገዲዲይሳ
 ኣሲ ኡባይ ኤራና።
- 14 ኢሰቲ ካና ማላ ሆሰካቲሼ
 ካታማ ጊዶን ዩዪ ፔኢዲ
 ኦማርሰ ሲማና።
- 15 ኢሰቲ ሚዛ ሚሽ ሃሲሼ ዩዬቴሰ፤
 ካሎንታ ኣጊኮ
 ካና ማላ ላዌቴሰ።
- 16 ጊዶ አቲን ታኒ
 ኔ ዋልቃ ሳባና፤
 ማላዶ ማላዶ
 ኔ ሚርና ሲቆ ገሻሰ
 ዩጸና።
 ኔኒ ታሰ ሜቶ ጋላሰ
 ዜምፖኔ ባቃታ አቲዛ ሚጸ።
- 17 ኣቤት ጸሳዉ!
 ታ ዋልቃይ ኔና፤
 ኔ ታሰ ሚጸ፤
 ኔ ሚርና ሲቆን ታና ሲቃሳ፤
 ሄሳ ገሻሰ ጋላታ ዩላን

ታ ኔና ሳባና።

60

ሜስጴጶሚያኒኔ አራሜን ዲዛ ዳራራ ኮሌቲ ሲሚዲ ኢዮኣቤይ
ማጸኔ ዙሌን ታማኔ ናሞኡ ሺ ኤደሜ አሳ ዋጁዳ ዋዴ ቲሚርቲስ
ዳዊቲ ዛማሬታ ካቦስ፥ «ጨሻ» ጌቴቲዛ ዲላ ገጊሶን ሺሺዳ
ማርካቴላ ዋሳ

1 አቤት ጸሳው!

ኔኒ ኑና አጋዳሳ፤
ኑና ሜንፎሬላ ዩጋዳሳ፤
ኔኒ ኑና ሃንቄታዳሳ፤
ሃኢ ገዲኮ ሲማዳ
ኑና ገጊሳ።

2 ኔኒ ቢታዮ ቃላዳ ዛኢሳዳሳ፤
ኢዛ ኮኮሪዛ ገሻስ
ኔኒ ኢዚ ዛኣ ኩንላ።

3 ኔኒ ኔ አሳ ሜቶ ቤሳዳሳ፤
ኔኒ ኑና ማሶሲዛ
ዋይኔ ኡሹ ኡሻዳሳ።

4 ኔስ ያዪዛይቲ ባንታ ሞርኬታ
ዋንዳፌፔ አታና ማላ
ማላታ ኢማዳሳ።

5 ኔኒ ሲቂዛይቲ አታና ማላ
ኔ ዋልቃን ኑና አሻ፤
ኔኒ ኑኮ አላ።

6 ጸሲ ባ ኬላን ዲሼ፥
«ታኒ ጸናዳ ሴኬሜ
ቢታ ሻካና፤

ቃሴ ሱኮቲ ሾባ ገሻና።
7 ጋላኣዴይኔ ሚናሴይ ታይታ፤
ኤፍሬሜይ ታስ ሁኤ ቆቤ፤
ዩሁዳይ ታስ ካዋቴላ ጉፌ።

8 ሞኣቤይ ታ ሜጨቴዛሶ፤
ኤደሜይ ታስ ጨማ
ዋሊዛሶ፤
ታኒ ፊሊሰጶሜ
ጸናዳ ጌሬራና» ገዴስ።

- 9 ገምቤቲዳ ካታማኮ
 ታና ኦኔ ኤፋናይ?
 ኤዶሜ ጋካናስ
 ታና ኦኔ ካሌፋናይ?
- 10 አቤት ጸሳው!
 ኩና አጊዳይ ኔና ጊዲኪ?
 «ኔኒ ኑ ቶራንቻታራ
 ኦላስ ኬዚኬ» ጋዳሳ።
- 11 አሳፔ ጊዲዳ ማዶይ ሃዳ፤
 ሄሳ ጊሻስ ኑ ሞርኬታ ቦላ
 ኑስ ጸኖ ኢማ።
- 12 ጸሳ ዋልቃን ኑ ሞርኬታ
 ኑኒ ጸናና፤
 ኢዚ ኑ ሞርኬታ ዬጴታና።

61

ዳዊቲ ዛማሬታ ካቦስ ዲላታን ዬጲዳ ማዛሙራ

- 1 አቤት ጸሳው!
 ኔኒ ታ ዋሶዛ ሲያ፤
 ታ ዋሳካ ኤዘጋ።
- 2 ታ ዋዚናይ ታሂን
 ቢታ ጋጸን ዳሼ ታ ኔና ጴይጋይስ፤
 ታፔ ቶቁዛ ዛላኮ ታና ካሌፋ።
- 3 ኔኒ ታስ ጌሚዛሶኔ
 ታኒ ታ ሞርኬታፔ
 ናጌታ አቲዛ ሚኖ ሚጸ።
- 4 ታኒ ኔ ዱንካኔዛን ሚርናስ ዳና፤
 ኔ ቁፌ ጊዶን ካሜታ አታና።
- 5 አቤት ጸሳው!
 ኔኒ ታ አዲና ሲያዳሳ፤
 ኔ ሱንላ ያዩዛይቲ
 ላቲዛ ላታ ታስካ ኢማዳሳ።
- 6 ካዋዛ ሼምፖ ጋምኢሳ፤

ኢዛ ላይሳ ዩሌታፔ ዩሌታ ጋላ።
 7 ኢዚ ጸሳ ሲንላን ሜርናሰ ካዎቶ፤
 ኔ ሜርና ሲቆኒኔ
 ኔ ቱማቴላን ኢዛ ናጋ።

8 ሂሰቲኮ ታኒ ታ አዲና
 ጋላሰ ጋላሰ ጋላና፤
 ኔ ሱንላካ ኡባቶ
 ዩላን ሳባና።

62

- ዳዊቲ ዛማሬታ ካቦ ኤዶታኔሰ ዩጲዳ ማዛሙራ
- 1 ታ ሼምፖፖ ጸሳን ጸላ
 ሼምፖ ዴማዉስ፤
 ታሰ አቶቴሊ ኢዛፔ ዩሰ።
- 2 ኢዚ ጸላ ታሰ ዛላኔ
 ታና አሺዛይሳ፤
 ታ ቆቴታ ኣቲዛሶ ጊዲዳ ጊሻሰ
 ሙሌካ ሂርጊኬ።
- 3 ጨሚዲ ኩንዳና ማቲዳ
 ጎዳ ማላኔ
 ሙሲዳ ላሻ ማላ
 ዎልቃይ ባይንዳ ኣሰ
 ቋይሳናዉ ሱጊሼ
 ኣዉዴ ጋካናሰ ዴኣንዴቲ?
- 4 ኢሰቲ ኢዛ ቦንቾ ሶሆፔ
 ካወሻናሰ ጸላ ኮዬቴሰ፤
 ኢሰቲ ዎርዶን ኡፋዬቴቴሰ፤
 ባንታ ዶናን ኣንጄቴሰ፤
 ጊዶ ኣቲን
 ባንታ ዎዚናን ቃንጌቴሰ።
- 5 ታ ሼምፖዬ!
 ዎፑ ጋዳ ጸሳ ጸላ ናጋ፤
 ታሰ ሂዶታይ ኢዛፔ ያና።
- 6 ኢዚ ጸላ ታሰ ዛላኔ

ታና አሺዛይሳ፤
 ታ ቆቴታ አቲዛሶ ጊዲዳ ጊሻሰ
 ሙሌካ ሂርጊኬ።

7 ታሰ አቶቴሌኔ
 ቦንሾይ ቤተዳይ ጸሳፌ፤
 ኢዚ ታ ቆቴታ አቲዛሶኔ
 ታሰ ሚኖ ዛላ።

8 አሶ! ኡባ ዎዴ
 ጸሳን አማኔቲቴ፤
 ኢዚ ኑሰ
 ቆቴቲ አቲዛሶ ጊዲዳ ጊሻሰ
 ኢንቴ ዎዚና ቆፋ ኢዛሰ ዮቲቴ።

9 ቦንሾሶፔ
 ዬሌቴሌ ማዴና፤
 ካዴቲዳሶፔ ዬሌቴሌካ
 ኡባይ ሃዴ።
 ኢሰቲ ሜዛኔ ዴንሶንታ
 ጫርኮ ማላ፤
 ኢሰቲ ኢሲ ቦላ
 ጫርኮ ማላ ካዉሻ።

10 ቦንቃን አማኔቶፍቴ፤
 ካይሲ ሺሺዳ ዲሬቴላን
 ሂዶታ አሶፍቴ።
 ኢንቴሰ ዲሬቴሌ ዳሪኮካ
 ኢንቴ ዎዚና ኢዛ ቦላ ዎሶፍቴ።

11 ጸሳይ ኢሲቶ ሃሳይዴሰ፤
 ታኒ ናሞኡ ዮኦታ ሲያዲሰ፤
 ሄይቲካ፥ «ዎልቃይ ጸሳሳ፤

12 ሜርና ሲቆይ ጸሳሳ።»
 አቤት ጎዳዉ!
 ኔኒ አሰ ኡባሰ
 ኢዛ ኦሶ ኦሶ ማላ ኢማና።

63

የሁዳ ባዘን ዲዛ ዎዴ ዳዊቲ ማዛሙራ

1 አቤት ጸሳው!

ኔኒ ታ ጸሳ፤

ታ ኔና ዎዚናፔ ኮያይሰ፤

ታ አሾይካ ኔና አሞቴሰ።

ሃሊ ባይንዳ ሜላ ቢታይ

ሃሊ ኮይዛ ማላ ታ አሳቴላይ

ኔና ሳሜቴሰ።

2 ታኒ ኔና ጌሻሶሆን ጸላዲሰ፤

ኔ ዎልቃኔ ኔ ቦንቾ

ታኒ ቤአዲሰ።

3 ኔ ሜርና ሲቆይ ዴኦፔ ሎኤሰ፤

ታ ኢንጸርሳይ ኔና ጋላቴሰ።

4 ታ ዴኦ ላይላንካ

ታኒ ኔና ጋላታና፤

ኔ ሱንላን ታ ኩሼ

ፑዴ ኔኮ ዴንላና።

5 አሲ ሎኦ ካሊ ሚ ካሊዲ

ኡፋዬቲዛ ማላ

ታ ሼምፖያ ኔናን ኡፋይታና፤

ታኒ ታ ኢንጸርሳን ኡፋይሳ ዬላን

ኔና ጋላታና።

6 ታኒ ታ ሂጸን ዳሼ

ኔና ሃሳኣይሰ፤

ኦማርሰ ኩሜሊ

ኔ ኦሶ ዩሻ ቆፓይሰ፤

7 ኔኒ ታና ማዲዛ ጊሻሰ

ታኒ ኔ ቄፌ ኩዋን ኡታዳ

ኡፋይሳን ዬጸይሰ።

8 ታ ሼምፖያ ሺጵ ጋ ካላዲሰ፤

ኔ ኡሻቻ ኩሼይካ

ታና ሚንሊ ኦይኪዴሰ።

9 ጊዶ አቲን ታና ዎፋና ኮይዛይቲ

- ቢታ ጋርሳን ጨማ ኦላን
ሞጌታና።
- 10 ኢስቲ ማሻሻ አቋ ኢሜታና፤
ኢስቲ ጎዳሬ ካዋ ጊዳና።
- 11 ጊዶ አቲን ካዎይ
ጸሳን ኡፋዬታና፤
ጸሳ ሱንፋን ጫቂዛ ኡባይ
ኢዛ ጋላታና፤
ዋርዶ ሃሳይዛይታ
ዶናይ ጊዲኮ ጎርዴታና።

64

- ዳዊቲ ዛማሬታ ካቦስ ዩዲዳ ማዛሙሬ
- 1 አቤት ጸሳው!
ታ ማጋና ኔኒ ሲያ፤
ታ ሺምፖዮ
ዋቆናስ ማንዲዛ
ታ ሞርኬታፔ ታና አሻ።
- 2 ፓላ አሳታ ማቆፌኔ
ማካላንቻታ ዱላታፔ
ታና ጌንሳ።
- 3 ኢስቲ ባንታ ኢንጻርሳ
ማሻ ማላ ሌፊዳ፤
ቃሴ ማርዜ ቃላታ
ዋንዳፌ ዪሻ ማላ
ዱካናስ ገግሲዳ።
- 4 ኢስቲ ቆቴቲዲ ባንታ ዋንዳፌን
ዲሎ ኣስ ዱኬቴስ፤
ኣሲ ኣኬኮንታ ዲሺን
ዱካናስ ጉዬ ጌቴና።
- 5 ኢስቲ ኢታ ኦላናስ
ኢሶይ ኢሳራ ማቆቴቲስ፤
ጌማራ ዋዲማዴ

- ዋላናስ ዘሬቴቴስ፤
 ኢስቲ፥ «ኑና
 ኑኒ በኣኔ?» ጌቴስ።
 6 ኢስቲ ጌኔ ማቄቲሼ፥
 «ኑኒ ሎኦ ማቆ
 ማቄቲዶስ» ጌቴስ፤
 ሄሲካ አሳ ዋዚናይኔ ካሃይ
 ኢታን ኩሚዳይሳ በሴስ።
 7 ጊዶ ኣቲን ጸሳይ
 ኢስታ ባ ዪሻን ደካና፤
 ኢስቲ ኣኬኮንታ ማዲንፋና።
 8 ኢዚ ኢስቲ ሃሳይዳ ቃላ
 ኢስታ ቦላ ዛራና፤
 ኢስታካ ባሻን ጋላና፤
 ኢስታ በኢዳ ኡባይ
 ኣሙሲዲ ሁኤ ቃላና።
 9 ሄ ዋዴ ኣሳይ ኡባይ
 ጸሳስ ያያና፤
 ጸሳ ኦሶ ቆንጨን የታና፤
 ኢዚ ኦሉዳይሳካ
 ዩሺ ቆፓና።
 10 ዲሎቲ ጎዳን ኡፋዬቴቶ፤
 ኢዛካ ባስ ባቃቲ
 ኣቲዛሶ ኦሌቶ፤
 ዋዚና ሱሬቲ ኡባይ
 ኢዛ ጋላቴቶ።

65

ዳዊቲ ዛማሬታ ካቦስ ዬዲዳ ማዛሙሬ

- 1 ኣቤት ጸሳዉ!
 ዲዮኔን ኔስ ጋላታይ በሴስ፤
 ኑኒ ኔስ ኣዲኔቲዳይሳ
 ጋላና።
 2 ኣቤት ዋሳ ሲዪዛይሶ!
 ኣሳይ ኡባይ ኔኮ ያና።
 3 ኑ ናጋራይ ኑና ሚቲዴስ፤

- ኔኒ ጊዲኮ ኑ ባላ
 አቶ ጋ ወርሳዳሳ።
- 4 ኔኒ ዶሪዳዴይኔ
 ኔናራ ዳና ማላ
 ኔ ዱቡሻኮ ሸሻ
 ኤኪዳዴይ አንጃቲዳዴ፤
 ኔ ጌሻሶዛፔኔ
 ኔ ዱንካኔ አንጃዛፔ
 ኑ ካላና።
- 5 አቤት ኑና አሺዛ ጸሳዉ
 ኔ ጺሎ ኦሶን ማላሊሲዛ ሚሽ
 ኑሰ ኦላ፤
 ሳኦ ጋጸፔ ጋጸ ጋካናሰ፥
 ሃሆ አባታፔካ
 ሄ ፒንላን ዲዛ
 አሳ ኡባሰ ሂዶታይ ኔና።
- 6 ኔኒ ኔ ዎልቃ ጌጼታዳሳ፤
 ዙማታካ ኔ ሚንላ ኤሳዳሳ።
- 7 ኔኒ አባ ጌሪሳኔ
 ዳምባላ ጉንላ
 ሲርጺ ኦላሳ፤
 ቃሴ ዴሬይ
 ዴንዲዛ ዴንላ ኢርጺሳሳ።
- 8 ሄሳሉ ኔኒ ኦላዳ
 ማላታ ጌሻሰ፥
 ሳኦ ጋጸ ጋካናሰ
 ዴኢዛ አሳይ
 ኡባይ ኔሰ፥
 «ሆላ!» ጌሰ።
 አርሼይ ሞኪዛሶፔ
 ወሊዛሶ ጋካናሰ
 ዲዛ አሳ ኡባ ኡፋይሳን
 ኢሊሊ ጌሳዳሳ።
- 9 ኔኒ ቢታ ናጋዳ ሃላ ኡሻሳ፤
 ሂሰታዳ ዳሮ ዱሬሳሳ፤
 አሳሰ ካላይ ሞካና ማላ
 ጸሳ ሻፋይ

- ሃላን ኩሚዴሰ፤
ሄሳሶ ኦላዲ
ኔኒ ጊጊሳዳሳ።
10 ጎሻ ጋዴታስ ጊዲዛ
ኢራ ኢማሳ፤
ጳሼታ ለቁሳሳ፤
ቢታካ ፑሴ ኢራን ሹጊሳሳ፤
ጨሬቻቲ ዶሊ
ዲጫና ማላ አንጃሳ።
11 ላይላ ካሎ ላይላ ኦላሳ፤
ኔኒ ኦጲዳሶ ኡባይ
ካላ ጸላ ጊዴሰ።
12 ሜህ ሄሚዛሶሆን
ጨለላ ማታይ ኩሚዴሰ፤
ዙምቡላቲ ኡፋይሳን ኩሚዴ።
13 ዴምባታን ዉዴ ሜሄይ ኩሚዴሰ፤
ሾባታን ካሊ ኩሚዴሰ፤
ኡባቲካ ኡፋይሳን
ኢሊሊሼ ዩጾቴሰ።

66

- ዛማሬታ ካቦስ ዩጾቴዳ ማዛሙሬ
1 ሳኦን ዲዛ አሰ ኡባይ
አንቴ ቃላ ጶቁሲዲ
ኢሊሊሳን ጸሳ ጋላቲቴ።
2 «ጸሳ ሱንሊ ቦንቼቶ!»
ጊዲ ዩጲቴ፤
ቦንቸ ጋላታ ኢዛሰ ኢሚቴ።
3 ጸሳሰ፡ «ኔ ኦሶቲ
ኦይ ኬና ማላሊሲዛ!
ኔ ዎልቃይ ዳሮ ጊዲዳ ጊሻሰ
ኔ ሞርኬቲ ያሻን
ኔ ሲንላን ኮኮሬቴሰ።
4 ሳኦን ዲዛ ኡባይ
ኔሰ ጎይኔሰ፤
ኔና ሳቤሰ፤
ኔ ሱንላሰ ጋላታ ማዛሙሬ

ዬዴሰ» ገቴ።

- 5 ሃ ዪቴ፤
 ጾሲ ኦሲዳዝ ቤኢቴ፤
 ኢዚ አሳ ገደን ማላሊሲዛ
 ኦሶ ኦሲዴሰ።
- 6 ኢዚ አባ ሃላ ሻኪዴሰ፤
 ቃሴ ቤኒ ኑ አዋቴ
 ሻፋራ ማላ
 ቢታራ ቶሆን ፒኒዳ፤
 ኑኒካ ኢዚ ኦሲዳ
 ኦሶን ኡፋዬቴደሰ።
- 7 ኢዚ ባ ዋልቃን ማርናሰ ሃሬሰ።
 ካዋቴላታ ኡባካ
 ባ ኣይፌን ዴሌሰ፤
 ሄሳ ገሻሰ ማካሊዛይቴ
 ኢዛ ቦላ ጶቁ ጶቁ
 ጎፔቶ።
- 8 አሳዉ! ኑ ጾሳ ጋላቴቴ፤
 ኢንቴ ጋላታ ጨንጉርሳይ ሲዬቶ።
- 9 ኢዚ ኑና ሸምፖራ
 ፓጸ ዋሊዴሰ፤
 ኑኒ ኩንደንታ ማላካ
 ናጊዴሰ።
- 10 ኣቤት ጾሳዉ!
 ኔኒ ኑና ፓጫ ዴላዳሳ፤
 ቢራ ሲሪሲ ጌሺዛ ማላ
 ኑና ጌሻዳሳ።
- 11 ኔኒ ኑና ዋጸማዴን
 ጌልላዳሳ፤
 ኑ ዘኮንካ
 ዴጾ ባኦ ባኢሳዳሳ።
- 12 ኑ ሞርኬቲ
 ኑና ሁኤራ ዱጌ
 ዬዳና ማላ ኦላዳሳ፤
 ኑኒ ሃላ ገደራኔ

ታማ ጊደራ ካንፊደስ፤
 ጊደ ኣቲን ሃኢ ኑና
 ኢሻሎ ሶሆ ኤሃዳሳ።

13 ታኒ ጹጌቲዛ ያርሾራ
 ኔ ጌሻሶሆ ጌላዳ
 ታ ኣዲና ኔስ ጋላና።

14 ታኒ ሜቶቲዳ ዋዴ
 ታ ደናፔ ታ ኬሲዳይሳ
 ታ ኢንጻርሳን ታ ኣዲኔቲዳ
 ኣዲና ታ ጋላና።

15 ታኒ ኔስ ጹጌቲዛ ያርሾስ
 ሞቶታ ሺሻና፤
 ሳዎ ያርሾስ ቆርሾታ፥
 ኮርማታኔ
 ኮርቤታ ሺሻና።

16 ኢንቴኖ ጸሳስ ያዪዛይቶ!
 ኡባቲ ሃ ዪዲ ሲዪቴ፤
 ጸሲ ታስ ኦፊዳይሳ
 ታኒ ኢንቴስ ዮታና።

17 ታ ቃላ ቶቁ ሂስታዳ
 ታኒ ኢዛኮ ዋሳዲስ፤
 ታ ኢንጻርሳንካ ኢዛስ
 ጋላታ ሺሻዲስ።

18 ታኒ ታ ዋዚናን ናጋራ
 ጌንፊዳኮ፥
 ጎዳይ ታ ዋሳ ሲዬና።

19 ጊደ ኣቲን ጸሲ ቱማፔ
 ታስ ሲዪደስ፤
 ታ ዋሳካ ኤዝጊደስ።

20 ታ ዋሳ ካቶንታ፥
 ባ ሜርና ሲቆ
 ታፔ ሃሶንታ
 ጸሳይ ጋላቴቶ።

67

ዛማሬታ ካቦስ ዲላታን ዬዲዳ ማዛሙሬ

- 1 ጸሲ ኑስ ቃጭቶኔ
ኑና አንጃ፤
ባ አይፌሶ ኑ ቦላ ፖኢሶ።
- 2 ኔ አጌቲ ሳኣ ቦላን፥
አሺዛ ኔ ዋልቃይካ
ካዎቴላታ ኡባ
ጊዶን ኤሬቴቶ።
- 3 አቤት ጸሳዉ!
አሳይ ኔና ጋላቶ፤
ካዎቴላ ኡባይ
ኔስ ጋላታ ሺሹ።
- 4 ኔኒ አሳስ ሱሬቴላን
ፒርዲዛ ጊሻስ
ሳኣ ቦላካ ኔ ዴራ
ካሌሊዛ ጊሻስ
ካዎቴላቲ ኡፋዬቴቶ፤
ኢሊሊሽካ ኔስ ዬጾቶ።
- 5 አቤት ጸሳዉ!
አሳይ ኔና ጋላቶ፤
ካዎቴላ ኡባይ
ኔስ ጋላታ ሺሹ።
- 6 ቢታይ ካሐ አማና፤
ጸሲ፥ ኑ ጸሳይ ኑና አንጃና።
- 7 ጸሲ ኑና አንጃና፤
ሳኣ ጋጸ ጋካናስ ዲዛ አሳይ
ኡባይ ኢዛስ ያያና።

68

ዳዊቲ ዛማሬታ ካቦስ ዬዲዳ ማዛሙራ

- 1 ጸሲ ዴንዶ፤
ኢዛ ሞርኬቲ ላሌቴቶ፤
ኢዛ ኢዲዛይቲ
ኢዛ ሲንጻፌ ባቃቴቶ።
- 2 ጨዋይ ጨርኮን ላሌቴዛ ማላ
ኔኒ ኢስታ ላላ፤
ሙቃዲይ ታማን ሴሪዛ ማላ፥

- ኢታቲ ጸሳ ሲንላፌ
ሴሪ ዳዬቶ።
- 3 ጸሎቲ ጊዲኮ ኡፋዬቴቶ፤
ጸሳ ሲንላን
ኡፋይሳን ሆምቦጩቶ፤
ቃሴካ ማጉሌቶ።
- 4 ጸሳስ ዬጺቴ፤
ኢዛ ሱንላስ ጋላታ ማዛሙሬ ዬጺቴ።
ሻራ ቦላራ * ሄሜቲዛይሳ
ጾቁ ጾቁ ሂስቲቴ፤
ኢዛስ ሱንላይ ጎዳ፤
ኢንቴካ ኢዛ ሲንላን
ኬሂ ኡፋዬቴቴ።
- 5 ጸሲ ባ ጌሻሶሆን ዲሼ
አዋይ ባይንዳይታስ አዋ፤
ቃሴ አምኤታስካ ፒርዲዛ ዳና።
- 6 ጸሲ ባርካ ዲዛ ቢዛታስ
ሶ አስ ኢሜስ፤
ቃሾ ኬላን ዲዛይታ ቢርሺዲ
ኢስታ ኢሻሎን ዋሕስ።
ማካላንቻቲ ጊዲኮ
ሱሊዛ ባዞን ዳኣና።
- 7 አቤት ጸሳዉ!
ኔኒ ኔ አሳ ካሌሊዳ ዋዴ፥
ኔኒ ኢስታራ ባዞ
ካንሊዳ ዋዴ፥
- 8 ሲና ጸሳ ሲንላን፥
ኢስራኤሌ ጸሳ ሲንላን
ቢታይ ቃጺዴስ፤
ሳሎቲ ኢራ ዲጌ ቲጊዳ።
- 9 አቤት ጸሳዉ!
ኔኒ ኮሺዛ ኬና
ኢራ ኢማዳሳ፤
ላዳ ቢታካ አራዲሳዳሳ።

* 68:4 ሻራ ቦላራ ጊዛይሲ ባዞራ ጌቱታና ዳንዳዬስ።

- 10 ኔ ዳሬዚካ ኢዞ
 ባሰ ዲሳሶ ሂሰቲዳ፤
 ኣቤት ጸሳዉ!
 ማንቆታሰ ኮሺዛዝ
 ኔኒ ኪያቴላን ኢማዳሳ።
- 11 ጎዳይ ቃላ ዩዲዴስ፤
 ሄ ኪታ ዳሮ ማጫሳቲ
 ዴራስ ኣዋጂዳ።
- 12 ኢሰቲ፥ «ካዎቲ ባ ኦላንቻታራ
 ዲኦ ጊሼቲ ኤኪዳ።
- 13 ዶርሳታ ናጋናሰ ጉዬን ኣቲዳይቲ
 ቢራፔ ኦሴቲዳ ቄፌቲ ቦላራ
 ጸልቂዛ ዎርቃን
 ቲዬቲዳ ሃራዴ
 ሚሰሌ ዴሚዳ» ጊዳ።
- 14 ኡባ ዳንዳይዛ ጸሳይ
 ካዎታ ላሊዳ ዎዴ፥
 ጸልሞኔ ዙማ ቦላ
 ቫቶ ቡኪሲዴስ።
- 15 ባሳኔ ዙማቲ
 ዎጋ ጊታ ዙማታ፤
 ባሳኔ ዙማታ ቦላ
 ዳሮ ፖጎኖቲ † ዴቴስ።
- 16 ዳሮ ፖጎኖቲ ዴኢዛ ዙማቶ!
 ጸሲ ዳናሰ ዶሪዳ ዙማዛ
 ኢንቴ ኣይሰ ሚቃይኔን ዴሌቲ?
 ጎዳይ ኢዛን ሜርናሰ ዴኣና።
- 17 ጸሳ ፓራ-ጋሬቲ
 ዳሮ ሺያን ቆዴቲዛይታ፤
 ጎዳይ ሲና ዙማፔ
 ባ ጌሻሶሆ ዩዴስ።
- 18 ጎዳዉ! ዲኦ ኤካዳ

† 68:15 ፖጎኖቲ፡ ፖጎኖቲ ጊዛይሲ ኣማራቶ ቃላን ጉቢታ ጊዛይሳ ቤሴስ፤ ኦ ቃላን
 ኢዛ ቢርሼላስ ዚቂ ቶቂ ጊዲ ሳንሳላታ ማላ ኦይኩቲዲ ቢዛ ዙማ ዴራታ ቤሴስ።

ጉዳ ኔ ዱሳስ ኬዛዳሳ፤
 አሳ ኡባፌ ኢሞታ ኤካዳሳ፤
 ሃራይ አቶሺን
 ማካላንቻታፔካ
 ኤካዳሳ፤

19 ሃች ሃች ኑ ቶሆ
 ቶኪዛ ጎዳይ፥
 ኑና አሺዛ
 ኑ ጸሳይ ጋላቴቶ።

20 ቤአቴ! ኑ ጸሲ አሺዛ ጸሳ!
 ሃይቆፔ አታና ዳንዳዬቴዛይ
 ጎዳይ አሺና።

21 ጸሲ ቱማፔ ባ ሞርኬታ
 ሁኤ ከንቻና፤
 ናጋራ ኦጌን ሄማቴዛ
 ጎፋራንቻታ
 ሁኤ ቆኤሬላና።

22 ጎዳይ፥ «ታኒ አንቴ ሞርኬታ
 ባሳኔፔ ዛራዳ ኤሃና፤
 ታኒ ኢሰታ ጨማ አባ ጊዶፌ
 ኬሳዳ ጉዬ ዛራና።

23 ኔኒ ኔ ሞርኬታ ሱሐ
 ዬታ አታና፤
 ኔ ካናቴካ ሞርኬታ ሱሐፌ
 ባንታ ጊሻ ላጫና» ጊደሰ።

24 አቤት ጸሳዉ! ኔ ጸኖ ጨፍራይ
 ኡባን ቤቴሰ፤
 ታ ጸሳኔ ታ ካዎይ አዛባን
 ባ ጌሻ ሶ
 ጌልሐሺ ቆንጨሰ።

25 ዬዲዛይቴ ሲንላን፥
 ቃሴ ካራቤ ባቂዛ
 ጌላኦቴ ጊዶን፥

- ዲዲዛይቲ ጉዬን
ኣዛቢ ቤቴሰ።
- 26 ኢሰቲ፡ «ጸሳ ኩሜላ
ሺቆን ጋላቲቴ፤
ኢንቴኖ ኢሰራኤል ዜሬላቶ
ኅዳ ጋላቲቴ» ጌቴሰ።
- 27 ሄ ጨፍራን ኡባፌ ካሎቲዛ
ቢኒያሜ ዛሬቲ ካሌጮቴሰ።
ካሊዲ ዩሁዳ ዳናቲ
ባንታ ቡቴን ቡቴን ቤቴሰ፤
ወርሲላን ዛቢሎኔ
ዳናቲኔ
ኒፍታሌሜ ዳናቲ ካሌቴሰ።
- 28 ኣቤት ጸሳዉ!
ኔ ዋልቃ ቆንጨሳ።
ሃይሳፌ ካሌ ኔ ኑሰ
ኦሊዳይሳሶ
ሃኢካ ኔ ሚኖቴሐ ኑና ቤሳ።
- 29 ዬሩሳላሜን ዲዛ
ኔ ኬላ ጊሻሰ
ካዎቲ ኢሞታ
ኔሰ ኤኪ ያና።
- 30 ማቃ ጊዶን ዲዛ ዶኣታ †
ኔኒ ሴራ።
ቦራታኔ ማራታ
ዉዴ ሚሳቲዛ
ካዎታ ኔኒ ላላ፤
ኢሰቲ ጉልባቲዲ ባንታ ቢራ
ኔሰ ጊራና ማላ ኦላ፤
ኦሌታናሰ ዬሞቲዛ
ኣሳታ ላላ።
- 31 ጊታ ኣሳቲ ጊብጾፔ ያና፤
ቶጵያይ ባ ኩሺ
ጸሳኮ ሚጫና።
- 32 ኢንቴኖ ሳኣ ካዎቴላቶ!

† 68:30 ማቃ ጊዶን ዲዛ ዶኣታ ጊዛይሲ ጊብጾ ቤሴስ።

- ጸሳስ ዩጲቴ፤
 ጎዳስ ጋላታ ማዛሙሬ ሺሺቴ።
 33 ቤኒሶፔ ደሚዲ ዲዛ
 ሳሎታፔ ቦላራ
 ቢዛይሳስ ዩጲቴ፤
 ኢዚ ባ ዎልቃማ ጨንጉርሳ
 ጉንፋን ዮተሺን ኤዘጊ ሲዩቴ።
 34 ኢዛ ቴማይ ኢሰራኤል ቦላና፤
 ኢዛ ዎልቃይካ ሳሎና።
 ሄሳ ጊሻስ
 ጸሳ ዎልቃ ኣዎጂቴ።
 35 ኣቤት ጸሳዉ!
 ኔኒ ኔ ኩላፌ
 ቆንጫሽ ማላሊሳሳ፤
 ኢሰራኤል ጸሳይ
 ባ ዴራስ ሚኖቴሉኔ
 ዎልቃ ኢሜስ።
 ጸሲ ጋላቴቶ።

69

ዳዊቲ ዛማሬታ ካቦስ ጨሻታ ጊጊሶ ጌቴቲዛ ዋጸን ዩጲዳ
 ማዛሙሬ

- 1 ኣቤት ጸሳዉ!
 ሃላ ኪጸይ ታስ
 ቆጼ ጋኪዳ ጊሻስ
 ኔ ታና ኣሻ።
 2 ቶሆይ ኤቂዛሶይ ባይንዳ
 ጫሬን ሚቴታዲስ፤
 ጨማ ሃላ ጊዶ ጌላዲስ፤
 ሃላ ዳምባላይ
 ታና ሚታና ሃኔስ።
 3 ታኒ ማዶ ዴማናስ
 ዋሳሽ ዳቡራዲስ፤
 ታስ ቆጼ ፖራንዴይካ
 ሜሊዴስ።
 ታ ጸሳ ናጎን ዲሺን
 ታ ኣይፌይ ባልጁሚዴስ።
 4 ታና ሜላ ጮ ኢጲዛይቲ

ታ ሁኔ ቢናናፔ ዳሮ።
 ዋርዶራ ታና ሞርኪዛይቲኔ
 ታና ቆይሳናው
 ኮይዛይቲ ዳሪዳ።
 ታ ካይሳ ኤኮንታ ሚሽ
 ታና ቃንጸ ጊዳ።

- 5 አቤት ጸሳው!
 ታ ኤያቴላ ኔኒ ኤራሳ፤
 ታ ኦሊዳ ናጋራይ
 ኔፔ ቆቴቲቤና።
- 6 አቤት ጎዳው፥
 ኡባፌ ዋልቃማ ጎዳው!
 ኔና ሂደታ ኦሊዳይቲ
 ዬላቶፔቶ፤
 አቤት ኢሰራኤል ጸሳው!
 ኔና ሚንሊ ኮይዛይቲ
 ታ ጋሶን ካውዮፌቶ።
- 7 ታኒ ጫሽ ኔ ጊሻሰ
 ጋዳ ዳንዳያዲሰ፤
 ታ አይፌሶይ ዬላቲዳሰ።
- 8 ታኒ ታ አሻንታሰ አማል፥
 ቃሴ ታ አዬይ ናይታሰ
 አላጋ ጊዳዲሰ።

- 9 ታኒ ኔ ኬላሰ
 ሚሼቲዛ ሚሾይ
 ታና ታማ ማላ ጸጌሰ፤
 አሳይ ኔና ጫዪዳ ጫሻይ
 ታና ጋኪዴሰ።
- 10 ታ ጸማሼ ዬካዲሰ፤
 ሄሳንካ ታ ቂዴታዲሰ።
- 11 ታኒ ካዮ ማይኦ ማይኦዲሰ፤
 ኢሰታሰካ ታኒ ቶሴሰ * አታዲሰ።
- 12 ታኒ ካታማ ጌሊዛ ፔንጌን

69:4 ማዛ 35:19፤ ዮሃ 15:25 69:9 ዮሃ 2:7፤ ኦሮ 15:3 * 69:11 ቶሴ፡
 ቶሴ ጌቲቲዛ ቃላዚ ሊቆስ፥ ቂዴስ፥ ሄሳ ሄሳ ማላሰ ጎኤሰ

ኡቲዛይታስ ዘገርሳስ ኣታዲስ፤
ማሳቲዛይታስ
ዬላስ ገዳዲስ።

- 13 ኣቤት ጎዳዉ!
ታኒ ገዲኦ ንና ዋሳይስ።
ኣቤት ጸሓዉ!
ኔ ዶሪዳ ዋዴ
ታ ዋሳ ሲያ፤
ኔ ማርና ሲቆን
ኔ ኣሺዛ ኣሸዛ ታና ቤሳ።
- 14 ጫሬን ማቴቶንታ ማላ
ታና ኣሻ።
ታና ኢዲዛይታፔ ታና ናጋ፤
ጪማ ሃላፊካ ታና ኣሻ።
- 15 ዲኦ ሃሊ ታና ኤፎፖ፤
ጪማ ኣባይ ታና ማቶፎ፤
ጪማ ኦላይ ታና ቦላ ዋዶ።
- 16 ኣቤት ጎዳዉ!
ኔ ማርና ሲቆ ኪያቴላ ማላ
ታስ ዛሮ ኢማ፤
ኔ ቃጺታ ዳሮን ታኮ ሲማ።
- 17 ታፔ ኔ ኣይሌዛፔ
ኔ ሲንላ ጌንሶፋ፤
ታኒ ዋዬቲዛ ገሻሰ
ታስ ኤሶን ዛሮ ኢማ።
- 18 ኔኒ ታኮ ሺቃዳ ታና ዋዛ፤
ታ ሞርኬታፔካ
ታና ኬሳ ላኣ ዬዳ።
- 19 ታ ቦላ ጋኪዳ ጫሻ፥ ዬላቴላኔ
ካዉሻቴላ ኔ ኤራሳ፤
ታ ሞርኬታካ ሁኤን ሁኤን
ኔ ዴማሳ።
- 20 ጫሺ ታ ዋዚና ማዲንሉን
ታ ሂዶታ ቃንጸዲስ።
ታስ ቃጺቲዛ ኣስ ኮያዲስ፤
ገዶ ኣቲን ኢሲ ኣሲካ ዴና።

- ታና ሚንፌሊዛ አስ ኮያዲሰ፤
 ጊደ አቲን ኢሳዴካ
 ዴማቤኬ።
- 21 ታኒ ጋፊዳ ዋዴ
 ታስ ጫሚዛ ካል ኢሚዳ።
 ታኒ ሳሚቲዳ ዋዴ
 ታስ ጫላ ጳንቂዳ
 ኡሹ ኢሚዳ።
- 22 ኢሰቲ ሚዛ ማዳይ
 ኢሰታስ ዋጺማዴ ጊደ።
 ኢሰቲ ያርሾ ያርሺዲ
 ሚዛ ማዳይ ኢሰታስ ጊቴ ጊደ።
- 23 ጸሎንታ ማላ
 ኢሰታ አይፌይ ጎዜቶ፤
 ኢሰታ ዘኮይ ቁኒ አቶ።
- 24 ኔኒ ኔ ሃንቆዛ ኢሰታ ቦላ ጉሳ፤
 ኢሰቲ ቆፖንታ ዲሺን
 ኔ ቦሻይ ኢሰታ ቦላ ጋኮ።
- 25 ኢሰታ ዱሳሶይ ካይሰ ጊደ፤
 ኢሰታ ዱንካኔን ኦኒካ ዶፖ።
- 26 አይሰ ጊኮ ኔኒ ቃጸይዳይታ
 ኢሰቲ ዬዴፍቲሰ፤
 ቃሴ ኔኒ ማዲንሊዳ
 አሳታ ቦላ
 ሜቶ ዳሪሴቲሰ።
- 27 ኢሰቲ ናጋራ ቦላ ናጋራ
 ጉጂ ጉጂ ባና ማላ አጋጋ፤
 ኔ ኢሰታ ማሮፓ።
- 28 ኢሰቲ ዴኦ ማጻፋፔ ቁጩቴቶ፤
 ጸሎታራ ኢሲፌ ማዝጋቤቶፌቶ።
- 29 ጊደ አቲን ታኒ ሳኬታሽኔ
 ዋዴታሽ ዴአይሰ።
 አቤት ጸሳዉ!

ኔ ታና አሻዳኔ ናጋ።

- 30 ታኒ ጸሳ ሱንሳ
 ዬላን ጋላታና፤
 ጋላታ ዬላን
 ኢዛ ገታቴላ ቆንጨሳና።
- 31 ሃይሲ ሳንጌቶንታ ቦራፔኔ
 ኮርማ ያርሾፌ
 አጂዲ ጎዳ ኡፋይሳና።
- 32 ቆሄቲዳይቲ ታና
 ጸሳይ አሺዳይሳ
 ቤኢዲ ኡፋዬቴቶ።
 ኢንቴኖ ጸሳኮ ሺቁዛይቶ
 ኢንቴ ዎዚናይ ሚኔቶ።
- 33 አይሰ ጊኮ ጎዳይ ሂዬሳታ ሲዬስ፤
 ቃሾ ኬላን ዴኢዛ
 ባ አሳካ ካጼና።
- 34 ሳሎይኔ ሳአይ፥
 አባይኔ ኢዛ ገደን
 ዎጺ ቃጺዛ ኡባቲ
 ጸሳ ጋላቴቶ።
- 35 ጋሶይካ ጸሲ
 ጸዮኔ አሻና፤
 ዩሁዳ ካታማታ ዛሪዲ ኤሳና።
 ኢዛ ዴሬይ ሄ ቢታ ላቲዲ
 ሄን ዴእና።
- 36 ኢዛ ኦሳንቻታ ዛሬይ
 ሄ ቢታ ላታና፤
 ኢዛ ሱንሳ ሲቁዛይቲ
 ሄን ዴእና።

70

ዛማሬታ ካቦስ ዳዊቲ ዬጲዳ ሃሳኢሶ ማዛሙራ
 (ማዛ 40:13-17)

- 1 አቤት ጸሳዉ!
 ታና አሻናዉ
 ታኮ ሃ ሲማ፤

- እቤት ጎዳዉ!
 ታና ማዳናዉ ኤሶታ።
- 2 ታና ዋቆናዉ ኮይዛይቲ
 ዩላቴቶኔ ሺርቴቶ፤
 ታኒ ቆሄታናይሳ አሞቲዛይቲ፥
 ካዉዪዲ ጉዬ ሲሜቶ።
- 3 ታ ቦላ፥ «ኢዛሰ ሃሹ! ሃሹ!»
 ጊዳይቲ ዩላቴዲ ጉዬ ሲሜቶ።
- 4 ጊዳ አቲን ኔና ኮይዛ ኡባቲ
 ኔናን ኡፋዬቴቶኔ
 ሃሹ ጌቶ፤
 ቃሴ ኔ አቶቴላ
 ዶሲዛ ኡባቲ፥
 «ዶሲ ቶቁ ቶቁ
 ጎ!» ጌቶ።
- 5 ታኒ ሂዬሳኔ ሜቶታንቻ፤
 እቤት ጸሳዉ!
 ኤሶን ታኮ ጋካ።
 ታና ማዲዛይኔ
 አሺዛይ ኔና፤
 እቤት ጎዳዉ! ጋሞኦፋ።

71

- 1 እቤት ጎዳዉ!
 ኔኒ ታሰ ታ ባቃታ አቲዛሶ፤
 ሙሌካ ኔ ታና ዩላሶፓ።
- 2 ኔ ጸሎቴላን ታና ኬሳ ኤካ፤
 ኔ ሃይላ ታኮ ዩጋዳ
 ታና አሻ።
- 3 ኔ ታሰ ኡባ ዎዴ
 ጌሜታ አቲዛ
 ሚኖ ዛላ ጊዳ፤
 ታና አሻናሰ ኔ አዛዛ፤
 ታሰ ሚኖ ሚጸይኔ
 ዛላይ ኔና።
- 4 እቤት ታ ጸሳዉ!
 ኢታታ ኩሼፔ፥

ጌናንቻታፔኔ
ሚንጾ ኢታታፔ
ታና አሻ።

5 አቤት ኡባ ሃሪዛ ጎዳዉ!

ታ ሂዶታይ ኔና፤
ዬላጋቴላ ዋዴፔ
ደማዳ
ታ አማኔቲዛይ ኔና።

6 ታኒ ዬሌቶሶፌ ደማዳ
ታ ኔናን ዜምፓዲስ፤
ታ አዬይ ኡሎፔ ታ ዬሌታና ማላ
ኦሊዳይ ኔና፤
ኡባ ዋዴ ታ ኔና ጋላታይስ።

7 ዳሮ አሳይ ታና
ደማ አይፌን ጼሊዴስ፤
ኔኒ ጊዲኮ ታ ባቃታ አቲዛ
ዋጋ ዛላ።

8 ጋላስ ኩሜላ ኔ ቦንቾ
ታ ዮታናስ፥
ታ ደናን ጋላታይ ኩሚዴስ።

9 ታኒ ጨሚዳ ዋዴን ታና ኦሎፓ፤
ታ ዋልቃይ ኢጲዳ ዋዴን
ታና አጎፋ።

10 አይስ ጊኮ ታ ሞርኬቲ
ታና ሂሊዳ፤
ታና ዋዳናዉ ኮይዛይቲ
ታ ቦላ ኢታ ማቄቲዳ።

11 ኢሰቲ፥ «ጸሲ ኢዛ አጊዴስ፤
ኢዛ አሻናይካ ዴና፤
ሄሳ ጊሻስ አኔ ኢዛ
ጎዲ ኦይኮስ» ጊዳ።

12 አቤት ጸሳዉ! ታፔ ሃኮፋ።
አቤት ታ ጸሳዉ!

ታና ማዳናስ ኤሌላ።

13 ታና ሞቲዛይቲ ዬላቲዲ ጳዬቶ።
ታና ቆሃናዉ ኮይዛይቲ

ዬላኔ ካዉሻቴስ
ማይኤቶ።

- 14 ታኒ ጊዲኮ ኡባቶ ኔና
ሂዶታ አላይሰ።
ታኒ ጋላታ ቦላ ጋላታ
ኔሰ ጉጃና።
- 15 ታኒ አይ ሊኬ ሃሳያናኮ
ኤሮንታ አጊኮካ
ጋላሰ ኩሜስ ታ ዶናይ
ኔ ጸሎቴላ ጊሻሲኔ
ኔ አቶቴላ ጊሻሰ ሃሳዬሰ፤
- 16 አቤት ጎዳዉ፥ ጸሳዉ!
ታኒ ያዳ ኔ ዋልቃማ
ኦሶ አዋጃና፤
ቃሴካ ኔ ጸሎቴላ ጸላ
ዮታና።
- 17 አቤት ጸሳዉ!
ኔኒ ታና ዬላጋቴላፌ
ዶማዳ ታማርሳዳሳ፤
ታኒካ ሃኖ ጋካናዉ
ማላሊሲዛ
ኔ ኦሶዛ አዋጃይሰ።
- 18 አቤት ጸሳዉ!
ኔ ማታ ጉዬፔ
ያና ዬሌታሰ፥
ኔ ዋልቃ ጉዬፔ ያና ዴሬ ኡባሰ፥
ታ ቆንጨሳና ጋካናሲኔ
ታ ጨማዳ ፑሉማና ጋካናሰ
ኔ ታና አጎፋ።
- 19 አቤት ጸሳዉ!
ኔ ጸሎቴላይ ሳሎ ጋኪዴሰ፤
አቤት ጸሳዉ!
ኔኒ ጊታ ሚሽ አላዳሳ፤
ኔና ሚሳቲዛይ ኦኒካ ዴና።
- 20 ኔኒ ታ ቦላ ዳሮ ሚቶ ኤሃዳሳ፤
ጊዲኮካ ኔኒ ታና

- ጨማ ኦላፌ
 ጎቻ ኬሳዳሳ፤
 ታ ዴኦ ዛራ ኦራዳዳ።
- 21 ኔኒ ታ ቦንቾ
 ካሴይሳፌ ዳርሳና፤
 ኔኒ ታና ዛሬዳዳካ
 ሚንፊሳና።
- 22 አቤት ታ ጸሳው!
 ኔ ቱማቴላ ጊሻስ
 ታኒ ኔና ዲላን ጋላታና፤
 አቤት ኢስራኤል ጌሻው!
 ታኒ ማሲንቆን ኔና ሳባና።
- 23 ታ ዋዚናይ ኡፋይሳን ኩሚዲ
 ኔስ ዬጸዛ ዋዴ፥
 ኔኒ ዋዚዳ ታ ሼምፖያ
 ኔስ ኢሊላውስ።
- 24 ታ ኢንጻርሳይ
 ኔ ጸሎቴላ ጊሻስ
 ጋላስ ኩሚል ሃሳዬስ፤
 ታ ቆሂቴል ኮይዛይቲ
 ዬላቲዳኔ ካወዱዳ።

72

ሶሎሞን ማዛመሬ

- 1 አቤት ጸሳው!
 ሱሬ ፒርዳ ካዎስ፥
 ኔ ጸሎቴላካ
 ካዎ ናስ ኢማ።
- 2 ሂስቲኮ ኢዚ ኔ ዴራስ
 ጸሎቴላን ፒርዳና፤
 ናቄቲዳይታሲካ
 ሱሬ ፒርዳና።
- 3 ዙማቲ ዴሬቴል ኤሃና፤
 ዙምቡላቲካ ጸሎቴል
 ኔ ዴራስ ኤሃና።
- 4 ሜቶቲዳይታ ጊሻስ
 ኢዚ ሞቴታና፤

ሂዬሳታ ኢዚ አሻና፤
ኡንኤሊ ዛይሳካ ኢዚ ሊቁሳና።

- 5 አዋይኔ አገናይ
ዲዛ ዎዴ ኡባን
አሳይ ኢዛሰ ሃሬቶ።
- 6 ካዎይ ሾቃን ቡኪዛ
ኢራ ማላኔ ጋዴ ካልሲዛ
ፑሴ ኢራ ማላ ጊዳና።
- 7 ኢዚ ዲዛ ላይሰ ኡባን
ጸሎይ ጨያና፤
አገናይ ዳያና ጋካናሰ
ቢታ ቦላ ሳሮቴሊ ዳራና።
- 8 አባፌ ቢዲ አባ ጋካናሰ፥
ኤፊራጺሴ ሻፋፔ
ሳኣ ጋጸ ጋካናሰ
ኢዚ ሃራና።
- 9 ባዞን ሜሄ ጸላ ሃሪ አቁዛይቲ፥
ኢዛ ሞርኬቲ ጉዲላ ላጫና።
- 10 ታርሴሴ ካዎቲኔ
ሃሩርታ ካዎቲ
ኢዛሰ ጊራ ኤሃና።
ሳባኔ ሳባ ካዎቲ
ኢዛሰ ኩሼ ፔንሶ ኤሃና።
- 11 ካዎቲ ኡባይ ኢዛሰ ጉልባታና፤
ካዎቲላይ ኡባይ
ኢዛሰ ሃሬታና።
- 12 ሜቶታንቻይ ዋሲዛ ዎዴ፥
ማንቆኔ ማደይ ባይንዳ
ኣሰ ኢዚ አሻና።
- 13 ሂዬሳታሲኔ ማንቆታሰ
ኢዚ ቃጺቴሰ፤
ሜቶታንቻታ ሺምፖካ
ኢዚ ሃይቆፔ ኣሺሰ።
- 14 ኢሰታ ሺምፖ ቆሆፔኔ

ጌኔፔ ኢዚ አሻና፤
ኢስታ ሱላይ
ኢዛ ሲንላን አልኦ።

15 ካዎይ ሼምፖ ጋምኦ፤
ሳባ ቢታ ዋርቃይ ኢዛስ ኢሜቶ።
ፓጩይ ባይንዳ ኢዛስ ዋሴቶ፤
ጋላስ ኡባን ኢስቲ ኢዛ አንጃቶ።

16 ቢታን ዳሮ ካላይ ሞኮ፤
ዙማቲ ካላን ካሜቱቶ፤
ቢታይ ሊባኖሴ ማላ
ካላ ቢታ ጊደ፤
ማታይ ዴምባ ኩሚዛ ማላ
ካታማ ኩሞ።

17 ካዎዛ ሱንሊ
ሜርናስ ሚኒ ዴኦ፤
ኦርሼይ ዴኢዛ ኬና
ዴይፔቲሼ ጋምኦ።

ካዎቱስ ኡባይ
ኢዛ ባጋራ አንጃቶ፤
ዴሬ ኡባይ ኢዛ፥
«ኔ አንጃቲዳዴ» ጌ አንጃ።

18 ማላሊሲዛ ሚሽ
ባርካ ኦሊዛ ጎዳይ፥
ጸሳይ፥ ኢስራኤሌ
ጸሳይ ጋላቴቶ።

19 ኢዛ ቦንቾ ሱንላይ
ሜርናስ ጋላቴቶ፤
ቢታ ኡባይ
ኢዛ ቦንቾን ኩሞ።
አሚን! አሚን!

20 ኢሴዬ ና ዳዊቱ ዋሳይ
ሃይሳን ፖሌቲዴስ።

ሄቫንሶ ማጻፋ

73

(ማዛ 73—89)

እሳፌ ማዛሙራ

1 ዋዚና ጌሽ ጊዲዳ
ኢስራኤል እሳስ
ጸሲ እይ ማላ ኪያ!

2 ጊዳ አቲን ታ ቶሆይ ቆጶቲን
ታ ኩንዳይቻዳ
ጉላሶን አታዲስ።

3 አይስ ጊኮ ኢታ እሳታኔ
ማካላንቻታ ዱሬቴላ
ቤአዳ ታኒካ ኢስታ ማላ
ሃናናስ አሞታዲስ።

4 ኢስታስ ቱጋይ ዴና፤
ኢስታ እሳቴላይ ፓያኔ ሚኖ።

5 ኢስቲ ሃራ እሳይ
ቱጋቲዛ ማላ ቱጋቴቴና፤
ሃራ እሳ ማላካ
ሜቶቲ ኤሬቴና።

6 ሄሳ ጊሻስ ኢስቲ ኦቶሬቴላ
አሌቆ ማላ ቆጴን አሌቴስ፤
ማካላቴላ አፋላ ማላ
ማይኤቴስ።

7 ኢስታ ዋዚናፔ
ኢታ ቆፋይ ፑልቴስ፤
ባንታ አይፌ ኬሲ ዴሬቄቴስ።

8 ኢስቲ ቂጴቴስኔ
ኢታ ሃሳዬቴስ፤
ኢስቲ ባንታ ኦቶሮን ሃራታ
ኡንኤላናዉ ማንዴቴስ።

9 ኢስቲ ሳሎን ዲዛ ጸሳ
ባንታ ዶናን ጫዬቴስ፤
ሳኣን ዴኢዛ እሳ
ባንታ ኢንጻርሳን ዴኬቴስ።

10 ሄሳ ጊሻስ ዴሬ ኡባይ
ኢስታኮ ጎቼስ፤

- ኢስቲ ዮቲዛይሳካ ኡባ
ኤሶን አማኔቲስ።
- 11 ኢስቲ፡ «ጸሲ አይ ኤሪዜ?
ኡባፌ ቶቃ ጸሳስ
ኤራቴሉ ዲዜ?» ጌቲስ።
- 12 ሄኮ ኢታቲ ሃይሳ ሚሳቲቲስ፤
ኢስቲ ኡባቶ ዉዱ ጎንታይታ፤
ዲሬቴሉ ቆጆ ጋኪዳይታ።
- 13 ሂስቲን ታኒ
ዎዚና ጌሻቲላን
ናጊዳይሲ
ታና አይ ማዲዴ!
ታ ኩሼ
ታ ጸሎቲላን ሜጪዳይሲ
ጮ ታና ጳሊቤና።
- 14 ጋላስ ኩሜሐ
ታኒ ሜቶ ቤያዲስ፤
ዎንቲን ዎንቲን
ታኒ ቃጸዬታዲስ።
- 15 ታኒ ኢስቲ ሃሳይዛይሳ ማላ
ሃሳያና ቆፒዳኮ
ኔ ዴራስ
ታ አማኔቶንታ አስ ጊዳና።
- 16 ታኒ ሃ ዮኦዛ ሻካ
ኤራናስ ቆፓዲስ
ጊዶ አቲን ታ ኤራፔ ቦላ ጊዲዴስ።
- 17 ሄሲካ ታኒ ጸሳ ጌሻሶሆ
ጌላና ጋካናሲኔ
ኢታታ ዉርሴላ
ቤእና ጋካናሳ።
- 18 አዳካ ኔ ኢስታ
ሃሊጸዛሶን ዎላዳሳ፤
ኔኒ ኢስታ ዲጌ
ባሻሶ ዬዳዳሳ።

- 19 ኢስቲ ሃሳኑንታ ኤሶን ጳይዳ፤
ዳጋማን ኢሶይካ አቶንታ
ዲፒ ጊዳ።
- 20 አቤት ጎዳፊ! ኔኒ ዴንዲዛ ዋዴ
አሲ ጲስኮፌ ቤጊን ጳይዛ
አጉሞ ማላ ኢስቲ ጳያና።
- 21 ታኒ ዪሎቲዳ ዋዴኔ
ታ ዋዚናይካ ማዲንጺዳ ዋዴ፥
22 ታኒ ቆፋይ ባይንዳ ዳማዲሰ፤
ታኒ ኔ ሲንሳን
ሚዛ ማላ ጊዳዲሰ።
- 23 ጊዶ አቲን ታኒ ኡባቶካ
ኔናራ ዳይሰ፤
ታ ኡሻቻ ኩሼዛካ
ኔኒ ኦይካዳሳ።
- 24 ኔ ዞሬን ታና ካሌላዳሳ፤
ሄሳፌ ጉዬ ኔኒ
ታና ቦንቸሰ ኤፋና።
- 25 ሳሎን ኔፔ አቲን
ታሰ ሃራይ
ኦኒ ዲዜ?
ሳኦንካ ኔፔ
ሃራ ኦናካ ኮይኬ።
- 26 ታ ዋልቃይኔ ታ ዋዚናይ
ዳቡራናሰ ዳንዳዬሰ፤
ጊዶ አቲን ጸሲ
ታ ዋዚናሰ ሚኖቴሊኔ
ታሰ ሜርና ቃዳ።
- 27 ኔፔ ሃኪዛይቲ ጳያና፤
ኔሰ አማኔቶንታይታ
ኡባ ኔኒ ጳይሳና።
- 28 ጊዶ አቲን ታሰ ጸሳኮ
ሺቆይ ሎኦ፤
ኔ ኦሶ ኡባ ዮታና ማላ።
ታኒ ኡባ ሃሪዛ ጎዳ
ታ ባቃታ አቲዛሶ ኦላዲሰ።

74

አሳፊ ሃሳኝን ሺሺዳ ጊንጾ

- 1 አቤት ጸሳው!
 ኔኒ ኑና ማርናስ
 አይሰ ዩጋ አጋዲ?
 ሄንላሶሆን ዲዛ
 ዶርሳታ ቦላ
 ኔ ሃንቆይ አይሰ ሱሊዴ?
- 2 ቤኒ ኔኒ ዶሪዳ ኔ ዴራ
 ኔስ ቡዞ ሂስታ
 ዋዚዳ ዛሬታ ሃሳኝ፤
 ኔኒ ዴኢዳ ጸሎን ዙማ ቆፓ።
- 3 አኔ ላሌቲዳ ጸሳ ኬላዛ
 ዩያ ጾላ፤
 ሞርኬቲ ኢዛን ዲዛ
 ኡባ ሚሽ ጳይሲዳ።

- 4 ኔ ሞርኬቲ ኔ ሶን፥
 «ኑኒ ጸኒዶስ» ጊዲ ጌሬሬቲስ።
 ጸኖ ማላታ ጊዲ
 ባንታ ባንዲራ ኤሲዳ።
- 5 ኢስቲ ዋራ ጊዶን ሚላ ቃንጸናዉ
 ባንታ ካልታ ጶቁ ሂስቲ
 ኦይኪዳ አስ ሚሳቲዳ።
- 6 ሂላንቻቲ ኦሊዳ አሌቆታ
 ካልታኒኔ ማዶሻን
 ሚንጮሬላ ዩጊዳ።

- 7 ጸሳ ኬላ
 ታማን ጸጊዲ ጳይሲዳ፤
 ኔ ጾይጌቲዛሶዛ ቱኒሲዳ።
- 8 ኢስቲ ባንታ ዋዚናን፥
 «ኢስታ ኑኒ ሙሌራ ኡንኤላና»
 ጊዲ ቆፒዳ፤
 ዴራን ጸሲ ጎይኔቲዛሶሆታ
 ኡባ ታማን ጸጊዳ።
- 9 ኑ ሻኪ ኤራናስ
 ማላታይ ዴና፤
 ሃይሳፊ ጉዬ ናቤይ ዴንዴና፤

ሃይሲ አዉዴ ጋካናዉ
ሃናናኮ ኤሪዛ አሲ
ኑ ጊዶን ዴና።

10 አቤት ጸሳዉ! ኔ ሞርኬቲ

አዉዴ ጋካናዉ
ኔ ቦላ ቁልጫኔ?
ኢሰቲ ኔ ሱንሳ
ሚርናሰ ካጲሼ ዳኔ?

11 ኔ ኩሼዛ ሚጫዳ
አይሰ ኢሰታ ጳይሲኪ?
ኔ ኡሻቻ ኩሼዛ
አይሰ ሾጳ ጋርሳን
ሎኮማ ኡታዲ?

12 አቤት ጸሳዉ!

ቤኒፔካ ታ ካዎይ ኔና፤
ኔኒ ቢታ ቦላ አቶቴል ኤሃዳሳ።

13 ኔ ጊታ ዋልቃን አባ ሻካዳሳ፤
ኢዛ ጊዶን ዲዛ
ሚሚንቴታ ሁኤ ቆኤሬላዳሳ።

14 ለዋታኔ* ጌቲቲዛ
ሚሚንቴ ሁኤታ ዲንጫዳሳ፤
ኢዛ አሾ
ባዘን ዲዛ ሜዴታታሰ
ቁማ ኦላ ኢማሳ ተ።

15 ኔኒ ፑልቶታኔ
ካንቼታ ዶያ ዬዳዳሳ፤
ኡባ ዋዴ ጎጊዛ ሻፋታ
ቃሴ ሜሊሳዳሳ።

16 ጋላሳይ ኔሳ፤
ቃማይካ ኔሳ፤
ቃሴ አርሼኔ አጊና
ኢሰቲ ዲዛሶን

74:13 ኩሳ 14:21 * 74:14 ለዋታኔ ጌቲቲዛ ሚሚንቴይ አባ ጊዶን ዴኢዛ
ዋጋ ጊታ ዶኣ። † 74:14 ኢዛ አሾ ባዘን ዲዛ ሜዴታታሰ ጊዛይሲ ላፑን ታሙ
ኤሬንቻታ ቢርሼላ ማጽፋን ቶጵያ አሳታሰ ቁማ ዋይኮ ካል ኢማዳሳ ጌሰ።

ሚንላ ዋሊዳይ ኔና።
 17 ቢታስ ዛዋ ዋሊዳይ፥
 ባልጎኔ ቦኔ ሜዲዳይ ኔና።

18 አቤት ጎዳዉ!
 ኔ ዋርኬቲ ኔ ቦላ
 ዋስቲ ቂልጨዳኮ፥
 ቃሴ ኤያ አሳቲ
 ኔ ሱንላ
 ዋስቲ ካዲዳኮ ቆፓ።
 19 ኔስ ሃሬቲዛይታ ሼሞፖ
 ዋራ ዶኣታስ አላ ኢሞፋ፤
 ሜቶቲዳ ኔ ዴራ
 ሚርናስ ዶጎፓ።
 20 ቢታን ዲዛ ጹማ ሶሆቲ
 ኡባይ ማካላንቻታን
 ኩሚዳ ጊሻስ
 ኔኒ ኑስ ጫቂዳ
 ጫቆ ቃላ ቆፓ።
 21 ናቂቲዳይቲ ዩላቲ ሲሞፊቶ፤
 ማንቆቲኔ ሜቶቲዳይቲ
 ኔ ሱንላ ጋላቴቶ።

22 አቤት ጸሳዉ! ዴንዳ!
 ኔኒ ኔ ሱንላስ ሞቴታ፤
 ኤያቲ ጋላስ ኡባን
 ኔና ካዲዛይሳ ቆፓ።

23 ኔ ዋርኬቲ
 ኔ ቦላ ዋሲዛ ዋሶዛ፥
 ኔና ኢጺዛይቲ
 ኔ ቦላ ጩቂቲዛ ጩቂቴላኔ
 ኢስታ ዋጫማ ዶጎፓ።

75

አሳፊይ ዛማሬታ ካቦስ፥ «ዳይሶፋ» ጌቴቲዛ ዲላ ጊጊሶን
 ሺሺዳ ማዛሙራ

¹ አቤት ጸሳዉ!
 ኔና ጋላቶስ፤

ኔ ኩስ ማታ ጊዲዳ ጊሻስ
 ኔ ሱንላስ ጋላታ ሺሾስ፤
 ኣሳይካ ማላሊሲዛ
 ኔ ኦሶ ኡባ ጊሻስ
 ሃሳዬስ።

2 ጸሲ፥ «ታ ባራ ዋሊዳ ዋዴን
 ሱሬ ፒርዳ ፒርዳናይ ታና።

3 ሳኣይኔ ኢዛ ቦላ ዲዛ
 ሜዴታ ኡባይ ቃጺዛ ዋዴ
 ሳኣ ቱሳታ ሚንላ
 ኤሲዳይ ታና።

4 ኦቶራንቻታ፥ «ኦቶሬቶፍቴ» ጋይስ፤
 ኢታታካ፥ «ኢንቴ ማካሎፍቴ።

5 ኔ ካጨ ኦቶሮን
 ቶቁ ቶቁ ሂሰቶፋ፤
 ኔ ቆዴ ቃላ
 ሃሳዮፓ» ጋይስ» ጌስ።

6 ቦንቾይ ኣርሼይ ሞኪዛሶፔ
 ዋይኮ ዉሊዛሶፔ
 ዋይኮ ባዞፌ ዬና።

7 ጊዶ ኣቲን ሱሬ ፒርዲዛይ ጸሳ፤
 ኢዚ ኢሳ ቦላ ፒርዴስ፤
 ኢሳ ጸሊሴስ።

8 ጎዳ ኩሼን ዋንጫይ ዴስ፤
 ኢዛን ሆሞቲዛ ሃንቆ ዋይኔ
 ኡሺ ኩሚ ኡቲዴስ፤
 ሄ ኡሻዛ ጌዴ ካሬ ጉሲዴስ፤
 ሳኣን ዲዛ ማካላንቻቲ
 ሄሳ ኡዱዳ፤
 ኢሰቲ ኦርጮካ
 ኣሾንታ ጮንጎርሲዳ።

9 ታኒ ጊዲኮ ሃይሳ
 ሜርናስ ኣዋጃና፤
 ያቆቤ ጸሳካ ማዛሙሬን ሳባና።

10 ታኒ ኢታታ ካጨ ኡባ ሜንላና፤

ጸሎታ ካጩ ጊዲኮ
 ቶቁ ቶቁ ሂስታና።

76

እሳፌይ ዛማሬታ ካቦስ ዲላታን ዬጲዳ ማዛሙሬ

- 1 ጸሲ ዩሁዳን ኤሬቲዳስ፤
 ኢዛ ሱንፊካ ኢስራኤልን ጌታ።
- 2 ኢዛ ዲንካኔይ ሳሌማን ዳስ፤
 ኢዛስ ዲሳሶይካ ጸዮኔ።
- 3 ኢዚ ሄሳን ዲኪዛ
 ዋንዳፌ ዪሻ፥
 ጎንዳሌ፥ ጌላ ማሻታኔ
 ሃራ ኦላ ሚሻታ
 ማንጮሬላ ዬጊዳስ።
- 4 አቤት ጸሳዉ!
 ኔኒ ቦንሾ ማይአዳ
 ጸላሳ፤
 ኔ ቲማቴላ
 ጌታ ዙማታፔካ አጼስ።
- 5 ጎባ ኦላንቻቲ ቦንቄቲዳ፤
 ኢስታፌ ኢሶይካ ባ ኩሼ
 ዴንፋና ዳንዳይቤና፤
 ኢስቲ ዋልቃማ ጴስኮ ጴስኪዳ።
- 6 አቤት ያቆቤ ጸሳዉ!
 ኔ ሃንቆ ጋሶን ቶጋ አሳቲኔ
 ቶጋ ፓራቲ ኩንዲ አቲዳ።
- 7 አቤት ጸሳዉ! ኔኒ ያሻሳ!
 ኔ ሃንቆይ ሱሊዳ ዋዴ
 ኔ ሲንላን ኦኔ ኤቃናይ?
- 8 ኔኒ ሳሎፔ ፒርዳ ሲሳዳሳ፤
 ቤታይ ያያዳ ሲርጺ ጋዱስ።
- 9 አቤት ጸሳዉ!
 ሃይሲ ሳኦ ቦላ
 ኡንኤቲዳይታ አሻናስ
 ኔኒ ፒርዳስ ዴንዲን ሃንዴስ።
- 10 ኔኒ አስ ሃንቂኮካ

ሄሲ ኔ ቦንሾሰ ጊዴሰ፤
ኦላፔ ኦቲዳይቲ
ኔ ባኣሌ ቦንቻና።

- 11 ጎዳ ኢንቲ ጸሳሰ ኣዲኒቲ፤
ሄ ኣዲኔቲዳይሳካ ጋሊቲ፤
ኢዛ ዩሾን ዲዛ ኡባቲ
ኢዛሰ ያሺሲዛ
ኢሞታ ኤኪ ዩቲ።
- 12 ኢዚ ኦቶሬቲዛ ዳናታ ካዉሻና፤
ዎልቃማ ካዎታካ ኢዚ ያሺሳና።

77

ኣሳፊይ ዛማሬታ ካቦ ኤዶታኔሰ ዩጲዳ ማዛሙሬ

- 1 ታኒ ታ ቃላ ቶቁ ሂሰታዳ
ጸሳኮ ዋሳይሰ፤
ታና ሲያና ማላ
ታ ኢዛ ዋሳይሰ።
- 2 ታኒ ሜቶቲዳ ጋላሰ ጸሳ ኮያይሰ፤
ኦማርሲካ ሼሞፖንታ
ታ ኩሼታ ኢዛኮ ሚጫይሰ፤
ጊዲኮካ ታኒ ሚኔታናሰ
ዳንዳያበኬ።
- 3 ኣቤት ጸሳዉ!
ታ ኔና ቆፓሺ ጨጫይሰ፤
ታ ዩሻ ቆፓሺ
ኬሃ ዳቡርዴሰ።
- 4 ታ ኣይፊፔ ዲሰኮ ዳይሳዳሳ፤
ታሰ ጋናዚ
ዳያና ጋካናሰ ጨጫዲሰ።
- 5 ታኒ ኣዲዳ ዎዶታ ቆፓዲሰ፤
ካሴ ኣዲዳ
ላይሳታካ ሃሳኣዲሰ።
- 6 ታ ዩጲዳይሳ ጊዶሐ
ዩሻ ቆፓዲሰ፤
ታኒ ዎዚናን ኣኬካዲሰ፤

ታ ኣያናይ ታና ዴንሕሊን፤

7 «ጎዳይ ኑና ሜርናስ
ዬጊ ኣጋኔ?
ሃይሳፌ ጉዬ
ኑና ሎኦ ቤሴኔ?

8 ኑና ሲቂዛይሳ ሙሌራ ኣጊዴ?
ኢዚ ዮቲዳ ሂዶታይ ሻሬቲዴ?

9 ጸሲ ባ ማሪዛይሳ ኣጊዴ?
ሃንቆን ባ ቃጺታ ኣጊዴ?»
ጋ ኦይቻይሰ።

10 ኡባፌ ቶቃ ጸሳዉ!
ታና ቆሂዳይ፤
ኔ ኡሻቻ ኩሺይ
ካሴይሳ
ኑና ማዶንታ ኣጎይሳ።

11 ጎዳዉ! ኔ ኦሶታ
ታኒ ቆፓና፤
ኔኒ ቤኒ ዋዴ ኦሒዳ
ማላሊሲዛ ኦሶታ ኡባ
ታ ዩሻ ቆፓና።

12 ኔ ኦሒዳ ኡባ
ታኒ ዛራ ዛራዳ ቆፓና፤
ኔ ዋልቃማ ኦሶታ ኡባ
ታኒ ኣኬካና።

13 ኣቤት ጸሳዉ!
ኔ ኦጌይ ጌሻ፤
ኑ ጸሳ ማላ
ሃራ ጌታ ጸሲ ኦኔ?

14 ኔኒ ማላሊሲዛዝ ኦሒዛ ጸሳ፤
ዴሬታ ጌዶን
ኔ ዋልቃ ቤሳሳ።

15 ያቆቤኔ ዮሴፌ
ዜሬሐ ጌዲዳ ኔ ዴሬታ
ኔኒ ኔ ዋልቃን ዋዛዳሳ።

- 16 አቤት ጸሐው!
 ሃላቲ ኔና ቤኢዳ፤
 ሃላቲ ኔና ቤኢዲ ያዪዳ፤
 ጨማ አባቲካ ኮኮሪዳ።
- 17 ሻራቲ ኢራ ኢሚዳ፤
 ሳሎን ዳዳይ ጉሚዳሰ፤
 ዋልቃንሴ ዋዋጨ ጊዳሰ።
- 18 ኔ ዳዳ ጉንላይ
 ጎቲ ጫርኮ ጊዶን ኮሺሚዳሰ፤
 ኔ ዋልቃንላ ጰሌሴ
 ሳኣ ፖኢሲዳሰ፤
 ቢታይካ ቃጸ ኮኮሪዳሰ።
- 19 ኔኒ አሳ ጊዶራ ሄሜታሳ፤
 ጨማ አባ ጊዶራ
 ካንላሳ፤
 ጊዲኮካ ኔ ቢዳ ጌዶይ
 ኤሬቴና።
- 20 ሙሴ ኣሮኔ ኩሺን
 ኔኒ ኔ ዴሬዛ ዶርሳ
 ዉዴ ማላ ካሌላዳሳ።

78

አሳፌይ ሃሳኣን ሺሺዳ ጊንጾ

- 1 ታ ዴሬዘ ታ ኔና
 ታማርሲዛይሳ ሲያ፤
 ታ ዶናፔ ኬኢዛ ቃላ ኤዘጋ።
- 2 ታኒ ሃሳይዛ ሃሳያ
 ለሚሶን ዶማይሰ፤
 ቤኒሶፌ ቆታን ዲዛ
 ጹራ ዮኦ ቆንጨሳይሰ።
- 3 ኦ ሲዱዳይሲኔ
 ኦ ኤሪዳይሲ፥
 ኦ አዋቲካ ኦሰ ዮቲዳይሳ።
- 4 ሄ ዮኦታ ኦኒ
 ኢሰታ ናይታፔ ቆቶኮ፤
 ጎዳሰ ቤሲዛ ጋላታ።

- ኢዛ ዋልቃኔ
 ማላሊሲዛ ኢዛ ኦሶ
 ዪዛ ዬሌታታሰካ
 ኑኒ ዮታና።
- 5 ኢዚ ያቆቤ ዛሬታሰ ኣዛዞ፥
 ኢሰራኤል ኣሳሰ ዋጋ ኢሚዴሰ፤
 ባንታ ናይታ ሄ ዋጋታ
 ታማርሳና ማላ ኣዛዚዴሰ።
- 6 ሄሲካ ካሊዛ ዬሌታይ
 ኢሰታ ኤራናሳ፤
 ቃሴካ ቡሮ ዬሌታና
 ናይቲ ኤራናሳኔ
 ኢሰቲካ ባንታ ናይታሰ ዮታናሳ።
- 7 ሄ ናይቲካ ጸሳን ኣማኔታና፤
 ኢዚ ኦሒዳ ኦሶካ ዶጌቴና፤
 ኢዛ ኣዛዞታካ ኢሰቲ ናጋና።
- 8 ኢሰቲ ካሴ ባንታ ኣዋታ ማላ
 ዋዚና ሙሙኔ
 ማካላንቻ ጊዴቴና፤
 ኢሰቲ ጸሳ ሲንፋን
 ሱሬ ጊዴቴና፤
 ጸሳሰካ ኣማኔቲቤቴና።
- 9 ኤፍሬሜ ናይቲ ኦላሰ
 ዋንዳፌኔ ዪሽ ጊግሲ ኬዚዳ፤
 ጊዶ ኣቲን ኦላ ጋላሰ ጉዬ ሲሚዳ።
- 10 ኢሰቲ ጸሳ ጫቆ ቃላ
 ናጊቤቴና፤
 ኢዛ ዋጋ ማላ ዶንታ ኢዲዳ።
- 11 ኢሰቲ ኢዚ ኦሒዳ ኦሶ ባሊዳ፤
 ኢዚ ኢሰቲ ቤሲዳ
 ማላሊሲዛ ሃኖታካ ዶጊዳ።
- 12 ኢዚ ኢሰታ ኣዋቲ ቤኢሺን
 ጊብጼ ቢታን
 ጸኖሴ ዴምባን
 ማላታ ኦሒዴሰ።
- 13 ኣባ ሻኪዲ ጊዶራ

- ኢስታ ፒንሊዴስ፤
 ኢዚ ሃላ ያኔ
 ሃ ሻኪዲ
 ጎዳ ማላ ኤሲዴስ።
 14 ኢዚ ኢስታ ጋላስ ሻራን፤
 ኦማርስ ታማ ፖኦን
 ካሌሊዴስ።
 15 ኢዚ ባዘን ዛላ ጳልቂዲ
 ኣባ ማላ ዳሮ ሃል
 ኢስታ ኡሺዴስ።
 16 ዛላፌ ሃል ፑልቲሲዲ
 ሻፋ ማላ ዱጌ ጎጊሲዴስ።
 17 ጊዶ ኣቲን ኢስቲ ኢዛ ቦላ
 ናጋራ ኦሶ ጌዴ ፑጂዳ፤
 ኡባፌ ቶቃ ጸሳ ቦላ
 ባዘን ማካሊዳ።
 18 ኢስቲ ኬሂ ኣሞቲዳ
 ካል ኦይቲዳ፤
 ኤሪሼ ባ ዎዚናን
 ጸሳ ፓጪዳ።
 19 ኢስቲ ጸሳ ቦላ፤
 «ባዘን ጸሲ
 ኑስ ማና ካል
 ኢማና ዳንዳይዜ?
 20 ዛላ ሾጪን ፑልቶይ ኬኢዲ
 ሻፋ ሃሊ ጎጊዴስ፤
 ሂስቲን ኢዚ ኑስ ሚዛ ካል
 ኢማናዉ ዳንዳይዜ?
 ዎይኮ ባ ኣሳስ
 ኣሾ ኢማናዉ
 ዳንዳይዜ?» ጊ ሃሳይዳ።
 21 ጎዳይ ሄሳ ሲዱዳ ዎዳ
 ኢስታ ቦላ ዳሮ ሃንቁቲዴስ፤
 ያቆቤ ዛሬታ ቦላ
 ታማይ ኤዲዴስ፤

- ኢስራኤል ቦላ ኢዛ ሃንቆይ
 ዳሪ ዳሪ ቢደስ።
 22 ኣይሰ ጊኮ ኢስቲ
 ጸሳን ኣማኒቤቴና፤
 ኢዚ ኣሺዛይሳካ
 ኣማኔቲቤቴና።
 23 ኢዚ ጊዲኮ ቦላፌ ሻራ ኣዛዚደስ፤
 ሳሎ ፔንጌታካ ደይደስ።
 24 ኢስቲ ማና ማላ ኢስታስ
 ማና ቡኪሲደስ፤
 ሳሎፔ ካል ኢስታስ ኢሚደስ።
 25 ኪታንቻታ ካል ኣሳይ ሚደስ፤
 ጸሲ ኢስቲ ካሊ ሚን
 ቲርፒ ኣቲዛ ካል ኢሚደስ።
 26 ኣርሼይ ሞኪዛ ባጋራ ሳሎፔ
 ጫርኮይ ጫርካና ማላ ኦሴደስ፤
 ባ ዎልቃን ዱጌሃ ባጋ
 ጫርኮ ደንፊሳደስ።
 27 ኢዚ ኣሳስ ኣሾ ጉድላ ቢታ ማላ፥
 ኣባ ደናን ዲዛ ኣጩ ማላ
 ደሮ ፒራዲዛ ካፎታ ዬዲደስ።
 28 ኢስቲ ዱንካኒ ኡቲዳሶ
 ዱንካና ዩሾን ዎዲደ።
 29 ኢስቲ ኣሞቲዳይሳ
 ኢስታስ ኢሚደስ፤
 ኢስቲካ ካሊ ሚደ።
 30 ጊዶ ኣቲን ኢስቲ
 ባ ሞሳ ኣሶንታ
 ቡሮ ሙሳ ቦላ ደኢሺን፥
 31 ጸሳ ሃንቆይ
 ኢስታ ቦላ ዎዲደስ፤
 ኢስታ ጊዶፌ
 ሚኖ ኣሳታ ዎዲደስ፤
 ኢስራኤሌፔ
 ፓያ ናቴላታ ሙልቂደስ።
 32 ሃይሲ ኡባይ ሃኒንካ
 ኢስቲ ናጋራ ኦሴዛይሳ

- እጊቤቴና፤
 ማላሊሲዛ ኢዛ ኦሶታካ
 ቤኢዲ እማኒቤቴና።
- 33 ሄሳ ጊሻሰ ኢዚ ኢሰታ ላይላታ
 ፔኖ ማላ እሊደሰ፤
 ኢሰቲ ዲዛ ዎዴታ
 ሂርጋን ወርሲደሰ።
- 34 ጸሲ ኢሰታፌ ጉላታ ዎዲን
 አቲዳይቲ ባ ናጋራ ፓጺዳ፤
 ዎዚናፔ ኮዪሽ
 ጸሳኮ ሲሚዳ።
- 35 ኢሰቲ ጸሲ ኢሰታሰ
 ዛላ ጊዲዳይሳኔ
 ኡባፌ ቶቃ ጸሲ
 ኢሰታ ዎዚዳይሳ ሃሳኢዳ።
- 36 ጊዶ አቲን ኢሰቲ ባንታ
 እንጸርሳን ኢዛሰ ዎርዶቲዲ
 ባንታ ዶናን ጨሚዳ።
- 37 ኢሰታ ዎዚናይ
 ጸሳን ሚኒ ኤቂቤና፤
 ኢዚ ኢሰታራ ጫቄቲዳ
 ጫቆን እማኔቲቤቴና።
- 38 ጊዶ አቲን ኢዚ ኢሰታ
 ማሪዛዴ ጊዲዳ ጊሻሰ
 ኢሰታ ኢታቴላ አቶ ጊደሰ፤
 ኢሰታካ ቶይሲቤና፤
 ዳሮ ዎዴ ባ ሃንቆዛ
 ኢሰታ ቦላፌ ቲቂደሰ፤
 ባ ሃንቆዛ ቦሻ ኡባ
 ኢሰታ ቦላ ዩዲቤና።
- 39 ኢሲኖ ጫርኪ አዲዳፔ ጉዬ
 ሰሞንታ ጫርኮ ማላ
 አሾ ማይኢዳ አሰ
 ጊዲዳይሳ አኬኪደሰ።
- 40 ኢሰቲ ባዞን አፑንቶ
 ኢዛ ቦላ ማካሊዶ!
 ሜላ ባዞን አፑንቶ
 ኢዛ ላንጨሲዶ!

- 41 ኢስቲ ዛሪ ዛሪዲ ጸሳ ፓጪዲ፤
ኢስራኤል ጌሻ
ማዲንሳዲ።
- 42 ኢዚ ኢስታ ሞርኬታፔ
ዋዚዳ ጋላሳታኔ
ኢዛ ዋልቃ ዶጊዳ።
- 43 ኢዚ ጊብጾ ቢታን ማላታ፥
ጸኖሴ ዴምባን ማላሊሲዛዝ
ኦላዲይሳ ቆፒቤቴና።
- 44 ኢስታ ሻፋ ሃላ
ሱላን ለሚደሰ፤
ሄሳ ጊሻሰ ጊብጾ ኣሳቲ
ሄ ሻፋታፔ
ኡያናሰ ዳንዳይቤቴና።
- 45 ኢስታ ኦላናሰ ኡዲንጾታኔ
ኢስታ ቢታ ጳይሳናሰ
ሾጴታ ኪቲደሰ።
- 46 ኢስታሰ ሞኪዳ ካላ ጉምባርሰ፤
ኢስቲ ኦላ ዳቡርዳ ካላ
ቦሌሰ ኢሚደሰ።
- 47 ኢስታ ዋይኔ ቴራ ሻቻን፥
ኢስታ ባላሴ ሚላታካ
ኬንቸን ጳይሲደሰ።
- 48 ኢስታ ሚዛታ ሻቻን ዋጲደሰ፤
ኢስታ ሚሄታ ዋልቃንላን
ጹጊ ወርሲደሰ።
- 49 ባ ሚኖ ሃንቆ፥ ቦሻ፥ ባሺኔ
ጳይሲዛ ኪታንቻታን
ኢስታ ቦላ ዩዲደሰ።
- 50 ባ ሃንቆዛሰ ኦጌ ጊግሲደሰ፤
ኢስታ ኢታ ሃርጌሰ
ኦላ ኢሚደሰ፤
ጊዶ ኣቲን ሃይቆፔ
ኣሺቤና።
- 51 ጊብጾን ዩሊቲዳ ባይራ ናይታ
ኡባ ዋጲደሰ፤

- ካሜ ዲንካኔን
 ኮይሮ ዩሌቲዳ
 ናይታ ወርሲዳስ።
 52 ጊዳ ኣቲን ኢዚ ባ ኣሳ
 ደርሳ ማላ ኬሲ ሄሚዳስ፤
 ወዴ ማላ ባዘን ካሌሊዳስ።
 53 ኢዚ ኢስታ ሳሮን ካሌሊዳስ፤
 ኢስቲካ ሂርጊቤቲና፤
 ኢስታ ሞርኬታ ጊዲኮ
 ኣባይ ሚቲዳስ።
 54 ሂስቲዲ ባ ጌሻ ቢታ፡
 ባ ኡሻቻ ኩሼን
 ጸኒ ኦይኪዳ
 ዙማ ኤፊዳስ።
 55 ኢዚ ኢስታ ሲንፋፌ
 ካዎቲፋ ጎዲዲ
 ኢስታ ቢታ ኢስራኤሌ ዛሬታስ
 ጊሼሬሊ ኢሚዲ
 ኢስታ ሳቲሲዳስ፤
 ኢስራኤሌ ኣሳ
 ኢስታ ሞርኬታ ኬፋን
 ዎሊዳስ።
 56 ኢስቲ ጊዲኮ ኡባፌ
 ቶቃ ጸሳ ቦላ ማካሊዳ፤
 ኢዛ ፓጪዲ ኢዛ ዎጋታካ
 ናጎንታ ኢጲዳ።
 57 ኢስቲ ቤኒ ባንታ ኣዎታ ማላ
 ማካላንቻታኔ
 ካዲዛይታ ጊዲዳ፤
 ኣማንሶንታ ቦካ ቶማን
 ኤቂዳ ቶራ ማላ ጊዲዳ።
 58 ኢስቲ ጎይኒዛ ቶቃሶሆታን
 ኢዛ ዪሎቺዳ፤
 ባንታ ኤቃ ጸሳታን

78:51 ኬሳ 12:29 78:52 ኬሳ 13:17-22 78:53 ኬሳ 14:26-28

78:54 ኬሳ 15:17፤ ኢያ 3:14-17 78:55 ኢያ 11:16-23 78:56 ዳና

2:11-15

- 59 ኢዛ ቃናቲሲዳ።
 ሂሰቲን ጸሲ ሄሳ ሲዪዲ
 ኬሂ ሃንቄቲደስ፤
 ኢስራኤል ሙሉራ
 ዬጊ ኣጋጊደስ።
 60 ኣሳ ጊዶን ኢዚ ቶኪዳ ዱንካና
 ሴሎን ባ ዲዛሶዛ
 ዬጊ ኣጊደስ።
 61 ጸሳ ዋልቃሲኔ
 ቦንቸሰ ማላታ ጊዲዳ
 ታቦታ ሞርኬታ ኩሼን
 ኣሉ ኢሚደስ።
 62 ኢዚ ባ ዴራ ቦላ ሃንቄቲደስ፤
 ኢስታ ጊላ ማሻሰ
 ኣሉ ኢሚደስ።
 63 ኢስታ ፓንፋታ ታማይ ሚደስ፤
 ሂሰቲን ኢስታ ጌላኦቲ
 ኣዚና ጌሎንታ ኣቲዳ።
 64 ኢስታ ቄሴቲ ማሻን ዉሪዳ፤
 ኢስታ ማቹቲካ
 ዬካናሰ ዳንዳይቤቴና።
 65 ሄሳፌ ጉዬ ጎዳይ
 ጺስኮፌ ቤጊዛ ማላ
 ቤጊደስ፤
 ዋይኮ ዋይኔ ኡሹ ኡዪ
 ማሶቲዳ ቃራይ ማሶፌ
 ቤጊዛ ማላ ዴንዲደስ።
 66 ኢዚ ባ ሞርኬታ ሾጪዲ
 ጉዬ ዛሪደስ፤
 ኢስቲ ሜርናሰ ዬላታና ማላ
 ኦሊደስ።
 67 ዮሴፌ ዱንካኔ ካጺደስ፤
 ኤፍሬሜ ቆሞታ ዶሪቤና።
 68 ጊዶ ኣቲን ኢዚ ዩሁዳ ዛሬኔ
 ባ ሰቂዛ ጸዮኔ
 ዙማ ዶሪደስ።

- 69 ሄሳን ኢዚ ጸሳ ከፋ
 ሳሎ ከሲ ቶቃን ከዲዳስ፤
 ሳኣ ማላ ማርናስ ኤሲዳስ።
- 70 ባ ኣይሌ ዳዊቲ ዶሪዲ
 ዶርሳ ዉዴ ሄሚዛሶሆፔ
 ኤኪዳስ።
- 71 ኢዛ ዶርሳታ ሄሚዛሶሆፔ
 ከሲዲ ባ ዴሬ ያቆቤኔ
 ባ ጸኒጾ ኢሰራኤሌ
 ሄንፋንቻ ኦሲዳስ።
- 72 ሂስቲን ዳዊቲካ ኢሰታ
 ሱሬ ዋዚናን ሄሚዳስ፤
 ቃሴካ ሂላን
 ኢሰታ ካሌሊዳስ።

79

ኣሳፌ ማዛሙራ

- 1 ኣቤት ጸሳዉ!
 ካዎቲፋቲ
 ኔ ቢታ ዎራጂዳ፤
 ጌሻ ጊዲዳ
 ጸሳ ከፋ ቱኒሲዳ፤
 ዬሩሳላሜ ላሊ ዬጊዳ።
- 2 ኢሰቲ ኔ ኣይሌታ ኣሃ
 ሳሎ ካፎታስ
 ቁማ ኦሲዲ ኢሚዳ፤
 ቃሴ ኔ ጌሻ ኣሳታ ኣሾ
 ሳኣ ዶኣታስ ኢሚዳ።
- 3 ኢሰታ ሱሐ ዬሩሳላሜ ዩሾን
 ሃፋ ማላ ጉሲዳ፤
 ኢሰታ ኣሃ
 ሞጊዛ ኣሲ ቆይዳስ።
- 4 ኑ ሾርታስ ኑኒ ቂልጫስ ጊዲዶስ፤
 ኑ ሄራን ዲዛይታስ ቂጼሲኔ
 ሚቻስ ኣቲዶስ።

- 5 አቤት ጎዳዉ!
 ሃይሲ አዉዴ ጋካናሰ
 ሃናኔ?
 ኔኒ ሜርናሰ ሃንቂታኔ?
 ኔ ቃናቴይ ታማ ማላ
 ኤዲሼ ዴኣኔ?
- 6 ኔና ኤርንታ ዴሬታ ቦላኔ
 ኔ ሱንላ ጸይጎንታ
 ካዎቴላታ ቦላ
 ኔ ሃንቆዛ ጉሳ።
- 7 አይሰ ጊኮ ኢሰቲ
 ያቆቤ ዜሬላታ
 ዎጳዳኔ
 ኢሰቲ ዴኢዛሶዚካ
 ሙሌራ ጳይሲዳ።
- 8 ካሴ ኑ አዋታ ናጋራ
 ኑ ቦላ ቆደፓ፤
 ኤሶን ኔ ማርታ ኑሰ ኪታ፤
 አይሰ ጊኮ
 ኑኒ ኬሂፔ ሜቶቲዶሰ።
- 9 አቤት ኑና አሺዛ ጸሳዉ!
 ኔ ሱንላ ቦንቾ ጊሻሰ
 ኑና ማዳ፤
 ኔ ሱንላ ጊሻሰ ኑና አሻ፤
 ኑ ናጋራካ አቶ ጋ።
- 10 ካዎቴላቲ፥ አይሰ «ኢሰታ ጸሲ
 አዋን ዲዜ?» ጋኔ?
 ኔ አይሌታ ሱሐ
 ኢሰቲ ጉሲዳይሳ
 ኔኒ ሃሎ ኬሲዛይሳ
 ኑ አይፌይ ቤኢሺን
 ካዎቴላታ ኤሪሳ።
- 11 ቃሾ አሳታ ኦሌይ
 ኔ ሲንሐ ጋኮ፤
 ሃይቆሰ ፒርዴቲዳይታ
 ኔ ሚኖ ቂሴን አሻ።

- 12 አቤት ጎዳዉ!
 ኑ ሾሮቲ ኔና ቂጂዳይሳ
 ሃሎ ላፑን ኩሼ ኢስታሰ ዛራ።
- 13 ሄ ዋዴ ኑኒ ኔ ዴሬቲኔ
 ኔስ ዉዴ ዶርሳቲ
 ሜርናስ ጋላታ ኔስ አማና፤
 ዬሌታፔ ዬሌታ ጋካናስ
 ኔኒ ኑስ ኦሊዳ ኦሶዛ
 ኑ ዮታና።

80

ዛማሬታ ካቦስ «ጪሻ» ጌቴቲዛ ዲላ ገጊሶን ማርካቴላስ
 ዬዴቲዳ አሳፌ ማዛሙሬ

- 1 አቤት ኢስራኤል ሄንላንቻዉ!
 ዮሴፌ ናይታ
 ዉዴ ማላ ካሌሊዛይሶ!
 ኔኒ ኑ ዋሳ ሲያ፤
 ከሩቤታ ቦላራ ዲዛ
 አራታን ኡቲዳይሶ!
 ኔ ፖኦን ቆንጫ።
- 2 ኤፍሬሜ፥ ቢኒያሜኔ ሚናሴ
 ሲንላን ቆንጫ ቤታ፤
 ኔ ዋልቃ ዴንላዳ
 ያዳ ኑና አሻ።

- 3 አቤት ጸሳዉ!
 ኑና ዛራ፤
 ኑኒ አታና ማላ
 ኔ አይፌሶ ኑስ ፖኢሳ።

- 4 አቤት ጎዳዉ
 ኡባፌ ዋልቃማ ጸሳዉ!
 ኔ አሳ ዋሳ ቦላ
 አዉዴ ጋካናስ
 ኔ ሃንቂታኔ?

- 5 ኔኒ ኢስታ ዬሆ
 ቁማ ማላ ሚዛዳሳ፤
 ቃሴ አፋንላ

- ሃላ ማላ ኡሻዳሳ።
 6 ኑ ሾሮቲ ኑ ቢታ ኤካናሰ
 ባንታ ጊዶን ኦዬታና ማላ
 ኦላዳሳ፤
 ኑ ሞርኬቲካ
 ኑ ቦላ ሚጨዳ።
- 7 ኣቤት ኡባፌ
 ዎልቃማ ጸሳዉ!
 ኑና ዛራ፤
 ኑኒ ኣታና ማላ
 ኔ ኣይፌሶ ኑሰ ፖኢሳ።
- 8 ኔኒ ጊብጾፔ ዎይኔ ኣኖ ኤሃዳሳ፤
 ካዎቴላታ ዬዴላዳ
 ኢሰታ ቢታን ኢዞ ቶካዳሳ።
- 9 ኔኒ ኢዚሰ ቢታ ቁጾ ጊጊሳዳሳ፤
 ሂሰቲን ጸጸ ዬዳዳ
 ቢታ ኡባ ጋካዱሰ።
- 10 ዙማቲ ኢዚ ኩዋን፥
 ሊባኖሴ ዚጋቲ
 ኢዚ ሃጋታን ካሜቲዳ።
- 11 ባ ሃጋታ ሜዲቴራኔ
 ኣባ ጋካናሰ
 ቃሴ ባ ጾራታ ኤፊራጺሴ
 ሻፋ ጋካናሰ ዬዳዱሰ።
- 12 ሂሰቲን ኦጌራ ኣጲዛ ኡባይ
 ኢዚ ኣይፌ ዱሊ ማና ማላ
 ኢዚ ዩሾዛን ዱዛ ጊምቤዛ
 ኣይሰ ላላዱ?
- 13 ባዞ ጉዱንሉ
 ኢዚ ቦላ ዱሪ ካኤሰ፤
 ቃሴ ዎራ ዶኣቲ
 ኡባይ ኢዞ ሜቴሰ።
- 14 ኣቤት ኡባፌ
 ዎልቃማ ጸሳዉ!
 ኔኒ ኑኮ ሰማ፤
 ሳሎራ ዱጌ ጸላዳ ኑና ቤኣ፤

- ሃኖ ዋይኔ ሚላዮ ናጋ።
 15 ኢዛ ኔ ኡሻቻ ኩሼይ
 ቶኪዳ ፑቲ፤
 ኔኒ ኔሰ ጋዳ ዲቺዳ ኣጫ።
- 16 ሞርኬቲ ኔ ዋይኔ ቄዲዲ
 ታማን ጸጊዳ፤
 ሄሳ ጊሻሰ ኔኒ ኢሰታ
 ኔ ሃንቆዛ ሱሌን ዳይሳ።
- 17 ኔ ኩሼይ
 ኔ ኡሻቻ ባጋራ ዲዛ ኣሳ
 ኔኒ ኔሰ ዲቺዳ ኣሳ ና።
- 18 ሃይሳፌ ጉዬ ኮኒ
 ኔና ኣጊዲ ጉዬ ሲሞኮ፤
 ኑና ሼሞፖራ ፓጻ ዋላ፤
 ኑኒካ ኔና ጋላታና።
- 19 ኣቤት ኡባፌ
 ዋልቃማ ጸሳዉ!
 ኑና ዛራ፤
 ኑኒ ኣታና ማላ
 ኔ ኣይፌሶ ኑሰ ፖኢሳ።

81

- ኣሳፌይ ዛማሬታ ካቦሰ ሱሱልኤን ዩዲዳ ማዛሙሬ
- 1 ኑሰ ዋልቃ ጊዲዳ
 ጸሳሰ ኡፋይሳን ዩዲቲ፤
 ያቆቤ ጸሳሰ ኢሊሊቲ!
- 2 ማዛሙሬ ዶሚቲ፤
 ካራቤ ባቂቲ፤
 ዲላኒኔ ማሲንቆን
 ሎኦ ማዛሙሬ ዩዲቲ።
- 3 ኣጊናይ ያሪዛ ዋይኔ
 ጳማን ጌሊዛ ዋይ
 ባኣሌሰ ዛዬ ፑኒቲ።

4 ሃይሲ ኢሰራኤልስ ዋጋ፤
 ያቆቤ ጸሳይ ኢሚዳ አዛዙ።
 5 ጊብዬ ቢታ ኢዚ ዬዲ ኬዚዳ ዋዳ
 ዮሴፌ ዛሬታስ
 ዋጋ ሂስቲ ዋሊዳስ፤
 ታኒ ኤርንታ ቃላራ ኢዚ ታስ።

6 «ኢንቴ ሃሽፔ ቶሆ ዋላዲስ፤
 ኢንቴ ኩሼ ዳጾ
 ጎሾፔ ሸምፒሳዲስ።
 7 ኢንቴ ሜቶ ዋዳ
 ታና ጸይጊዳታ፤
 ሂስቲን ታኒ ኢንቴና አሻዲስ፤
 ታኒ ሻራ ጊዶራ ዳዳን
 ኢንቴና አላዲስ፤
 ማሪባ ጌቲቲዛ
 ፑልቶ ሃላ ማታን
 ታኒ ኢንቴና ፓጫዲስ።

8 «ታ ዳሬዘ!
 ታኒ ኔና ሴሪዛይሳ ሲያ!
 ኢሰራኤል አሳዉ!
 ኔ ታና ኤዘጋ ሲዪዳኮ
 አዜ ዲዛይ!

9 ኢንቴ ጊዶን አላጋ ጸሲ ዶፖ፤
 ሃራ ጸሳስ ጎይኖፍቴ።

10 ታኒ ጎዳ ኢንቴ ጸሳ፤
 ኢንቴና ጊብዬ ቢታፌ ኬሳዳ
 ኤሂዳይ ታና ኢንቴ ጎዳ፤
 ኔ ዶና ኬሃ ሃንጋ፤
 ታኒ ኔና ቱላና።

11 «ጊዶ አቲን ታ አሳቲ
 ታ ቃላ ሲዪቤቴና፤
 ኢሰራኤልቲ ታስ
 ኩሼ ኢሚቤቴና።

- 12 ሄሳ ጊሻስ ታኒ
 ኢስቲ ባ ዎዚና
 ሙሜቴሳሶ
 ባ ደሶይሳ ሃናና ማላ
 አጋጋዲሰ።
- 13 «ታ ዳሬይ ታና ሲዱዳኮ!
 ኢስራኤል አሳይ
 ታ ኦጌ ካሊዳኮ!
- 14 ታኒ ኢስታ ሞርኬታ
 ኢስታስ ጉልባቲሳና፤
 ኢስታ ባሊጋራታካ
 ታ ሾጫናኮሺን።
- 15 ጎዳ ኢጲዛይቲ
 ኢዛ ሲንሳን ኩንዳና፤
 ኢስቲ ሜርናስ ቃጸዬታና።
- 16 ጊዶ አቲን ታኒ ኢንቴና
 ሙሩታ ጊስቲ ሚዛና፤
 ቃሴ ዛላፌ ኢንቴና
 ኤስ ካልሳና» ጊሺን ሲያዲሰ።

82

አሳፌ ማዛመራ

- 1 ጸሲ ሳሎን ዲዛ ዱላታ ካሌሴስ፤
 ጸሳቲ ኡባይ ሺቂን
 ኢስታ ቦላ ፒርዲሼ፥ *
- 2 «ኢንቴ አዉዴ ጋካናዉ
 ጌላ ፒርዳ ፒርዳኔ?
 ኢታታካ አዉዴ ጋካናስ
 ማዳኔ?
- 3 ዎልቃይ ባይንዳይታሲኔ ዪኦታስ
 ቱማ ፒርዳ ፒርዲቲ፤
 ማንቆኔ ናቂቲዳ አሳታ
 ማታ ናጊሲቲ።

* 82:1 ጸሳታ ሃይሲ ሃ ቃላዚ ካዎታ፥ ዳናታ፥ አሳ ቦላ ዱማ ዱማ ኦጌራ ፒርዲዛይታ፥ ኪታንቻታኔ ኤቃ ጸሳታ ቤሴስ።

- 4 ዳቡራንቻታኔ
 ማቶታንቻታ ኣሺቴ፤
 ኢታታ ኩሼፔካ
 ኢስታ ዋሊ ኤኪቴ።
- 5 «ኢንቴስ ኣይኮ ኤራቴሊኔ
 ኣከካይ ዴና፤
 ኢንቴ ቆማን ሲሜሬቴታ፤
 ቢታ ዮቻቲ
 ኡባይ ቃጾቴስ።
- 6 «ታኒ ኢንቴና፡ ሓንቴ ጸሳታ፤
 ኢንቴ ኡባይካ
 ኡባፌ ቆቃ ጸሳ
 ናይታ፡ ጋዲስ።
- 7 ሪዶ ኣቲን ኢንቴ
 ኣሲ ሃይቂዛ ማላ ሃይቃና፤
 ቃሴ ሃራ ሃላቃቲ ኩንዲዛ ማላ
 ኢንቴካ ኩንዳና፡ ጋይስ» ጌስ።
- 8 ኣቤት ጸሳዉ! ዴንዳ!
 ሳኣ ቦላ ፒርዳ፤
 ካዋቴሊ ኡባይ ኔሳ።

83

- ኣሳፌ ማዛመራ
- 1 ኣቤት ጸሳዉ! ጮኡ ጎፓ!
 ሲርጺ ጎፓ!
 ኣቤት ጸሳዉ!
 ቄሊ ጎፓ!
- 2 ቤኣ! ኔ ሞርኬቲ ኔ ቦላ ዴንዲዳ፤
 ኔና ኢጺዛይቲ ኔ ቦላ
 ባ ቆጼ ቃሊዳ።
- 3 ኢስቲ ኔ ኣሳ ቦላ
 ጌማን ጌኔ ዲላቲዳ፤
 ኔኒ ሲቂዛ ኣሳታ ቦላ

ማቁቲዳ።

- 4 ኢስቲ፥ «ሃ ዪቴ!
ኢስታ ካዎቴላ ሳይሶስ፤
ኢስራኤል ጌቴቲዛ ሱንሳ
ሜርናስ ሃሳኤቶንታ ማላ
ኦሶስ» ጊዳ።

- 5 ኢስቲ ኢሲ ዎዚና ጊዳዲ
ኢሲፌ ማቁቲዳ፤
ኔ ቦላ ዴንዳናስ ጫቁቲዳ።

- 6 ኢስቲካ ኤዶሜ አሳታ፥
ኢስማኤል አሳታ፥
ሞኦቤ ዛሬታ፥ አጋሪ ዛሬታ፥
7 ጌባሌ አሳታ፥ አሞኔ አሳታ፥
አማሌቄ አሳታ፥ ፊሊስጾሜ
አሳታኔ ጸረሴ አሳታ።

- 8 አሶሬ አሳቲ ኢስታራ
ኢሲፌቴላ ሜዲዳ፤
ሎጼ ዛሬታስካ ማዶ ጊዳዳ።

- 9 ኔኒ ሚዲያሜ አሳታ ቦላ፥
ሲሳራኔ ያቤኔ ቦላ
ቂሶኔ ሻፋን ኦሊዳ
ማላ ኢስታ ቦላ ኦላ።

- 10 ኢስቲ ኤን-ዶሬ
ጌቴቲዛሶን ሳይዳ፤
ኢስታ አሃይ ሞጌቶንታ
ቢታ ቦላ ዎቂዴስ።

- 11 ኦሬቤ ቦላኔ
ዛኤቤ ቦላ ኦሊዳ ማላ
ኢስታ ሃላቃታ ቦላ ኦላ፤
ዜባሃኔ ጸልሙና
ሳይሲዳ ማላ
ኢስታ ሃሪዛይታካ ኔኒ ሳይሳ።

- 12 ሄይቲ፥ «ኑኒ ጸሳ አሳ ቢታ
ኑስ ቡዞፋና» ጊዳይታ።

- 13 አቤት ታ ጸሳው!
 ኢስታ ጉዲላ ማላ ላላ፤
 ጫርኮይ ኤፊዛ ሱላ ማላ ኦላ።
- 14 ጸራጋይ ዋራ ሚዲ ወርሲዛ ማላ፤
 ታማ ላጮይ
 ዙማ ማይኢዛ ማላ፤
 15 ጎቴን ኔ ኢስታ ዳጋንላ፤
 ኔ ኡሾንካ ኢስታ ዬዳላ።
- 16 አቤት ጎዳው!
 አሳይ ኔ ሱንሐ ኮያና ማላ
 ኔኒ ኢስታ አይፌሶ ዬላ ማይዛ።
- 17 ኢስቲ ሚርናስ ዬላቴቶ፤
 ሂርጌቶኔ ካዉዬ ቆዬቶ።
- 18 ኔ ሱንላይ ጎዳ
 ጌዲዳይሳኔ
 ሳኣ ኡባ ቦላ ኔኒ ጸላ
 ኡባፌ ቆቃ ጸሳ
 ጌዲዳይሳ ኢስቲ ኤሬቶ።

84

ቆሬ ናይቲ ዛማሬታ ካቦስ ሱሱልኤን ዬዲዳ ማዛሙሬ

- 1 አቤት ሚጴቴላ ጎዳው!
 ኔኒ ዴኢዛሶይ አይ ማላ ሎኦሶ!
- 2 ታኒ ጎዳ ኬላ
 ዛጎ ላሞታይስ፤
 ታኒ ኩሜላ ዋዚናፔ
 ዴኦ ጸሳስ
 ኡፋይሳን ዬዳይስ።
- 3 አቤት ኡባፌ
 ዋልቃማ ጎዳው!
 ታ ካዋዞ ጸሳው!
 ኔስ ያርሾ ያርሺዛሶዛ ማታን
 ሲኔ ካፎይ ባስ
 ዴኢዛሶ ዴማዲስ።
 ሃራጴያካ
 ባስ ዬሊዛሶ ኬዳዲስ።

- 4 ኔ ኬላን ዳኢዛይቲኔ
 ማርናስ ኔና ሳቢዛይቲ
 እንጃቲዳይታ።
- 5 ባንታስ ኔና ዋልቃ ኦሊዛይቲ፥
 ጸዮኔ ኦጌ ባ ዋዚናን
 እሞቲዛይቲ እንጃቲዳይታ።
- 6 ባካ ጌቱቲዛ ሃሊ ባይንዳ
 ሻፋራ ኢስቲ ካንሊዛ ዋዴ
 ሄ ሶሆን ፑልቶይ ቆቃና፤
 ባጴሳ ኢራይካ ቡኪዲ
 ቢታ ካልሳና። *
- 7 ኢስቲ ዋልቃ ቦላ ዋልቃ
 ጉጂ ጉጂ ባና፤
 ኢስቲ ጸሳ ሲንላን
 ጸዮኔን ቤታና።
- 8 ኣቤት ኡባፌ
 ዋልቃማ ጎዳዉ!
 ታ ዋሳ ኔኒ ሲያ።
 ኣቤት ያቆቤ ጸሳዉ!
 ታ ጊዛዝ ኤዝጋ።
- 9 ኣቤት ጸሳዉ!
 ኔኒ ዶራ ቲይዳ
 ኑ ካዋዛ እንጂ፤
 ኢዚ ኑስ ጎንዳሌ ጊዲዳ ጊሻስ
 ኔ ኢዛ ጸላ።
- 10 ሃራሶን ሺ ጋላስ ዳኣናፔ
 ጸሳ ኬላን
 ኢሲ ጋላስ ዱሲ ሎኦ፤
 ኢታታ ዱንካኔን ዳናፔ
 ጸሳ ኬላ ዛጎን
 ዛቤ ጊዴሊ ታስ ሎኦ።
- 11 ጎዳይ ኑስ ኣርሼኔ ጎንዳሌ፤
 ኢዚ ኣዮቴላኒኔ

* 84:6 ባካ ጊዛይሳ ዱማ ዱማ ጌሻ ማጻፋቲ ዬሆ ሾባ ጌቱስ።

ቦንሾን ኑና ናጌሰ፤
 ሱሬቴላን ሄማቲዛይታ
 ኢዚ ሎኦ ሚሽ ዲጌና።

- 12 ኣቤት ኡባፌ
 ዋልቃማ ጎዳዉ!
 ኔናን ኣማኔቲዛይቲ
 ኣንጄቲዳይታ።

85

ቆሬ ናይቲ ዛማሬታ ካቦስ ዲላን ዬጲዳ ማዛሙሬ

- 1 ኣቤት ጎዳዉ!
 ኔኒ ኔ ቢታስ
 ኪያቴላ ቤሳዳሳ፤
 ያቆቤ ዲኤቲዳሶፔ
 ዛራዳሳ።
- 2 ኔኒ ኔ ኣሳ ናቆ ኣቶ ጋዳሳ፤
 ኢሰታ ናጋራ ኡባ ካማዳሳ።
- 3 ኔኒ ዪሎቲዛይሳ ኡባ ኣጋዳሳ፤
 ሱሊዛ ኔ ሃንቆፌካ
 ሲማዳሳ።
- 4 ኣቤት ኑና ኣሺዛ ጸሳዉ!
 ኔ ኑና ዛራ፤
 ኔኒ ኑ ቦላ
 ላንጨቴዳይሳ ኣጋ።
- 5 ኔኒ ኑና ሜርናስ ሃንቂታኔ?
 ኔ ሃንቆይ ዬሌታፔ
 ዬሌታ ጋካናዉ ጋሞኣኔ?
- 6 ኔ ኣሳይ ኔናን ኡፋይታና ማላ፥
 ኔ ኑና ኦራጲሲኪ!
- 7 ኣቤት ጎዳዉ!
 ኔ ሜርና ሲቆዛ ኑና ቤሳ፤
 ኔኒ ኑና ኣሻ።
- 8 ታኒ ጎዳ ጸሲ
 ዮቲዛይሳ ሲያና፤
 ኢሰቲ ሲሚዲ

- ባላ ኦጌን ቦንታ ኣጊኮ፥
 ባ ጌሻ ዴራሰ
 ሳሮቴል ኤሃናሰ
 ሂዶታ ኢሚዴሰ።
- 9 ኢዛ ቦንቹይ
 ኑ ቢታን ዳና ማላ
 ኣቶቴላይ ኢዛሰ ያዪዛይታሰ
 ማታን ዴሰ።
- 10 ሲቆይኔ ቱማቴል
 ኢሲፌ ሲጌቴቴሰ፤
 ዲሎቴልኔ ሳሮቴል
 ኢሲፌ ኢዲሚቴቴሰ።
- 11 ኣማኔቴል ሳኣፔ
 ፑዴ ኬዛና፤
 ጸሳ ዲሎቴል
 ሳሎፔ ዴጌ ዋዳና።
- 12 ቤኣቴ! ጎዳይ ሎኦ ሚሽ ኢማና፤
 ኑ ቢታይካ ሎኦ ካል ሞኪሳና።
- 13 ዲሎቴል ኢዛፔ
 ሲንሳራ ባና፤
 ኢዚ ባናሶካ ኢዛሰ ገጊሳና።

86

- ዳዊቴ ዋሳ
- 1 ኣቤት ጎዳዉ!
 ታኒ ሂዬሳኔ ማቶታንቻ
 ጊዲዳ ጊሻሰ
 ታ ዋሶዛ ሲያዳ
 ታሰ ዛሮ ኢማ።
- 2 ታኒ ኔሰ ዲማ ኣሰ ጊዲዳ ጊሻሰ
 ኔ ታ ሼምፖ ናጋ፤
 ኔኒ ታ ጸሳ፤
 ኔናን ኣማኔቲዛ
 ኔ ኣይሌዛ ታና ኣሻ።
- 3 ኣቤት ጎዳዉ!
 ኩሚሳ ጋላሰ

- ታ ኔኮ ዋሲዛ ጊሻሰ
ኔ ታና ማራ።
- 4 አቤት ጎዳዉ!
ታኒ ዋዚናፔ
ኔና ዋሲዛ ጊሻሰ
ታና ኔ አይሌዛ ኡፋይሳ።
- 5 አቤት ጎዳዉ!
ኔኒ ኑሰ ኪያኔ
አቶ ጊዛዴ፤
ኔና ዋሲዛ ኡባሰ
ኔ ሜርና ሲቆ ቤሳሳ።
- 6 አቤት ጎዳዉ!
ታ ዋሳ ሲያ፤
ታ ሾባ ዋሲዛይሳ ኡዘጋ።
- 7 ኔ ታሰ ዛሮ አሚዛ ጊሻሰ
ታኒ ሜቶ ጋላሳን
ኔኮ ዋሳይሰ።
- 8 አቤት ጎዳዉ!
ኔ ማላይ ጸሳታ ጊዶን ባዋ፤
ኔ ኦሶራ ጊናቲዛ
ኦሶይካ ዴና።
- 9 አቤት ጎዳዉ!
ኔኒ ሜጂዳ
ካዋቱላይ ኡባይ
ኔኮ ዬዲ ኔሰ ጎይናና፤
ኔ ሱንላካ ቦንቻና።
- 10 ኔኒ ጊታ፤
ማላሊሲዛ ሚሽ ኦላሳ።
ኔኒ ጸላ ጸሳ።
- 11 አቤት ጎዳዉ!
ታኒ ኔ ቱማን ባና ማላ
ታና ኔ ኦጌ ታማርሳ፤
ታኒ ኔ ሱንላሰ ያያና ማላ
ታሰ ኢሲ ዋዚና ኢማ።

- 12 አቤት ጎዳ ታ ጸሳው!
 ታኒ ኔና
 ታ ኩሜላ
 ዋዚናፔ ጋላታና፤
 ኔ ሱንላካ
 ሜርናስ ቦንቻና።
- 13 አይስ ጊኮ ኔ ታና ቤሲዳ
 ሜርና ሲቆይ ኬሂ ጊታ፤
 ኔኒ ታ ሼምፖዮ
 ዱፎፔ አሻዳሳ።
- 14 አቤት ጸሳው! ኡቶራንቻቲ
 ታ ቦላ ዴንዲዳ፤
 ታና ዋቆና ኮዬዲ
 ፓንጋቲ ዱላቴቴስ፤
 ኔና ዉዳንካ ዩጊቤቴና።
- 15 ጊዶ አቲን አቤት ጎዳው!
 ኔኒ ቃጂቲዛዴኔ
 ማሪዛ ጸሳ፤
 ሃንቄታናስ ጋምኢዛ ጸሳ፤
 ኔ ሲቆይኔ ኔ አማኔቴላይ
 ኬሂ ዳሮ።
- 16 ታኮ ሲማዳ ታስ ቃጂታ፤
 ታስ ኔ አይሌዛስ ዋልቃ ኢማ፤
 ኔ አይሌይ ናዛ ታና አሻ።
- 17 አቤት ጎዳው!
 ኔ ታና ማዲዛይሳኔ
 ሚንፌሊዛይሳ
 ታና ኢዲዛይቲ ቤኢዲ
 ዩላታና ማላ
 ኔ ኪያቴላ ማላታ ታና ቤሳ።

87

- ቆሬ ናይቲ ዩዲዳ ማዛሙሬ
- 1 ጎዳ ካታማይ
 ጌሻ ዙማ ቦላ ኬጾቲዴስ።
- 2 ጎዳይ ዲዮኔ ፔንጌታ
 ያቆቤይ ዲዛሶታ

- ኡባፌ ኣሉ ሰቄሰ።
 3 ሃኔ ጸሳ ካታማዬ!
 ጸሳይ ኔ ጊሻሰ
 ማላሊሲዛ ሚሽ።
- 4 «ታና ኤሪዛ ካዎቴላታ ጊዶፌ
 ጊብጾኔ ባቢሎኔ
 ጋላ ማዘጋባሽ
 ፊሊሰጾሜ፥ ጲሮሴኔ
 ቶጵያ ኣሳ ጉጃና» ጌሰ።
- 5 ጲዮኔ ጊሻሰ፥ «ኡባ ኣሳይ
 ኢዚን ዩሌቲዴሰ፤
 ኡባፌ ጶቃ ጸሲ
 ኢዘ ሚንሉ ኤሳና» ጌቴታና።
- 6 ጎዳይ ዴራ ኡባ ማዘጋቢሽ፥
 «ሃይሲ ጲዮኒን ዩሌቲዴሰ»
 ጊዲ ጸፋና።
- 7 ዩጲዛይቲኔ ጉፒዛይቲ፥
 «ኮ ኣንጆ ኡባይ
 ጲዮኒፔ ፑልቲሰ»
 ጊሽ ኡፋይሳን ዩጻና።

88

ኢዘራኤሌ ኣሰ ኤማኔይ ሶሬን ሺሺዳ ጊንጾ ቆሬ ናይቲ
 ዛማሬታ ካቦሰ ዲላ ጊጊሶን ዩጲዳ ማዛሙሬ

- 1 ኣቤት ጎዳዉ!
 ታና ኣሺዛ ጸሳዉ!
 ታኒ ጋላሲኔ ኦማርሰ
 ኔ ሲንላን ዩካይሰ።
- 2 ታ ዋሶይ ኔ ሲንሉ ጋኮ፤
 ኔ ሃይሉ ታ ዋሳኮ ዛራ።
- 3 ኣይሰ ጊኮ ታ ዴኦይ
 ሚቶን ኩሚዴሰ፤
 ታኒ ሃይቃና ማታዲሰ።

4 ታኒ ዱፎን ጌሊዛ
 አሳታራ ቆዳታዲሰ፤
 ዋልቃይ ባይንዳ አሰ ጊዳዲሰ።

5 ታኒ አሃታ ጊደን
 ኦሌቲዳ አሳ ማላ፤
 ሃይቂዲ ዱፎን ሞጌቲዳ
 አሃ ማላ፤
 ታኒ ኡባካ
 ኔኒ ደጊዳ አሳ ማላኔ
 ኔ ማደፔ ዱጺዳ
 አሳ ማላ ጊዳዲሰ።

6 ኔኒ ታና ጨማ ኦላን፤
 ዱጌ ቋማ ሰሆን ዬጋዳሳ።

7 ኔ ሃንቆይ ታና ዳጼሰ፤
 ኔ ሃንቆዛ ዳምባላይ
 ታና ሙሌራ ሚቲዳሰ።

8 ኔኒ ታ ላጌታ ታፔ ሃሳዳሳ፤
 ኢሰቲ ታና ሹኔታና ማላ
 ኦላዳሳ፤
 ታና ጊዶሊዳ፤
 ኬሳ ኤካናዉካ ዳንዳይኬ።

9 አቤት ጎዳዉ!
 ካዮ ጋሶን ታ አይፌቲ ዶልጂሚዳ፤
 ኡባ ጋላሰ
 ታኒ ኔኮ ዋሳይሰ፤
 ታ ኩሼታካ ኔኮ ሚጫይሰ።

10 ኔኒ ሃይቂዳይታሰ
 ማላሊሲዛ ሚሽ ኦላይ?
 ኢሰቲ ዳንዲዲ ኔና ጋላታኔ?

11 ኔ ሜርና ሲቆይ ዱፎን
 ኔ አማኔቴላይካ
 ባሻሻሉን ዮቴቲዜ?

12 ኔ ማላሊሲዛ ኦሶይ
 ቋማን ኤሬቲዜ?
 ዋይኮ ኔ ጺሎቴላይ

ደጌቲዳ አሳታ ቢታን ቤታኔ?

- 13 አቤት ጎዳዉ!
ኔኒ ታና ማዳና ማላ
ታ ኔኮ ዋሳይሰ፤
ማላዶ ማላዶ ታ ዋሳይ
ኔ ሲንሐ ጋኮ።
- 14 አቤት ጎዳዉ!
ኔኒ ታና አይሰ ኢጸይ?
ኔ ሲንሐ ታፔ
አይሰ ጌንላይ?
- 15 ዬላጋቴላሶፌ ደማዳ፥
ታኒ ቱጋታዲሲኔ
ሃይቃና ማታዲሰ፤
ኔኒ ታና ዳጋንሐን
ሂዶታ ቃንጸዲሰ።
- 16 ሱሊዛ ኔ ሃንቆይ
ታ ቦላ ጋኪዴሰ፤
ባቢሲዛ ኔ ሃንቆይ
ታና ቋይሲዴሰ።
- 17 ኢሰቲ ኩሜላ ጋላሰ
ዲኦ ሃላ ማላ
ታና ጊደሐዳ፤
ኢሲ ቦላ ጊዲዲ
ታና ዶዲ ኦይኪዳ።
- 18 ኔኒ ታ ላጌታኔ
ታ ሲቆታ ታፔ ሃሳዳሳ፤
ቋማይ ጸላ ታሰ ዳቦ ጊዲዴሰ።

89

ኤዚራኤሌ አሰ ኤታኔይ ሃሳክ ጊንጾን ሺሺዳ ቲሚርቲ

- 1 አቤት ጎዳዉ!
ኔ ሜርና ሲቆ ጊሻሰ
ታኒ ሜርናሰ ዬጸና፤
ኔ አማኔቴላ
ዬሌታ ኡባሰ ታ አዋጃና።
- 2 ታኒ ኔ ሜርና ሲቆይ

ሜርናሰ ኤቂዳይሳኔ
ኔኒ ኔ አማኔቴላ ሳሎን
ሚንላዳ ኤሲዳይሳ ዮታና።

3 ኔኒ፥ «ታኒ ዶሪዳይሳራ
ጫቆ ቃላ ጌላዲስ፤
ታ ኣይሌ ዳዊቴስ፥
4 ታኒ ኔ ዛሬታ
ሜርናሰ ካዎሳና፤
ኔ ካዎቴላ ኣልጋ
ዬሌታ ኡባሰ ሚንላና
ጋ ጫቃዲስ» ጋዳሳ።

5 ኣቤት ጎዳዉ!
ሳሎቴ ኔኒ ኦሒዳ ማላሊሲዛ
ኦሶታ አዋጁቴስ፤
ጌሻታ ዱላታይ
ኔ አማኔቴላ ሳቤስ።

6 ሳሎን ጎዳራ
ሊኬታናሰ ዳንዳይዛይ ኦኔ?
ሳሎ ሜጄቴላታ ጌደንካ
ጎዳ ማላይ ኦኔ?

7 ጌሻታ ሺቆን
ጸሲ ያሺሲዛዴ፤
ባ ዩሾን ዲዛ ኡባፌ
ኬሂ ያሺሲዛዴ።

8 ኣቤት ጎዳዉ!
ኡባፌ ዋልቃማ ጸሳዉ!
ኔ ማላ ዋልቃማይ ኦኔ?
ኣቤት ጎዳዉ!
ኔኒ ኡባ ሚሻን
አማኔቴዳዴ።

9 ኔ ቡልኣኬቴዛ ኣባ ሴራሳ፤
ኣባ ዳምባላካ

- ጮኡ ኦሳሳ።
 10 ኔኒ ኤራኣቤ ጌቴቲዛ
 ኣባ ዶኣዛ ቆጶሬላ
 ዋዳዳሳ፤
 ኔ ሞርቤታ
 ኔ ዋልቃማ ቄሴን ላላዳሳ።
- 11 ሳሎቲ ኔይታ፤
 ሳኣይካ ኔሳ፤
 ቢታኔ ኢዛን ኩሚዳ ኡባ
 ኔኒ ሜዳዳሳ።
- 12 ፑዴሃኔ ዲጌሃ
 ኔኒ ሜዳዳሳ፤
 ታቦሬኔ ሄርሞኔ ዙማቲ
 ኡፋይሳን ኔ ሱንላን
 ዬጼቴሰ።
- 13 ኔሰ ዋልቃማ ቄሴይ ዳሰ፤
 ኔ ቄሴይ ሚኖ፤
 ኔ ኡሻቻ ቄሴይ ያሼሰ።
- 14 ጸሎቴሊኔ ሱሬ ፒርዳይ
 ኔ ካዋቴላ ኣራታሰ ዮቻ፤
 ማርቴሊኔ ኣማኔቴሊ
 ኔፔ ሲንላራ ቤቴሰ።
- 15 ኣቤት ጎዳዉ!
 ኢሊሊሳን ኔና ሳቢዛይቲኔ
 ኔ ፖኦን ሄሜቲዛይቲ
 ኣንጃቲዳይታ።
- 16 ኔ ሱንላን ኩሜላ
 ጋላሰ ኡፋዬቴቴሰ፤
 ኔ ጸሎቴላ ጊሻሰ
 ኢሰቲ ኔና ቶቄ ቶቄ
 ሂሰቴቴሰ።
- 17 ኢሰቲ ጨቄቲዛ ዋልቃይ ኔና፤
 ኔ ቴማን ኢሰታ ካጨይ
 ቶቄ ቶቄ ጌሰ።
- 18 ኑ ጎንዳሊይ ጎዳ ኩሼና፤
 ኑ ካዋይካ

ኢስራኤል ጌሻ ኩሼና።

- 19 በኒ ኔኒ ኔ አማኔቲዳ
 አሳታሰ አጁታን፥
 «ታኒ ኦላ ቃራ ማዳዲሰ፤
 ዴራ ጊዶፌ ዶሬቲዳ ዬላጋ
 ቶቁ ቶቁ ሂሰታዲሰ።
- 20 ታ አይሌ ዳዊቲ ዴማዲሰ፤
 ታ ጌሻ ዛይቱንካ ቲያዳ
 ኢዛ ካዎላዲሰ።
- 21 ታ ኩሼይ ኢዛ ማዳና፤
 ታ ቄሴይካ ኢዛ ሚንላና።
- 22 ኢዛ አይ ሞርኬይ ሃሪዲ ጊሪሴና፤
 አይ ኢታ አሲካ ኢዛ ቆሄና።
- 23 ታኒ ኢዛ ሞርኬታ
 ኢዛ ሲንላን ቲንቼሬላና፤
 ኢዛ ኢጸዛይታካ ሸጫ
 ኒፊፊ ሂሰታና።
- 24 ታ አማኔቲላይኔ
 ታ ሜርና ሲቆይ
 ኢዛራ ኢሲፌ ጊዳና፤
 ታ ሱንላን ኢዛ ካጩይ
 ቶቁ ቶቁ ጋና።
- 25 ታኒ ኢዛ ካዎቲላ
 ሜዲቲራኔ አባ
 ጋካናሰ አሳና።
 ኢዛ ዛዋካ ኤፊራጸሴኔ
 ጸግርሴ ሻፋታ
 ጋካናሰ አሳና።
- 26 ዳዊቲ ታና፥
 ርኔኒ ታ አዋ፤
 ታ ጸሳኔ
 ታና አሺዛ ዎጋ ዛላ፥
 ጊ ጴይጋና።
- 27 ታኒ ኢዛ ታሰ ባይራ ና ሂሰታና፤
 ሳኣን ዲዛ ካዎታ ኡባፌ

- ታ ኢዛ ጌታሳና።
 28 ታኒ ታ ሲቆ
 ኢዛሰ ሜርናሰ ናጋና፤
 ታኒ ኢዛሰ ጌሊዳ
 ጫቆ ቃላ ሚንፋና።
 29 ታኒ ኢዛ ዛሬታ
 ሜርናሰ ሚንፋ ኤሳና፤
 ኢዛ ካዎቴላ አራታካ
 ሳሎ ማላ ሜርናሰ
 ሚንፋ ቶካና።
 30 «ጊዶ አቲን ኢዛ ዘሬላቲ
 ታ ዎጋ አጌኮ፥
 ቃሴ ኢሰቲ ታ አዛዞካ
 ናጎንታ ኢጲኮ፥
 31 ኢሰቲ ታ ዎሊዳ
 ማራ ዋሪኮ፥
 ታ አዛዞካ ቦንቾንታ ኢጲኮ፥
 32 ታኒ ኢሰታ ናጋራ ጌሻሰ
 ኢሰታ ጉፊን ቃጸያና፤
 ኢሰታ ሞሮ ጌሻሰ
 ኢሰታ ደርቃፊን ሾጫና።
 33 ጊዶ አቲን ታኒ ታ ሲቆ
 ኢዛፔ ሃሲኬ፤
 ዎይኮ ታ አማኔቴሰ
 ኢዛሰ ፓጪንቺኬ።
 34 ታኒ ጫቂዳ ጫቆ ቃላ ሚኬ፤
 ታ ዶናፔ ኬኢዳ
 ቃላ ላሚኬ።
 35 ታኒ ኢሲቶ ታ ጌሻ ሱንፋን
 ጫቂዳ ቃላ
 ዳዊቴሰ ዋርዶቲኬ።
 36 ኢዛ ዛሬቲ ሜርናሰ ሚኒዲ ዳና፤
 ኢዛ ካዎቴላ አልጋይካ
 አዋ አርሼ ማላ
 ታ ሲንፋን ሜርናሰ ዳና።
 37 ሳሎ ቦላ አማኔቲዳ ማርካ

ጊዳዳ ዲዛ አገና ማላ
ኢዚ ሜርናሰ ሚኒ ዳና» ጋዳሳ።

- 38 ጊዳ አቲን ሃኢ ኔኒ
ቲያዳ ካዎሲዳይሳ
ቦላ ኮሃ ሃንቄታዳሳ፤
ኢዛ ካታዳሳ፤
ዬጋ አጋዳሳ።
- 39 ኔኒ ኔ አይሌዛሰ
ጫቂዳ ጫቆ ቃላ ላላዳሳ፤
ኢዛ ካላቻ
ባናን ኦላዳ ቱኒሳዳሳ።
- 40 ኔኒ ካታማ ጊምቤዛ
ኡባ ላላዳሳ፤
ኢዛ ሚጸ ኡባ ታይሳዳሳ።
- 41 ኦጌራ አቋዛ ኡባቲ
ኢዛ ቦንቂዳ፤
ኢዚ ባ ሾርታሰ ቂጾሰ አቲዴሰ።
- 42 ኔኒ ኢዛ ሞርኬታሰ ኡቫቻዳሳ፤
ኢሰታ ኡባ ኡፋይሳዳሳ።
- 43 ኔኒ ኢዛ ማሻ
ቃራዛ ዲንኢሳዳሳ፤
ኦላንካ ኢዛ ማዳቤካ።
- 44 ኔኒ ኢዛ ካዎቴላ ጉፋ
ኢዛ ኩሼፔ ዋላ ኤካዳሳ፤
ቃሴ ኢዛ ካዎቴላ
አራታ ቢታን ኦላዳሳ።
- 45 ኔኒ ኢዛ ዬላጋቴላ
ላይላ ቃንላዳሳ፤
ዬላካ ማይዛዳሳ።
- 46 አቤት ጎዳዉ!
አዉዴ ጋካናሰ
ኔና ጌንላኔ?
ኔኒ ሜርናሰ ጌማኔ?
ኔ ሃንቆይ ታማ ማላ
አዉዴ ጋካናሰ ኤጻኔ?
- 47 ታ ላይላይ አይ ኬና

ቃንላኮ ቆጋ፤
 ኔ አሳ ና ጮ ሃዳ ሜዳዲ!
 48 አሲ ሃይቆንታ ሜርናስ
 ሸምፖራ ፓጸ ዳናስ
 ዳንዳይዜ?
 ቃሴ ዱፎን ጌሎንታ ማላ
 ባና አሻናስ ዳንዳይዜ
 አሲ ዱዜ?

49 አቤት ጎዳዉ!
 ዳዊቴስ ኔ አማኔቴላን
 ጫቂዳ ጫቆይኔ
 ካሴ ኔ ሜርና ሲቆይ
 አዋን ዱዜ?

50 አቤት ጎዳዉ!
 ታኒ ኔ አይሌይ
 አይ ማላ ቦሬቲዳኮ
 ኔኒ ሃሳያ፤
 ታኒ አሳ ኡባ ቦሬዛ
 ዋሰታ ዳንዳይዳኮ
 አኔ ኔ ቆጋ።

51 አቤት ጎዳዉ! ኔ ሞርኬቲ
 ኔ ዶራዳ ቲይዳ
 ካዋዛ ጫዪዛይሳ፥
 ኢዚ ቢዳሶ ኡባን
 ኢዛ ቂልጪዛይሳ ቆጋ።

52 ጎዳይ ሜሪ ሜርናስ ጋላቴቶ!
 አሚን! አሚን።

ኦይዳንሶ ማጽፋ

90

(ማዛ 90—106)

ጸሳ አስ ሙሴይ ዋሲዳ ዋሳ
 1 ጎዳዉ! ኔኒ ኑስ
 ዬሌታፔ ዬሌታ
 ጋካናስ ሸቂ አቲዛሶ ጌዳዳሳ።

- 2 ዙማቲ ሜዴታናፔ ካሴ፥
 ዋይኮ ኔኒ ሳኣ
 ኦላናፔ ካሴ
 ሜርናፔ ሜርና ጋካናሲ
 ኔኒ ጸሳ።
- 3 ኔኒ ኣሳ ናይታ፥
 «ኣሳ ናይቶ!
 ጉዬ ቢታን ሲሚቲ»
 ጋዳ ኢሰቲ ሜዴቲዳ ቢታን
 ጉዬ ዛራሳ።
- 4 ሺ ላይሊ ኔሰ ኣዲዳ
 ኢሲ ጋላሳ ማላ፤
 ዋይኮ ኦማርሳፌ ኢሲ ሳቲ ማላ።
- 5 ኣሰ ቆፖንታ ኤፊዛ ዲኦ ማላ
 ኔ ኤፊሺን፥
 ኢሰቲ ኣጉሞ ማላ ኣቆና፤
 ማላዶ ማላዶ
 ሞኪዛ ማታ ማላ ጨሊሊቴሰ።
- 6 ማታይ ማላዶ ዲጨዲ ጨዬሰ፤
 ኦማርሳ ዋዴ ጊዲኮ
 ሹሊዲ ሜሌሰ።
- 7 ኑኒ ኔ ቃንጌላን ወሪዶሰ፤
 ኔ ሃንቆ ሱሌን ዳጋሚዶሰ።
- 8 ኔኒ ኑ ኢታ ኦሶ
 ኔ ሲንላን ዋላዳሳ፤
 ቃሴ ኑ ጌንሊዳ ናጋራ
 ኔ ሲንላ ፖኦኮ
 ኣላዳሳ።
- 9 ኑ ዋዴ ኡባይ
 ኔ ሃንቆን ኣዲዳሰ፤
 ኑ ላይላካ ኦሌን ወርሶሰ።
- 10 ኑ ዳና ላይላይ
 ላፑን ታማ፤
 ዳሬሰ ጊኮ ኦሰፑን ታማ፤
 ሄይቲካ ሜቶኒኔ
 ጨፎጨን ኩሚዳ፤

ኑ ላይላይ ኤሶን አደሰ፤
ኑኒካ ኤሶን ባና።

11 ኔ ሃንቆዛ ዋልቃ ኦኔ ኤሪዛይ?

ኔ ሃንቆ ሴላይ ያሽሰ።

12 ኑ ላይላ ማራራ

ኑ ጎኤታና ማላ

ኑና አዶ ኤራቴል ታማርሳ።

13 አቤት ጎዳዉ!

ኔ ሃንቆይ

አዉዴ ጋካና ጋሞአኔ?

ሲማ! ኔ አይሌታስ ቃዴታ!

14 ኑ ላይላ ኡባን

ኑኒ ኡፋይታና ማላኔ

ዬዳና ማላ ማላዶ ማላዶ

ኔ ሲቆን ኑና ካልሳ።

15 ኔኒ ኑና ሜቶሲዳ

ጋላሳታ ከናኔ

ኑኒ ቱጋ ቤኢዳ ላይላታ

ሊኬ ኑና ኡፋይሳ።

16 ኑስ ኔ አይሌታስ

ኔ ኦሶይ ቆንጮ፤

ኔ ቦንቾይ ኑና ናይታስ ቤቶ።

17 አቤት ጎዳዉ! ኑ ጸሳዉ!

ኔ ኪያቴሊ ኑናራ ጊዶ፤

ኑ ኦሊዛ ኡባ

ኑስ ኢንጃሳ፤ ኤሮ!

ኑ ኦሊዛ ኡባ ኑስ ኢንጃሳ።

91

ኑና ናጊዛ ጸሳስ ዬዴቲዳ ማዛሙሬ

1 ኡባፌ ቶቃ ጎዳን

ዜምፒ ዴኢዛይ፥

ኡባ ዳንዳይዛ

ጸሳ ኩዋን አቄሰ።

2 ታኒ ጎዳ፥

«ኔኒ ታሰ ዜምፖ፥
 ሚጸኔ ታኒ ኔናን
 አማኔቲዛ
 ታ ጸላ» ጋና።

3 ኢዚ ኔና ሻንካንቻታ ጊቴፔ፥
 ዋጲዛ ኢታ ሃርጌፌካ
 አሻና።

4 ኢዚ ባ ዋንጎታን
 ኔና ካማና፤
 ኢዛ ቁፌታ ጋርሳን
 ኔኒ ቆቴታ አታና፤
 ኢዛ አማኔቲላይ
 ኔሰ ጎንዳሌኔ
 ዜምፖ ጊዳና።

5 ኔኒ አማርሳን
 ዳጋንሊዛ ሚሻሰ፥
 ዋይኮ ጋላስ ጸንጌቲዛ
 ዪሻሰ፥
 6 ጳማን ኦይኪዛ ሃርጌስ፥
 ዋይኮ ሴታ ጋላሳን
 ወርሲዛ ኢታ ሃርጌስ ያያካ።

7 ኢሲ ሺ ኔ ሚሊሶራ፥
 ቃሴ ታሙ ሺ ኔፔ
 ኡሻቻ ባጋራ ኩንዳና፤
 ጊዶ አቲን ኔና ኣይኮይካ
 ቦቹና።

8 ኔኒ ኔ ኣይፌን
 ዬሎ ጸላ ዬላና፤
 ኢታቲካ ቃጸዬቲሺን ቤኣና።

9 ጎዳ ኔኒ ኔሰ ባቃታ አቲዛሶ፥
 ኡባፌ ቶቃ ጸላ ኔሰ
 ዜምፖ ሂሰቲዳ ጊሻሰ፥
 10 ኢታ ሚሺ ኔና ቦቹና፤
 ቦሻይካ ኔ ኬል ሺቄና።

11 ኔ ቢዛ ኦጌ ኡባን

- ኔና ናጋና ማለ
 8ሲ ባ ኪታንቻታ ኣዛዛና።
- 12 ኔ ቶሆይ ሹቻን
 ቆዴቶንታ ማለ
 ኪታንቻቲ ባ ኩሼን
 ኔና ዴንላና።
- 13 ኔኒ ጋሞኔ
 ሃሶ ሾሻ ቦላ ሄመታና፤
 ቃሴካ ዋዳላ ጋሞኔ
 ኢታ ሾሻ ዬቆና።
- 14 ጎዳይ፥ «ኢዚ ታና ሲቂዳ ጊሻሰ
 ታኒ ኢዛ ኣሻና፤
 ኢዚ ታ ሱንላ ኤሪዳ ጊሻሰ
 ታኒ ኢዛ ናጋና።
- 15 ኢዚ ታና ያይጊዛ ዋዴ
 ታኒ ኢዛሰ ኮያና፤
 ኢዚ መቶቲዳ ዋዴ
 ታኒ ኢዛራ ኢሲፌ ጊዳና፤
 ታኒ ኢዛ ኣሻናኔ
 ቦንቻና።
- 16 ታኒ ኢዛ ላይላ ኣዱሳና፤
 ታ ኣሺዛዴ ጊዲዳይሳ
 ታ ኢዛ ቤሳና» ጌሰ።

92

- ሳሞባታ ጋላስ ዬጾቲዛ ማዛመሬ
- 1 ጎዳ ጋላቶይ ሎኦ፤
 ኣቤት ኡባፌ
 ቶቃ ጸሳዉ!
 ኔ ሱንላሰ
 ማዛመሬ ሺሾይ ሎኦ።
- 2 ማላዶ ኔ መርና ሲቆ፥
 ጊዶሐ ኔ ኣማኔቴሐ
 ኣዋጃይ ሎኦ።

3 ታሙ ሻያን ዋጾቲዳ
 ባጋናኒኔ
 ማሲንቆ ዲዲሼ ኣዋጃይ ሎኦ።

4 ኣቤት ጎዳዉ!
 ኔ ኦሊዳ
 ዋልቃማ ኦሶቲ
 ታና ኡፋይሲዳ፤
 ኔ ኩሺይ ኦሊዳ ጊሻሰ
 ታኒ ኡፋይሳን ዩጻይሰ።

5 ኣቤት ጎዳዉ!
 ኔ ኦሶይ ኣይ ኬና ጊታ!
 ኔ ቆፋይካ ኣይ ኬና ጨማ!

6 ሄሳ ኤያ ኣሲ ኤራናዉ ዳንዳዬና፤
 ዳማ ኣሲካ
 ኣኬካናዉ ዳንዳዬና።

7 ኢታቲ ማታ ማላ ዲጨኮካ፥
 ጌኔ ኦሊዛ ኡባቲ ጨይኮካ
 ኢሰቲ ሜርናሰ ጃያና።

8 ጊዶ ኣቲን ኣቤት ጎዳዉ!
 ኔኒ ሜርናሰ ኡባፌ ቶቃ።

9 ኣቤት ጎዳዉ!
 ኔ ሞርኬቲ ጃያና፤
 ኢታ ኦሊዛ ኡባቲ
 ፒሰኪ ጋናይሳ ኑ ኤሮሰ።

10 ታ ካጩዛ ሜንላ
 ካጩ ማላ ቶቁሳዳሳ፤
 ሎኦ ዛይቴንካ ታና ቲያዳሳ።

11 ታ ሞርኬቲ ጸኔቲዳይሳ
 ታ ኣይፌን ቤኣዲሰ፤
 ታ ባልጋራታ ኩንዴሰ
 ታ ኣይፌን ቤኣዲሰ።

12 ጸሎቲ ዛምባ ማላ ዳያና፤
 ቃሴ ሊባኖሴ

ጸዳ ማላ ዲጫና።

13 ኢስቲ ጎዳ ኬላን ቶኬቲዳ፤

ኢስቲ ጸሳ ኬላ

ዛጎ ጋካናሰ ዲያና።

14 ኢስቲ ጨጌዲካ ኣይፋና፤

ኢስቲ ኡባ ዋዴ ጨሊሊዳ ማላኔ

ሚኒዳ ማላ ዳና።

15 ኢስቲ፥ «ጎዳይ ሊኬ፤

ኢዚ ታሰ ዋጋ ዛላ፤

ኢዛ ቦላ ዋሶይ ዴና» ጋና።

93

1 ጎዳይ ካዋቲዴሰ!

ቲማኔ ዋልቃ ማይኢዴሰ፤

ኣላሜይ ቃጽንታ ማላ

ሚንሱ ኤሲዴሰ፤

ኦኒካ ኢዞ ቃሌና።

2 ኔ ካዋቲላ ኣራታይ

ቤኒሶፌ ሚኒ ኤቂዴሰ፤

ኔኒ ሜርናሰ ዳሳ።

3 ኣቤት ጎዳዉ!

ጨማ ኣባይ ጉሚዴሰ፤

ጨማ ኣባይ ባ ጉንላ

ቶቁ ሂስቲዴሰ፤

ጨማ ኣባይ ዳምባላ ጉንላ

ቶቁ ኦሲዴሰ።

4 ሳሎን ዲዛ ጎዳይ

ጌታ ሃላታ ጉንላፌ፥

ኣባ ዳምባላ ጉንላፌካ

ኣቶ ዋልቃማ።

5 ኣቤት ጎዳዉ!

ኔ ዋጋይ ላሜቶንታ ሚኖ፤

ኔ ኬላይ ሜርናሰ

ጌሻቲላን

ሎኢ ዳና።

94

- 1 አቤት ጎዳዉ!
ኔኒ ሃሎ ኬሲዛ ጸሳ፤
አቤት ሃሎ ኬሲዛ ጸሳዉ!
ኔ ቦንቾ ቆንጨሳ።
- 2 አቤት ሳኣ ፒርዲዛይሶ! ዴንዳ!
ኦቶራንቻታሰ ቤሲዛ
ቁጸቴ ኢማ።
- 3 አቤት ጎዳዉ!
ኢታቲ ኣዉዴ ጋካናሰ
ጋሞኣኔ?
ኢሰቲ ኣዉዴ ጋካናሰ
ኡፋዬታኔ?
- 4 ኢታ ኦሲዛ ኡባቲ
ባንታ ኦቶሮ ቃላን ሃሳዬቴሰ፤
ጮ ጮቄቴቴሰ።
- 5 አቤት ጎዳዉ!
ኢሰቲ ኔ ዴራ ሊቂሴቴሰ፤
ኣሳ ቶቴቴሰ።
- 6 ኢሰቲ ኣሞኤታኔ
ቤቴ ኣሳታ ዋጄቴሰ፤
ዪኦታ ሲፌቴሰ።
- 7 ሂሰቲዲ ኢሰታሰ፤
«ጎዳይ ኑና ቤኤና፤
ያቆቤ ጸሲ
ኣኬኬና» ጌቴሰ።
- 8 ኢንቴኖ ኣሳ ጊዶፌ
ዳማቶ! ኣኬኪቴ!
ኢንቴኖ ኤያቶ!
ኣዉዴ ኢንቴ ኤራኔ?
- 9 ሃይሐ ኢሚዳ ጸሲ ሰዬኔ?
ኣይፌ ሚጲዳ
ጸሲ ቤኤኔ?
- 10 ካዋቴላ ሰሪዛይሲ
ቃጸዬኔ?
ኣሰ ኤራቴሐ ታማርሲዛይሲ

- 11 ጎዳይ ላሳ ቆፋይ ቆሎንታይሳኔ
 ሃዳ ገዲዳይሳ ኤሬስ።
 12 አቤት ጎዳዉ!
 ኔኒ ሴሪዛዴይኔ
 ኔኒ ኔ ዋጋፔ ታማርሲዛ
 አሲ አንጄቲዳዴ።
 13 ኢታቲ ኩንዳና ኦላይ
 ቦኬታና ጋካናስ፤
 ኔ ኢዛ ማቶፔ ሸምፒሳሳ።
 14 ጎዳይ ባ ላሳ ኦሌና፤
 ኢዚ ባይታ አገና።
 15 ፒርዳይ ሰሚዲ ጸሎ ፒርዳስ
 ዮች ገዳና፤
 ጸሎቲ ኡባይ
 ቱማ ፒርዳ ካላና።
 16 ማካላንቻታ ቦላ
 ታ ገሻሰ ኤቄታናይ ኦኔ?
 ኢታ ኦሊዛይታራካ
 ታ ገሻሰ ሞቲታናይ ኦኔ?
 17 ጎዳይ ታና ማዶንታኮ፤
 ታኒ ኤሶን ዱፎን ጌላዳ
 ሲርጲ ጋና።
 18 አቤት ጎዳዉ!
 ታኒ፥ «ኩንዳና ሃናይስ» ገሺን
 ኔ ሜርና ሲቆይ ታና ካፊዴስ።
 19 ታ ዋዚናይ ጨጨን ኩሚዳ ዋዴ
 ኔ ሚንፊሶይ ኡፋይስ ዳሪሴስ።
 20 ዋጋን ዘምፒዲ ጌላ ፒርዲዛዴራ
 ኔኒ ዙፔታናስ ዳንዳያይ?
 21 ጸሎ አሳታ ቦላ ጌኔ ዱላቴቴስ፤
 ሱሬ አሳታ ቦላካ
 ሃይቆ ፒርዳ ፒርዴቴስ።
 22 ጎዳይ ገዲኮ ታስ

- ታኒ ባቃታ አቲዛ ሚጸ፤
 ታ ጸሲ ታ ኢዛን
 ዜምፒዛ ዋጋ ዛላ።
- 23 ኢሰታ ኢታቴላ ጊሻሰ
 ኢዚ ኢሰታ ቃጸያና፤
 ኢሰታ ናጋራ ጊሻሰ
 ኢዚ ኢሰታ ቋይሳና፤
 ጎዳ ኑ ጸሳይ
 ኢሰታ ዲፒ ሂሰታና።

95

- 1 ሃ ዪቴ!
 እኔ ጎዳሰ ኡፋይሳን ዬጸሰ፤
 ኑና አሺዛ ዛላሰ ኢሊሎሰ።
- 2 እኔ ኢዛ ሲንሐ ጋላታራ ሺቆሰ፤
 ጋላታ ማዛሙሬ ኡፋይሳን ዬጸሰ።
- 3 ጋሶይካ ጎዳይ
 ዋልቃማ ጸሳ፥
 ጸሳታ ኡባ ቦላካ
 ዋልቃማ ካዎ።
- 4 ቢታ ጨማቲ ኢዛ ኩሼን ዴቴሰ፤
 ዙማ ጸራቲካ ኢዛሳ።
- 5 አባ ሃሊ ኢዛሳ፤
 ሄሳ ኢዛ ኩሼቲ ሜዲዳ፤
 ቢታካ ሜዲዳይ ኢዛ።
- 6 ሃ ዪቴ!
 ሆኪዲ እኔ ኢዛሰ ጎይኖሰ፤
 ኑና ሜዲዳ ጎዳ
 ሲንሳን ጉልባቶሰ።
- 7 ኢዚ ኑ ጸሳ፤
 ኑኒ ኢዛ ቆርን ሄማቲዛይታ፤
 ኑኒ ኢዛሰ ዶርሳ ዉዴታ።
- ጎዳይ ኢንቴና ጊዛይሳ ሃቕ ሲዪቴ!
- 8 «ካሴ ኢንቴ አዋቲ
 ማሳኒኔ ማሪባን

- ኦሶይሳ
 ኢንቲ ዋዚና ሙሚሶፒቲ።
 9 ኢሰቲ ታ ኦሶ በኢዲካ
 ታናራ ኤቄቲዳኔ ታና ፓጪዳ።
 10 ሄ ዬሌታ ሶላ ታኒ
 ኦይዱ ታሙ ላይሐ ሃንቄታዲሰ፤
 ታኒካ፥ ሩኢሰቲ ኡባ ዋዴ
 ባንታ ዋዚናን ባሊዛ ኣሳ፤
 ኢሰቲ ታ ኦጌ ኤሪቤቴና ጋዲሰ።
 11 ሄሳ ጊሻሰ ታኒ፥
 ሩኢሰቲ ታ ሹምፖሶ
 ሙሌካ ጌሌቴና
 ጋዳ ሃንቄታ ጫቃዲሰ።»

96

- 1 ጎዳሰ ኦራላ ማዛሙሪ ዬዲቴ፤
 ሳኣን ዴኢዛ ኣሳዉ!
 ኡባይ ጎዳሰ ዬዲቴ።
 2 ጎዳሰ ዬዲቴ፤
 ኢዛ ሱንላ ሳቢቴ፤
 ኢዚ ኣሺዛይሳ ሃች ሃች ዮቲቴ።
 3 ካዋቴላታ ጊዶን
 ኢዛ ሶንቾ ቆንጨሲቴ፤
 ኣሳ ኡባ ጊዶን ማላሊሲዛ
 ኢዛ ኦሶ ኣዋጁቴ።
 4 ጎዳይ ጊታ፤
 ጊታ ጋላታይካ ኢዛሰ በሴሰ፤
 ኡባ ጸሳታፔ ኣፏዲ
 ኢዚ ያዬታናሰ በሴሰ።
 5 ዴሪ ኣሳይ ጎይኒዛ ጸሳቲ
 ኡባይ ኤቃ ጸሳታ፤
 ጊዶ ኣቲን ጎዳይ
 ሳሎታ ሜጲዳ ጸሳ።
 6 ሶንቾይኔ ቲማይ

ኢዛ ዩሾን ዳስ፤
 ሚኖቴላይኔ ፑላይ
 ኢዛ ኬላን ዳስ።

7 ኢንቴኖ ቢታ ቦላ ዲዛ
 ዴሬ ኡባቶ!
 ጎዳ ቦንቾ ገሻሲኔ
 ኢዛ ዎልቃ ገሻሰ ጋላቲቴ።

8 ኢዛ ሱንላሰ ቤሲዛ ቦንቾ
 ጎዳሰ ኢሚቴ፤
 ያርሾ ኤኪዲ ኢዛ ኬላ ዛጎ ጌሊቴ።

9 ኢዛ ጌሻቴላ ፑላን ጎዳሰ ጎይኒቴ፤
 ቢታን ዴኢዛ ኣሰ ኡባይ
 ኢዛ ሲንላን ኮኮሪቴ።

10 ካዎቴላታ ጊዶን፥
 «ጎዳይ ካዎቴዳሰ!
 ሳኣይ ሚኒ ኤቂዳሰ፤
 ሙሌካ ቃጾና፤
 ኢዚ ኣሰ ኡባሰ
 ኢሲ ገና ፒርዳና» ጌቴ።

11 ሳሎይኔ ሳኣይ ኡፋዬቶ!
 ኣባይኔ ኢዛ ጊዶን ዲዛ
 ኡባቲ ጉሜቶ!

12 ጎሻ ጋዴይኔ ኢዛ ቦላ ዲዛ
 ኡባይ ኡፋዬቶ!
 ዎራን ዲዛ ሚሐ ኡባይ
 ኢዛ ሲንላን ኡፋይሳን ዩጸና።

13 ኣይሰ ጊኮ ጎዳይ ያና፤
 ኢዚ ሳኣ ቦላን ፒርዳናሰ ያና፤
 ኢዚ ሃ ሳኣ ቦላ ጺሎቴላን፥
 ኣሳ ቦላካ
 ቱማቴላን ፒርዳና።

97

1 ጎዳይ ካዎቴዳሰ፤
 ሳኣን ዴኢዛ ኣሳይ ኡፋዬቶ፤
 ኣባ ጊዶን ዴኢዛ
 ሃሩሮቲ ኡፋዬቶ።

- 2 ሻራይኔ ሳካና ቋማይ
 ኢዛ ዩዩ አዲደሰ፤
 ዲሎቴሊኔ ቱማቴሊ
 ኢዛ ካዋቴላ
 አራታሰ ዮቻ።
- 3 ታማይ ኢዛፔ ሲንላራ ቤሰ፤
 ኢዛ ዩሾን ዲዛ
 ሞርኬታካ ጽጌሰ።
- 4 ኢዛ ዋልቃንሊ ሳኣ ፖኢሴሰ፤
 ቢታይ ሄሳ ቤኢዲ ቃጾሰ።
- 5 ጎዳ ሲንላን፥
 ሳኣ ኡባ ጎዳ
 ሲንላን ዙማቲ
 ሙቃዳ ማላ ሴሪዳ።
- 6 ሳሎቲ ኢዛ ዲሎቴላ አዋጃቴሰ፤
 አሳይ ኡባይ ኢዛ ቦንሻ ቤኤሰ።
- 7 ሚሰሌታሰ ጎይኒዛይቲኔ
 ኤቃ ጸሳታን ጨቄቲዛይቲ
 ኡባይ ዩላቴቶ!
 ኤቃ ጸሳቲ ኡባይ
 ጎዳሰ ጉልባቴቶ!
- 8 አቤት ጎዳዉ!
 ዲዮኔ አሳይ ኔ ዲሎ ፒርዳ
 ሲዩዲ ኡፋዬቴሰ፤
 ዩሁዳ ካታማቲካ፥
 «ሃሹ» ጌቴሰ።
- 9 አቤት ጎዳዉ!
 ኔኒ ሳኣ ኡባፌ ቆቃሳ፤
 ጸሳታ ኡባፌ ኔኒ ጌታታሳ።
- 10 ጎዳ ዶሲዛይቶ! ኢታ ኢጺቴ፤
 ኢዚ ባሰ አማኔቲዛይታ
 ሼምፖ ናጌሰ፤
 ቃሴካ ኢታታ ኩሼፔካ
 አሼሰ።

- 11 ዲሎታስ ፖኦይ ፖኢ ፖኢ ባና፤
 ዋዚና ሱሬታስ ኡፋይሲ ዳና።
- 12 ኢንቴኖ ዲሎቶ!
 ጎዳን ኡፋዬቲቴ፤
 ጌሻ ሱንፋ
 ኢዛይሳ ጋላቲቴ።

98

ማዛሙራ

- 1 ጎዳስ ኦራፋ
 ማዛሙራ ዬዲቴ፤
 ጋሶይካ ኢዚ ማላሊሲዛ
 ሚሽ ኦሊዴስ፤
 ኢዛ ኡሻቻ ኩሼይኔ
 ኢዛ ጌሻ ቄሴይ
 ኢዛስ ጾኖ ኢሚዴስ።
- 2 ጎዳይ ባ ኣሺዛይሳ ኤሪሲዴስ፤
 ኢዚ ባ ዲሎቴፋካ
 ካዎቴፋስ ቆንጨሲዴስ።
- 3 ኢዚ ኢሰራኤሌታ ሲቂዛይሳኔ
 ኢስታስ ኣማኔቲዛይሳ
 ሃሳኢዴስ፤
 ሳኣ ጋጸ ጋካናስ ዲዛ
 ኣሳይ ኡባይ
 ኑ ጸሳይ ኣሺዛይሳ ቤኢዴስ።
- 4 ሳኣ ቦላን ዲዛ ኣስ ኡባይ
 ጎዳስ ኡፋይሳን ዬዲቴ፤
 ቃላ ቶቄ ኦሊዲ
 ኡፋይሳ ዬፋን ጋላቲቴ።
- 5 ባጋና ዲዲሼ
 ማዛሙራን ጎዳ ጋላቲቴ፤
- 6 ዲንኬኔ ዛዬ ፑኒሼ
 ኑ ካዎ ጎዳ ሲንፋን
 ኡፋይሳን ኢሊሊቴ።
- 7 ኣባይኔ ኣባ ጊዶን ኩሚዳ
 ኡባይ ጉሞ!

- ሳኣይኔ ሳኣ ቦላን ዲዛ
 ኡባይ ዬጸ!
 8 ሻፋቲ ኢሲፌ
 ባንታ ኩሼ ባቄቶ!
 ዙማቲ ጎዳ ሲንላን
 ኢሲፌ ኡፋይሳን ዬጹቶ!
 9 ጎዳይ ሳኣ ቦላን ፒርዳናስ ያና፤
 ኢዚ ሃ ሳኣ ቦላ ጸሎቴላን
 ኣሳ ቦላካ
 ሱሬቴላን ፒርዳና።

99

- 1 ጎዳይ ካዎቲዴስ!
 ሄሳ ገሻስ ኣሳይ ኮኮሮ!
 ከሩቤታ ገደን
 ካዎቴላ ኣራታን ኡቲዴስ፤
 ሄሳስ ቢታይካ ቃጸ።
 2 ጎዳይ ጸዮኔን ገታ፤
 ካዎቴላ ኡባፌ
 ኢዚ ቶቁ ቶቁ ገዴስ።
 3 ገታኔ ኬሂፔ ያሺሲዛ
 ኔ ሱንላ
 ኢስቲ ኡባይ ሳቤቶ!
 ኢዚ ዲማ!
 4 ቱማ ፒርዳ ዶሲዛ ዎልቃማ ካዎ!
 ኔኒ ሱሬቴላስ
 ዮች ዬጋዳሳ፤
 ኔኒ ያቆቤስ ቱሙ ፒርዳኔ
 ጸሎቴላ ኤሳዳሳ።
 5 ኢዚ ዲማ ገዲዳ ገሻስ
 ጎዳ ኑ ጸሳ
 ቶቁ ቶቁ ሂስቲቲ፤
 ኢዛ ቶሆ ጋርሳንካ ጉፋኒዲ
 ኢዛስ ጎይኒቴ።
 6 ኢዛ ቄሴታ ገደፌ ሙሴይኔ

- አሮኔይ ዴቴስ፤
 ሳሜሊካ ኢዛ ሱንፋን
 ዋሲዳይታፔ ኢሳ፤
 ኢስቲ ጎዳስ ዋሲዳ፤
 ኢዚካ ኢስታ ዋሶ ኣሊዴስ።
 7 ኢዚ ሻራ ቱሳ ጊዶራ
 ኢስታስ ሃሳይዴስ፤
 ኢስቲ ኢዚ ኢሚዳ ማራኔ
 ዋጋ ናጊዳ።
 8 ኣቤት ጎዳዉ፥ ኑ ጸሳዉ!
 ኔኒ ኢስታ ዋሳ ሲያዳሳ፤
 ኔኒ ኢስታ ኢታቴላ ጊሻስ
 ቃጸይዳ ጊዲኮካ
 ኢስታስ ኣቶ ጊዳ ጸሳ።
 9 ጎዳ ኑ ጸሳ
 ቶቁ ቶቁ ሂስቲቴ፤
 ኢዛ ጌሻ ዙማ ቦላን
 ኢዛስ ጎይኒቴ፤
 ኣይስ ጊኮ ጎዳ
 ኑ ጸሳይ ጌሻ ጸሳ።

100

ጋላታ ማዛሙራ

- 1 ሳኣን ዴኢዛ ኣስ ኡባይ
 ጎዳስ ኡፋይሳን ኢሊሊቴ።
 2 ጎዳስ ኡፋይሳን ሃጋዚቴ፤
 ኡፋይሳ ዬላራ
 ኢዛ ሲንል ሸቂቴ።
 3 ጎዳይ ጸሳ ጊዲዳይሳ ኤሪቴ፤
 ኑና ሜዲዳይ ኢዛ፤
 ኑኒ ኢዛይታ፤
 ኑኒ ኢዛ ኣሳቲ
 ኢዚ ሄሚዛ ዶርሳ ዉዴታ።
 4 ኢዛ ፔንጌ ጋላታራ፥

- ኢዛ ዛጎ ሳባራ ጌሊቲ፤
 ኢዛ ጋላቲቲ፤
 ኢዛ ሱንፋካ አንጂቲ።
 5 ኣይሰ ጊኮ ጎዳይ ኪያ፤
 ኢዛ ሲቆይ ሜርናሳ፤
 ኢዛ ኣማኔቲላይ
 ዩሌታፔ ዩሌታ ጋካናሳ።

101

- ዳዊቲ ማዛሙራ
 1 ታኒ ኔ ሲቆ ጊሻሲኔ
 ቱማ ፒርዳ ጊሻሲ ዩጸና፤
 ኣቤት ጎዳዉ!
 ታኒ ኔሰ ጋላታ ማዛሙራ ዩጸና።
 2 ታኒ ሱሬ ኦጌ ካላና፤
 ኔኒ ታኮ ኣዉዴ ያኔ?
 ታኒ ታ ኬላን
 ሱሬቲላን ዳና።
 3 ታኒ ታ ኣይፌራ
 ኢታ ሚሽ ደሊኬ፤
 ጸሳፌ ካሬ ኬዚዳ ኣሳታ
 ኦሶ ኢጸይሰ፤
 ታኒ ኢሰታራ ሙሌካ ዙፔቲኬ።
 4 ዋዚና ጌላቲ ታፔ ሃኬቶ፤
 ኢታቲላራ ታሰ
 ጋይቶቴላ ዳና።
 5 ጌማን ባ ላጌ ዚጊርዛይሳ
 ታኒ ሲርጺ ኦላና፤
 ኦቶሬቲዛይሰኔ ጨቁቲዛ ኣሰ
 ታኒ ጮኡ ጋ ኣጊኬ።
 6 ኢሰቲ ታናራ ዳና ማላ
 ቢታ ቦላ ዳኢዛ

አማኔቲዛይታ
 ታኒ ሎኦ ኣይፌን ጸላይሰ።
 ሱሬቴላን ሄማቲዛ ኣሲ
 ታሰ ሃጋዛና።

7 ጨዋ ኦሊዛይ ኦኒካ
 ታ ኬላን ዴና፤
 ዋርዶ ሃሳይዛይ
 ታ ሲንላን ኤቄና።

8 ቢታን ዴኢዛ ኢታ ኣሰ ኡባ
 ታኒ ሃች ሃች ዳይሳና፤
 ኢታ ኦሊዛይታ ኡባ
 ታኒ ጎዳ ካታማፔ
 ዶቃላ ዳይሳና።

102

ጨጨዳ ዋዴኔ ሜቶቲዳ ዋዴ ጸሳ ሲንላን ዋሲዳ ዋሳ

1 ኣቤት ጎዳዉ!
 ታ ዋሳ ሲያ፤
 ታ ዋሶይ ኔኮ ጋኮ።

2 ታ ሜቶቲዳ ጋላሰ
 ኔ ሲንላ ታፔ ጌንሶፋ፤
 ኔ ሃይላ ታኮ ዛራ፤
 ታኒ ኔኮ ዋሲዛ ዋዴ
 ታሰ ኤሶን ኣላ።

3 ኣይሰ ጊኮ ታ ላይላይ
 ጨዋ ማላ ዳዬሰ፤
 ታ ሜቄላይካ
 ታማ ቦንቆ ማላ ኤዴሰ።

4 ታ ዋዚናይ
 ኣዋይ ላቢዳ ማታ ማላ ሃንዴሰ፤
 ታሰ ቆጶይ ካሐ ኢዲዴሰ።

5 ታሰ ኦሌ ዳሮፔ ዴንዶይሳን
 ሜቄላ ጸላ ኣቲዴሰ።

6 ታኒ ባዞን ዲዛ ቢያ ካፎ
 ዋይኮ ላሌቲዳ ኬላን
 ዴኢዛ ጉቶ ማላ።

- 7 ታኒ ኢቺን ጳሰኮይ ዬና፤
 ታኒ ኬላ ሁኤን
 ባርካ ኡቲዳ ካፎ ማላ ጊዳዲሰ።
- 8 ታ ሞርኬቲ ኡባ ጋላሰ
 ታና ጫዬቲሰ፤
 ታና ኢሴሊዛይቲ ታ ሱንሐ
 ቃንጌቲዳ ማላ ቆዲዳ።
- 9 ታኒ ቢዲንሐ ጳሌ ማላ ቃሞኣዲሰ፤
 ታ ኣፋንላካ
 ኡሻራ ዋላካ ኡያዲሰ።
- 10 ኔ ሃንቆ ጋሶኒኔ
 ኔ ቦሻ ጋሶን
 ኔ ታና ፑዴ ዴንሶፕ፤
 ዲጌ ኦላዳሳ።
- 11 ታ ዴኦ ላይላይ ኦማርሳ ዋዴ
 ኩዋ ማላ፤
 ታኒ ማታ ማላ ሜላዲሰ።
- 12 ጊዶ ኣቲን ኣቤት ጎዳዉ!
 ኔኒ ካዋቲላ ኣራታን
 ሜርናሰ ኡታዳሳ፤
 ኔ ሱንላይካ ዬሌታፕ
 ዬሌታ ጋካናሰ ሃሳኤታና።
- 13 ኔኒ ጸዮኒሰ
 ኪያቲሐ ኦሊዛ ዋዴይ
 ጋኪዳ ጊሻሲኔ
 ዋዴዚካ ሃኢ ጊዲዳ ጊሻሰ
 ኔኒ ዴንዳዳ ኢዚሰ ቃዴታና።
- 14 ኔ ኦሳንቻቲ ኢዛን ዲዛ
 ሹቻታ ዶሴቲሰ፤
 ቡዴቲዳ ቢታሰካ
 ቃዴቲቲሰ።
- 15 ካዋቲላቲ ጎዳ
 ሱንላሰ ያያና፤
 ሳኣ ካዋቲ ኡባይ
 ኢዛ ቦንቻና።

16 ጎዳይ ጸዮኖ ዛሪ ኤሲዛ ዎዴ
ኢዚ ባ ጌታቴላ ቤሳና።

17 ኢዚ ሂዩሳታ ዎሳ ሲያና፤
ኢስታ ሾቤካ ካጴና።

18 ቡሮን ዩሌታናይ
ጎዳ ጋላታና ማላ
ሃይሲ ዩዛ ዩሌታስ ጸፊቶ።

19 ጎዳይ ቋቃን ዲዛ
ባ ጌሻ ሶሆፔ
ዱጌ ዳሊዴስ፤
ኢዚ ሳሎፔ ዱጌ
ሳኣ ቤኢዴስ።

20 ሄሲካ ቃሼቲዳ
ኣሳታ ዋሶ ሲያናሲኔ
ሃይቆስ ፒርዴቲዳ ኣሳታ
ቃሾፔ ቢርሻናሳ።

21 ሄሳ ጌሻስ ጎዳ ሱንሒ
ጸዮኒን ዮቴታና፤
ኢዛ ጋላታይ
ዩሩሳላሜን ኣዋጁታና።

22 ዳሬቲኔ ካዎቲ ኢሲፌ ሸቂዲ
ጎዳስ ሄ ዎዴ ጎይናና።

23 ታኒ ናቴቴላን ዲሺን፥
ኢዚ ታ ሚኖቴላ
ኦጌን ኣሺዴስ፤
ታ ዳና ላይላካ
ቃንሒዴስ።

24 ሂስቲን ታኒ፥
«ኣቤት ታ ጸሳዉ!
ታኒ ዳና ላይላ
ቡሮ ባጋሲሺን
ኔ ታና ኤኮፋ።

ኣቤት ጎዳዉ!
ኔኒ ዩሌታፔ ዩሌታ ጋካናስ
ዳሳ» ጋይስ።

- 25 ኔኒ ቤኒ ሳኣ ሜዳዳሳ፤
 ሳሎቲካ ኔ ኩሼ ኦሶ።
- 26 ሄይቲ ኡባይ ዳያና፤
 ጊዶ አቲን ኔኒ ሚና ዳና፤
 ኢሰቲ ኡባይካ
 አፋላ ማላ ዉራና፤
 ኔኒ ኢሰታ ጫርቃ
 ማላ ላማና፤
 ኢሰቲካ አዳና።
- 27 ጊዶ አቲን አዉዴካ
 ኔኒ ኔና፤
 ኔ ላይላይ ሙሌካ ዉሬና።
- 28 ኔሰ ኦሲዛይታ ናይቲ
 ሳርቲላን ዳና፤
 ኢሰታ ዜሬላይካ
 ኔ ሲንላን ሚኒ ኤቃና።

103

- ዳዊቲ ማዛሙራ
- 1 ታ ሼምፖዬ!
 ጎዳ ጋላታ!
 ታ ኩሜላ አሳቲላይ
 ኢዛ ጌሻ ሱንላ ጋላቶ።
- 2 ታ ሼምፖዬ! ጎዳ ጋላታ!
 ኢዚ ኔሰ ኦሲዳ
 ኪያቲላ ኡባ ዶጎፓ።
- 3 ኢዚ ኔ ናጋራ
 ኡባ አቶ ጌሰ፤
 ኢዚ ኔ ሃርጌ ኡባፌ
 ኔና ፓሌሰ።
- 4 ኢዚ ኔና
 ዱፎን ጌሎንታ ማላ አሼሰ፤
 ሜርና ሲቆኒኔ ማርታን
 ኔና አንጄሰ።
- 5 ጎሌ ካፎሶ ኔኒ ኦራጸና ማላ
 ኢዚ ኔ አሞ ኡባ
 ሎኦ ሚሻን ኩንላና።

- 6 ጎዳይ ናቂቲዳይታስ
 ጸሎ ኦሴሲኔ
 ሱሬ ፒርዳ ፒርዴስ።
- 7 ኢዚ ባ ኦጌ ሙሴ ቤሲዴስ፤
 ባ ኦሶካ
 ኢሰራኤል ኣሳ ኤሪሲዴስ።
- 8 ጎዳይ ቃጂቲዛዴኔ
 ማሪዛዴ፤
 ኢዚ ሃንቁታናስ ኤሶቶንታዴ፤
 ኢዛ ሲቆይ ኬሂፔ ዳሮ።
- 9 ኢዚ ኡባ ዎዴ
 ኑ ሞሮስ ሞቴና፤
 ማርናስካ ሃንቁቲና።
- 10 ኢዚ ኑ ናጋራ ማላ
 ኑስ ኦሴቤና፤
 ኑ ኢታቲላ ማላ
 ኑስ ዛሪቤና።
- 11 ሳሎይ ሳኦፔ ቋቂዛ ማላ
 ጎዳስ ያዪዛይታስ
 ኢዛ ሲቆይ ጌታ።
- 12 ኦርሼይ ሞኪዛሶፔ
 ዉሊዛሶይ ሃኪዛ ማላ
 ጎዳይ ኑ ሞሮዛ
 ኑፔ ሃሲዴስ።
- 13 ኦዋይ ባ ናይታስ
 ቃጂቲዛ ማላ
 ጎዳይ ባስ ያዪዛይታስ ቃጂቲስ።
- 14 ኑኒ ኦዛፔ ሜጂቲዳኮ
 ኢዚ ኤሬስ፤
 ኑኒ ቢታ ጌዲዳይሳካ
 ኢዚ ኦኬኬስ።
- 15 ኦሳ ዴኦይ ጌዲኮ ማታ ማላ፤
 ኢዚ ባዞ ጨሻ ማላ ጨዬስ።
- 16 ጫርኮይ ጫርኪዛ ዎዴ
 ቆቆፌቲ ቶዬስ፤
 ኢዚ ካሴ ዲዛሶይ

- መጠኑን ከፊትና።
 17 ጊደ አቲን ጎዳሰ ያዩዛይታሰ
 ኢዛ ሲቆይ ማርናፔ
 ማርና ጋካናሳ፤
 ኢዛ ጸሎቴላይካ
 ዬሌታፔ ዬሌታ ጋካናሳ።
 18 ሄሲ ሃናናይ
 ኢዛ ጫቆ ቃላ
 ናጊዛይታሲኔ
 ኢዛ አዛዘ ፖላናሰ
 ሚኔቲዛይታሳ።
 19 ጎዳይ ባ አራታ ሳሎን ኤሲዴሰ፤
 ኢዛ ካዎቴላይ ኡባ ሃሬሰ።
 20 አንቴኖ ኢዛ ኪታንቻቶ!
 ኢዛ አዛዘ ፖሊዛ ዎልቃማቶ!
 ኢዚ ጊዛይሳ ኤዝጊዛይቶ!
 ጎዳ ጋላቲቴ።
 21 አንቴኖ ሳሎን ዴኢዛ ሚኖቶ!
 ኢዛ ሸኔ ኦሊዛ አይሌቶ!
 ጎዳ ጋላቲቴ።
 22 አንቴኖ ኢዚ ሃሪዛ ሶሆ
 ኡባን ዴኢዛ ሚጴታቶ!
 ኡባይካ ጎዳ ጋላቲቴ።
 ታ ሸምፖዬ! ጎዳ ጋላታ።

104

- 1 ታ ሸምፖዬ!
 ጎዳ ታ ጸሳ ጋላታ!
 አቤት ጎዳ ታ ጸሳዉ!
 ኔኒ አይ ኬና ጊታ!
 ኔኒ ቦንቾኔ
 ቴማ ማይአዳሳ።
 2 ኔኒ አፋላ ማላ ፖኦ ቁማአዳሳ፤
 ሳሎታካ ዴንካኔ ማላ
 ቶላዳሳ።
 3 ኔ ኬላ

- ሳሎ ጉፋንሉ ቦላን ኬጸዳሳ፤
 ሻራ ኔስ ፓራ-ጋሪ ኬሳዳሳ፤
 ጫርኮ ቄፌ ቶጋዳ ባሳ።
 4 ኔኒ ጫርኮታ ኔ ኪታንቻ፤
 ታማ ላጮካ ኔ አይሌ ኬሳሳ።
 5 ኔኒ ሳኦ ዮቻ ቦላ ኬሳዳሳ፤
 ኢዚ ሜሪ ሜርናስካ ቃጾና።
 6 ዋጋ ጌታ አባ ቢታ ቦላን
 አፋላ ማላ ሚጫዳሳ፤
 ሃሊካ ጌታ ዙማታ
 ካሚዴስ።
 7 ጌዶ አቲን ኔ ሴሪን
 ሃላቲ ኪቺዳ፤
 ኔ አዛዙ ሲዪዲ ኤሶን ባቃቲዳ።
 8 ኢስቲ ጌታ ዙማታፔ
 ዱጌ ሾባታ ዋጂዳ፤
 ኔኒ ኢስታስ ገግሲዳሶ ጎጊዳ።
 9 ሃላቲ ሲሚዲ
 ቢታ ካሞንታ ማላ፤
 ኢስቲ አጵንታ ማላ
 ዛዋ ኬሳዳሳ።
 10 ኔኒ ፑልቶታ ሾባን ፑልቲሳሳ፤
 ሃላ ዙማታ ጌዶራ
 ዱጌ ጎጊሳሳ።
 11 ባዞ ዶኦቲ ኡባይ ኢዛፔ ኡዬቴስ፤
 ሃሪዲዳቲካ ሳሞስ
 ኢዛፔ ኡዪ አሌቴስ።
 12 ሳሎ ካፎቲ ሃላ ማታን
 ባንታ ኬላ ኬጾቴስ፤
 ሚላ ሃጋታ ጌዶንካ
 ዬጾቴስ።
 13 ኔኒ ጌታ ዙማታ ቦላን
 ሳሎፔ ኢራ ቡኪሳሳ፤
 ቢታካ ኔ ኩሼ ኦሶ

- ኣይፌን ኩንላዳሳ።
 14 ኔኒ ሜሄሰ ማታ፤
 ኣሳሰ ካል ሞኪሳሳ፤
 ሄሳን ኣሳይ ቢታ ኦሊዲ
 ካል ሺሼሰ።
 15 ኣሳ ዎዚና ኡፋይሲዛ ዎይኔ፤
 ሲንል ሺጨሲዛ ዛይቲኔ
 ዎልቃ ኢሚዛ ካል ዴሜሰ።
 16 ጎዳ ሚላቲ፤
 ኢዚ ቶኪዳ ሊባኖሴ ዚጋቲ
 ዳሮ ኢራ ኡዪ ካሌቲሰ።
 17 ኢሰታን ካፎቲ
 ባንታ ኬል ኬጾቲሰ፤
 ዘገለቲካ ዚጋ ቦላ
 ኬዲዲ ዴኤቲሰ።
 18 ቶቃ ዙማታ ቦላን
 ወሻቲ ዴኤቲሰ፤
 ቃሴ ጉፓሌቲ
 ሹቻ ጎንጎሎን ቆቴቲቲሰ።
 19 ዎዳ ቆዳ ኤሪሳናሰ
 ኔኒ ኣገና ሜታዳሳ፤
 ኣርሼይ ባ ዉሊዛ ዎዳ ኤሬሰ።
 20 ኔኒ ቶማ ኤሂዛ ዎዳ
 ሳኣይ ቃሜሰ፤
 ዎራ ዶኣቲካ ኬዚዲ
 ዎጾሬቲቲሰ።
 21 ዎዳላ ጋሞቲ
 ማና ሚሻሰ ዋሴቲሰ፤
 ኢሰቲ ባንታሰ ሚዛ ሚሽ
 ጸሳፌ ኮዬቲሰ።
 22 ኣርሼይ ሞኪዛ ዎዳ
 ጉዬ ሲሚዲ
 ባንታ ኣቆሶን ኢቺቲሰ።
 23 ሄ ዎዳ ኣሲ ባ ኦሶሰ ኬዜሰ፤
 ሳኣይ ቃማና ጋካናሰ
 ኦሌሰ።

- 24 አቤት ጎዳዉ!
 ኔ ኦሶይ አይ ኬና ዳሮ!
 ኔ አጽ ኤራቴላን
 ኔኒ ኢሰታ ኡባ ሜዳዳሳ፤
 ኔ ሜዳዳ ሜዳታቲ
 ቢታ ኩሚዳ።
- 25 ሃና አባያ ገታኔ አሆ፤
 ቆዳይ ባይንዳ ቃጺዛ
 ሜዳቴላቲ፤
 ጉላቲኔ ገታቲ ኢዚን ኩሚዳ።
- 26 ኢዚ ቦላን ማርካቤቲ ሲሜሬቴቲሰ፤
 ቃሴ ኔኒ ሜዳዳ
 ሌዋታኔ ጌቴቲዛ ሚሚንቴይ
 ኢዚን ካኤሰ።
- 27 ኮሺዛ ዋዴ ኔ ኢሰታሰ
 ሚዛዝ እማና ማላ
 ኢሰቲ ኡባይ ኔኮ ጸሌቴሰ።
- 28 ኔኒ ኢሰታሰ እሚዳ ዋዴ
 ኢሰቲ ሺሼቴሰ፤
 ኔኒ ኔ ኩሼፔ ዬገን
 ኢሰቲ ሎኦ ሚሽ ካሌቴሰ።
- 29 ኔኒ ኔ ሲንሳ
 ጌንሊዛ ዋዴ ዳጋሜቴሰ፤
 ኔ ኢሰታ ሼምፖ
 ኤኪዛ ዋዴ ሃይቄቴሰ፤
 ዱጌ ቢታንካ ሲሚ ጌሌቴሰ።
- 30 ጊዶ አቲን ኔኒ ኢሰታሰ
 ኔ አያና ከቲዳ ዋዴ
 ሃራቲ ሜዳቴቲሰ፤
 ቢታካ ኦራዲሳሳ።
- 31 ጎዳ ቦንቸይ ሜርናሰ ዴኦ፤
 ጎዳይ ባ ኦሶን ኡፋዬቶ።
- 32 ኢዚ ቢታ ጸሊን ቢታይ ቃጼሰ፤
 ቃሴ ኢዚ ዙማታ ቦቺን
 ዙማቲ ጨዋቴቲሰ።

- 33 ታኒ ዴኢዛ ላይሰ ኡባን
 ጎዳሰ ዩጸና፤
 ታኒ ሼምፖራ ፓጸ
 ዴኢዳ ዋዴ ኡባን
 ታ ጸሳሰ ዩጸና።
- 34 ታኒ ጎዳን ኡፋዬቲዛ ጊሻሰ
 ታ ዋዚና ቆፋይ ኢዛ ኡፋይሶ።
- 35 ናጋራንቻቲ ቢታፌ ቆዬቶ፤
 ሃይሳፌ ሲንሳሰ
 ኢታቲ ዶፔቶ።
- ታ ሼምፖዬ!
 ጎዳ ጋላታ!
 ጎዳ ጋላታ!

105

- 1 ጎዳ ጋላቲቲ፤
 ኢዛ ሱንላ ጸይጊቲ፤
 ኢዚ ኦሒዳ ኦሶታ
 ካዋቲላታ ኤሪሲቲ።
- 2 ኢዛሰ ጊንጾ ጊግሲቲ፤
 ጋላታ ዬሒካ ዬጺቲ፤
 ማላሊሲዛ ኢዛ ኦሶ ኡባ ዮቲቲ።
- 3 ጌሻ ሱንላን
 ኢዛይሳን ጨቄቲቲ፤
 ጎዳ ኮይዛይታ
 ዋዚናይ ኡፋዬቶ።
- 4 ጎዳኔ ኢዛ ዋልቃ ጸሞሲቲ፤
 ኡባቶ ኢዛ ሲንላ ኮጺቲ።
- 5-6 ኢንቴኖ ኢዛ ኣይሌ
 ኣብራሃሜ ዜሬላቶ!
 ዶሬቲዳ ያቆቤ ናይቶ!
 ኢዚ ኦሒዳ ማላሊሲዛ ኦሶታ፥
 ኢዛ ማላታኔ ኢዚ ፒርዲዳ
 ፒርዳ ኣኬከቲ።
- 7 ኢዚ ጎዳ ኑ ጸሳ፤
 ኢዛ ሱሬ ፒርዳይካ

ሳኦ ኡባ ቦላ ዴስ።

- 8 ኢዚ ባ ጫቆ ቃላ ሚርናስ
ባ ኣዛዚዳ ቃላ ሺ ዬሌታ
ጋካናስ ናጌስ።
- 9 ኢዚ ኣብራሃሚስ ጫቂዳ
ጫቆ ቃላ፥
ዪሳቃስ ኢሚዳ
ቃላ ባሌና።
- 10 ሄሳ ያቆቤስ ዎጋ፥
ኢስራኤሌስካ
ሚርና ጫቆ ቃላ
ሂስቲዲ ሚንሱ ኤሲዴስ።
- 11 ቃሴካ፥ «ኔስ ካናኔ
ቢታ ኢማና፤
ኢዚካ ኔ ዜሬላታስ
ላታ ጊዳና» ጊዴስ።
- 12 ኢስቲ ቆዳን ቂ ጉላታኔ
ካናኔ ቢታን
ቤቴ ጊዲዲ ዲዛ ዎዴ፥
- 13 ኢሲ ዴሬፔ ሃራ ዴሬ፥
ኢሲ ካዎቴላፌ
ሃራ ካዎቴስ ዩዩዳ።
- 14 ጸሲ ኢስታ ኦኒካ ቆሃናስ
ኢሚቤና፤
ኢስታ ጊሻስ ካዎታ ሴሬሼ፥
- 15 «ታኒ ቲይዳይታ ቦቾፍቴ፤
ናቤታ ቆሆፕፕቴ» ጊዴስ።
- 16 ጎዳይ ቢታ ቦላ
ኮሻ ዬዲዴስ።
ኢስታ ካሐ ኡባ ዳይሲዴስ።
- 17 ጊዶ ኣቲን ኢዚ ባ ኣሳ ኣሻናስ
ኢስታፌ ሲንላን ኣይሌቴላስ

- ባይዘቲዳ ዮሴፌ ኪቲዳስ።
 18 ኢዛ ቶሆቲ ካቴናን ዋጾቲዳ፤
 ኢዚ ሳንሳላታን ቃሼቲዳስ።
 19 ኢዚ ካሴ ዮቲዳይሲ
 ፖሌታና ጋካናስ
 ጎዳ ቃላይ ኢዛ ፓጨዳስ።
 20 ካዎይ ኣስ ኪቲዳ
 ኢዛ ቢርሺሲዳስ፤
 ዴራ ሃሪዛይሲ
 ቃሾ ኬላፌ ኬሲዳስ።
 21 ካዎዚ ኢዛ ባ ኬላስ
 ጎዳ ኦሲዳስ፤
 ባስ ዲዛ ኡባ
 ኣቆታ ቦላ ሹሚዳስ።
 22 ሄሲካ ሹሚታ
 ማራራ ካሌላና ማላኔ
 ጌታ ኣሳታ ኣጵ ኤራቴላ
 ታማርሳና ማላ ሱንሊዳስ።
 23 ሄሳፌ ጉዬ ኢሰራኤሌይ
 ጌብጾ ጌሊዳስ፤
 ያቆቤይ ካሚ ቢታን
 ቤቴ ኣስ ጌዲዲ ዴኢዳስ።
 24 ጎዳይ ባ ኣሳ ኬሂ ጮራሲዳስ፤
 ኢስታ ሞርኬታፔ
 ኢስታ ኣሊ ሚንሊዳስ።
 25 ኢዚ ጌብጾ ኣሳይ
 ባ ኣሳ ኢጸና ማላኔ
 ባ ኣይሌታ ቦላ
 ዴንዳና ማላ ኦሊዳስ።
 26 ሄሳፌ ጉዬ ባ ኣይሌ ሙሴኔ
 ባ ዶሪዳ ኣሮኔ
 ኢስታኮ ኪቲዳስ።
 27 ኢስቲ ጌብጾ ኣሳታ ሲንላን

- ጸሳ ማላታ፥
 ካሜ ቢታን
 ማላሊሲዛ ሚሽ ኦሴዳ።
 28 ጎዳይ ቋማ ከቲዲ
 ሄ ቢታ ቋሚሲዴሰ፤
 ጊዶ አቲን ጊብጾ አሳቲ
 አዛ አዛዞ አጸሰ ጊዳ።
 29 አሰታ ሃላ ሱላን ላሚዲ
 ሞሌታ ዋዲዴሰ።
 30 አሰታ ቢታ ኡባ
 ካዋዛ ኬላካ
 ሾጴይ ኩሚዴሰ።
 31 አዚ አዛዚን ቦጾይኔ ኡኤይ
 አሰታ ቢታ ኡባ ቦላ
 ሾሞኡሾሞኢዴሰ።
 32 አሰታ ቢታ ቦላን አራ ጊሻሰ
 ሻች ዋልቃንላራ
 ቡኪሲዴሰ።
 33 አዚ አሰታ ዋይኔ ቱራኔ
 ባላሴ ሚሐ ኡባ ዲፒ ሂስቲዴሰ፤
 አሰታ ቢታን ዴኢዛ ሚላታካ
 ሚንፔሬሲዴሰ።
 34 አዚ አዛዚን ቦሌይኔ
 ቆዳይ ባይንዳ
 ጉሞባሮይ ኬዚዴሰ።
 35 ሂስቲዲ አሰታ ጋዴን
 ሞኪዳ ካሐ ኡባ ሚዴሰ፤
 አሰታ ቢታን ዲዛ ጨለላ ሚሽ
 ኡባካ ዲፒ ሂስቲዴሰ።
 36 ጎዳይ ጊብጾ ዴሬን
 ባይራታ ኡባ ዋዲዴሰ፤
 ኮይሮ ዩሌቲዳ ናይታ
 ኡባካ ዳይሲዴሰ።

37 ሄሳፌ ጉዬ አዚ አሰራኤሌ አሳ

105:28 ኬሳ 10:21-23 105:29 ኬሳ 7:17-21 105:30 ኬሳ 8:1-6

105:31 ኬሳ 8:16-17፥20-24 105:33 ኬሳ 9:22-25 105:35 ኬሳ

10:12-15 105:36 ኬሳ 12:29

ዋርቃኔ ቢራ አሌቆራ ኬሲደስ፤
 ኢስታ ጊደፌ
 ኩንዲዲ አቲዳይ ኦኒኔ ባዋ።

38 ጊብጾ አሳቲ ኢስታስ
 ዳሮ ያዩዳ ጊሻስ
 ኢስቲ ኬዚ ቢሺን ኡፋዬቲዳ።

39 ጸሳይ ኢስታ ካማናስ
 ሻራ ሚጨደስ፤
 ኦማርስ ኢስታስ ፖአሳናዉ
 ታማ ጊግሲደስ።

40 ኢስቲ ሚዛ ሚሽ ኦይቺን
 ኩራቾ ሚሳቲዛ ካፎታ
 ኢስታስ ዬዲደስ፤
 ኢስታ ሳሎ ቁማ ካሊሲደስ።

41 ኢዚ ዛላ ጳልቂን ሃሊ ፑልቲደስ፤
 ሻፋ ማላካ ዲጌ ባዞ ጎጊደስ።

42 ኢዚ ባ አይሌ አብራሃሜስ
 ጫቂዳ ጌሻ ቃላ
 ሃሳኢደስ።

43 ኢዚ ባ አሳ ኡፋይሳን፥
 ባ ዶሪዳይታ ኢሊሊሳን ኬሲደስ።

44 ኢዚ ኢስታስ ሃራ ካዋቴላታ
 ቢታ አሚደስ፤
 ሂስቲን ኢስቲ ሃራቲ
 ዳቡሪ ኬሲዳ ካላ
 አይፌ ላቲዳ።

45 ሄሳ ኢዚ ኦሊዳይ
 ኢስቲ ኢዚ ዋሊዳ
 ማራ ናጋናሳ፤
 ኢዛ ዋጋካ ፖላናሳ።

ጎዳ ጋላቲቴ!

106

- 1 ጎዳ ጋላቲቲ!
 ኢዚ ኪያ ጊዲዳ ጊሻስ፥
 ኢዛ ሲቆይካ
 ሜርናስ ጊዲዳ ጊሻስ
 ጎዳ ጋላቲቲ።
- 2 ጎዳይ ኦሴዳ ዋልቃማ
 ኦሶ ዮታናስ፥
 ዋይኮ ኢዛ ጋላታ
 ኡባ ቆንጨሳናስ
 ዳንዳይዛይ ኦኔ?
- 3 ፒርዳይ ጌላቶንታ ማላ
 ናጊዛይቲኔ
 ኡባ ዋዴ ጸሎ ኦሴዛይቲ
 ኣንጄቲዳይታ።
- 4 ኣቤት ጎዳዉ!
 ኔኒ ኔ ኣሳ ማዲዛ ዋዴ
 ታና ቆፓ፤
 ኢሰታ ኔኒ ኣሺዛ ዋዴ
 ታናካ ኣላ።
- 5 ሄሲካ ኔ ዶሪዳ ኣሳስ
 ሳኣይ ኪጸን ታኒ ቤያና ማላ፥
 ኔ ኣሳ ኡፋይሳ
 ታኒ ኡፋይታና ማላ፥
 ኔ ናይቲ ቦንቹቲዳ ጋሶን
 ታኒካ ኡፋይሳን
 ማጉላና ማላሳ።
- 6 ኦኒ ኦ ኣዋታ ማላ
 ናጋራ ኦሴደስ፤
 ሞሮኔ ኢታ ኦሴደስ።
- 7 ኦ ኣዋቲ ጊብጾን ዴኢዛ ዋዴ፥
 ኔ ማላሊሲዛ ኦሶ
 ቆፒቤቴና።
 ኔ ሲቆ ዳሮቴላ

- ኢሰቲ አኬኪቤቴና፤
 ዘኦ አባ ላንቄን ማካሊዳ።
 8 ጊዲኮካ ኢዚ ባ ሱንላ
 ጊሻሰ፥ ባ ጊታ
 ዋልቃ ኤሪሳናሰ
 ኢሰታ አሺዳሰ።
 9 ኢዚ ዘኦ አባ ሴሪዳሰ፤
 አባይካ ሜሊዳሰ፤
 ባዘን ካሌሊዛይሳ ማላ
 ጨማ ጊዶራ
 ኢሰታ ካሌሊዱ ፒንሊዳሰ።
 10 ኢዚ ኢሰታ
 ኢጲዛይታ ኩሼፔ አሺዳሰ፤
 ሞርኬታ ኩሼፔ
 ኢሰታ ዋዚዳሰ።
 11 ኢሰታ ሞርኬታ ሃሊ ሚቲዳሰ፤
 ኢሰታፌ ኢሶይካ አቲቤና።
 12 ሄ ዋዴ ኢሰራኤሌቲ
 ኢዛ ቃላ አማኒዳ፤
 ኢዛ ዬላን ሳቢዳ።
 13 ጊዲኮካ ኢሰቲ ኢዚ አሶይሳ
 ሄራካ ደጊዳ።
 ኢዛ ዘሪ ናንንታ
 ባንቲ ኮዪዳይሳ አሊዳ።
 14 ኢሰቲ ባዘ ቢታን ኬሂ አሞቲዳ፤
 ቃሴ ሜላ ቢታንካ
 ጾሳ ፓጪዳ።
 15 ሄሳ ጊሻሰ ኢዚ
 ኢሰቲ ዋሲዳይሳ ኢሚዳሰ፤
 ጊዶ አቲን ኢሰታ ሼምፖሰ
 ጊልቃቴሰ ከቲዳሰ።
 16 አሳቲ ባዘን ደንካኒ ዲሼ
 ሙሴኔ ጎደሰ ደማቲዳ
 አይሌ አሮኔ

- ቃናቲዳ ዋዴ፥
 17 ቢታይ ደዬቲዲ
 ዳታኔ ሚቲዴሰ፤
 ኣብራሚ ኢዛ ኬላ
 ኣሳታራ ሞጊዴሰ።
 18 ቃሴ ኢሰታ ማባራ ጊዶን
 ታማይ ኤጲን፥
 ላጮይ ሄ ኢታ ኣሳታ ጹጊዴሰ።
 19 ኮሬቤ ዙማን ዴኢሼ
 ዋርቃ ሴሪሲዲ
 ማራ ሚሰሌ ሜዲዳ፤
 ሂሰቲዲ ሄ ሚሰላሰ ጎይኒዳ።
 20 ኢሰቲ ባንታ ቦንቾ ጸሳ
 ማታ ሚዛ
 ሚዛ ሚሰሌን ላሚዳ።
 21 ኢሰቲ ባንታና ኣሺዳ
 ጸሳ ደጊዳ፤
 ኢዚ ጊብጾን ጊታ ኦሶ፥
 22 ካሜ ቢታንካ
 ማላሊሲዛይሳኔ
 ዘኦ ኣባን፥ «ሆላ!» ጊሲዛይሳ
 ኦሒዳይሳ ደጊዳ።
 23 ሄሳ ጊሻሰ ጸሲ
 ኢሰታ ዳይሳና ጊዴሰ፤
 ጊዶ ኣቲን ዳይሶንታ ማላ
 ኢዛ ሃንቆዛ ዛራናሰ
 ጸሲ ዶሪዳ
 ሙሴይ ጊዶን ኤቂዴሰ።
 24 ሄ ሎኦ ቢታዮ ካዲዳ፤
 ሄሳፌ ጉዬ
 ኢዛ ቃላን ኣማኔቲቤቴና።
 25 ኢሰቲ ባንታ ዱንካኔዛ ጊዶን
 ዙዙሚዳኔ
 ጎዳ ቃላሰ
 ኣዛዜቶንታ ኢዲዳ።

- 26 ሄሳ ገሻሰ ኢስቲ
 ባዘን ኩንዲ ላያና ማላ፥
 ኢዚ ባ ኩሼ ዳንሊዲ ጫቂደሰ።
- 27 ኢስታ ዜሬላቲ
 ካዎቲላታ ጊዶን
 ኦሌታናይሳኔ
 ኢስቲ ቢታ ጋጸ ጋካናስ
 ላሌታናይሳ ፍቲደሰ።
- 28 ሄሳፌ ጉዬ ኢስቲ
 ባኣሊ-ፔኦሬን ዲዛ
 ኤቃስ ጎይኒዛይታራ
 ኢሲፌ ጋይቲዳ፤
 ሼሞፖይ ባይንዳ ኤቃታስ
 ያርሼቲዳ ያርሾዛ ሚዳ።
- 29 ኢስቲ ባንታ ኦሶን
 ጎዳ ሃንቁሊዳ፤
 ሂስቲን ኢስታ ጊዶን
 ኢታ ሃርጌይ ዎጂደሰ።
- 30 ጊዶ ኣቲን ፊኒሃሲ ዳንዲዲ
 ኢስታ ሞሮዛ ፒርዲን
 ኢታ ሃርጌይ
 ኢስታ ቦላፌ ኪቺደሰ።
- 31 ሄሲካ ዩሌታፔ ዩሌታ ጋካናስ
 ሜርናስ ኢዛስ
 ጸሎቴላ ጊዲዲ ቆዴቲደሰ።
- 32 ማሪባ ፑልቶ ማታን
 ጎዳ ሃንቁሊዳ፤
 ኢስታ ጋሶን ሙሴ ቦላ
 ሜቶይ ጋኪደሰ።
- 33 ኣይስ ጊኮ ኢስቲ ሙሴ ዩሎሲዳ፤
 ሂስቲን ኢዛ ደናፔ
 ቤሶንታ ቃላይ ኬኢደሰ።
- 34 ጎዳይ ላይሲቲ ጊን

- ኢስቲ ካናኔ አሳታ ጳይሲቤቴና።
 35 ሄ ፓላፔ ኢስቲ
 ሄ ካዎቴላታራ
 ጌሌቲ ኤኬቲዲ ዋላኬቲዳኔ
 ኢስታ ዴኦ ዋጋ ካሊዳ።
 36 ጸሳ አሳቲ ኢስታ ኤቃሰ ጎይኒዳ፤
 ሄሲካ ኢስታሰ ዎጺማዴ ጊዲዴሰ።
 37 ኢስቲ ባንታ አቱማኔ ማጫ ናይታ
 ዳይዳንላታሰ ያርሺዳ።
 38 ኢስቲ ጸሎ ሱሐ
 ካናኔ ኤቃታሰ ያርሺዳ፤
 ባንታ አቱማኔ ማጫ ናይታ
 ሱሐ ጉሲዳ፤
 ሄ ሱላን ቢታይ ቱኒዴሰ።
 39 ሄሳሶ ኢስቲ
 ባንታ ኦሶን ቱኒዳኔ
 ላይማ ማጫሳ ማላ
 ባንታ ጸሳሰ
 አማኔቶንታ ኢጲዳ።

 40 ሄሳ ጊሻሰ ጎዳ ሃንቆይ
 ኢዛ አሳ ቦላ ኤጲ ኬኢዴሰ፤
 ኢዚ ባይታ ሃራሴቲዴሰ።
 41 ኢዚ ኢስታ ሃራ ካዎቴላታ ኩሼን
 አሊ ኢሚዴሰ፤
 ኢስታ ሞርኬቲ ኢስታ ሃሪዳ።
 42 ኢስታ ሞርኬቲ ኢስታ ናቂዳኔ
 ባንታ ሼኔን አይሲዳ።
 43 ኢዚ ኢስታ ዳርቶ አሺዴሰ፤
 ጊዶ አቲን ኢስታ ማካላሰ
 ጊጲ ኬዚዳ፤
 ባንታ ናጋራ ጋሶን ጳይዳ።

 44 ጊዲኮካ ኢስቲ ዋሲዳ ዋሶዛ ሲዪዲ
 ኢስታ ዋዬዛ ቆፒዴሰ።
 45 ኢስታ ጊሻሰ

ባ ጫቆ ቃላ ሃሳኢዳሰ፤
 እጎንታ ባ ሲቆ ዳርን
 ኢሰታ ማሪዳሰ።
 46 ኢሰታ ዲኢዳ ኡባይ
 ኢሰታስ ቃዴታና ማላ
 ኦሊዳሰ።

47 አቤት ጎዳዉ ኑ ጸሳዉ!
 ኑና አሻ።
 ኑኒ ኔ ጌሻ
 ሱንላ ጋላታና ማላ
 ካዎቲላታ ጊዶፌ
 ኑና ሺሻ።

48 ጎዳይ፥ ኢሰራኤል ጸሲ
 ሜርናፔ ሜርና ጋካናሰ
 ጋላቲቶ!
 አሳይ ኡባይ፥ «አሚን» ጎ።

ጎዳ ጋላቲቲ!

ኢቻሻንሉ ማጻፋ

107

(ማዛ 107—150)

1 ኢዚ ኪያኔ
 ኢዛ ሲቆይ ሜርናሰ
 ጊዲዳ ጊሻሰ ጎዳ ጋላቲቲ።
 2 ጎዳይ ኢሰታ ዎዚዳይቲ፥
 ኢሰታ ዋርኬታ ኩሺፔ
 ኢዚ እሺዳይቲ ሂዝጌቶ፤
 3 አርሼይ ዋኪዛሶፔኔ
 ዉሊዛሶፔ፥
 ፑዳሃፔኔ ዳጌሃፔ
 ዴሬ ኡባፌ ኢዚ ሺሺዳይቲ
 ሂዝጊ ሃሳዬቶ።

- 4 ኢስታፌ ኢሶቲ ኢሶቲ
 ባዞ ቢታን ቶይላቲዳ፤
 ባ ዴኢዛ ካታማ ኤፊዛ ኦጌ
 ዴማናሰ ዳንዳይቤቴና።
- 5 ኢስቲ ጋፊዳኔ ሳሜቲዳ፤
 ከሂፔ ዳቡርዳ።
- 6 ኢስቲ ሜቶቲዳ ዎዴ
 ጎዳኮ ዋሲዳ፤
 ኢዚካ ኢስታ ዋዬዛፔ
 አሺዴሰ።
- 7 ኢስቲ ዴአና ካታማ ጋካናሰ፤
 ኢዚ ኢስታ ሲታ ኦጌራ ካሌሊዴሰ።
- 8 ሜርና ኢዛ ሲቆዛሲኔ
 ኢዚ አሳሰ ኦሊዳ ማላሊሲዛ
 ሚሻታሰ ኢስቲ ጎዳ
 ጋላቴቶ!
- 9 አይሰ ጊኮ ኢዚ ሳሜቲዳይታ
 ኦሺ አሊሴሰ፤
 ጋፊዳይታካ
 ሎኦ ሚሻን ካልሴሰ።
- 10 ኢስታፌ ኢሶቲ ኢሶቲ ቢራታ
 ሳንሳላታን ቃሼቲዲ
 ዋዬቲዛይታ፤
 ሳካና ቋማ ጊዶንካ
 ኡቲዳይታ፤
- 11 ጋሶይካ ኢስቲ
 ጸሳ ቃላ ቦላ ማካሊዳኔ
 ኡባፌ ቋቃ ጸሳ
 ዞሬ ካቋዳ።
- 12 ሄሳ ጊሻሰ ዎልቃ ኦሶን
 ኢስታ ኢጼሊዴሰ፤
 ኢስቲ ዳቡሪን
 ኢስታ ማዲዛይ ቋይዴሰ።
- 13 ኢስቲ ሜቶቲዳ ዎዴ
 ጎዳኮ ዋሲዳ፤
 ኢዚካ ኢስታ ዋዬዛፔ
 አሺዴሰ።

- 14 ሳካና ጹማፔ ኢሰታ ኬሲዴሰ፤
ኢሰቲ ቃሼቲዳ ሳንሳላታካ
ዱሴሬሊዴሰ።
- 15 ሜርና ኢዛ ሲቆዛሲኔ
ኢዚ ኣሳሰ ኦሊዳ
ማላሊሲዛ ሚሻታሰ
ኢሰቲ ጎዳ ጋላቴቶ።
- 16 ኣይሰ ጊኮ ኢዚ ጸርቂማላፔ ኦሴቲዳ
ፔንጌ ሜንሊዴሰ፤
ቢራታ ኮላታታካ
ቃንጾሬሊዴሰ።*
- 17 ኢሰታፌ ኢሶቲ ኢሶቲ
ባ ማካላቴላ ጋሶን
ኤያ ጊዲዳ፤
ባ ናጋራ ጋሶንካ
ሜቶን ጌሊዳ።
- 18 ኢሰታ ቆዴይ ካል ኢጲን
ሃይቃና ማቲዳ።
- 19 ኢሰቲ ሜቶቲዳ ዋዴ
ጎዳኮ ዋሲዳ፤
ኢዚካ ኢሰታ ዋዬዛፔ
ኣሺዴሰ።
- 20 ኢዚ ባ ቃላ ከቲዲ
ኢሰታ ፓሊዴሰ፤
ዱፎ ደናፔካ
ኢሰታ ኣሺዴሰ።
- 21 ሜርና ኢዛ ሲቆዛሲኔ
ኢዚ ኣሳሰ ኦሊዳ ማላሊሲዛ
ሚሻታሰ
ኢሰቲ ጎዳ ጋላቴቶ።
- 22 ኢሰቲ ኢዛሰ
ጋላታ ያርሾ ያርሼቶ፤
ቃሴካ ኡፋይሳ ዬላን
ኢዚ ኦሊዳ ኦሶ ቆንጨሴቶ።

* 107:16 ኮላታ ጊዛይሳ ኢሲ ኢሲ ባጋ ጋሞላ ቃላን ጎልጌ ዋይኮ ኮላታ ጌቴሰ።

- 23 ኢስታፌ ኢሶቲ ኢሶቲ ማርካቤን
 ጊታ አባ ጊደራ ቢዳ፤
 ሄ ጊታ አባ ቦላ
 ባንታ ኦሶ ኦሴዳ።
- 24 ኢሶቲ ጎዳ ኦሶ ቤኢዳ፤
 ኢዚ ጨማ ጋርሳን ኦሴዳ
 ማላሊሲዛ ኦሶታ ጸሊዳ።
- 25 ኢዚ አዛዚን
 ጎቲ ጫርኮይ ዴንዲዴሰ፤
 ሂሰቲን አባ ዳምባላይ
 ቃጺዴሰ።
- 26 ኢሶቲ ፑዳ ሳሎ ኬዚዳ፤
 ሰሚዲካ ዲጌ ጨማን ጌሊዳ፤
 ኢስታ ጋኪዳ ሜቶፔ
 ዴንደይሳን
 ኢስታ ዋዚናይ ታሂዴሰ።
- 27 ኢሶቲ ማፆቲዳ አሳ ማላ
 ዪጮቲዲ ጋንዲጋርዳ፤
 ኢስታሰ አኬኪዛ ዋዚናይካ
 ዳሚዴሰ።
- 28 ኢሶቲ ሜቶቲዳ ዋዴ
 ጎዳኮ ዋሲዳ፤
 ኢዚካ ኢስታ ዋዬዛፔ
 አሺዴሰ።
- 29 ኢዚ ጎቲ ጫርኮዛ
 ጮኡ ሂሰቲዴሰ፤
 አባ ዳምባላካ ሲርጺ ሂሰቲዴሰ።
- 30 ጮኡ ጊዳ ጊሻሰ
 ኢሶቲ ኡፋዬቲዳ፤
 ኢሶቲ አሞቲዛ ዋዴቤን
 ጋሴዴሰ።†
- 31 ሜርና ኢዛ ሲቆዛሲኔ
 ኢዚ አሳሰ ኦሴዳ ማላሊሲዛ
 ሚሻታሰ
 ኢሶቲ ጎዳ ጋላቱቶ።
- 32 ኢሶቲ ኢዛ ዴሬ ዲላታን

† 107:30 ዋዴቤ ጊዛይሲ ማርካቤን አባራ ቢዛ አሳቲ አባፌ ኬዚዲ ሽምፒዛሶኔ
 አባን ጌላናሰ ናጊዛይቲ ሽምፒዛ አባ ዶናን ዲዛ ካታማ።

ጶቁ ጶቁ ሂሰቴቶ፤
ቃሴ ጨማታ ሺቆን
ኢዛ ጋላቴቶ።

33 ሻፋታ ሙሌራ ሜሊሲዴሰ፤
ፑልቶቲ ፑልቶንታ ማላ ቴቂዴሰ።

34 ሄን ዴኢዛ አሳ
ኢታቴላ ጋሶን
አራዳ ቢታዮ አይኮ
ዶሊሶንታ ማጺኔ
ቢታ ኦሴዴሰ።

35 ኢዚ ባዞን ሃል ኤሊሲዴሰ
ሜላ ቢታን ፑልቶይ
ጶቃና ማላ ኦሴዴሰ።

36 ጋፊዳይታ ሄን ዋሴዴሰ፤
ኢሰቲካ ባንታሰ
ዴአና ካታማ ኬጺዳ።

37 ኢሰቲ ባንታ ጎሻን ዜሪዳ፤
ዋይኔ ቶኪዳ፤
ዳሮ ካል ሺሺዳ።

38 ኢዚ ኢሰታ አንጂን
ኢሰቲ ኬሂ ጮራቲዳ፤
ኢሰታ ሜሄታካ ጉሴቤና።

39 ሜቶን፥ ዋዬኒኔ
ጨጮን ጸኔቲን
ኢሰታ ቆዳይ ጉጺዴሰ።

40 ጎዳይ ሃላቃታ ካዉሺዴሰ፤
ኦጌይ ባይንዳ ባዞን
ቶይላታና ማላ
ኢሰታ ኦሴሰ።

41 ጊዶ አቲን ኢዚ ሜቶታንቻታ
ኢሰታ ዋዬፔ ኬሲዴሰ፤
ዶርሳ ዉዴ ማላ ጮራ ናይታካ
ኢሰታሰ አሚዴሰ።

42 ሱሪ አሳቲ
ሄሳ ቤኢዲ ኡፋዬቴቲሰ፤
ጊዶ አቲን ጌላታ

ዶናይ ጎርዴታና።

- 43 ኤራ አሲ ሃ ዮኦዛ
 ባ ዋዚናን ዋሶ፤
 ኢዚካ ጎዳ ማሮቴል አኬኮ።

108

ዳዊቲ ዬጲዳ ማዛመራ

- 1 አቤት ጸሳዉ!
 ታ ዋዚናይ ሚኖ፤
 ታኒ ኔሰ ኩሚላ
 ዋዚናፔ ዬጸናኔ
 ኔና ሳባና።
- 2 ታ ዲሊኔ ማሲንቆይ ዴንዲቴ!
 ታኒካ ማላዶ
 ዋንታራ ዴንዳና።
- 3 አቤት ጎዳዉ!
 ታኒ ዴራ ጊዶን ኔና ጋላታና፤
 ቃሴ ካዋቴላታ ጊዶን
 ኔሰ ሳባን ዬጸና።
- 4 ኔ ሲቆይ ጊታ፤
 ሳሎታፔካ አጽሰ።
 ኔ አማኔቴላይካ
 ፑዴ ሳሎ ጋኬሰ።
- 5 አቤት ጸሳዉ!
 ሳሎታፔ ቦላራ
 ቶቁ ቶቁ ጋ!
 ኔ ቦንቾይ ቢታ ኡባ ጋኮ።
- 6 ኔኒ ሲቂዛይቲ አታና ማላ
 ኔ ኡሻቻ ቄሴን ኑና አሻ፤
 ታ ዋሳ ሲያ።
- 7 ጸሲ ባ ጌሻሶሆን ዲሼ፥
 «ታኒ ጸናዳ
 ሴኬሜ ቢታ ሻካና፤
 ቃሴ ሱኮቴ ዙላ ጊሻና።
- 8 ጋላአዴይ ታይሳ፤

- ሚናሴይካ ታይሳ፤
 ኤፍሬሜይ ታ ሁኤን
 ዋሊዛ ቢራታ ቆቤ፤
 ዩሁዳይ ታ ካዋቴላ ጉፌ።
 9 ሞኣቤይ ታሰ ሜቻሶ፤
 ኤዶሜይ ታይሳ
 ጊዲዳይሳ ኤሪሳናሰ
 ታኒ ታ ጫማ
 ኢዛ ቦላ ዋላይሰ፤
 ታኒ ፊሊስጾሜ ጸናዳ
 ጌሬራይሰ» ጊዴሰ።
 10 ጊምቤቲዳ ካታማኮ
 ታና ኦኔ ኤፋናይ?
 ኤዶሜ ጋካናሰ
 ታና ኦኔ ካሌላናይ?
 11 አቤት ጸሳዉ!
 ኑና ኣጊዳይ ኔና ጊዲኪ?
 ኔኒ ኑ ኦላንቻታራ
 ከዚኬ ጋዳሳ።
 12 አሳ ማዶይ ሃዳ፤
 ሄሳ ጊሻሰ ኑ ሞርኬታ ቦላ
 ኑሰ ጸኖ አማ።
 13 ጸሲ ኑናራ ጊዲኮ
 ኑኒ ሞርኬታ ጸናና፤
 ኢዚ ኑ ሞርኬታ
 ባ ቶሆን ዬቆና።

109

ዳዊቲ ዛማሬታ ካቦሰ ዬጲዳ ማዛሙሬ

- 1 አቤት ታኒ ጋላቲዛ ጸሳዉ!
 ኔኒ ታሰ ጮኡ ጎፓ።
 2 ኢታቲኔ ዋርዳንቻቲ ባ ዶና
 ታ ቦላ ዶይዳ፤
 ታ ቦላካ ዋርዶ ሃሳይዳ።
 3 ኢሰቲ ኢጾ ቃላራ ታና ጊዶሊዳ፤
 ጋሶይካ ባይንዳ
 ታና ኬሂ ቆሂዳ።

- 4 ታኒ ኢሰታ ሲቂሺን
ኢሰቲ ታና ሞቲዳ፤
ጊዶ እቲን ታ ዋሳይሰ።
- 5 ታኒ ሎኦ ኦሊን
ታሰ ኢታ ዛሪዳ፤
ታ ኢሰታ ሲቂን ታና ኢጲዳ።
- 6 ኢዛ ቦላ ኢታ ዳና ሹማ፤
ኢዛ ሞቲዛይካ
ኢዛ ኡሻቻን ኤቆ።
- 7 ፒርዳሶን ኢዚ ሞራንቻ
ጊዲ ቤቶ፤
ኢዛ ዋሳይካ
ኢዛሰ ሲሚዲ ጎሜቶ!
- 8 ኢዛ ላይሊ ቃሞ፤
ኢዛ ሹሜቲላካ ሃራይ ኤኮ!
- 9 ኢዛ ናይቲ አዋ ጳይዲ ዪኦቲቶ፤
ኢዛ ማቼያካ አሞኦ ጊዲ!
- 10 ኢዛ ናይቲ ዩዩ ዩዩዲ ዋሴቶ፤
ሃኢ ባ ዲዛ ላሌቲዳ
ኬላፊካ ጎዴቲቶ!
- 11 ኢዛ አቆታ ኡባ አጮ አዋይ ላቶ፤
ኢዚ ዳቡርዲ ኬሲዳ ኡባ
አላጋይ ቦንቆ!
- 12 ኦኒካ ኢዛ ማርፖ፤
ዋይኮ ዪኦ ጊዲዳ ናይታሰ
ቃጴቲዛይ ደፖ!
- 13 ኢዛ ናይቲ ኡባይ ጳዬቶ፤
ካሊዛ ዩሌታን
ኢዛ ሱንሊ ደጌቶ።
- 14 ኢዛ አዋታ ናጋራይ
ጎዳ ሲንላን ቆፌቶ፤
ኢዛ አዬይ ናጋራይ
ሙሌካ ቁጨቶፎ!
- 15 ኢሰታ ናጋራይ
ጎዳ ሲንላን ኡባቶ ቤቶ፤
ኢሰታ አኬኪሲዛ ሚሺ

ቢታ ቦላ ደፖ።

- 16 ጋሶይካ ኢዚ ማንቂዳዳ፥
 ሜቶቲዛዴኔ
 ዋዚናይ ማዲንጲዳዳ
 ሃይቃና ጋካናስ
 ጎዲዴስ ኣቲን
 ኢዛ ማራናስ ቆፒቤና።
- 17 ኢዚ ቃንጋናስ ደሲዛ ጊሻስ
 ኢዚ ቃንጌቶ!
 ኢዚ ኣንጃናስ ደሶንታ ጊሻስ
 ኢዛፔ ሃኪዴስ!
- 18 ቃንጌላ ማይኦ ማላ ማይኢዴስ፤
 ሃላ ማላ ኢዛስ ቦላን ጌሊዴስ፤
 ዛይቲ ማላካ
 ሜቄላ ጊዶ ጌሊዴስ።
- 19 ኣፋላ ማላ ኢዛ ካሞ፤
 ሳቄ ማላ ኡባ ዋዴ
 ኢዛ ጸሳን ዴኦ!
- 20 ሃይሲ ታና ሞቲዛይታስኔ
 ታ ቦላ ኢታ ሃሳይዛይታስ
 ጎዲይ ኢሚዛ ዋይቶ ጊዶ!
- 21 ጊዶ ኣቲን ኣቤት
 ኡባፌ ቋቃ ጎዳዉ!
 ኔ ሱንላ ጊሻስ
 ታና ሎኦ ኣይፌን ጸላ፤
 ኔ ሲቆይ ሎኦ ጊዲዳ ጊሻስ
 ታና ኣሻ።
- 22 ታኒ ሂዬሳኔ ሜቶታንቻ ኣሳ፤
 ታ ዋዚናይ ማዲንጲዴስ።
- 23 ታኒ ኦማርሳ ዋዴ ኩዋ ማላ
 ጳያና ሃናይስ፤
 ቦሌ ማላካ ቆቆፌታዲስ።
- 24 ጸሚሺን ታ ጉልባቲይ ዳቡርዴስ፤
 ታ ኣሾይ ጊልቂዲ
 ሜቄላ ኣቲዴስ።
- 25 ታ ሞርኬታስ ታኒ

ቂልጪዛ ሚሽ ጊዳዲሰ፤
ኢሰቲ ታና ቤኢዲ
ባ ቆጼ ቃሌቲሰ።

26 ኣቤት ጎዳዉ ታ ጸሳዉ!

ታና ማዳ፤
ኔ ሜርና ሲቆ ማላ
ታና ኣሻ።

27 ኣቤት ጎዳዉ!

ሃይሳ ኔ ኩሼይ ኦሊዳይሳኔ
ኔኒ ፖሊዳይሳ
ታ ሞርኬቲ ኤሬቶ።

28 ኢሰቲ ታና ቃንጌቲሰ፤

ኔኒ ጊዲኮ ታና ኣንጃሳ፤
ታ ቦላ ዴንዲዛይቲ ዬላታና፤
ጊዶ ኣቲን ታኒ
ኔ ኣይሌይ ኡፋዬታና።

29 ታና ሞቲዛይቲ

ካዉሻቴሉ ማይኤቶ፤
ባንታ ዬላካ
ኩታ ማላ ቁማኤቶ።

30 ታኒ ታ ኢንጸርሳን

ጎዳ ኬሃ ጋላታና፤
ዳሮ ዴሬይ ሽቂዳ ዱላታን
ኢዛ ሳባና።

31 ጋሶይካ ኢሰታ ቦላ ሃይቆ ፒርዳ

ፒርዲዛይታፔ ኣሻናሰ
ማንቆታፔ ኡሻቻ ባጋራ
ኢዚ ኤቄሰ።

110

ዳዊቲ ማዛሙራ

1 ጎዳይ ታ ጎዳሰ፤

«ታኒ ኔ ሞርኬታ ኔ ቶሆ
ጋርሳን ዬዲሳና ጋካናሰ፤

ታ ኡሻቻን ኡታ» ጊደሰ።

- 2 ጎዳይ ኔስ ማታ ጉፌ
 ጸዮኔፔ ኪታና፤
 ኔኒካ ሞርኬታ ሃራና።
 3 ኔኒ ኔ ሞርኬታራ ኦሌቲዛ ጋላስ
 ኔ ኦላንቻቲ ባ ሸኔን
 ኔ ሚሌን ኤቃና፤
 ዋንታ ማላዶ ኣዋ ማላ
 ጌሻቴላን ጸላሼ
 ኔ ናቴቴላ ኣሳይ ኔኮ ያና።

- 4 ጎዳይ፥ «ማልኬዬዴቄ
 ቄሴቴላ ማላ
 ኔኒካ ሜርናስ ቄሴ ጊዳና»
 ጊዲ ጫቂደሰ፤
 ኢዚ ባ ቆፋ ላሚና።

- 5 ጎዳይ ኔ ኡሻቻን ዴሰ፤
 ኢዚ ባ ሃንቆ ጋላስ
 ካዋታ ቲንቹሬላና።
 6 ካዋቴላታ ቦላ ኢዚ ፒርዳና፤
 ኦላ ዋሳናታካ
 ኣሃ ጸላ ሂስታና፤
 ሳኣን ኡባን ዲዛ ካዋታ
 ኢዚ ሜንፎሬላና።
 7 ካዋዚ ኦጌ ላንቄን ዲዛ
 ሃላ ፑልቶፌ ኡዪዲ፥
 ኢዚ ባ ሁኤ ቶቄ ቶቄ ሂስታና።

111

- 1 ጎዳ ጋላቲቴ!
 ሱሬታ ሺቆኒኔ
 ዴሬ ዲላታን
 ታኒ ኩሜላ ዋዚናፔ

ጎዳ ጋላታና።

- 2 ጎዳ ኦሶቲ አይ ከና ጊታ!
ኢስታን ኡፋዬቲዛይቲ ኡባይ
ኢስቲ ዩሺ ቆፓናስ ቤሴስ።
- 3 ኢዛ ኦሶቲ ቦንቾኒኔ
ቱማን ኩሚዳይታ፤
ኢዛ ጸሎቴሴካ ሜርናስ ዴስ።
- 4 ኢዚ ባ ማላሊሲዛ ኦሶታ
ሃሳኤታና ማላ ኦሴዴስ።
ኢዚ ኪያኔ ማሪዛ ጎዳ።
- 5 ባስ ያዪዛይታስ ካል ኢሜስ፤
ባ ጫቆ ቃላካ
ሜርናስ ቆፔስ።
- 6 አላጋታ ቢታ ባ ዴራስ ኢሚዲ
ባ ሚኖ ኦሶዛ
ባ ካዎቴላ ቤሲዴስ።
- 7 ኢዛ ኦሶቲ ቱማኔ ሱሬ፤
ኢዛ ዎጋቲካ
ኡባይ አማኔቲዛይታ።
- 8 ኢስቲ ሜርናስ ኤቂ ዴኢዛይታ፤
ቱማቴላኒኔ
ሱሬቴላን ኢሜቲዳ።
- 9 ኢዚ ባ አሳስ ኦቶቴል ኢሚዴስ፤
ባ ጫቆ ቃላካ
ኢስታስ ሜርናስ አዛዚዴስ፤
ኢዛ ሱንላ ጌሺኔ ያሺሲዛዛ።
- 10 አጵ ኤራቴላስ ኮይሮይ
ጎዳስ ያሻቴላ፤
ኢዛ አዛዞ ኦሴዛይታስ
ሎኦ አኬካይ ዴስ።
ጎዳይ ሜርናስ ጋላቴቶ!

112

- 1 ጎዳይ ጋላቴቶ!
ጎዳስ ያዪዛ አሲ፥

ኢዛ አዛዞታካ ፖላናሰ
ኡፋዬቲዛ አሲ አንጃቲዳይሳ።

2 ኢዛ ናይቲ ቢታን ዋልቃማ ጊዳና፤
ሱሬ አሳታ ዩሌታይ አንጃታና።

3 አቆታይኔ ዱሬቴሲ
ኢዛ ኬላን ዳሰ፤
ኢዛ ጸሎቴላይካ
ሜርናሰ ዳኣና።

4 ኪያ፥ ቃጂቲዛኔ ጸሎ ኦሊዛ
ሱሬ አሳሰ ሉማ ጊዶን
ፖኤይ ፖኤሰ።

5 ኪያቴላን ጮ ታልኢዛ አሳሰ፥
ባ ኦሶ ሱሬቴላን ኦሊዛ
አሳሰ ዳኦይ ኢንጃታና።

6 ጸሎ አሲ አዉዴኔ ኩንዴና፤
ሜርናሰ ኢዚ ሃሳኤቲሼ ዳኣና።

7 ኢታ ሚሺ ኢዛ ዳጋንሌና፤
አይሰ ገኮ ኢዛ ዋዚናይ ሂርጌና፤
ኅዳን አማኔቴሰ።

8 ኢዛ ዋዚናይ ሚኖ፤
ሙሌካ ያዬና፤
ወርሴላን ባ ሞርኬታ
ኩንዴላ ኢዚ ቤኣና።

9 ኢዚ ሂዬሳታሰ ኪያቴላን ኢሜሰ፤
ቃሴ ኢዛ ጸሎቴላይ
ሜርናሰ ዳሰ፤
ኢዛ ካጩይ ቦንቾን
ጶቁ ጶቁ ጋና።

10 ኢታ አሲ ሄሳ ቤኢዱ ዩሎቴሰ፤
ባ ኣቻ ጋርጪሼ
ጮ ገልቂ ቆዬሰ፤
ኢታታ አሞይ ሃዳ ጊዳና።

113

1 ኅዳይ ጋላቴቶ!

- እንቴኖ ጎዳ ኦሳንቻቶ!
 ጎዳ ጋላቴቴ!
 ኢዛ ሱንላካ ሳቢቴ!
 2 ጎዳ ሱንላ ሃቺፌ
 ሜርና ጋካናስ ጋላቴቶ!
 3 ኣርሼይ ሞኪዛሶፔ ቢዲ
 ዉሊዛሶ ጋካናስካ
 ጎዳ ሱንላ ጋላቴቶ!
 4 ጎዳይ ካዎቴላታ ኡባፌ ጌታ፤
 ኢዛ ቦንቾይካ
 ሳሎታፔ ቶቃ።
 5 ጎዳ ኑ ጸሳ ማላይ ኦኔ?
 ኢዚ ቦላ ቶቃን
 ካዎቴላ ኣራታን ኡቴዴስ።
 6 ኢዚ ሳሎታኒኔ
 ሳኣን ዲዛይታ ዲጌ ዴሌስ።
 7 ኢዚ ሂዬሳ ጉድላፌ
 ቶቁ ቶቁ ሂስቴስ፤
 ሜቶታንቻካ
 ቢዲንላፌ ዴንፎስ።
 8 ሂስቴዲ ኢስታ ጌታ ኣሳታራኔ
 ዴሬ ሹሜታራ ኢሲፌ ኡቴሴስ፤
 9 ማይኔዮ ናይታ ኣዮ ኦፎስ፤
 ቦንቺዲካ ኢዚሶን
 ኢዞ ኡፋይሳን ዎፎስ፤

ጎዳይ ጋላቴቶ!

114

- 1 ኢስራኤሌ ኣሳይ
 ጌብጼ ቢታፌ ኬዚዳ ዎዴ፥
 ያቆቤ ዜሬላይ
 ኣላጋ ቃላ ሃሳይዛ ቢታፌ
 ዬጌዲ ቢዳ ዎዴ፥
 2 ዩሁዳ ኣሳይ ጸሳስ

ጌሻ እስ ጊዲዴስ፤
ኢስራኤል እሳይካ
ኢዛስ ሃሬቲዴስ።

3 ዞኦ እባይ ሄሳ ቤኢዲ ባቃቲዴስ፤
ዮርዳኖሴ ሻፋይካ
ጉዬ ሲሚዴስ።

4 ዙማቲ ቆርሾ ማላ ጉፊሬቲዳ፤
ዙምቡላቲካ
ዶርሳ ላቃ ማላ ጸኪዳ።

5 አባዞ! ኔ አይስ ባቃታዲ?
ዮርዳኖሴ ሻፋዞ!
አይስ ጉዬ ሲማዲ?

6 ኢንቴኖ ዙማቶ!
ቆርሾ ማላ አይስ ጉፒዴቲ?
ኢንቴኖ ዙምቡላቶ!
ዶርሳ ላቃ ማላ አይስ ጸኪዴቲ?

7 ሃኔ ቢታዬ! ጎዳ ሲንላን
ያቆቤ ጸሳ
ሲንላን ኮኮራ።

8 ኢዚ ዛላ ኤሌ ሃሕ ኬሲዴስ፤
ዎልቃማ ዛላ ፑልቶ ሃሕ ኬሲዴስ።

115

1 አቤት ጎዳዉ!
ኑ ጌሻስ ጊዶንታ
ኔ ሲቆ ጌሻሲኔ
ኔ እማኔቴላ ጌሻስ
ኔ ሱንላ ቦንቻ።

2 ካዎቴላቲ አይስ፥
«ኢስታ ጸሲ አዋን ዲዜ?» ጊዞ?

3 ኑ ጸሳይ ሳሎን ዴስ፤
ኢዚ ባ ዶሲዳይሳ ኡባ ኦፊስ።

- 4 ጊዶ ኣቲን ኢሰታ ኤቃ ጸሳቲ
ቢራፔኔ ዋርቃፌ
ኣሳ ኩሼን ኦሴቲዳይታ።
- 5 ኢሰታሰ ዶናይ ዳሰ ሺን
ሃሳዬቴና፤
ኣይፌይካ ዳሰ ሺን ዳሜቴና።
- 6 ኢሰታሰ ሃይላ ዳሰ ሺን ሲዬቴና፤
ሲዶይካ ዳሰ ሺን ሲንጌቴና።
- 7 ኢሰታሰ ኩሼይ ዳሰ ሺን
ቦቹቴና፤
ቶሆይካ ዳሰ ሺን
ሄሜቴቴና፤
ኢሰታ ፖራንዳይ
ጨንጉርሰ ኬሴና።
- 8 ኢሰታ ሜዲዛይቲኔ
ኢሰታን ኣማኔቲዛይቲ
ኡባይ ኢሰታ ማላ ጊዳቶ።
- 9 ኢንቴኖ ኢሰራኤሌ ኣሳቶ!
ጎዳን ኣማኔቲቲ!
ኢዚ ኢንቴሰ ጎንዳሌኔ
ኢንቴና ማዲዛይ።
- 10 ኢንቴኖ ኣሮኔ ዜሬላቶ!
ጎዳን ኣማኔቲቲ!
ኢዚ ኢንቴሰ ጎንዳሌኔ
ኢንቴና ማዲዛይ።
- 11 ኢንቴኖ ጎዳሰ ያዪዛይቶ!
ጎዳን ኣማኔቲቲ!
ኢዚ ኢንቴሰ ጎንዳሌኔ
ኢንቴና ማዲዛይ።
- 12 ጎዳይ ኦሰ ቆፔሰ፤
ኢዚ ኦና ኣንጃና፤
ኢዚ ኢሰራኤሌ ኣሳታኔ
ኣሮኔ ዜሬላታካ ኣንጃና።
- 13 ጎዳሰ ያዪዛይታ ኡባ

ጉል ጊዲን ጊታ ኢዚ አንጀና።

- 14 ጎዳይ አንቴናካ
አንቴ ናይታካ ዳሪሶ!
15 ሳሎኔ ሳኣ ሜዲዳ
ጎዳይ አንቴና አንጀ!

- 16 ሳሎቲ ጸሳሳ፤
ጊዶ አቲን ሳኣ
አሳ ናይታሰ አሚዴሰ።
17 ሃይቂዲ ዱጌ ዱፎን ጌሊዳይቲ
ጎዳ ጋላታናሰ
ዳንዳዬቴና።
18 ጊዶ አቲን ኮኒ
ሼምፖራ ፓጻ ዲዛይቲ
ሃቺፌ ዶሚዲ
ሜርና ጋካናሰ
ጎዳ ጋላታና።

ጎዳይ ጋላቴቶ!

116

- 1 ኢዚ ታ ሾባ
ዋሲዛ ዋሳ
ሲዪዳ ጊሻሰ
ታኒ ጎዳ ዶሳይሰ።
2 ኢዚ ባ ሃይል
ታኮ ዩጊዳ ጊሻሰ
ታኒ ዳኢዛ ዋዴ ኡባን
ኢዛ ጼይጋና።
3 ሃይቆይ ዋጺማዴ ማላ
ታና ዶዲ ኦይኪዴሰ፤
ዱፎን ጌሎይ ታና ሂርጊሲዴሰ።
ጨጨይኔ ኡንኦይ
ታና ቶሊ ኦይኪዴሰ።
4 ሄ ዋዴ ታኒ፥

«አቤት ጎዳው! ሃዳራ!
ታና አሻ» ጋዳ
ጎዳ ሱንሐ ያይጋዲስ።

5 ጎዳይ ኪያኔ ደሎ፤
ኑ ጸሳይ ማሪዛይሳ።

6 ጎዳይ አሽኬታ ናጌስ፤
ታኒ ሜቶቲዳ ዋዴ
ኢዚ ታና አሺዴስ።

7 ታ ሼምፖዬ አኔ ዋፑ ጋ፤
ጎዳይ ኔስ
ሎኑ ሚሽ ኦሊዴስ።

8 ጎዳይ ታና ሃይቆፔ፥
ታ አይፌ አፋንላፌ፥
ታ ቶሆካ
ቆዴፔ አሺዴስ።

9 ሄሳ ጊሻስ
ታኒ ጎዳ ሲንላን
ሼምፖራ ፓጻ ዲዛይታ
ጊዶን ሄሜታይስ።

10 ታ፥ «ታኒ ኬሃ ኡንኤታዲስ»
ጊዛ ዋዴካ
አማኖ አጋቤኬ።

11 ታስ ጊዛዚ ቆዴን፥
«አሲ ኡባይ ዋርዶ» ጋዲስ።

12 ኢዚ ታስ ኪዬዳ ኪያቴላ ጊሻስ
ታኒ ጎዳስ
አይ ቃንጸናስ ዳንዳያዚና?

13 ጎዳይ ታና አሺዳ ጊሻስ
ዋይኔ ኡሹ ጋላታስ ሺሻዳ
ኢዛ ሱንሐ ያይጋና።

14 ኢዛ ዴራ ኡባ ሲንላን
ታኒ አዲኒዳ አዲና
ጎዳስ ጋላና።

- 15 ጌሻታ ሃይቆይ
 ጎዳ ሲንፋን ቦንቾ።
- 16 አቤት ጎዳዉ! ታኒ ኔ አይሌ፤
 ታኒ ኔ አይሌይ ና፤
 ታና ቃሾፔ ቢርሻዳሳ።
- 17 አቤት ጎዳዉ!
 ታኒ ጋላታ ያርሾ ኔስ ያርሻና፤
 ሂስታዳ ኔ ሱንፋ ጸይጋና።
- 18 ኢዛ ዴራ ኡባ ሲንፋን
 ታኒ አዲኔቲዳ አዲና
 ጎዳስ ጋፋና።
- 19 ሄሳካ ታኒ ጋፋናይ፥
 ዩሩሳላሜን ዲዛ ጎዳ
 ኬፋ ዳባባና።
- ጎዳይ ጋላቴቶ!

117

- 1 ካዎቴፋቲ ኡባይ
 ጎዳ ጋላቴቴ!
 ኡባ አሳይ ኢዛ ጋላታን ሳቢቴ!
- 2 አይስ ጊኮ ኢዚ ባ ጊታ ሲቆ
 ኑና ቤሲዴስ፤
 ኢዛ አማኔቴፋይካ
 ሜርናሳ፤
- ጎዳይ ጋላቴቶ!

118

- 1 ኢዚ ኪያኔ ኢዛ ሲቆይ
 ሜርናስ ጊዲዳ ጊሻስ
 ጎዳ ጋላቴቴ!
- 2 ኢስራኤል አሳይ፥

- «ኢዛ ሲቆይ ማርናሳ» ጎ።
 3 ኣሮኔ ዜሬላቲ፥
 «ኢዛ ሲቆይ ማርናሳ» ጌቶ።
 4 ጎዳሰ ያዪዛይቲ ኡባይ፥
 «ኢዛ ሲቆይ ማርናሳ» ጌቶ።
 5 ታኒ ኡንኤቲዳ ዎዴ
 ጎዳኮ ዋሳዲሰ፤
 ሂሰቲን ኢዚ ታ ዋሶዛ ኣሊዲ
 ታና ኡንኤፌ ኬሲዴሰ።
 6 ጎዳይ ታናራ ዲዛ ጊሻሰ
 ታኒ ያዪኬ።
 ኣሲ ታና ኣይ ኦላኔ?
 7 ጎዳይ ታና ማዳናሰ
 ታናራ ዴሰ፤
 ታ ሞርኬታ ጸኔቴላ
 ታኒ ኣይፌን ቤኣና።
 8 ኣሳን ኣማኔቴላፌ
 ጎዳን ኣማኔቴላይ ሎኦ።
 9 ዳናታን ኣማኔቴላፌ
 ጎዳን ኣማኔቴላይ ሎኦ።
 10 ካዎቴላቲ ኡባይ
 ታና ዶዲዳ፤
 ጊዶ ኣቲን ጎዳ ሱንላን
 ታኒ ኢሰታ ጸናዲሰ።
 11 ኢሰቲ ታና ኡባሶራ
 ዶዲ ኦይኪዳ፤
 ጊዶ ኣቲን ጎዳ ሱንላን
 ታኒ ኢሰታ ጸናዲሰ።
 12 ኢሰቲ ታና
 ማሊ ዶዲዛ ማላ ዶዲዳ፤
 ጊዶ ኣቲን ኣጉንሳ
 ኤጺዛ ማላ
 ኤጺ ጳይዳ፤
 ጎዳ ሱንላን

ታኒ ኢስታ ጸናዲሰ።

13 ታና ሱቪን ኩንዳናስ
ጋንዲጋራዲሰ፤
ጊዶ ኣቲን ጎዳይ
ታና ማዲዴሰ።

14 ጎዳይ ታስ
ሚኖቴሴኔ ዬላ፤
ታና ኣሺዛይ ኢዛ።

15 ጸሎታ ዱንካኔ ጊዶን
ጸኖ ኢሊሊሰኔ
ኡፋይሳ ዬላ፤
«ጎዳ ኡሻቻ ኩሼይ
ዎልቃማ ሚሽ
ኦሊዴሰ!» ጊሼ ሴቴቴሰ።

16 ጎዳ ኡሻቻ ኩሼይ
ጶቁ ጶቁ ጊዴሰ!
ጎዳ ኡሻቻ ኩሼይ
ዎልቃማ ሚሽ ኦሊዴሰ።

17 ታኒ ሃይቂኬ
ሸምፖራ ፓጻ ዴኣና፤
ጎዳይ ኦሊዳ ኦሶ
ቡሮፔካ አዋጃና።

18 ጎዳይ ታና ኬሂ ቃጸይዴሰ፤
ጊዶ ኣቲን ሃይቆስ
ኦሊ ኢሚቤና።

19 ታኒ ጊዶ ጌላዳ
ጎዳ ጋላታና ማላ
ጸሎቴላ ፔንጌታ
ኣኔ ታስ ዶይቴ!
20 ሃይሲ ጎዳ ፔንጌ፤
ኢዛራ ጸሎቲ ጸላ ጌላና።
21 ኔኒ ታስ ሲዬዳ ጊሻሲኔ
ጸኖ ኢሚዳ ጊሻስ

- ታኒ ኔና ጋላታይሰ።
- 22 ጊምቢዛይቲ ካጲዲ
 ኢጲዲ ሹቻይ
 ጉላሰ ሁኤን ዋሊዛ
 ሹቻ ጊዲዴሰ።
- 23 ሃይሲካ ጎዳ ኦሶ፤
 ቃሴ ኑ ኣይፌሲካ
 ማላሊሲዛ ሚሻ።
- 24 ሃይሲ ጋላሳይ
 ጎዳይ ኦሊዲ ጋላሳ፤
 ኣኔ ኑኒ ኢዛን
 ኡፋዬቶሲኔ ኢሊሎሰ።
- 25 ኣቤት ጎዳዉ!
 ሃኢ ኑና ኣሻርኪ!
 ኣቤት ጎዳዉ!
 ሃኢ ኑሰ ኢንጄሳርኪ!
- 26 ጎዳ ሱንፋን ዪዛ ኣሲ
 ኣንጃቲዳይሳ ጊዶ!
 ኑኒ ጎዳ ኬፋን
 ኢንቴና ኣንጆሰ።
- 27 ጎዳይ ጸሳ፤
 ኢዚ ኑሰ ፖኢሲዴሰ፤
 ጨለላ ሚፋ ሃጋታ ኦይኪቴ፤
 ያርሾ ያርሺዛሶዛ ቦላ ዲዛ
 ካጩታኮ ጋካናሰ ኬዚቴ፤
 ባኣሌ ቦንቺቴ።
- 28 ኔኒ ታ ጸሳ፤
 ታኒ ኔና ጋላታና፤
 ኔኒ ታ ጸሳ፤
 ታኒ ኔና ጊታሳና።

29 ኢዚ ኪያ ጊዲዳ ገሻስ
 ጎዳ ጋላቲቴ!
 ኢዛ ሲቆይ ሜርናሳ።

119

ኣሌፌ

1 ባንታ ኦጌን ቦሬይ ባይንዳይቲኔ
 ጎዳ ዋጋ ማላ
 ሄሜቲዛይቲ ኣንጄቲዳይታ።
 2 ኢዚ ዮቲዳይሳ ኦሊዛይቲኔ
 ባ ኩሜላ ዋዚናፔ
 ኢዛ ኮይዛይቲ ኣንጄቲዳይታ።
 3 ኢስቲ ማካላ ሚሽ ኦሌቴና፤
 ጎዳ ኦጌን ሄሜቲቲስ።

4 ኔ ዋጋ ኣማኔቲዲ
 ናጋና ማላ
 ኔኒ ኑና ኣዛዛዳሳ።
 5 ኔ ዋሊዳ ዋጋ ናጋናስ
 ታ ኦጌይ ሚናና ማላ
 ታ ኣሞታይስ።
 6 ኔ ኣዛዘታ ኡባ
 ታ ሎኤላ ኣኬኪኮ
 ሙሌካ ዬላቲኬ።
 7 ኔ ጺሎ ፒርዳ ታኒ ታማርዳ ኬና
 ሱሬ ዋዚናፔ ኔና ጋላታና።
 8 ታኒ ኔ ዋሊዳ ማራታ ናጋና፤
 ታና ሙሌካ ዬሳፋ።

ቤቲ

9 ናቴሊ ባ ኦጌ ጌሻቴላን
 ዋስቲ ናጋናስ ዳንዳይዜ?
 ኔ ቃላይ ጊዛ ማላ
 ዴኢኮ ዳንዳይስ።
 10 ታኒ ታ ኩሜላ ዋዚናፔ
 ኔና ኮያይስ፤
 ኔ ኣዛዘታፔ ካሬ ኬዘንታ ማላ
 ታና ናጋ።

- 11 ታኒ ኔ ቦላ
 ናጋራ ኦሶንታ ማላ
 ኔ ቃላ ታ ዋዚናን ቆታዲሰ።
- 12 ኣቤት ጎዳዉ! ኔኒ ጋላቴታ!
 ኔ ማራ ታና ታማርሳ።
- 13 ኔ ዶናፔ ኬዚዛ ማራ ኡባ
 ታኒ ታ ኢንጸርሳን የታይሰ።
- 14 ኣሲ ባ ዱሬቴላን ኡፋዬቴዛ ማላ
 ታኒ ኔኒ ኢሚዳ ማራ
 ካላሼ ኡፋዬታይሰ።
- 15 ኔ ዋሒዳ ዋጋታ
 ዩሻ ቆፓይሰ፤
 ታ ዋዚናካ
 ኔ ኦጌታን ዋላዲሰ።
- 16 ኔ ኣዋጃይ ታና ኡፋይሴሰ፤
 ኔ ቃላካ ታኒ ዶጊኬ።

ጋሜል

- 17 ታኒ ሼምፖራ ፓጸ
 ዴኣና ማላኔ
 ኔ ቃላሰ ኣዛዜታና ማላ፥
 ታሰ ኔ ኣይሌሰ ሎኦ ሚሽ ኦላ።
- 18 ኔ ዋጋ ጊዶን ዲዛ
 ማላሊሲዛ ቱማቴላ
 ታኒ ቤኣና ማላ ታ ኣይፌ ዶያ።
- 19 ታኒ ሃ ሳኣን ኢማላ፤
 ኔ ኣዛዘታ ታፔ ጌንሶፋ።
- 20 ታ ሼምፖያ ኡባ ዋዴ
 ኔ ማራ ዴማናሰ
 ኬሃ ላሞታዲሰ።
- 21 ኔ ኣዛዞዛፔ ካሬ ኬዚዛይታ፥
 ኦቶሬቴዛይታኔ ቃንጌቴዛይታ
 ኔኒ ሴራሳ።
- 22 ታ ኔኒ የቴዲይሳ
 ናጊዳ ጊሻሰ
 ኢሰታ ጫሻኔ ካጼዛ

- ታ ቦላፌ ዲጋ።
 23 ዴሬ ካሌሊዛይቲ ኡባቲ
 ታ ቦላ ማቄቲኮካ
 ታኒ ኔ ኣይሌይ
 ኔ ኣዋጃታ ዩሻ ቆፓና።
 24 ኔ ማርካቴላቲ
 ታና ኡፋይሴቲስ፤
 ኢስቲካ ታና ዘሬቴስ።

ዳሌጾ

- 25 ታ ሼምፖይ ኬዛና ሃኔስ፤
 ኔኒ ጊዳ ቃላ ማላ ታና ኣሻ።
 26 ታኒ ታ ኦጌ ኡባ
 ኔስ ቆንጨሳዲስ፤
 ኔኒ ታስ ሲያዳሳ፤
 ኔ ኣዋጃታ ታና ታማርሳ።
 27 ኔ ማራ ታና ኣኬኪሳ፤
 ማላሊሲዛ ኔ ኦሶ
 ታ ዩሻ ቆፓና።
 28 ታ ሼምፖያ ጨጨይ
 ዳሪዳ ጊሻስ ዳቡራዲስ፤
 ኔኒ ጊዳ ቃላ ማላ ታና ሚንፋ።
 29 ባሌሊዛ ኦጌ ታፔ ሃሳ፤
 ኔ ኪያቴላን
 ኔ ዋጋ ታና ታማርሳ።
 30 ታኒ ቱማ ኦጌ ዳራዲስ፤
 ኔ ዋጋካ
 ታ ዋዚናን ዋላዲስ።
 31 ኣቤት ጎዳዉ!
 ታኒ ኔ ዮቲዳይሳ
 ሚንፋ ኦይካዲስ፤
 ኔ ታና ዬላስ ኣላ ኢሞፋ።
 32 ኔኒ ታ ዋዚና ኣሲዳ ጊሻስ
 ታኒ ኔ ኣዛዞ ኦጌን ዋጻይስ።

ሄ

- 33 ኣቤት ጎዳዉ!

- ኔ አዋጃታ ታና ታማርሳ፤
 ታኒ ወርሴላ ጋካናሰ
 ኢዛ ናጋና።
- 34 ታኒ ኔ ዋጋ ናጋና ማላኔ
 ኩሜላ ዋዚናፔ
 ኢዛሰ አዛዜታና ማላ
 ኔኒ ታሰ አኬካ አማ።
- 35 ኔ አዛዞይ ታና ኡፋይሴሰ፤
 ሄሳ ጊሻሰ ኔ ኦጌን
 ታና ካሌላ።
- 36 ታ ዋዚና ቤሶንታ ጎአሰ ጊዶንታ
 ኔ ማራ ፖላና ማላ ዛራ።
- 37 ፓሶንታ ሚሽ ጼሎንታ ማላ
 ታ አይፌታ ናጋ፤
 ኔ ቃላ ማላ ታ ዴኦ ኦራዲሳ።
- 38 ኔሰ ያያና ማላ
 ኔ ጌሊዳ ቃላ
 ታሰ ኔ አይሌዛሰ ፖላ።
- 39 ኔ ፒርዳይ ሱሬ ጊዲዳ ጊሻሰ
 ታኒ ያዪዛ ካወሻቴላፌ
 ታና ናጋ።
- 40 ታኒ ኔ ዋጋ ናጋናዉ አሞታይሰ፤
 ኔኒ ዲሎቴላን
 ታ ዴኦ ኦራዲሳ።

ዋው

- 41 አቤት ጎዳዉ!
 ኔ ሜርና ሲቆይ ታኮ ሃ ዮ፤
 ኔኒ ጊዳ ቃላ ማላ ታና አሻ።
- 42 ታኒ ኔ ቃላን አማኔታይሰ፤
 ታና ጫዪዛይታሰካ
 ታኒ ዛሮ አማና።
- 43 ታኒ ኔ ዋጋን ሂዶታ ኦላዲሰ፤
 ቱማ ቃላ
 ታ ዶናፔ ዳይሶፋ።
- 44 ታኒ ሜሪ ሜርናሰካ

- ኔ ዋጋስ ኡባ ዋዴ አዛዜታና።
 45 ታኒ ኔ ዋጋ ሲቁዛ ጊሻስ
 ላእን ሲሜሬታና።
 46 ታኒ ካዋታ ሲንላን ኤቃዳ
 ኔኒ ዮቲዳይሳ
 ዮታሼ ዬላቲኬ።
 47 ታኒ ኔ አዛዘታ ደሳይስ፤
 ኢስታንካ ኡፋዬታይስ።
 48 ታኒ ሲቁዛ ኔ አዛዘታ ቦንቻይስ፤
 ኔ አዋጃታ ዩሻ ቆጋና።

ዛይ

- 49 ኔኒ ታስ ኔ አይሌዛስ
 ኢሚዳ ቃላ ቆጋ፤
 ሄሳ ጊሻስ ታኒ ሄ ቃላን
 ሂዶታ ኦላይስ።
 50 ኔ ቃላይ ታስ ዴኦ ኢሚዴስ፤
 ሄሲ ሚቶ ዋዴ
 ታና ሚንጮስ።
 51 ኦቶራንቻቲ ታና ኬሂ ካጲዳ፤
 ጊዶ ኦቲን ታኒ
 ኔ ዋጋፔ ሹርኢ ጊኬ።
 52 አቤት ጎዳዉ!
 ቤኒሶፌ ዲዛ ኔ ዋጋ
 ታኒ ቆጋዲስ፤
 ሄሳን ታኒ ሚኔታይስ።
 53 ኢታቲ ኔ ዋጋስ አዛዜቶንታይሳ
 ቤአዳ ኬሂ ሃንቄታዲስ።
 54 ታኒ ኢማላቲላን
 ዴኢዛ ቢታን
 ኔ ዋጋይ ታስ ማዛሙሬ ጊዲዴስ።
 55 አቤት ጎዳዉ!
 ታኒ ጊዶሐ
 ኔ ሱንላ ቆጋይስ፤
 ኔ ዋጋካ ናጋይስ።
 56 ታ ኔ ዋጋስ አዛዜታና፤
 ሄሲ ታስ ኦሶ ጊዲዴስ።

ሄት

- 57 አቤት ጎዳዉ!
 ታ ቃዳይ ኔና፤
 ታኒ ኔ ቃላስ
 አዛዜታናስ ቃቻዲስ።
- 58 ታኒ ኩሜላ ዋዚናፔ
 ኔና ኮያይስ፤
 ኔኒ ጊዳ ቃላ ማላ
 ታስ ቃጼታ።
- 59 ታኒ ታ ኦጌ ጸሞሳ ጸላዲስ፤
 ኔ ማራ ካላናስ ሲማዲስ።
- 60 ታኒ ኔ አዛዘ ናጋናስ
 ኤሶታናፔ አቲን ታኪኬ።
- 61 ኢታቲ ታና ኦይካና ጌቱ ዬጊዳ፤
 ታኒ ጊዲኮ
 ኔ ዋጋ ዶጋቤኬ።
- 62 ኔ ጸሎ ዋጋ ጊሻስ ታ ኔና
 ጋላታናስ ጊዶል ዴንዳይስ።
- 63 ታኒ ኔስ ያዪዛይታ ኡባሲኔ
 ኔ ዋጋ ናጊዛይታስ ላጌ።
- 64 አቤት ጎዳዉ!
 ሳኣይ ኔ ሜርና ሲቆን ኩሚዴስ፤
 ኔ አዋጃታ ታና ታማርሳ።

ጼት

- 65 አቤት ጎዳዉ!
 ኔ ጊዳ ቃላ ማላ
 ታስ ኔ አይሌዛስ ሎኦ ኦላዳሳ።
- 66 ታኒ ኔ አዛዘታ አማናይስ፤
 ሎኦ ፒርዳኔ
 ኤራቴል ታና ታማርሳ።
- 67 ታ ቃጸዬታናፔ ካሴ
 ኔ ዋጋፔ ካሬ ኬዛዲስ፤
 ሃኢ ታኒ ኔ ቃላስ አዛዜታና።
- 68 ኔኒ ሎኦ፤ ኔ ኦሶይካ ሎኦ፤
 ሄሳ ጊሻስ ኔ አዋጃታ

ታና ታማርሳ።

- 69 ኦቶራንቻቲ ታ ሱንላ
ዋርደራ ሞሪዳ፤
ጊዶ ኦቲን ታኒ ኔ ዋጋ
ታ ኩሜላ ዋዚናፔ
ናጋይሰ።
- 70 ኢሰታ ዋዚናይ ሙሌካ ዳሚዴሰ፤
ጊዶ ኦቲን ታኒ
ኔ ዋጋን ኡፋዬታይሰ።
- 71 ታኒ ቃጸዬቲዳይሰ
ታሰ ሎኦ ጊዲዴሰ፤
ኔ ዋጋ ታማራና ማላ
ታና ማዲዴሰ።
- 72 ዳሮ ሺ ቢራፔኔ ዋርቃፌ
ኔ ዶናፔ ኬኢዳ ዋጋይ
ታሰ ኣጴሰ።

የድ

- 73 ታና ኔ ኩሺይ
ሜዲዴሰኔ ገግሲዴሰ፤
ኔ ኣዛዘ ታኒ ታማራና ማላ
ታሰ ኣኬካ ኢማ።
- 74 ታኒ ኔ ቃላ ሂዶታ ኦላዲሰ፤
ሄሳ ገሻሰ ኔሰ ያዪዛይቲ
ታና ቤኢዲ ኡፋዬቲቶ።
- 75 ኣቤት ጎዳዉ!
ኔ ፐርዳይ ጸሎ ጊዲዳይሳኔ
ኔኒ ታና ቃጸይዳይ
ኣማኔቴላን ጊዲዳይሳ
ታኒ ኤራይሰ።
- 76 ኔኒ ታሰ ኔ ኣይሌዛሰ
ጌሊዳ ቃላ ማላ
ኔ ሜርና ሲቆይ
ታና ሚንሴሉ።
- 77 ኔ ዋጋይ ታና ኡፋይሲዛ ገሻሰ
ታኒ ሸሞፖራ

- ፓጸ ዳኣና ማላ
 ታሰ ቃጂታ።
- 78 ኦቶራንቻቲ ታና ዋርዶን
 ሞቲዛ ጊሻሰ ዬላቴቶ።
 ታኒ ጊዲኮ ኔ ዋጋታ
 ዩሻ ቆፓይሰ።
- 79 ኔሰ ያዩዛይቲኔ
 ኔ ኣዛዙ ኤሪዛይቲ ኡባይ
 ሃ ታኮ ሲሜቶ።
- 80 ታኒ ዬላቶንታ ማላ
 ኔ ማራን ታ ዋዚናይ
 ቦሬይ ባይንዳዝ ጊዶ።
 ካፍ
- 81 ኔ ታና ኣሻና ማላ
 ታ ሼምፖያ ኬሃ ላሞታዱሰ፤
 ታኒካ ኔ ቃላ
 ሂዶታ ኦላዲሰ።
- 82 «ኣይዴ ታና ሚንፊላንዴሻ?»
 ጉሳን ኔ ኢሚዳ
 ሂዶታ ቃላ ታ ናጊሺን
 ታ ኣይፌይ ዶልጂሚዴሰ።
- 83 ጨዋን ካቂዳ
 ሉካሞ ማላ ጊዳዲሰ፤
 ጊዲኮካ ኔ ኣዋጃታ
 ባላቤኬ።
- 84 ታኒ ኔ ኣይሌይ
 ኣዉዴ ጋካናሰ ዳኔ?
 ታና ዬዴሊዛይታ ቦላ
 ኔኒ ኣዉዴ ፒርዳኔ?
- 85 ኔ ዋጋ ናጎንታ ኦቶራንቻቲ
 ታና ጳይሳናሰ
 ኦላ ቦኬቴሰ።
- 86 ኔ ኣዛዙቲ ኡባይ ኣማኔቲዛይታ፤
 ኣሳይ ጋሶይ ባይንዳ
 ዬዴሊዛ ጊሻሰ
 ታና ማዳ!

87 ኢስቲ ታና
 ቢታፌ ጳይሳና ጋኪዳ፤
 ጊዶ አቲን ታኒ
 ኔ ዋጋ አጋቤኬ።
 88 ኔ ሜርና ሲቆን
 ታ ዴኦ ኦራጺሳ፤
 ታኒካ ኔ አዛዞታ ናጋና።
 ላሜድ

89 አቤት ጎዳዉ!
 ኔ ቃላይ ሜርናሳ፤
 ኢዚካ ሳሎን ሚኒ ዴስ።
 90 ኔ አማኔቴላይ ዩሌታፔ
 ዩሌታ ጋካናስ ዴስ፤
 ኔኒ ሳኦስ ዮቻ ዩጋዳሳ፤
 ኢዚካ ሚኒዲ ዴስ።
 91 ኔኒ ጊዳ ማላ ኡባይካ
 ሃቕ ጋካናስ ሚኒዲ ዴስ፤
 አይስ ጊኮ ኡባቲካ
 ኔ አይሌታ።
 92 ታ ሜቶቲዳ ዋዴ
 ጳያይቻና ሺን
 ኔ ዋጋይ ታስ ኡፋይስ ጊዲዴስ።
 93 ኔ አዛዞቲ ታና ሺምፖራ
 ፓጸ ዋሐዳ ጊሻስ
 ታኒ ሙሌካ ኢስታ ዶጊኬ።
 94 ታኒ ኔሳ፤
 ታና አሻርኪ!
 ታኒ ዋጋ ናጋናዉ ኮያይስ።
 95 ኢታቲ ታና ጳይሳናዉ
 ዛማዲዲ ናጌቲስ፤
 ጊዶ አቲን ኔኒ ዮቲዳይሳ
 ታኒ ዩሻ ቆፓይስ።
 96 ፖሎ ጊዲዳ ሚሽ ኡባስ ዛዋይ
 ዲዛይሳ ታኒ ቤአዲስ፤
 ጊዶ አቲን ፖሎ ጊዲዳ
 ኔ አዛዞታስ ዛዋይ ዴና።

ሜሞ

- 97 ታኒ ኔ ዋጋ አይ ኬና ሲቃዚና!
 ጋላስ ኩሜስ
 ታኒ ኢዛ ዩሻ ቆፓይስ።
- 98 ኔ አዛዞቲ ኡባ ዋዴካ
 ታናራ ዲዛ ጊሻስ
 ታ ሞርኬታፔ አሊዲ
 ታና አኬካንቻ ሂስቲዳ።
- 99 ኔ ዋሊዳ ዋጋ
 ዩሻ ቆፒዛ ጊሻስ
 ታና ታማርሲዳ ኡባፌ
 ዋዚናማ ጊዳዲስ።
- 100 ታኒ ኔ አዛዞታ ካሊዛ ጊሻስ
 ጨማታፔ ቦላራ
 አኬኪዛ አስ ጊዳዲስ።
- 101 ታኒ ኔ ቃላስ
 አዛዜታናስ ኮይዛ ጊሻስ
 ታ ቶሆ ኢታ ኦጌ ኡባፌ ናጋዲስ።
- 102 ኔኒ ታና ታማርሲዳ ጊሻስ
 ታኒ ኔ ዋጋፔ ሹርኢ ጋቤኬ።
- 103 ኔ ቃላይ አይ ማላ ማልኢዜ!
 ኤሳ ኢሊሎፔካ አዲዲ
 ደናን ማልኤስ።
- 104 ኔ ዋጋፔ አኬካ ዴማዲስ፤
 ሄሳ ጊሻስ ታኒ
 ጌላ ኦጌ ኡባ ኢጻዲስ።
 ኖን
- 105 ኔ ቃላይ ታ ቶሆስ ጸሞፔ፤
 ታ ኦጌስካ ፖኦ።
- 106 ኔ ጸሎ ዋጋ ናጋናስ
 ታኒ ጫቂዳ ጫቆዛ ሚንላና።
- 107 አቤት ጎዳዉ!
 ታ ኬሃ ሜቶታዲስ፤
 ኔኒ ጊዳ ቃላ ማላ

- ታና ሼምፖራ ፓጸ ዋላ።
 108 አቤት ጎዳዉ!
 ታ ደናፔ ኬዚዛ
 ጋላታ ያርሾዛ
 ኔ ኤካ፤
 ኔ ዋጋ ታና ታማርሳ።
 109 ታ ሼምፖያ ኡባ ዋዴ
 ሜቶ ቦላ ዳዉሰ፤
 ታኒ ጊዲኮ ኔ ዋጋ ባለቤኬ።

- 110 ኢታቲ ታና ኦይካናሰ
 ዋጸማዴ ዋሒዳ፤
 ጊዶ አቲን ታኒ ኔ ዋጋፔ
 ሼርኢ ጋቤኬ።
 111 ኔ ኢሚዳ ዋጋይ
 ታሰ ሜርናሰ ላታ፤
 ታ ዋዚናይ ኢዛን ኡፋዬቴሰ።
 112 ታ ሃይቃና ጋካናሰ
 ኔ ኢሚዳ ኣዛዘ ፖላናሰ
 ቃላ ጌላዲሰ።

ሳምኬት

- 113 ታኒ ዋዚና ባላታ ኢጸይሰ፤
 ጊዶ አቲን ኔ ዋጋ ሲቃይሰ።
 114 ኔኒ ታሰ ጎንዳሌኔ
 ባቃታ አቲዛሰ፤
 ታኒ ኔ ቃላ ሂዶታ ኦላይሰ።
 115 ታኒ ታ ጸሳ ኣዛዘ
 ናጋና ማላ
 ኢንቴኖ ኢታ ኦሒዛይቶ!
 ታፔ ሃኪቴ!
 116 ኔኒ ጊዳ ቃላ ማላ
 ታና ካፋ፤
 ሂሰቲኮ ታኒ ሼምፖራ
 ፓጸ ዴኣና፤
 ታ ሂዶታይ ሃዳ ጊዲን
 ታና ዬላሶፓ።
 117 ኔ ታና ካፋ ኦይካ፤

ሂሰቲኮ ታ ሳሮን ዴካና፤
 ታኒ ኡባ ዋዴ
 ኔ አዋጃታ ፖላና።

118 ኔ ዋጋፔ ካሬ ኬዚዳይታ
 ኡባ ዬጋ ኣጋዳሳ፤
 ኢሰቲ ባሌሶኒኔ ዋርዶን
 ኦሊዳ ኡባይ ሃዳ ጊዳና።

119 ሳኣን ዴኢዛ ኢታታ ኡባ
 ኔኒ ቡራ ማላ ዬጋ ኣጋሳ፤
 ሄሳ ጊሻሰ ታኒ
 ኔ ኢሚዳ ኣዛዞ ደሳዲሰ።

120 ታ ኣሾይ ኔሰ ያዪዲ ኮኮሬሰ፤
 ታካ ኔ ፒርዳሰ ያያይሰ።

ኤ

121 ታኒ ሱሬኔ ዲሎ ሚሽ ኦላዲሰ፤
 ታና ኡንኤሊዛይታሰ
 ኣላ ኢሞፋ።

122 ታሰ ኔ ኣይሌዛ ሎኤቴላሰ
 ዋሴ ጊዳ፤
 ታና ኦቶራንቻታን ኡንኤሶፋ።

123 ታ ኣይፌቲ ኔ ኣሺዛይሳኔ
 ኔ ዲሎ ቃላ ናጊሼ ደልጂሚዳ።

124 ታሰ ኔ ኣይሌዛሰ
 ኔ ሲቆዛ ከና ኦላ፤
 ኔ ዋጋ ታና ታማርሳ።

125 ታኒ ኔ ኣይሌ፤
 ኔ ዋጋ ታ ኤራና ማላ
 ታሰ ኣኬካ ኢማ።

126 ኣቤት ጎዳዉ!
 ኔ ኢሚዳ ዋጋይ
 ሞሬቲሼ ዴሰ፤
 ኔኒ ፒርዳና ዋዴያ ሃኖ።

127 ታኒ ኔ ኣዛዞ
 ዋርቃፌ ኣላዳ ሲቃይሰ፤
 ሙሩታ ዋርቃፌካ

- አላዳ ደሳይሰ።
 128 ኔ ዋጋቲ ኡባይ
 ቱሙ ጊዲዲይሳ አማናዲሰ፤
 ሄሳ ጊሻሰ ጌላ ኦጌ
 ኡባ ኢጻዲሰ።

ፔ

- 129 ኔ ዮቲዳ ቃላይ ኡባይ ማላሊሴሰ፤
 ሄሳ ጊሻሰ ታ ሸምፖያ
 ኢዛ ናጋዉሰ።
 130 ኔ ቃላ ቢርሼላይ
 ፖኦ አሜሰ፤
 አኬካይ ፓጪዳይታሰ
 አኬካ አሜሰ።
 131 ታኒ ኔ ቃላ ሳሜታዲሰ፤
 ታ ዶናካ ዶያዳ ዬሞታይሰ።

- 132 ሃ ታኮ ሰማ፤
 ኔ ሱንላ ሰቂዛይታ ኡባሰ
 ኔኒ ኦሊዛይሳ ማላ
 ታሰካ ቃጵታ።
 133 ታ ሄሜታ ኔ ቃላ ማላ ሱሪሳ፤
 ናጋራይ ሃራና ማላ
 ታና አላ ኢሞፋ።
 134 ታኒ ኔ አዛዙ ናጋና ማላ
 ታና ኡንኤሊዛይታ
 ኩሼፔ ዋዛ።
 135 ታሰ ኔ አይሌዛሰ
 ኔ አይፌሶ ፖኢሳ፤
 ኔ አዋጃታ ታና ታማርሳ።
 136 ኔ ዋጋይ ቦንቹቶንታ ጊሻሰ
 ታ አፋንሴ
 ሃላ ማላ ጎጌሰ።

ጸደ

- 137 አቤት ጎዳዉ! ኔኒ ጸሎ፤
 ኔ ፒርዳይካ ሊኬ።
 138 ኔ ኢሚዳ አዛዙቲ

- ጸሎኔ አማንሊዛዛ።
 139 ታ ሞርኬቲ ኔ ቃላ ቶቺዳ፤
 ሂሰቲን ኔ ቃላ ሚሻይ
 ታ ጎሞፓን ታማ ማላ ኤጲዴሰ።
 140 ኔ ቃላይ ፓጩቲ ጌዪዳዛ፤
 ታኒ ኔ ኣይሌይ ኢዛ ሲቃይሰ።
 141 ታኒ ላፋኔ ካጼቲዳ አሳ፤
 ጌዲኮካ ታኒ ኔ ዋጋ
 ደጋቤኬ።

- 142 ኔ ጸሎቴላይ ሜርናሰ ዴሰ፤
 ኔ ዋጋይካ ቱማ።
 143 ሜቶይኔ ቱጋይ ታና ጋኪዴሰ፤
 ጌዶ አቲን ኔ አዛዞቲ
 ታና ኡፋይሴቴሰ።
 144 ኔኒ ዮቲዳይሲ ሜርናሰካ ጸሎ፤
 ታኒ ሸሞፖራ ፓጻ ዳና ማላ
 ኔ ታሰ አኬካ አማ።
 ቆፍ

- 145 አቤት ጎዳዉ!
 ታኒ ኩሜላ ዋዚናፔ
 ኔኮ ዋሳዲሰ፤
 ታና አላ።
 ታኒ ኔ አዋጃታሰ አዛዜታና።
 146 ታኒ ኔኮ ዋሳይሰ፤
 ኔ ታና አሻ፤
 ታኒ ኔ አሚዳ አዛዞዛ ናጋና።
 147 ባዞይ ዘኣንታ ዋንታራ ዴንዳዳ፤
 «ታና ማዳ» ጋዳ
 ኔኮ ዋሳይሰ፤
 ኔ ታሰ ጌሊዳ ቃላ
 ሂዶታ ኦላይሰ።
 148 ኔ ቃላ ዩሻ ቆፓሼ
 ኦማርሰ ኩሜላ አይፌ ቂጸንታ
 ኡታ አቃይሰ።
 149 አቤት ጎዳዉ!
 ኔ ሲቆ ኬና ታ ቃላ ሲያ፤

ኔ ዋጋ ማላ ታና
ሼምፖራ ፓጻ ዋላ።

150 ጌኔ ቆፒዛይቲ ታኮ ሺቂዳ፤
ሄይቲካ ኔ ዋጋፔ
ሃኪ ዲዛይታ።

151 አቤት ጎዳዉ!
ኔኒ ጊዲኮ ታ ማታን ዳሳ፤
ኔ አዛዞቲ ኡባይካ ቱማ።

152 ኔ ኢስታ ሜርናስ
ሚንሳ ኤሳዳሳ፤
ሄሳ ታኒ ቤኒፔ ደማዳ
ኔ ዋጋፔ ታማራዲስ።
ሬስ

153 ታ ቱጋ ቤያዳ ታና አሻ፤
አይስ ጊኮ ታኒ ኔ ዋጋ
ደጋቤኬ።

154 ኔ ታ ጊሻስ ሞቲታዳ
ታና ዋዛ፤
ኔ ጊዳ ቃላ ማላ
ታና ሼምፖራ ፓጻ ዋላ።

155 ኢታቲ ኔ ዋጋ ኮኖንታ ጊሻስ
ኢስታስ አቶቲሊ ዴና።

156 አቤት ጎዳዉ! ኔ ቃጴታይ ዳሮ፤
ኔ ቃላ ማላ
ታና ሼምፖራ ፓጻ ዋላ።

157 ታ ሞርኬቲኔ
ታና ዬዴሊዛይቲ ዳሮ፤
ጊዶ አቲን ታኒ
ኔ ኮቲዳ ቃላፔ
ሼርኢ ጋቤኬ።

158 ኔ አዛዞታ ናጎንታ ጊሻስ
ታ አማኔቶንታይታ
ቤያዳ ሻቲታዲስ።

159 አቤት ጎዳዉ!
ታኒ ኔ ዋጋ ደሲዛኮ ቤኣ፤

ኔ ሲቆ ማላ
 ታና ሼምፖራ ፓጸ ዋላ።
 160 ኔ ቃላ ኡባይ ቱማ፤
 ኔ ጸሎቴላ ዋጋይ ሜርናሳ።
 ሳን

161 ዴሬ ሃሪዛይቲ
 ታና ጮ ዬዴሊዳ፤
 ጊዶ ኣቲን ታ ዋዚናይ
 ኔ ቃላስ ያዬስ።
 162 ዳሮ ሚሽ ዲኢዳ ኣሲ
 ኡፋዬቲዛ ማላ
 ኔኒ ጊዳ ቃላን ታኒ ኡፋዬታይስ።
 163 ታኒ ዋርዶ ኢጸይሲኔ ሻቴታይስ፤
 ጊዶ ኣቲን ኔ ዋጋ ሲቃይስ።
 164 ኔ ጸሎ ፒርዳ ጊሻስ
 ታኒ ኔና ጋላሳን
 ላፑንቶ ጋላታይስ።

165 ኔ ዋጋ ሲቁዛይታስ
 ዳሮ ሳሮቴሊ ዴስ፤
 ኢስታ ቋጺዛ ሚሺ ዴና።
 166 ኣቤት ጎዳዉ!
 ታኒ ኔ ኣቶቴላ
 ኡፋይሳን ናጋይስ፤
 ኔ ኣዛዘታካ ፖላይስ።
 167 ታኒ ኔ ዮቲዳ ቃላ ናጋይስ፤
 ታ ኢዛ ዳሮ ሲቃይስ።
 168 ታኒ ኔ ዋጋሲኔ
 ኔ ዮቲዳ ቃላስ ኣዛዘታና፤
 ታ ኦጌ ኡባይ ኔ ሲንላን ቆንጮ።
 ታው

169 ኣቤት ጎዳዉ!
 ታ ዋሶይ ኔኮ ጋኮ፤
 ኔኒ ጊዳ ቃላ ማላ
 ታስ ኣኬካ ኢማ።
 170 ታ ሾቤሊ ፑዴ ኔ ሲንላ ጋኮ፤

- ኔኒ ጊዳ ቃላ ማላ
 ታና አሻ።
- 171 ኔ አዋጃታ ታና ታማርሳዳሳ፤
 ሄሳ ጊሻስ ታ ሜቴርሻታፔ
 ጋላታይ ፑልቴስ።
- 172 ኔ አዛዘቲ ኡባይ ጸሎ፤
 ሄሳ ጊሻስ ታ ዶናይ
 ኔ ቃላ ዬጾ።
- 173 ታኒ ኔ አዛዘታ ዶራዲስ፤
 ሄሳ ጊሻስ ኔ ኩሼይ
 ታና ማዳናስ ገገ ኡቶ።
- 174 አቤት ጎዳዉ!
 ኔ አቶቴላ ታ ላሞታይስ፤
 ኔ ዋጋይ ታና ኡፋይሴስ።
- 175 ታኒ ኔና ጋላታና ማላ
 ታና ሽሞፖራ ፓጸ ዋላ፤
 ኔ ዋጋይ ታስ ማዶ ጊዶ።
- 176 ጳይዳ ዶርሳ ማላ
 ታኒ ቶይላታዲስ፤
 ጊዶ አቲን ታኒ ኔ ዋጋ
 ባላቤኬ፤
 ሄሳ ጊሻስ ታና
 ኔ አይሌዛ ኮያ።

120

ፑዴ ኬዚሼ ዬዲዳ ማዛሙራ

- 1 ታኒ ሜቶቲዳ ዋዴ
 ጎዳ ጸይጋዲስ፤
 ኢዚካ ታስ ኮዬዴስ። *
- 2 አቤት ጎዳዉ!
 ዋርዶቲዛ ሜቴርሻታፔኔ
 ጨሚዛ አንጻርሳታፔ
 ታና አሻ።

* 120:1 ፑዴ ኬዚሼ ዬዲዳ ማዛሙራ ገዛይሲ ኢብራዊ ዴሬን አሳይ ዬሩሳሌም ቢሼ ዬዲዛ ማዛሙራ ቤሴስ።

- 3 ኢንቴኖ ዋርዳንቻቶ!
ኢዚ ኢንቴና ዋሰታኔ?
ሄሳፌ ሃራ ኢንቴ ቦላ
አይ ኦላኔ?
- 4 ኢዚ ኢንቴና ሆጾ ቶራን ጫዳና፤
ኢዚ ኢንቴና
ቦንቆ ታማን ጹጋና።
- 5 ታ ሜሼኬ ዴራ ጊዶን ዳይሰ፤
ቄዳሬ ደንካኔንካ
ኡቲዳ ጊሻሰ
ታሰ አዬ አና!
- 6 ሳርቴላ ኢጲዛ አሳታራ
ታኒ ዳር ዋዴ ዴአዲሰ።
- 7 ታኒ ሳር ኮያይሰ፤
ጊዶ አቲን ታኒ ሳር
ሃሳይዛ ዋዴ
ኢሰቲ ኦሽ ኮዬቴሰ።

121

ፑዴ ኬዚሼ ዩጲዳ ማዛሙራ

- 1 ታኒ፥ «ማደይ ታሰ
አዋፔ ያንዴሻ?» ጋዳ
ታ አይፌታ
ፑዴ ዙማታኮ ዴንፋዲሰ።
- 2 ታሰ ማደይ ሳሎኔ
ሳኦ ሜዲዳ
ጎዳፔ ዩሰ።
- 3 ኢዚ ኔ ቶሆ ሃሊጲሴና፤
ኔና ናጊዛይሲ
ዲሰኬና።
- 4 ኢሰራኤሌ ናጊዛይሲ
ሙሌካ ኢቹናኔ ዲሰኬና።
- 5 ጎዳይ ኔና ናጊዛይሳ፤
ጎዳይ ኔሰ ኡሻቻ ባጋራ
ኩዋ ጊዳና።
- 6 ጋላሳ አዋይ ኔና ጹጌና፤

አማርኛ አገናይካ ኔና ቆሄና።

- 7 ጎዳይ ኢታ ኡባፌ
ኔና ናጋና፤
ኔ ሸምፖ ሄማና።
8 ጎዳይ ኔ ቡሳኔ ዩሳ
ሃቺፌ ሜርና
ጋካናስ ናጋና።

122

- ዳዊቲ ፑዴ ኬዚሽ ዩጲዳ ማዛሙሪ
1 ኢስቲ ታና፡
«እኔ ጎዳ ኬል ቦስ» ጊን
ታኒ ኡፋዬታዲስ።
2 ሃኔ ዩሩሳሌም ካታማዬ!
ኩኒ ኔ ፔንጌታራ ጌሊዲ ኤቂዶስ።
3 ዩሩሳሌም ካታማያ
ዳንጾታ ኬጾቲዳ
ሚኖ ካታማ።
4 ኢስራኤሌስ ኢሜቲዳ ዋጋ ማላ
ኢስራኤሌ ቆሞቲ
ጎዳ ሱንል ጋላታናስ
ሄ ባና።
5 ዳዊቲ ዜሬላፌ ካዋቲዳይቲ
ፒርዳናስ ሄን ኡቲዳ።
6 ዩሩሳሌም ሳሮቴላስ፡
«ኔና ዶሲዛይቲ ኡባይ
አሻሎን ዴቶ፤
7 ኔ ጊምቤታ ጊዶን ሳሮይ ዴኦ!
ኔ ካዋቲላ ኬላን ዋፓይ ኩሞ»
ጊ ዋሲቲ፤
8 ታ ዳቦታ ጊሻሲኔ
ላጌታ ጊሻሲ
«ኔ ጊዶን ሳሮይ ዶ!» ጋይስ።
9 ጎዳ ኑ ጸሳ ኬላ
ጊሻሲ ጋዳ

ታኒ ኔሰ ሎኦ ኣሞ ታና።

123

ፑዴ ኬዚሺ ዩጺዳ ማዛሙራ

1 ኔሶ ሳሎ ኣራታን ኡቲዲሶ!

ታኒ ኔኮ ፑዴ ጸላይሰ።

2 ኣሽካራይ ባ ጎዳ ኩሺ

ጸሊዛ ማላ፤

ኣሽካራያካ ባ ጎዳቲይ

ኩሺ ጸሊዛ ማላ፤

ኑኒካ ኢዚ ኑና

ማራና ጋካናሰ

ኑ ጎዳኮ ፑዴ ጸሎሰ።

3 ኣቤት ጎዳዉ!

ኑ ቦላ ካጼይ ዳሪዳ ጊሻሰ

ማራርኪ!

ኑና ማራ።

4 ጨቄቲዛይታፔ ዳሮ ጫሺ

ኦቶራንቻታፔ ዳሮ ካጼይ

ኑና ጋኪዴሰ።

124

ዳዊቲ ፑዴ ኬዚሺ ዩጺዳ ማዛሙራ

1 ኢሰራኤሌይ፤

«ጎዳይ ኑናራ ደንታኮ

ኑ ዋናኔ?

2 ኑ ሞርኬቲ ኑ ቦላ ዴንዲዳ ዎዴ

ጎዳይ ኑናራ ባይንዳኮ፤

3 ኢሰታ ሃንቆይ ኑ ቦላ

ታማ ማላ ኤጺዳ ዎዴ

ኢሰቲ ኑና ፓጻ ሚታናሺን።

4 ሃሊ ኑና ኤኪ ባናሺን፤

ዲኦይ ኑና ሚታናሺን።

5 ኪጸ ሃሊ ኑና

ማናሺን» ጌቶ።

- 6 ኑና ኑ ሞርኬታ አቻን
ፑዚሶንታ አሺዳ
ጎዳይ ጋላቴቶ።
- 7 ኑኒ ሻንካንቻታ ናርጸፌ
ካፎይ ኬሲ ኤኪዛ ማላ
ኬሲ ኤኪዶሰ፤
ያርዴይ ዲዲዴሰ
ኑኒካ ኬሲ ኤኪዲ አቲዶሰ።
- 8 ሳሎኔ ሳኣ ሜዲዳ
ጎዳ ሱንፋን
ኑሰ ማዶይ ዩሰ።

125

- ፑዴ ኬዚሺ ዩዲዳ ማዛሙራ
- 1 ጎዳን አማኔቲዛይቲ
ሜርናሰ ቃጸንታ ዲዛ
ዲዮኔ ዙማ ማላ።
- 2 ዙማቲ ዬሩሳላሜ ካታማ
ዩሾን ዲዛ ማላ
ሃቺፌ ሜርና ጋካናሰ
ጎዳይ ባ ዴራ ዩሾን ዴሰ።
- 3 ዲሎቲ ኢታቴስ ታማርንታ ማላ
ኢታቲ ሃሪሽ
ዲሎታ ቢታን ጋሞኤቴና።
- 4 አቤት ጎዳዉ! ሎኦ አሳታሲኔ
ዎዚና ሱሬ አሳታሰ
ኔ ሎኦ ኦፋ።
- 5 ጊዶ አቲን ካሴ
ባ ጌላ ኦጌ ሲሚዛይታ
ኔኒ ኢታ ኦሊዛይታራ
ኢሲፌ ጋፋ ቃጸያ፤

ኢሰራኤሌሰ ሳሮይ ጊዶ!

126

ፑዴ ኬዚሺ ዩዲዳ ማዛሙራ

- 1 ጎዳይ ኑና ዲኤቲዳይታ
 ዛሪዲ ደኮኔ ኤሂዳ ዋዴ
 ኑስ አጉሞ ሚሳቲዴስ።
- 2 ሄ ዋዴ ኑ ዶናይ
 ሚቻን ኩሚዴስ፤
 ኑ አንጸርሲካ
 ኡፋይሳ ማዛሙሬ ዩዲዴስ፤
 ሂስቲን ካዋቴላቲ ባንታ ጊዶን፥
 «ጎዳይ ኢስታስ
 ጊታ ሚሽ ኦሊዴስ» ጊዳ።
- 3 ቱሙካ ጎዳይ
 ኑስ ጊታ ሚሽ ኦሊዴስ፤
 ኑኒካ ኬሂ ኡፋዬቲዶስ።
- 4 አቤት ጎዳዉ!
 ኔጌቤ ባዞን ኢራ ቡኪሳዳ
 ሻፋ ሃላን
 ኩንሊዛ ማላ
 ኑ ዲሳ ኦራላ።
- 5 ዩኪሼ ዜሪዳይቲ
 ኡፋይሳን ዩዲሼ ሺሻና።
- 6 ዜሬሐ ቶኪዲ ዩኪሼ ቢዳይቲ
 ሚርቄታ ቶኪዲ
 ኡፋይሳን ዩዲሼ ሲማና።

127

- ሶሎሞኔይ ፑዴ ኬዚሼ ዩዲዳ ማዛሙሬ
- 1 ጎዳይ ኬሐ ኬጾንታ
 አጊኮ ኬጸዛይቲ
 ጮ ሜላ ዳቡሬቲስ፤
 ጎዳይ ካታማ ናጎንታ አጊኮ
 ናጊዛይቲ ጮ ሜላ ዳፌቲቲስ።
- 2 ኔኒ አቆታ ዴማናስ
 ማላዶ ዋንታራ
 ዴንዳ ዋጸኮኔ
 ጊዶሐ ጋካናስ ኔ ዳቡርኮ
 ሂሲ ዉሪካ ሃዳ፤
 ጎዳይ ባ ሲቁዛይታስ

ሼምፖ አሜሰ።

3 ናይቲ ጎዳፔ አሜቲዛ አሞታታ፤
ናይቲካ ቱማፔ ኢዛ ዎይቶ።

4 አሲ ናቴላን ዲሼ
ዬሊዛ አቱማ ናይቲ
ኦላንቻ ኩሼን ዲዛ
ዪሻ ማላ።

5 ኢዛ ኮሆቲ ሄ ዪሻታን
ኩሚዳይ አንጄቲዳዴ።
ኢዚ ካታማ ፔንጌን ባ ሞርኬታራ
ማርሼቲዛ ዎዴ ሻቱሜቲና።

128

ፑዴ ኬዚሽ ዩዲዳ ማዛሙራ

1 ጎዳሰ ያዪዛይቲኔ
ኢዛ ኦጌን ሄሜቲዛይቲ
ኡባይ አንጄቲዳይታ።

2 ኔኒ ኔ ዳቡራ አይፌ ማና፤
ኔ አንጄታናኔ ኔሰ አንጄታና።

3 ኔ ማቺያ ኔሶን አይፊዛ
ዎይኔ ማላ ጊዳና፤
ኔ ናይቲካ ኔ ማዳ ዩሾን
ዎጋራ ፑቲ ማላ ጊዳና።

4 ጎዳሰ ያዪዛ አሲ
ሄሳሶ አንጄታና።

5 ጎዳይ ኔና ጸዮኔፔ አንጃ!
ኔኒ ዴኢዳ ላይሰ ኡባን
ኢዚ ኔና
ዩሩሳላሜ ሎኤቲሰ ቤሶ!

6 ኢዚ ኔና ናይታ ናይታ ጋሊ ቤሶ!

ኢሰራኤሌስ ሳሮይ ጊዶ!

129

ፑዴ ኬዚሽ ዩዲዳ ማዛሙራ

- 1 ኢሰራኤል አሳይ፥
«ሞርኬቲ ታና ዩላጋቴላፌ ዶሚዲ
ዳሮ ዋዴ ኡንኤሊዳ።
- 2 ቱማፔ ኢሰቲ ታና
ዩላጋቴላፌ ዶሚዲ
ዳሮ ዋዴ ኡንኤሊዳ፤
ጊዶ አቲን ኢሰቲ
ታና ጸኒቤቴና።
- 3 ታ ዘኮ ጹርቃፊን ሾጪ ሾጪዲ
ዋርጸፊቲዳ ጋዴ ሚሳቲሲዳ» ጎ።
- 4 ጊዶ አቲን ጎዳይ ጸሎ፤
ኢታታ ዋዶሮ ዱሴሬሊዲ
ታና ቢርሺ ዩዲዴሰ።

- 5 ጸዮኔ ኢጲዛ ኡባይ
ዩላቲዲ ጉዬ ሲሞ!
- 6 ኬላ ካራ ቦላ ሞኪዲ
ሄራካ ሚሊዛ ማታ ማላ ጊዶ!
- 7 ሄሲ ቡጪዛይታሰ
ኩሽ ኩሞንታ ማታ ማላ
ዋይኮ ሚርቂዛይታሰካ
ዳንኬ ኩሞንታ ካላ ማላ።
- 8 ሄ ኦጌራ አጲዛይቲ፥
«ጸሲ ዋልቃ ኢሞ»
ቡጪዛይቲካ፥
«ጸሲ አንጀ» ጎፔቶ።

130

ፑዴ ኬዚሽ ዩዲዳ ማዛሙራ

- 1 አቤት ጎዳዉ!
ታኒ ጪማ
ሜቶ ጊዶን ዳሽ
ኔኮ ዋሳይሰ።
- 2 አቤት ጎዳዉ!
ታ ጨንጉርሳ ሲያ፤

ታኒ ሾቢዛይሳ
ኔ ሃይላቲ ኤዝጌቶ።

3 አቤት ጎዳዉ!
ኔኒ ኑ ናጋራ
ካሌታ ካሌታ ማዘጋቢዳኮ
አቤት ጎዳዉ እኔ ኔ ሲንላን
ኤቂ ዳንዳያኔ?

4 ጊዶ አቲን ኑኒ
ኔና ቦንቻና ማላ
ኔኒ ኑ ናጋራ አቶ ጋሳ።

5 ታኒ ጎዳ ላሞታን ናጋይሰ፤
ታ ሼምፖያ
ዳንዳያን ናጋዉሰ፤
ኢዛ ቃላካ ሂዶታ ኦላዉሰ።

6 ዛቤቲ ሳኣይ አዉዴ ዎንታኔሻ
ጊዱ ናጊዛይሳፊካ ቦላ
ታኒ ጎዳ ላሞታን ናጋይሰ።

7 ጎዳ አቻን ሲቆይኔ
ማሮቴሉ ዲዛ ጊሻሰ
ኢሰራኤሌ አሳዉ!
ጎዳን ሂዶታ ኦሊቴ።

8 ኢዚ ኢሰራኤሌ አሳ
ኢሰታ ናጋራ ኡባፌ አሻና።

131

ዳዊቲ ፑዴ ኬዚሼ ዬጲዳ ማዛሙራ

1 አቤት ጎዳዉ!
ታ ዎዚናይ ኦቶሪቲቤና፤
ታኒ ኦቶሮን ጾላ ኤሪኬ፤
ታ ቆፋን ቤሶንታ
ጌታቴላሰ አሞታቤኬ፤
ታ ዎልቃፌ ቦላራ
ዛራዳቤኬ።

- 2 ጳጳስ ዱዲዳ ናይ
 ባ ኣዪ ኪኦን
 ጮኡ ጊ ኡቲዛ ማላ፥
 ታ ሸምፖያ
 ታ ጊደን ጮኡኔ
 ዋፑ ጋደሰ።

- 3 ኢሰራኤል ኣሳዉ!
 ሃቺፌ ደሚዲ
 ሜርና ጋካናሰ ጎዳን
 ሂደታ ኦሊቴ።

132

ፑዴ ኬዚሽ ዩዲዳ ማዛሙራ

- 1 ኣቤት ጎዳዉ!
 ዳዊቴኔ ኢዚ ዳንዳይዳ
 ሜቶዛ ኡባ ኔ ቆፓ።
- 2 ጎዳዉ! ኢዚ ኔሰ ጮቂዳ ቃላ፥
 ዋልቃማ ያቆቤ ጸሳሰካ
 ኣዲኔቲዳ ኣዲና ቆፓ።
- 3 ኢዚካ፥ «ሃይሳፌ ሲንላን
 ታኒ ታሶ ጌሊኬ፤
 ታ ሂጸንካ ኬዚኬ፤
- 4 ጳሰኮካ ጳሰኪኬ፤
 ታ ኣይፌታካ ሊጲኬ።
- 5 ሄሲካ ታኒ ጎዳሰ ዱሳሶ፥
 ዋልቃማ ያቆቤ ጸሳሰ
 ኣቆሶ ጊጊሳና
 ጋካናሳ» ጊደሰ።
- 6 ሄኮ ኑኒ ታቦታዛ ጊሻሰ
 ኤፍራታን ዲሽ ሲዪደሰ፤
 ቂሪያቴ-ዪኣሪሜ ቢታን
 ኢዛ ዳሚደሰ።
- 7 ኑኒ፥ «ኣኔ ኢዚ ዱዛሶ ቦሰ፤
 ኢዛ ቶሆይ ዩጳዛሶን
 ጉፋኒዱ ኢዛሰ ጎይኖሰ።

- 8 «አቤት ጎዳዉ! ዴንዳ!
 ኔ ሚኖቴላሰ
 ማላታ ጊዲዳ ታቦታራ
 ኔ ኬላ ጌላዳ ሸምፓ።
- 9 ኔ ቄሴቲ ጸሎቴላ ማይኤቶ፤
 ጌሽ ጊዲዳ
 ኔ አሳቲ ኢሊሌቶ» ጊዶስ።
- 10 ኔ አይሌ ዳዊቴ ጊሻሰ ጋዳ
 ኔኒ ቲይዳይሳ ዬጎፋ።
- 11 ጎዳይ ዳዊቴሰ
 ቃንጻፌ ጫቂዴሰ፤
 ለማቶንታ ቃላን፥
 «ኔ ናይታፔ አሳ ታኒ
 ኔ አራታን ኡቲሳና።
- 12 ኔ ናይቲ ታ ጫቆ ቃላኔ
 ታኒ ታማርሲዳ ቃላ
 ኢሰቲ ናጊኮ
 ኢሰታ ናይቲካ
 ኔ ካዋቴላ አራታን
 ማርናሰ ኡታና» ጊ ጫቂዴሰ።
- 13 ጎዳይ ጸዮኖ ዶሪዴሰ፤
 ባሰ ዴኢዛሶ
 ኦላናሰ አሞቲዲ፥
- 14 «ሃና ታሰ ማርናሰ
 ሸምፖሶ ጊዳና፤
 ታኒ ኢዞ ዶሲዳ ጊሻሰ
 ኢዚን ዴኣና።
- 15 ታኒ ኢዞ ኬሃ አንጃና፤
 ኢዚን ዴኢዛ ማንቆታካ
 ካላ ካልሳና።
- 16 ታኒ ኢዚን ዲዛ ቄሴታ
 አቶቴላ ማይዛና፤
 ኢዚን ዴኢዛ ጸሳ አሳቲካ
 ኡፋይሳን ዬጸና።

- 17 «ሃ ሶሆን ዳዊቴ ዜሬላፌ
ካዎ ኬሳና፤
ታኒ ቲይዳይሳስ ፖኑ ገቢሳና።
- 18 ታኒ ኢዛ ሞርኬታ ዩላቻና፤
ገደ ኣቲን ኢዛ ሁኣን ዴኢዛ
ካዎቴላ ካላቻይ ጸላና» ገዴሰ።

133

- ዳዊት ፑዴ ኬዚሽ ዩጲዳ ማዛሙራ
- 1 ኢሻንቲ ኢሲፌቴላን ዴኢዛይሲ
ኣይ ማላ ሎኦኔ
ኣይ ማላ ኡፋይሲዛዜ!
- 2 ሄሲ ኣሮኔ ሁኡን ቲጊን
ቡቻራ ቢዲ
ኢዛ ማይኦ
ማጫራ ጋካናሰ ጎጊዲ
ሳዎ ቱኑ ገዛ ኣልኦ ዛይቴ ማላ።
- 3 ቃሴካ ሄርሞኔ ዙማታፔ
ዱጌ ጲዮኔ ዙሞቡላታ ቦላ
ጸኪዛ ጸዛ ማላ፤
ጎዳይ ሄሳን ኣንጆኔ
ዴኦ ሜርናሰ ኣዛዚዴሰ።

134

- ፑዴ ኬዚሽ ዩጲዳ ማዛሙራ
- 1 ኢንቴኖ ጎዳ ኣይሌቶ!
ጎዳ ኬላን ኦማርሰ ኦሲዛይቶ!
ኡባይካ ሃ ዩዲ
ጎዳ ጋላቲቴ።
- 2 ጸሳ ኬላን
ኢንቴ ኩሽ ዴንሊዲ
ጎዳ ጋላቲቴ።
- 3 ሳሎኔ ሳኦ ሜጲዳ ጎዳይ
ኢንቴና ጲዮኔፔ ኣንጆ።

135

- 1 ኢንቴኖ ጎዳ አይሌቶ!
ኢዛ ጋላቲቴ!
ጎዳ ሱንላ ሳቢቴ!
- 2 ኢንቴኖ ጎዳ ኬላን
ኦሊዛይቶ!
ኢንቴኖ ኑ ጸሳ ኬላ ዛጎን
ኤቂዳይቶ ጋላቲቴ!
- 3 ኢዚ ኪያ ጊዲዳ ጊሻስ
ጎዳ ጋላቲቴ!
ኢዚ ሎኦ ጊዲዳ ጊሻስ
ኢዛ ሱንላስ ዩጺቴ!
- 4 ጎዳይ ያቆቤ
ባስ ቡዞ ኦሊዴስ፤
ኢስራኤሌካ ባስ
ኣልኦ ሚሽ ሂስቲ ዶሪዴስ።
- 5 ጎዳይ ጊታ ጊዲዳይሳኔ
ኑ ጎዳይ ጸሳታ ኡባፌ
ጽቂዛይሳ ታኒ ኤራይስ።
- 6 ሳሎኒኔ ሳኣን፥
ኣባታኒኔ ጨማታ
ኡባ ጊዶንካ
ጎዳይ ባ ዶሲዳይሳ
ኡባ ኦሴስ።
- 7 ካሬላ ሻራ ሳኣ ጋጻፔ
ኢዚ ዴንሴስ፤
ኢዚ ኢራራ ዋልቃንሐ ኪቴስ፤
ባ ሚንጂ ዋሊዳሶፔ
ጫርኮ ኬሲ ዩዴስ።
- 8 ጊብጾ ቢታን ኣሳፔ ቢዲ
ማሄ ጋካናስ
ባይራ ዩሌቲዳ ኡባ ዋዲዴስ።
- 9 ኔኖ ጊብጾ! ፓርኔ ቦላኔ
ኢዛ ኦሳንቻታ ቦላ
ኦራሊኔ ማላሊሲዛ

- ሚሽ ዬዲዴስ።
 10 ኢዚ ዳር ካዎቱላታ ቋይሲዴስ፤
 ዋልቃማ ካዎታካ ዋዲዴስ።
 11 አሞሬታ ካዎ ሲሆኔ፥
 ባሳኔ ካዎ አጌኔ
 ካናኔ ካዎታ ኡባ ዋዲዴስ።
 12 ኢስታ ቢታካ ባ ዴራ
 ኢስራኤል ላቲሲዴስ።
 13 አቤት ጎዳዉ!
 ኔ ሱንሊ ሜርናስ ዳና፤
 ዬሌታፔ ዬሌታ ጋካናስ
 ኔኒ ሃሳኤታና።
 14 ጎዳይ ባ አሳስ ፒርዳና፤
 ኢዚ ባ አይሌታስካ ቃዴታና።
 15 ካዎቱላቲ ጎይኒዛ
 ኤቃ ጸሳቲ
 ቢራፔኔ ዋርቃፌ
 አሳ ኩሼን አሴቲዳይታ።
 16 ኢስታስ ዶናይ ዴስ ሺን
 ሃሳዬቴና፤
 አይፌይ ዴስ ሺን ጸሌቴና።
 17 ሃይሊ ዴስ ሺን ሲዬቴና፤
 ኢስታ ሲዴን ፔኖይካ ዴና።
 18 ኢስታ ሜዲዳይቲኔ
 ኢስታን አማኔቲዛይቲ ኡባይ
 ኢስታ ማላ ጊዴቶ።
 19 ኢስራኤል ዴሬዘ!
 ጎዳ ጋላቲቴ፤
 አሮኔ ኬላ አሳቶ!
 ጎዳ ሳቢቴ፤
 20 ሌዌ ኬላ አሳቶ!
 ጎዳ ጋላቲቴ፤
 ጎዳስ ያዪዛይቶ!
 ኡባይ ጎዳ ጋላቲቴ።
 21 ዬሩሳሌምን ዴኢዛ ጎዳይ
 ጸሊዮኔን ጋላቲቶ!

ኅዳይ ጋላቴቶ!

136

ኤድን ዩዲዳ ጋላታ ማዛሙሪ

1 ኅዳ ጋላቴቴ! ኢዚ ኪያ፤

ኢዛ ሲቆይ ሜርናሳ።

2 ጸሳታ ጸሳ ጋላቴቴ!

ኢዛ ሲቆይ ሜርናሳ።

3 ኅዳ ጋላቴቴ!

ኢዛ ሲቆይ ሜርናሳ።

4 ኢዚ ጸላ ጌታ ማላሊሲዛ

ሚሽ ኦፊስ፤

ኢዛ ሲቆይ ሜርናሳ።

5 ባ ሂላቴላን

ሳሎታ ሜዲዴስ፤

ኢዛ ሲቆይ ሜርናሳ።

6 ቢታ ሃላ ቦላን ሚጨዴስ፤

ኢዛ ሲቆይ ሜርናሳ።

7 ጌታ ፖኦታ ሜዲዴስ፤

ኢዛ ሲቆይ ሜርናሳ።

8 ኣርጄይ ጋላስ

ፖኣና ማላ ኦፊዴስ፤

ኢዛ ሲቆይ ሜርናሳ።

9 ኣጊናይኔ ጸሊንቴቲ

ኦማርስ ፖኢሳና ማላ

ኦፊዴስ፤

ኢዛ ሲቆይ ሜርናሳ።

10 ኢዚ ጌብጾ ቢታን

ባይራታ ዋዲዴስ፤

ኢዛ ሲቆይ ሜርናሳ።

11 ኢሰራኤል ኣሳ ጌብጾፔ

ካሌላ ኬሲዴስ፤

136:1 1ታሪ 16:34፤ 2ታሪ 5:13፤ 7:3፤ ኢዝ 3:11፤ ማዛ 100:5፤ 106:1፤ 107:1፤
 118:1፤ ኤር 33:11 **136:5** ሜዴ 1:1 **136:6** ሜዴ 1:2 **136:9** ሜዴ
 1:16 **136:10** ኬሳ 12:29

- ኢዛ ሲቆይ መርናሳ።
 12 ባ መኖ ኩሼኒኔ
 ባ ዋልቃማ ቄሴን
 ሃይሳ ኦሊዴሰ፤
 ኢዛ ሲቆይ መርናሳ።
 13 ዞኦ ኣባ ሻኪ ዩጊዴሰ፤
 ኢዛ ሲቆይ መርናሳ።
 14 ኢሰራኤሌ ኣሳ
 ሄ ኣባ ጊደራ ፒንሊዴሰ፤
 ኢዛ ሲቆይ መርናሳ።
 15 ጊብጾ ካዎኔ ኢዛ ኦላንቻታ
 ዞኦ ኣባን መቲሲዴሰ፤
 ኢዛ ሲቆይ መርናሳ።
 16 ኢዚ ባ ኣሳ ባዘራ ካሌሊዴሰ፤
 ኢዛ ሲቆይ መርናሳ።
 17 ጊታ ካዎታ ሾጨዴሰ፤
 ኢዛ ሲቆይ መርናሳ።
 18 ዋልቃማ ካዎታ ዋዲዴሰ፤
 ኢዛ ሲቆይ መርናሳ።
 19 ኣሞሬታ ካዎዛ
 ሲሆኔ ዋዲዴሰ፤
 ኢዛ ሲቆይ መርናሳ።
 20 ቃሴ ባሳኔ ካዎዛ
 ኣጌ ዋዲዴሰ፤
 ኢዛ ሲቆይ መርናሳ።
 21 ሂሰቲዲ ኢሰታ ቢታ
 ባ ኣሳ ላቲሲዴሰ፤
 ኢዛ ሲቆይ መርናሳ።
 22 ባ ኣይሌ ኢሰራኤሌ ላቲሲዴሰ፤
 ኢዛ ሲቆይ መርናሳ።
 23 ኦኒ ካዉዪዳ ዋዲ
 ኢዚ ኦኒ ቆፒዴሰ፤
 ኢዛ ሲቆይ መርናሳ።

- 24 ኑና ኑ ሞርኬታፔ አሺዴሰ፤
ኢዛ ሲቆይ ሜርናሳ።
- 25 ሜዴታ ኡባሰ ሚዛዝ ኢሜሰ፤
ኢዛ ሲቆይ ሜርናሳ።
- 26 ሳሎ ጸሳ ጋላቲቱ!
ኢዛ ሲቆይ ሜርናሳ።

137

- 1 ባቢሎኔ ሻፋታ
ላንቄን ኡቲዲ
ኑኒ ጸዮኔ ቆፒዳ ዋዴ
ዬኪዶሰ።
- 2 ሄን ኑኒ ኑ ዲላታ
ሃላ ማታን ዲጨዛ
ሚላታ ቦላ ካቂዶሰ።
- 3 ኑና ዲኢዳ አሳቲ ኑኒ ዬጲዲ
ኢሰታ ኡፋይሳና ማላ፥
«ጸዮኔ ዬላፌ ኢሳ
አኔ ኑሰ ዬጲቲ» ጊዳ።
- 4 ጎዳ ማዛሙሬ ኑኒ አላጋ ቢታን
ዋሰቲ ዬጸኒ?
- 5 ዬሩሳላሜ ካታማዬ!
ታኒ ኔና ባሊኮ
ታ ኡሻቻ ኩሼይ
ባ ኦሶ ባሎ።
- 6 ታኒ ኔና ሃሳኦንታ አጊኮ
ታ ኡፋይሳ ኡባፌ አላዳ
ዬሩሳላሜ ዶሶንታ አጊኮ
ታ ኢንጻርሳይ
ጎንጊራላራ ኦይኬቶ።
- 7 አቤት ጎዳዉ!
ዬሩሳላሜይ ኩንዲዛ ጋላሰ
ኤዶሜ አሳቲ
ኦሊዲይሳ ቆፓ፤
ኢሰቲ፥ «ላሊቲ! ላሊቲ!

የቻፌ ዶቃሊ ዳይሲቴ!»
ጊዳይሳ ባሎ።

- 8 ሃኔ ባቢሎኔ ቢታዬ
ኔ ዳያና!
ኔኒ ኑ ቦላ ፖሊዳ ኢታ ኦሶ
ኔ ቦላ ዛሪ ኦሊዛይ
እንጃቲዳይሳ።
- 9 ኔ ጉላ ናይታ ኦይኪዲ
ዛላ ቦላ ዲንጩሬሊዛይ
እንጃቲዳይሳ።

138

ዳዊቱ ማዛመሬ

- 1 አቤት ጎዳዉ!
ታኒ ታ ኩሜላ ዎዚናፔ
ኔና ጋላታይሰ፤
ጸሳታ ሲንላን ኔና ሳባይሰ።
- 2 ኔ ጌሻ ኬላኮ ሲማዳ
ኔና ጎይናይሰ፤
ኔ ሲቆ ጊሻሲኔ
ኔ አማኔቴላ ጊሻሰ
ታኒ ኔ ሱንላ ሳባይሰ፤
ኔኒ ኔ ሱንላኔ ኔ ቃላ
ኡባፌ አላዳ
ዶቁ ሂስታዳሳ።
- 3 ታኒ ጸይጊዳ ጋላሰ ታሰ ኮያዳሳ፤
ኔ ሚኖቴላን
ታና ሚንሌላ።
- 4 አቤት ጎዳዉ!
ሳኣን ዲዛ ካዎቲ ኡባይ
ኔ ዶናፔ ኬኢዳ ቃላ ሲዪዲ
ኔና ጋላቴቶ!
- 5 ጎዳ ቦንቾይ
ጊታ ጊዲዳ ጊሻሰ

ኢስቲ ኢዚ ኦሊዳ
 ኦሶ ጊሻሰ ዩጾቶ።
 6 ጎዳይ ቦላ ቶቃን ዲኮካ
 ሂዩሳታ ሎኦ ኣይፌን ያሌሰ፤
 ጊዶ ኣቲን ኦቶራንቻታ
 ኢዚ ሃሆፔ ኤሬሰ።

7 ታኒ ሜቶ ጊዶን ዲኮካ
 ኔኒ ታና ናጋሳ፤
 ታ ሞርኬታ ሃንቆ ቦላ
 ኔ ቄሴ ዴንፋሳ፤
 ኔ ኡሻቻ ኩሼን
 ታና ኣሻሳ።

8 ጎዳይ ታሰ ቆፒዳይሳ ፖላና፤
 ኣቤት ጎዳዉ!
 ኔ ሲቆይ ሜርናሳ፤
 ኔ ኩሼ ኦሶ ዬጋ ኣጎፋ።

139

ዳዊቲ ዛማሬታ ካቦስ ዩጲዳ ማዛሙሬ

1 ኣቤት ጎዳዉ!
 ኔኒ ታና ፒልጋ ኤራዳሳ።
 2 ታኒ ኣዉዴ ኡቲዛኮኔ
 ኣዉዴ ኡቂዛኮ ኔኒ ኤራሳ፤
 ኔኒ ታ ቆፋ ኡባ
 ሃኮፔ ኣኬካሳ።
 3 ታኒ ቢዛሶኔ
 ሼምፒዛሶ ጸሞሳሳ፤
 ታ ኦጌታ ኡባ ኔኒ ኤራሳ።
 4 ኣቤት ጎዳዉ!
 ታኒ ታ ዶናፔ ኢሲ ቃላካ
 ሃሳያናፔ ካሴታዳ
 ኔኒ ታ ቆፋ ኡባ ኤራሳ።

5 ኔኒ ታ ዩሾ ኡባን ዳሳ፤
 ኔ ኩሼዛን ታና ናጋሳ።

6 ኔ ኤራቴሳይ

ታና ኬሂፔ ማላሊሴስ፤
 ታኒ ኣኬካናስ
 ዳንዳይዛይሳፌካ ቋቄስ።

- 7 ታኒ ኔ ኣያናፔ
 ኣዋ ባናስ ዳንዳያዚና?
 ዋይኮ ኔ ሲንላፌ
 ኣዋ ባቃታናስ ዳንዳያዚና?
 8 ፑዴ ሳሎ ኬኢኮ
 ኔኒ ሄን ዳሳ!
 ዲጌ ሲኦሌ ዋዲኮካ
 ኔኒ ሄን ዳሳ።
 9 ኣርሼይ ሞኪዛሶ ባጋ
 ፓላ ቢኮ፥
 ዋይኮ ኣርሼይ ዉሊዛሶ ባጋ
 ሃካ ቢኮ፥
 10 ታና ሄን ኔ ኩሼይ ካሌሌስ፤
 ኔ ኡሻቻ ኩሼይካ
 ታና ሚንሒ ኦይኬስ።

- 11 ታኒ፥ «ዱማዘ!
 ታና ጌንላ፤
 ፖኦዘ! ታ ዩሾን
 ዱማ» ጌኮ፥
 12 ዱማይ ኔና ዴሎ ዲጌና፤
 ኦማርሲ ኔስ
 ጋላሳ ማላ ፖኤስ፤
 ዱማይኔ ፖኦይ ኔስ ኢሲ ማላ።

- 13 ኔኒ ታ ኣሳቱላ
 ኡባ ሜዳዳሳ፤
 ታ ኣዬይ ኡሎንካ
 ታና ቲላ ሜዳዳሳ።
 14 ኔኒ ታና ኬሂ ዬጋልሒኔ
 ማላሊሲዛዝ ሂስታ
 ሜዲዳ ጊሻስ
 ታ ኔና ጋላታይስ፤
 ኔ ኦሶቲ ማላሊሲዛይታ!

- ታ ሸምፖያ
 ሄሳ ኡባ ኤራዉሰ።
 15 ታኒ ገማሶን ሜዴቲዳ ዋዴ
 ታ ሜቄላቲ
 ኔፔ ገሚቤቲና፤
 ታኒ ታ አዩይ ኡሎን ጨማ ጊዶን
 ሂላን አሴቲዛ ዋዴ፤
 16 ታ አዪ ኡሎን ቡሮ ሱሐ ጊዳ
 ታ ዲሺን ኔ አይፌቲ ቤኢዳ፤
 ታ ላይላታፔ ኢሶይኔ
 ደሜቶንታ ዲሺን
 ታሰ ኔኒ ባሪዳ ጋላሳቲ ኡባይ
 ኔ ማዘጋባን ጸፌቲዳ።
- 17 አቤት ጸሳዉ!
 ኔ ታሰ ቆፒዛ ቆፋይ
 አይ ማላ ሎኦ!
 ኢዚካ አይ ኩና ጮራ!
 18 ታኒ ኢዛ ቆዲኮ አጩፔካ ዳሮ፤
 ታ ኢቻ ቤጊዛ ዋዴ
 ሃኢካ ኔናራ ዴኣይሰ።
- 19 አቤት ጸሳዉ!
 ኔኒ ኢታታ ሲፊዳኮ አዜ ዲዛይ!
 ሱሐ ጉሳና ሳሜቲዛ አሳቲ
 ታፔ ሃኪቲ!
 20 ኢሰቲ ኔ ቦላ
 ኢታ ሚሽ ሃሳዬቲሰ፤
 ኔ ሞርኬቲ
 ኔ ሱንሳ ሞሬቲሰ።
- 21 አቤት ጎዳዉ!
 ኔና ኢጺዛይታ
 ታኒ ኢጺኪና?
 ኔ ቦላ ዴንዲዛይታ
 ታኒ ሃራሴቲኪና?
 22 ታ ኢሰታ ሙሌራ ኢጸይሰ፤
 ኢሰታ ታኒ
 ታ ሞርኬታ ማላ ቆዳይሰ።

- 23 አቤት ጸሳው!
 ታ ዋዚና ፒልጋዳ ኤራ፤
 ታና ፓጫዳ ታ ጨጨፎ ቆፋካ
 ሻካ ኤራ።
- 24 አኔ ታናን ኢታይ ዴኢኮ ጾላ፤
 ሂሰታዳ ሜርና ኦጌራ
 ታና ካሌላ።

140

- ዳዊቲ ዛማሬታ ካቦስ ዩጲዳ ማዛሙራ
- 1 አቤት ጎዳው!
 ኢታ አሳታፔ ታና አሻ፤
 ማካላንቻታፔካ
 ታና ናጋ።
- 2 ኢሰቲ ኡባ ዋዴ
 ኢታ ኦፋናስ ማቄቲቲስ፤
 ኡባ ጋላሲካ
 ኦሽ ዴንፋናስ
 ዮኦ ፒቄቲስ።
- 3 ኢሰቲ ሃሶ ሾሻ ማላ
 ኢንጻርስ ቃራሴቲስ፤
 ኢሰታ ዶናፔ ጎፔ ማርዜ ማላ
 ቃላይ ኬዜስ።
- 4 አቤት ጎዳው!
 ኢታ አሳታ ኩሼፔ ታና አሻ፤
 ታ ቶሆ ቃጸናስ ቆፒዛ
 ማካላንቻታፔካ
 ታና ናጋ።
- 5 ኦቶራንቻቲ ታስ
 ዋጺማዴ ዋሊዳ፤
 ጌቲ ጊግሲዳ፤
 ታ ኦጌንካ ዲዛ ዋሊዳ።
- 6 ታኒ ጎዳ፥
 «ኔኒ ታ ጸሳ» ጋይስ።

- አቤት ጎዳዉ!
 ታኒ ሾቢዛይሳ ሲያ።
 7 አቤት ኡባፌ ዋልቃማ ጎዳዉ!
 ታና አሺዛ ሚኖዞ!
 ኦላ ጋላስ ታስ ጎንዳሌ ጊዳዳሳ!
 8 አቤት ጎዳዉ!
 ኢታታ አሞይ ፖሌቶፎ፤
 ኢስታ ቆፋይ
 ፖሌታና ማላ ኦሶፋ!
 9 ታ ሞርኬታን ታና ጸኒሶፓ፤
 ኢስቲ ቆፒዳ ኢታ ቆፋይ
 ኢስታ ሁኤን ጸጾቶ።
 10 ኢስታ ቦላ ታማ ቦንቆይ ቆሌቶ፤
 ኢስቲ ታማን ኦሌቴቶ፤
 ሲሚ ኬዛናስ ዳንዳዮንታ
 ኦላን ኩንዴቶ።
 11 ኢታ ሃሳይዛይታ ቢታይ ቶኮፎ፤
 ማካላንቻታ
 ኢታ ሚሺ ኦይኮ።
 12 ጎዳይ ሂዬሳታስ ፒርዲዛይሳኔ
 ሜቶታንቻታስ
 ሞቴቲዛይሳ ታ ኤራይስ።
 13 ዲሎቲ ቱሙፔ
 ኔ ሱንላ ጋላታና፤
 ሱሬቲካ ኔ ሲንላን ዴኣና።

141

ዳዊቱ ማዛሙራ

- 1 አቤት ጎዳዉ!
 ታኒ ኔና ጾይጋይስ፤
 ታና ማዳናስ ኤሌላ።
 ታኒ ኔኮ ዋሲዛ ዋዴ
 ታ ዋሶ ሲያ!
 2 ታ ዋሳይ ኤጳኔ ጨዋ ማላ
 ኔ ሲንሐ ሺቆ፤

ታኒ ታ ኩሼዛ ሚጨዛይሲ
ኔሰ ኦማርሳ ዋዴ
ያርሾ ማላ ጊዶ።

3 ኣቤት ጎዳዉ!
ታ ዶና ናጋናሰ
ዛቤ ዋላ፤
ታ ሜቴርሻታ ፔንጌን
ናጊዛይሳ ኤሳ።

4 ሞሮ ኦሲዛ ኣሳታራ
ኢታ ኦሶ ኦሶንታ ማላ
ታ ዋዚና ኢታኮ ዛርፓ፤
ኢሰታ ጊቢራካ ታና ሚዘፓ።

5 ዲሎ ኣሲ ታና ቃጸዮ፤
ሄሲካ ታሰ ሎኦ፤
ኢዚ ታና ሴሪኮ
ሄሲ ታ ሁኤን
ዛይቲ ቲዪዛ ማላ፤
ሄሳካ ታ ኢዲኬ፤
ጊዶ ኣቲን ታኒ ኡባቶካ
ኢታ ኣሳታ ኦሶ ቦላ ዋሳይሰ።

6 ኢሰታ ዶናቲ
ኣፎራ ዱጌ ኦሌቲዛ ዋዴ
ታ ቃላይ ቱማ ጊዱዳይሳ
ኢሰቲ ኤራና።

7 ጋዴይ ጎዬቲዛ ማላኔ
ጳሼይ ሊቂዛ ማላ
ኢሰታ ሜቄሲካ
ዱፎ ዶናን ላሌታና።

8 ኣቤት ጎዳዉ፥
ኡባፌ ዋልቃማ ጸሳዉ!
ታ ኣይፌይ ኔና ዴሌሰ፤
ታ ዜምፖይ ኔና፤
ታና ሃይቆሰ ኣላዳ ኢሞፋ።

9 ኢሰቲ ታሰ ዋሲዳ

- ዎጸማዴፔኔ
ኢታ ኦሊዛይታ ጊቴፔ
ታና ናጋ።
10 ታ ሳሮ ኣጲሺን
ኢሰቲ ባንቲ ዎሊዳ
ጊቴዛን ኦይኬቴቶ።

142

- ጎንጎሎ ጊደን ዲዛ ዎዴ ዳዊቲ ኣኬካን ዩዲዳ ማዛሙራ
- 1 ታ ቃላ ቶቁ ሂስታዳ
ታኒ ጎዳኮ ዋሳይሰ።
ጎዳፔ ማሮቴል ዋሳይሰ።
- 2 ታ ቆሆዛ ኡባ ኢዛሰ ማጋናይሰ፤
ታ ሜቶ ኡባ ኢዛሰ ዮታይሰ።
- 3 ታኒ ዳቡርዳ ዎዴ
ኔኒ ታ ኦጌ ኤራሳ፤
ታ ሄሜቲዛ ኦጌን
ታና ኦይካናሰ
ዎጸማዴ ዎሊዳ።
- 4 ታኒ ታ ዩሾ
ሲማ ጸሊዛ ዎዴ
ታና ማዳናይ ኦኒካ ዴና፤
ታ ባቃታ ኣታናሶይካ ዴና፤
ታ ሼምፖይሰ ዉዴቲዛ
ኣሲካ ዴና።
- 5 ኣቤት ጎዳዉ!
ኔ ታና ማዳና ማላ
ታ ኔኮ ዋሳይሰ፤
ታ ዜምፖይ ኔና፤
ታ ሼምፖራ ፓጻ ዲሺን
ታ ቃዳይ ኔና።
- 6 ታኒ ኬሂፔ
ሂዶታ ቃንጺዳ ጊሻሰ
ኔ ታ ዋሶ ሲያ!
ታና ጎዲዛይቲ
ታፔ ዎልቃቲዳ ጊሻሰ

- ታና አሻ።
 7 ታኒ ኔ ሱንላ ጋላታና ማላ
 ታና ቃሾፔ ቢርሻ።
 ኔኒ ታሰ ሎኦ ጊዲዳ ጊሻሰ
 ጸሎቲ ታ ዩሾን ሺቃና።

143

ዳዊቲ ማዛመራ

- 1 አቤት ጎዳዉ!
 ታ ዋሳ ሲያ፤
 ታ ሾቢዛይሳ ኤዘጋ፤
 ኔኒ ጸሎኔ
 አማኔቲዛይሳ
 ጊዲዳ ጊሻሰ
 ታሰ ዛሮ ኢማ።
 2 ኔ ሲንላን ጸሎ ጊዳና ኣሲ
 ኦኒካ ዳና፤
 ታና ኔ ኣይሌዛ
 ፒርዳሰ ሺሾፋ።
 3 ታ ሃይቃና ጋካናሰ
 ታ ሞርኬቲ ታና ዩዴሊዳ፤
 ታና ዲርጸዲ
 ቢታ ጋርሰ ጌልሊዳ፤
 ካሴ ሃይቂዳ ኣሳታ ማላካ
 ታና ጁማን ዋሊዳ።
 4 ሄሳ ጊሻሰ ታኒ ዳቡራዲሰ፤
 ታ ዋዚናይካ ሂደታ ቃንጸዴሰ።
 5 ታኒ ቤኒ ዋዴታ ሃሳኣይሰ፤
 ኔኒ ኦሊዳ ኦሶ ኡባ
 ዩሻ ቆፓይሰ፤
 ኔ ኩሼ ኦሶታካ ኣኬካይሰ።
 6 ታኒ ታ ኩሼዛ ኔኮ ሚጫይሰ፤
 ሚላ ቢታይ ሃሐ ኮይዛ ማላ

ታ ሸምፖና ኔና ሳሜታዲስ።

7 አቤት ጎዳዉ!

ታኒ ዳቡራዲስ፤
ኔ ታስ ዛሮ ኢማናስ ኤሌላ!
ታኒ ሃይቂዳ አሳታሶ
ዱጌ ዱፎን ጌሎንታ ማላ
ኔ ሲንሳ ታፔ ጌንሶፋ።

8 ታኒ ኔና አማኔቲዛ ጊሻስ
ማላዶ ማላዶ ኔ ሲቆ
ታና ቤሳ፤
ታኒ ታ ሸምፖ ኔስ ሃዳራዲስ፤
ሄሳ ጊሻስ ታ ባና ኦጌ
ታና ታማርሳ።

9 አቤት ጎዳዉ!

ታ ኔ ጋርሳን ቆቴታዲስ፤
ታና ታ ሞርኬታፔ አሻ።

10 ኔኒ ታ ጸሳ፤
ታኒ ኔ ሸኔ ፖላና ማላ
ታና ታማርሳ፤
ኔ ሎኦ አያናይ
ታና ሱሬ ኦጌ ካሌሶ።

11 አቤት ጎዳዉ!

ኔ ሱንሳ ጊሻስ
ታና አሻ፤
ኔ ዲሎቴላን
ታና ሜቶፔ ኬሳ።

12 ኔ ታና ሲቂዛ ጊሻስ
ታ ሞርኬታ ሱፑ ሂስታ ዎቶ፤
ታና ኔ አይሌዛ ኡንኤሊዛይታ
ዲፒ ሂስታ ቶይሳ።

144

ዳዊቲ ማዛሙራ

1 ታ ኩሼታ ኦላስ።

- ታ ቢራጄታካ
 ጸንጌላሰ
 ሎሂሲዳ ጎዳይ
 ታ ዛላይ ጋላቴቶ!
 2 ኢዚ ታና ሲቁዛኔ
 ጌንሉዛ ጸሳ፤
 ኢዚ ታሰ ሚጸኔ
 ታና ኣሺዛይሳ፤
 ኢዚ ታ ጎንዳሌኔ
 ታኒ ባቃታዳ ኣቲዛሶ፤
 ካዎቴላታካ
 ኢዚ ታሰ ሃሪሲዛይሳ።
- 3 ኣቤት ጎዳዉ!
 ኔ ሃይሳ ሲሬ ቦንቻናሰ
 ኣሲ ኣዜ?
 ኔ ሃይሳሶ ኣሳሰ ቆፓናዉ
 ኣሳ ናይ ኣዜ?
 4 ኣሲ ኢሲቶ ጫርኪ ኣጲዛ
 ጫርኮ ማላ፤
 ኢዛ ላይላቲካ
 ኤሶን ጳይዛ ኩዋ ማላ።
- 5 ኣቤት ጎዳዉ!
 ኔኒ ሳላ ደካዳ
 ዱጌ ዋጳ!
 ዙማታ ቦቻዳ ጨዋሳ!
 6 ዋልቃንሐ ዬዳዳ
 ኔ ሞርኬታ ላላ!
 ኔ ዋንዳፌ ዪሻን
 ዱካዳ ዬዴላ!
 7 ቦላፌ ኔ ኩሼ ዬዳዳ፥
 ታና ዋልቃማ ሃላፌ
 ጎቻ ኬሳ፤
 ኣላጋ ኣሳታ ኩሼፔ
 ኔ ታና ኣሻ።
 8 ኢሰታ ዶናይ ዋርዶ ሃሳዬሰ፤

ኢስቲ ኡሻቻ ኩሼ ዴንሉዲ
ዋርዶ ጫቄቴስ።

9 እቤት ጸሳዉ!

ታኒ ኔስ ኦራላ
ማዛመሬ ዬጸና፤
ታሙ ሻያን ዋጾቲዳ ዲላን
ኔስ ዬጸና።

10 ካዎታስ ጸኖ ኢማሳ፤
ኔ አይሌ ዳዊቴ ጊላ
ማሻፌ አሻሳ።

11 ዋርዶ ሃሳይዛይታፔኔ
ባ ኡሻቻ ኩሼ ዴንሉዲ
ዋርዶ ጫቄዛይታፔኔ
አላጋታፔ ታና አሻኔ ናጋ።

12 ኑ አቱማ ናይቲ
ባ ናቴቴላን ዳልቂዳልቂዲ
ዲጨዛ ሚላ ማላ ጊዴቶ!
ኑ ማጫ ናይቲካ
ካዎ ኬላ ጉላን
አሌቆስ ኤሲዳ
ቴቄ ማላ ጊዴቶ።

13 ኑ ጎታራታን ዱማ ዱማ
ቆሞ ካሊ ኩሞ፤
ኑ ዶርሳቲ ሺ ላቃ
ጋካናስ ዬሌቶ፤
ሄማቲዛሶን ታሙ ሺ
ጋካናዉ ዳሬቶ።

14 ኑ ሚዛቲ ዬሊዛይታ ጊዴቶ፤
ኢስቲ አዉጫዮንታ
ዬሌቲዲ ጮራቴቶ።
ኑና አሲ ዲኦፖ፤
ኑ ዛጎን ዋሶይ ሲዬቶፎ።

15 ሃ አንጃይ ኢዛ ጋኪዛ ዴሬይ
አንጃቲዳ ዴሬ፤

ጸሲ ኢዛስ ጎዳ ጊዲዳ ዳሬይ
እንጃቲዳ ዳሬ።

145

ዳዊቲ ዬጲዳ ጋላታ ማዛሙራ

- 1 እቤት ታ ካዎ ጸሳዉ!
ታኒ ኔና
ጶቁ ጶቁ ሂስታና፤
ኔ ሱንላ
ሜርናስካ ጋላታና።
- 2 ታኒ ኔና ኡባ ጋላስ ሳባና፤
ኔ ሱንላካ
ሜርናስ ጋላታና።
- 3 ጎዳይ ጊታ፤
ጊታ ጋላታይ ኢዛስ ቤሴስ፤
ኢዛ ጊታቴላይ
እሳ ቆፋፔ ቦላ።
- 4 ኢሲ ዬሌታይ ካሊዛ ዬሌታስ
ኔ ኦሊዳ ኦሶ ዮቴስ፤
ማላሊሲዛ ኔ ኦሶታካ
ቆንጨሳና።
- 5 ኢስቲ ኔ ቦንቾኔ
ኔ ጊታ ቴማ ሃሳያና፤
ታኒካ ማላሊሲዛ ኔ ኦሶዛ
ዛራ ዛራ ቆፓና።
- 6 አሳይ ማላሊሲዛ ኔ ኦሶዛ
ጊታቴላ ጊሻስ
ሃሳዬታና፤
ታኒካ ኔ ጊታቴላ አዋጃና።
- 7 ኢስቲ ኔ ኪያቴላ ዳሮዛ ዮታና፤
ኔ ጲሎቴላ
ኡፋይሳን ዬጻና።
- 8 ጎዳይ ቃጵቲዛይሳኔ
ማሪዛይሳ፤
ኢዚ ሃንቄታናስ
ኤሶቶንታይሳኔ

- ሲቆይ ኩሚዳይሳ።
 9 ጎዳይ ኡባሰ ኪያ፤
 ኢዚ ባ ሜዲዳ
 ኡባሰ ቃጮቲዛይሳ።
- 10 ኣቤት ጎዳዉ!
 ሜዴታ ኡባይ ኔና ጋላታና፤
 ኔ ዴሬይ ኡባይካ
 ኔና ሳባና።
- 11 ኢሰቲ ኔ ካዎቴላ
 ቦንቾ ጊሻሰ ሃሳያና፤
 ኔ ዎልቃ ጊሻሰ ዮታና።
- 12 ሄሳን ኔ ዎልቃማ ኦሶታኔ
 ኔ ካዎቴላ
 ቴማ ቦንቾዛ
 ኢሰቲ ኤሪሳና።
- 13 ዬሌታፔ ዬሌታ ጋካናሰ
 ኔ ሃራና፤
 ኔ ካዎቴላይ ሜርናሳ።
- ጎዳይ ባ ጊዳ ቃላን
 ኣማኔቲዛይሳ፤
 ኢዚ ባ ኦሶ ኡባን ኪያ።
- 14 ጎዳይ ጋንዲጋርዛይታ ካፌሰ፤
 ኩንዲዳይታካ ዴንፌሰ።
- 15 ኡባ ኣይፌይ ኔኮ ዶሌሰ፤
 ኢሰታሰ ኮሺዛ ዎዴን
 ኔኒ ኢሰታሰ ቁማ ኢማሳ።
- 16 ኔኒ ኔ ኩሼ ሚጫዳ
 ሼምፖራ ፓጳ ዲዛ ኡባ
 ኣሞ ኩንላሳ።
- 17 ጎዳይ ባ ኦጌ ኡባን ጸሎ፤
 ኢዚ ባ ኦሶ ኡባን ኪያ።
- 18 ጎዳይ ባና ዴይጊዛይታሰ
 ኡባሰ ማታ፤
 ዎዚናፔ ዴይጊዛ ኡባሰ
 ማታን ዴሰ።

- 19 ኢዚ ባሰ ያዪዛ ኡባሰ
 ኣሞ ኩንፊሰ።
 ቃሴ ኢዚ ኢሰታ ዋሶዛ ሲዪዲ
 ኢሰታ ኣሼሰ።
- 20 ጎዳይ ባና ሲቂዛይታ
 ኡባ ናጌሰ፤
 ጌዶ ኣቲን ኢታታ
 ኡባ ዳይሳና።
- 21 ታኒ ታ ዶናን ጎዳ ጋላታና።
 ሜዴታ ኡባይ
 ኢዛ ጌሻ ሱንፋ
 ሜሪ ሜርናሰ ጋላቶ!

146

- ኣሺዛ ጸሓሰ ሺቂዳ ጋላታ
- 1 ጎዳይ ጋላቱቶ!
 ታ ሺምፖዬ፥
 ጎዳ ጋላታ!
- 2 ታ ዴኦ ላይላ ኡባን
 ታኒ ጎዳ ጋላታና፤
 ታኒ ሺምፖራ ፓጻ ዲዛ ዎዴ
 ኡባን ታ ጸሓ ሳባና።
- 3 ዴሪ ኣይሲዛይታን ኣማኔቶፍቴ፤
 ኣሰ ኣሻናዉ ዳንዳዮንታ
 ኣሾ ማይኢዳ
 ሜዴታታን ጨቂቶፍቴ።
- 4 ኢሰታ ሺምፖይ ኬዚዛ ዎዴ
 ኢሰቲ ቢታን ሲማና፤
 ኢሰታ ሃልቾይ ኡባይ
 ሄ ጋላሰ ኣታና።
- 5 ያቆቤ ጸሓይ ማዲዛ ኣሲ
 ባ ሂዶታካ ባ ጎዳ ቦላ
 ዎሒዳ ኣሲ ኣንጄቲዳዴ።
- 6 ጎዳይ ሳሎኔ ሳኣ፥

- ጌታ አባኔ አሰታ
 ጌደን ዲዛ ኡባ
 ሜዲዳይሳ፤
 ኢዚ ባ አማኔቴላ
 ሜርናሰ ናጊዛይሳ።
 7 ኢዚ ቆሄቲዳይታሰ ፒርዲዛይሳ፤
 ጋፊዳይታ ሚዚ ካልሲዛይሳ።

- ጎዳይ ቃሽቲዳይታ
 ቢርሺ ዬዲዛይሳ፤
 8 ጎዳይ ቆቄታ ጸሊሴሰ።
 ጎዳይ ኩንዲዳይታ ዴንፊሰ፤
 ጎዳይ ጸሎታካ ሰቆሰ።
 9 ጎዳይ ቤቴ አሳታ ናጌሰ።
 አምኤታኔ ዪኦ ናይታ ማዴሰ፤
 ጌደ አቲን ኢታታ ኦጌ ዳይሴሰ።

- 10 ጎዳይ ሜርናሰ ካዎ፤
 ጸዮኔ! ኔ ጸሲ
 ዬሌታፔ ዬሌታ ጋካናሰ
 ካዎታና።

ጎዳይ ጋላቴቶ!

147

- 1 ጎዳይ ጋላቴቶ!
 ኑ ጸሳ ዬላን ሳቦይ
 አይ ማላ ሎኦ!
 ኢዛ ጋላቲዛይሲ ኡፋይሴሰ፤
 ሄሲካ ኢዛሰ ቤሴሰ።
 2 ጎዳይ ዬሩሳላሜ ኦራዲሳና፤
 ኢሰራኤሌፔ ቤቲዳይታካ
 ሺሻና።
 3 ዎዚናይ ሜቁዳይታ ኢዚ ኮሌሰ፤
 ኢሰታ ማዴንሳካ
 ኢዚ ፓሌሰ።

4 ኢዚ ሳሎ ጸሊንቴታ ቆዳ ኤሬሰ፤
 ኢሳ ኢሳ ኢዛ ሱንላን
 ሱንላን ጸይጌሰ።

5 ኑ ጎዳይ ጊታ፤
 ኢዚ ኬሂፔ ዋልቃማ፤
 ኢዛ ኤራቴላሰ ዛዋይ ዳና።

6 ጎዳይ ካዴቲዳይታ ቦንቹሰ፤
 ጊዶ ኣቲን ኢታታ ካዉሼሰ።

7 ጎዳሰ ጋላታ ማዛሙሬ ዩጲቴ፤
 ኑ ጸሳሰ ማሲንቆ
 ሾጪሼ ጋላቲቴ።

8 ኢዚ ሳሎ ሻራ ማይዜሰ፤
 ሳኣሰ ኢራ ቡኪሴሰ፤
 ዙማታ ቦላካ ማታ ሞኪሴሰ።

9 ሜዶሳሲኔ ቁሮ ዩሎታሰ
 ሚዛ ሚሽ ኢዚ ኢሜሰ።

10 ኢዚ ኡፋዬቲዛይ
 ፓራታ ዋልቃኒኔ
 ቶራንቻታ
 ሚኖቴላን ጊዳና።

11 ጎዳይ ባሰ ያዩዛይታኒኔ
 ኢዛ ሲቆን
 ኣማኔቲዛይታን ኡፋዬቴሰ።

12 ዩሩሳላሜ ካታማዬ!
 ጎዳ ጋላታ!
 ሃኔ ጸዮኔ! ኔ ጸሳ ሳባ!

13 ኢዚ ኔ ፔንጌ ኮላታ ሚንፌሰ፤
 ኔ ጊዶን ዲዛ ኔ ናይታ ኣንጄሰ።

14 ኢዚ ኔ ዛዋ ሳሮቴላን ናጌሰ፤
 ኔና ኬሂፔ ሎኢዛ
 ጌሰቴ ካልሴሰ።

15 ኢዚ ባ ኪታ ሳኣሰ ኪቴሰ፤
 ኢዛ ቃላይካ ኤሶን ጋኬሰ።

16 ኢዚ ሻቕ ኣፋላ ማላ ሚጨሰ፤

- ከንቸካ ቢዲንላ ማላ
ላሌሰ።
- 17 ኢዚ ሻቶ ሹቻ ማላ
ዲጌ ዬዳና፤
ሄ ሞጮዛን ኤቃናሰ
እኒኔ ዳንዳዬና።
- 18 ኢዚ ባ ቃላ ከቲዲ
ሻቻ ማዪሌሰ።
ኢዚ ጫርኮ ጫርኪሲን
ሃላ ጎጌሰ።
- 19 ኢዚ ባ ቃላ ያቆቤ ዜሬላሰ
ባ ማራኔ ዋጋ
ኢሰራኤሌ ኣሳሰ ቆንጨሲሰ።
- 20 ኢዚ ሄሳ ማላ
ሃራ ካዋቲላታሰ
ኦሊቤና፤
ኢሰቲ ኢዛ ዋጋ ኤሬቴና።
- ጎዳይ ጋላቴቶ!

148

- 1 ጎዳይ ጋላቴቶ!
- ሳሎን ዴኢዛይቶ! ጎዳ ጋላቴቴ፤
ቦላ ቶቃን ዴኢዛይቶ!
ኢዛ ሳቢቴ።
- 2 ኢንቴኖ ኢዛ ከታንቻቶ!
ኡባይ ኢዛ ጋላቴቴ፤
ሳሎን ዴኢዛ ኢዛ ኦላንቻቶ!
ኡባይ ኢዛ ጋላቴቴ።
- 3 ኣርጄይኔ ኣጊናይ ኢዛ ጋላቴቴ፤
ፖኢሲዛ ጸለንቴቶ!
ኡባይ ኢዛ ጋላቴቴ።
- 4 ኢንቴኖ ኡባፌ ቦላ ቶቃን
ዲዛ ሳሎቶ! ኢዛ ጋላቴቴ፤
ሳሎ ጉፋንሶፌ ቦላራ ዲዛ
ሃላቶ! ኢዛ ሳቢቴ።

- 5 ኢዚ ኣዛዚን ኢስቲ ኡባይካ
 ሜዴቲዳ ጊሻስ
 ኡባቲ ጎዳ
 ሱንሳ ጋላቴቶ!
- 6 ኢዚ ኢስታ ኢስቲ ዲዛሶን
 ሜሪ ሜርናስ
 ሚንሴ ዋሴዴስ፤
 ኢዚ ኢስታስ ላሜቶንታ
 ዋጋ ኢሚዴስ።
- 7 ሳኣን ዴኢዛይቶ! ጎዳ ጋላቴቲ!
 ኣባ ጊደን ዲዛ
 ጊታ ሜዴቴላቴኔ
 ዋጋ ጊታ ኣባ ጨማቲ
 ኡባይካ ኢዛ ሳቢቴ።
- 8 ዋልቃንሴኔ ሻቺ፥
 ኬንቾይኔ ጉባናይ፥
 ኢዛ ኣዛዞ ፖሊዛ ጎቴ ጫርኮቲ
 ኡባቲካ ኢዛ ጋላቴቴ።
- 9 ዙማቶ፥ ዙምቡላቶ፥
 ኣይፌ ኣይፊዛ ሚላቶ፥
 ዚጋቶ ኡባቲካ ኢዛ ጋላቴቴ።
- 10 ሜሄቶ፥ ደኣቶ፥
 ሳኣራ ጎሼቲዛ ሜዴታቶ!
 ፓሊዛ ካፎቶ ኡባቲካ
 ኢዛ ጋላቴቴ።
- 11 ሳኣ ካዎቶ፥ ካዎቴላቶ!
 ዳናቶ፥ ዴሬ ሃሪዛይቶ!
 ኡባቲካ ኢዛ ጋላቴቴ።
- 12 ፓንላቶ፥ ጌላኦቶ፥
 ጨማቶ፥ ናይቶ!
 ኡባቲካ ኢዛ ጋላቴቴ።
- 13 ኢዛ ሱንሴ ኡባ ቦላ ቶቃ፤
 ኢዛ ቦንቾይ
 ሳኣፔኔ ሳሎፔ ቦላ፤
 ሄሳ ጊሻስ ሃይቲ ኡባይ
 ኢዛ ሱንሳ ጋላቴቶ።

- 14 ኢዛ ባጋ ጊዲዲ ኢሰራኤል አሳቲ
 ኢዛ ጋላታና ማላ
 ኢዚ ኢስታ ካጩ ኬሲዴሰ።
- ኅዳይ ጋላቲቶ!

149

- 1 ኅዳይ ጋላቲቶ!
 ኅዳሰ ኦራላ
 ማዛሙራ ዩዲቲ!
 ጌሻታ ሺቆሶን ኢዛሰ
 ጋላታ ማዛሙራ ዩዲቲ!
- 2 ኢሰራኤል አሳቲ
 ባና ሜዲዳይሳን
 ኡፋዬቲቶ፤
 ዲዮኔ አሳቲ ባ ካዎዛን
 ኬሂፔ ኡፋዬቲቶ።
- 3 ዱሪሼ ካራቤ ባቂሼኔ
 ዲሐ ዲዲሼ ኢዛ ሱንሐ ሳቤቶ።
- 4 ኅዳይ ባ አሳን ኡፋዬቲሰ፤
 አሽኬታ አሺዲ
 ቦንቾን ፑላሴሰ።
- 5 ሄ ፑላቲላን ጸሳ አሳቲ
 ኡፋይሳን ዩዴቶ፤
 ጋዴይ ዋንታና ጋካናሰ
 ኢሊሊሼ ዩዴቶ።
- 6 ኢስታ ዶናን ጸሳ ጋላታይ፥
 ኢስታ ኩሼንካ
 ቃራ ጊላ ማሻይ ዴኦ።
- 7 ኢስቲ ሄሳን ካዎቲላታ ቦላ
 ሃሎ ኬሳና፤
 አሳካ ቃጸያና።
- 8 ኢስታ ካዎታ ሳንሳላታን፥
 ኢስታ ኦላ ቃራታካ
 ቢራታን ቃቻና።

9 ሄሳን ኢስታ ቦላ
 ጸፊቲዳ ፒርዳ ፖሊዲ
 ጸሳ አሳቲ ጸናና።

ኅዳይ ጋላቲቶ!

150

1 ኅዳይ ጋላቲቶ!

ጸሳ ኢዛ ኬላን ጋላቲቲ፤
 ኢዛ ዋልቃይ ዲዛ
 ሳሎ ጉፋንሶን
 ኢዛ ጋላቲቲ።

2 ኢዚ ኦሊዳ
 ዋልቃማ ኦሶታ ጊሻስ
 ኢዛ ጋላቲቲ፤
 ኢዚ ኬሂ ጊታ ጊዲዳ ጊሻስ
 ኢዛ ጋላቲቲ!

3 ዛዬን ኢዛ ጋላቲቲ፤
 ባጋናኒኔ ማሲንቆን
 ኢዛ ጋላቲቲ።

4 ካራቤ ባቂሼኔ ዱሪሼ
 ኢዛ ጋላቲቲ፤
 ታሙ ሻያን ዋጾቲዳ
 ዲላኒኔ
 ሱሱልኤን ኢዛ ሳቢቲ።

5 ዳላ ቃሊሼ ኢዛ ጋላቲቲ፤
 ዳላ ሾጪሼ ኢዛ ጋላቲቲ።

6 ሼምፖራ ፓጻ ዲዛ ኡባይ
 ኅዳ ጋላቲቲ!

ኅዳይ ጋላቲቶ!

ጌሻ ማጻፋ

Gamo: ጌሻ ማጻፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b